

Doctissimo Bacchalario Beltrano Tri-
stano, Grammaticę in suo Collegio profes-
sori, Alfonsus Torres Turricula-
nus. S. P. D.



Impportunis à me precibus
efflagitasti, doctissime Bel-
trane, ut quādo amplissimi
huius Diui Isidori Colle-
gij patronus essem, tenerer
q̃ ex cura moderationis mi-
hi iniūcta, publicis scholasti-
corum emolumentis & ra-
tionibus consulere, breues quosdam in quartum Ne-
brissensis commentarios conficerem : quibus putida
illa, ne dicam barbara, quorundam Grammaticorū
præcepta ex nostra schola in sua sterquilinia rele-
gantur, & tenera puerorū ætas à tam graui anno-
tationum mole, onerosis questionibus libera, ad ger-
manam eloquentiam, Romani sermonis uenustatem,
politiores deinceps Musas formaretur. Quæ tua
petitio tantum mihi honestatis habere uisa est, ut
post multam ac diuturnam consultationē, quæ meū
animum in uarias sententias distrahebat, non dubita-
uerim rem immensi laboris & difficultatis plenam
intentare, & seuerissimam iudiciorū aleam subire,
ne tam honestis desiderijs, & tam propense in com-
munem utilitatem uoluntati restitisse, aut aliquo pa-
cto uiderer repugnasse. Volui summa quadā accura-
tione, tam ueterū quā recentiorum libros de Grā-
maticis

maticis præceptis conscriptos: alij, tanta uerborum
luxuria redundantes, tanta præceptionū turba &
multitudine referti, ut non ad rectam puerorum in-
formationem, sed ad perniciē potius, & ingeniorū
corruptelam excogitati uideantur. Alij tam breues
& compendiarij, ut nihil dixisse præstitisset, quā
pauca illa profunda quadā caligine & cimmerijs te-
nebris inuoluta. Ego uerò, qui in his humanitatis
studijs iam pridem uersatus sum, cum ex assiduo pu-
blicè legendi usu, & frequenti experimēto didicis-
sem, mediocritatem in rebus omnibus, sed potissimū
in tradendis documentis solere ab uniuerfis scholasti-
corum ordinibus commendari, in ea re diligentius
insudaui, ne his nostris commentarijs aut nimium pro-
lixa, aut nimium breuia præcepta continerentur: ne
aut nimia rerum copia puerorū animi obruerētur,
aut nimia inopia & orationis ieiunitate, in labyrin-
thos ducerentur inexplicabiles. Eos igitur medio-
cri quodam stylo compositos, qualem scilicet pueri-
lis illa ætas requirebat, tibi offero humanissime Bel-
trane: quos si ea, qua soles omnia nostra, humanita-
te exceperis, si ea qua soles, cura & animi intentio-
ne uersaueris, inuenies (nisi meam opinionem fallit
amor) non tantum inde posse discipulis tuis, sed pu-
blicis etiam ac priuatis totius Hispaniæ gymnasijs
plurimū utilitatis accrescere. Bene uale Com-
pluti, anno à die Christi natali millesimo
quingentesimo sexagesimo. Ad Cal.

Novembris.

I
MAGISTRI HIERONY-
mi Ficaei Toletani, in doctissimi Magi-
stri Alfonsi Torres authoris commē-
dationem, Dialogismus inter
emptorem & bibliopolā,
Alloquitur Bi-
bliopola.

:::

B, Dic bone quid quaris inuenis, fors peruenis emp

E, Nunquid habes aliquid bibliopola noui, tum?

B. Et tibi quod placeat. E. quod nā. B. perdiscere par

Vt possis Latiam tempore Grammaticam. (uo
E. Pol bene, sed vetuse est, Laudat sua munera cerdo.

B. Lando, nec in laudes vtilitate feror.

Ipsa quidem vulgi vox hoc testatur, id ipsum

Audui doctos dicere saepe viros.

E. Ne vulgo, ne crede, aliter ridebere: nanque]

Ludicra multifidus dicta popellus amat.

Adde, quod assidue nulla ratione mouetur:

Quaque prius dictis extulit, illa premit.

E. Non verbis opus est, vbi res lucefcit: at istum

Porge mihi librum venditor. Beccelubens.

E. Quis fecit? B: quis? Pteridum lingueque Latina

Gloria: qui Latias nuper adauxit opes.

Hic est, quem nostri moderantem frana theatri

Fama est aeternum promeruisse decus.

Hic est qui latias iuuenes depromere voces

Edocet, hic Græca est fons genialis aqua.

Hic est, quem Musa proprijs aluere papillis,

Atque vlitum sophias edocuere nouem.

B

*Hic est (Et breuiter dicam) quem suspicit orbis,
Torres. E. ingenium quale mihi memoras?
Venditur at quanti liber hic? B. mercede pusilla
Et credo satis forte minore tuis.*

E. At quanti? B. si scire cupis tibi dixero ad aurem.

E. Si solet hictanti vendier, en pretium.

*Vales tibi fiat libri bone compater. B. Et tu
Enoluas latis hunc precor auspicijs.*

*EIVSDEM IN COMMENDATIO-
nem operis, carmen.*

*Dum quibus hoc numeris lector studiose volumē,
Sensa quod in spatio continet ima breui,
Laudarem, foret in dubio, quasque vberē vena
Effundit passim prodigus author opes.
Attitit ecce mihi Phœbus, dixitq; subinde,
Ne dubites, istud stulte manebit opus.
Humanę non vocis eget, quia Pol bene tritum est:
Vendibili vincto non opus est hedera.*

IDEM AD LECTOREM.

*Qui cupis Antoni quantum perdiscere librum,
Syntaxis placidum si modò quæris iter,
Hanc erne (necc pigeat) lector studiose libellum,
Quem peperit Torres docta Minerva tibi.
Parua licet, pretiosa tamen sunt munera lector:
Hæc modò qui præstat, post meliora dabit.*

2

COMMEN TARIUM IN QVART-

tum Antonij Nebris
sens.



VM QVATVOR
sint partes præceptivæ
Grammaticæ, Orthogra
phia quæ de litera: proso
dia, quæ de syllaba, Etymo
logia, quæ de dictione, Syn
taxi, quæ de octo partiũ
orationis constructione di
sputat. Superiore libro e
git Nebrisenſis de litera, & dictione compendioſe
& breuiter ſatis, de ſyllaba copioſius in quinto diſ
ſeretur, de ea Grammatices parte quam Græci Syn
taxim, nos partium orationis ordinem ſiue constru
ctionem vocamus, in hoc quarto libro ſuſcipit diſpu
tationem.

Quando igitur de constructione futurus eſt ſer
mo, non erit à noſtro inſtituto & officio alienum
explicare quid ſit conſtructio, & quotuplex ſit
Conſtructio eſt debita ac legitima dictionum in ora
tione ordinatio, ut Tempus omnia aperit. Eſt debita
ac legitima ordinatio, hoc eſt, iuxta leges & regu
las Grāmaticæ. Dictionũ, quoniã unius dictionis nō

Libert quartus

est constructio, sed aut duarū, ut ego doceo, aut plurimum, ut ego doceo Grammaticam. In oratione, quoniam nisi in oratione constructio esse non potest. Vnde apertè colliges hanc non esse constructionem, Diuina sapientia, licet ibi sit substantiuū cum adiectiuo concordia: ceterū si adieceris, Diuina sapientia incredibiles sui amores in hominum animis excitare solet, iam feceris constructionem.

Est autem triplex, bona, mala, figurata. Bona, est oratio ab omni uitio & incongruitate aliena, ut, Excruciat animum libido. Mala, est oratio nulla ratione neq; authoritate excusabilis, ut uir bona Deo diligit: in qua oratione bis peccatum est, tum quia adiectiuum bona cum substantiuo non concordat, tum etiam, quia uerbum diligo datiuum pro accusatiuo à tergo regit. Figurata, est oratio quæ licet primo aspectu uitiosa appareat, ratione tamen & authoritate excusari potest, ut Ego magister doceo. In qua constructione licet uerbum non concordet cum nominatiuo magister, quod nomen est tertiæ personæ, excusatur tamen hæc improprietas, quoniam uerbum semper digniori respondere debet: prima namque persona ordine naturæ dignior est secunda, & secunda tertia.

De accidentibus constructionis, concordantia, & regimine, nihil in præsentia: quoniam de his, & figuris constructionis, peculiarem faciemus tractatum, postquam Quartum librum absoluerimus.

Verba partim sunt personalia, partim impersonalia.

Exorditur Nebrissensis quarti libri tractationem à uerbo, quoniā est totius orationis ueluti forma, sine qua oratio ipsa constare non posset: ideo eius finitionem ex tertio libro petamus necesse est, ne uerbi de finitio ignorata audientium animis aliquid pariat perplexitatis. Est igitur uerbum, pars orationis declinabilis, cum modis & temporibus, sine casu, agendi uel patiendi significatiua. Pars orationis declinabilis, ut partes indeclinabiles excludatur. Cum modis & tēporibus: ut nomen, pronomen, & participium excipiantur: nam nomen & pronomen prorsus carent modis & temporibus: participium licet tempora sortiatur, illa tamen habet implicita. Sine casu, ad differentiā participij, quod per suos casus inflectitur. Agendi uel patiendi significatiua, nam uerbum aliquando actionem significat, ut amo aliquando passionem, ut amor: aliquando sub una uoce utrunque complectitur, ut largior. Quæ definitio de uerbis adiectiuis regularibus, nō de substantiuis, aut irregularibus intelligi debet. Partitur igitur Antonius uerba in personalia, & impersonalia. Personalia sunt, quorum tempora per numeros & personas certas explicantur, ut amo, as. Impersonalia, quorum tempora certis numeris, certisq; personis carent, ut uidet. Sed uerbi impersonalis consideratione in alium locum reiecta, de personalibus differit, quæ à persona, & non à numero nomen acceperunt, quia persona numero nobilior est: cum actio uel passio quæ per uerba personalia significatur, non numero, sed personæ agentis uel

Libet quartus

patienti inhaereat.

Personalia rursus in quinque genera diuiduntur.

Quæ rursus in quinque genera distribuit. actiuum. passiuum. neutrum. deponens. commune. Quæ partim terminatione, partim significatione, partim constructione discernuntur. Nam quemadmodum genus in nomine est qualitas quædã, qua genus masculinum à feminino distinguitur, & neutrum ab utroque: ita genus in uerbo est qualitas, qua uerbū actiuum à passiuo, passiuum à neutro, & reliquis generibus uerborum tum uoce, tum significatione, tum constructione secernitur. Colligitur aut. in horum quinque generum numerus in hunc modum. Aut uerbum desinit in .o. aut in .er. Si in .o. aut est actiuum aut neutrum ut diligo, seruiō. Si in .er. aut solam passionem significat, & est passiuum uerbū ut diligor, aut solam actionem & est deponens, ut obliuiscor, aut actionem & passionem simul & est commune, ut ueneror, interpretor. De his igitur ordine ipso quo distributa sunt, qua possimus perspicuitate differemus.

De uerbo Actiuo.

Actiuum uerbum est illud quod desinit in .o. & habet passiuum in .er. & exigit ante se nominatum in persona agentis uel facientis, & accusatiuum in persona patientis. Explicemus singulas partes huius definitionis. Desinit in .o. ad differentiam

uer-

uerborū passiuiorum, deponentium, & communū, quæ desinant in or, ut legor, recordor, experior. Et habet passiuum in. or. ad differentiam uerbi neutrius ea uoce carentis. Et exigit ante se nominatiuum, hoc commune est uerbis omnibus personalibus in modis finitis, ut nominatiuum exigāt ante se (dixi in modis finitis, nam infinitiuius modus exigit ante se accusatiuum in uoce actiua loco personæ agentis, in passiuā uerò, patientis.) In persona agentis uel facienti, hoc proprium est uerbi actiui, uel neutrius actionem significantis, & deponentis. Nam reliqua uerborum genera possunt etiam passionem significare, exiguntq; ante se nominatiuum pro persona patienti, ut exulo, criminor. Aliquando loco nominatiui orationem exigit, ut assiduas ad Deū fundere preces diuinam mitigat indignationem. Quod uerò dixit, in persona agentis uel facienti, non sine ratione adiectum est. Nam differentia illa inter agere & facere, non à Philosophis solum sed ab studiosis etiam linguae Latine obseruatur, ut facere sit rerum in materiam exteriorē transcuntium, ut feci domum, feci imaginem, agere sit rerum immanentium, ut ago fortiter, ago prudenter. Erit igitur (si his uocibus rigide utamur) persona faciens, quæ opus corpore exercet, agens uerò quæ animo, uerū communiori uocabulo persona agens ab authoribus appellari solet. Et accusatiuum in persona patienti, ut mater tenerrimè filios amat, uel orationē pro accusatiuo, ut bonorū tria esse genera nullus sanæ mentis ignorat.

Libert quartus.

Hæc definitio traditur de uerbis integris & regularibus, non autem de defectiuis aut irregularibus, inter quæ reperies quædam, quæ exeunt in. o. & non in. or, ut audeo, uolo, facio, do, quæ in uoce passiua non habent, audeor, uolor, facior, dor. Alia uerò deprehendes, quæ utraq; uoce carèt, & nec uocem actiuam in. o. neque passiua in. or. habent, ut odi, noui, cœpi, memini. Quæ omnia uerba, licet mutila sint, & suis temporibus orbata, inter actiua tamen numeranda sunt, quandoquidem cum accusatiuo construuntur. Sunt enim quædam uerba actiua uoce tantum, ut uapulo, alia significatione tantum, ut sequor: alia uoce & significatione simul, ut amo, alia postremò significatione & constructione, ut superiora illa, odi, memini, noui.

Eius complures sunt species.

Actiuum uerbum in sex species diuiditur (siue formas, siue classes, siue ordines, siue gradus malis appellare.) Neque existimes hic speciem ab Antonio accipi more Dialectico pro ea, quæ prædicatur de pluribus numero differentibus, ut homo, leo: sed pro collectione uerborum eandem habentium constructionem, & ab alijs adeò diuersam, ut hoc solo nomine à reliquarum classium uerbis differant. Nam licèt uerba actiua omnia in hoc conueniant, ut à fronte ex æquo nominatiuum requirant agentis, à tergo accusatiuum patientis, quia tamen alios atque alios ulteriores casus præter accusatiuum accipiunt, propterea in diuersas species distrahuntur, & quia sex modis à ter-

go constructa reperiuntur, ideò in sex species passim distribui solent. Quæ accusatiuo tantum contenta sunt primam constituunt speciem. Quæ præter accusatiuum, genitiuum uel ablatiui desiderant, secundam. Quæ datiuum, tertiam. Quæ alterum accusatiuum, quartam. Quæ ablatiui sine præpositione, quintam. Quæ cum præpositione, a, uel ab, sextam, quas sigillatim percurramus.

De prima classe verborum Actiuorum.

Verba huius speciei cum accusatiuo tantum construuntur, siue accusatiuus ille rem significet, ut diligo res honestas, siue personam, ut amo te. Quod si uerba huius speciei præter accusatiuum alios casus regant, ad alias species migrabunt, Teretius in Phormione. Neq; quomodo uxorem amittam à me inuenio, neq; uti retineam, scio: ubi amitto quod est primæ speciei, efficitur sextæ. Item si uerba sequentiũ classium, casibus, quos post accusatiuum regunt, priuentur, efficiuntur huius speciei, ut hominis negligentiam accuso, suasi utilia, doceo artes liberales, satiaui animum, omnia tua negotia libens suscipio. Si uerò cum nullo casu construuntur, fient absoluta, ut adolescens affectu quodam cæco & immoderato amat. Aliquando hæc uerba duos accusatiuos recipiunt, si ad eandem rem pertineant, ut facio te arbitrum. Verba tamen quartæ speciei duos accusatiuos habent pro diuersis rebus acceptos, ut doceo te Grammaticam, aut per figuram Appositionem, ut uerso Ciceronem Romanæ eloquentiæ parentem, aut per Enallagen appellatiui pro adiectiuo, ut præsta te uirum, id est fortē,

Liber quartus

ant deniq; præpositione interiecta, quorum alter à præpositione, alter à uerbo regatur. *Liuius, liberum copiam traiecit.*

De casibus communibus.

Illud præterea notandum est, uerba huius speciei, quemadmodum & reliqua, præter accusatiuū, quæ sua natura exigunt, posse etiā recipere casus, quos Grammatici communes siue generales appellat, qui cōdicti sunt cōmunes, quod speciem priuatam non constituent, sed ab omnibus uerbis cuiusuis generis, cuiusuis speciei, cuiusuis naturæ regi possint. Sunt autem septuaginta, Dativus damni aut cōmodi, quæ per accusatiuum media præpositione In uel Ad interpretari solemus, ut tibi soli sapis, id est, in tuam uel ad tuam utilitatem. Terentius in Adelphis, Si quid peccat Demia, mihi peccat, id est in meum uel ad meum detrimentum. Genitiuus estimationis, ut pluris facio famam quàm pecuniā. Ablatiuus pretij, ut hic patriam pecunia deseruit. Effectiuius instrumenti ut nutrix infantē lacte alit. Accusatiuus uel Ablatiuus temporis uel spatij, ut studui Grammaticæ quatuor annos uel annis, laxavi domum uiginti passus uel passibus. Casus cum præpositione, ut iaceo ante pedes, doceo in gymnasio. Postremo urbium & oppidorum propria, licet aduerbialiter ponantur in oratione, post quoduis uerbum succedere citra præpositionem possunt, ut sum Romæ, eo Romanam, uenio Roma, transiui Roma.

Huius speciei uerba adeo uaria sunt, ut in certū numerum colligi non possint. In hoc tamen uerbo Ca-

pio,

pio illa proprietas notanda est (ut author est Val-
la lib 6. Elegant cap. 3.) habere scilicet reciprocu
quendam usum, cum dictionibus praesertim ad de-
lectationem pertinentibus: ut idem sit cepi uolupta-
tem, & uoluptas cepit me: cepi delectationem, &
delectatio cepit me: sed usitatus ceptus sum delecta-
tione. Notabis praeterea, idem uerbum quando si-
gnificat continere, id sibi iure exigere, ut locus qui
continet ponatur in nominatiuo, res quae contine-
tur, in accusatiuo: ut ararium uix tantam pecuniā
capiet, non ē conuerso. Cicero oratione secunda de
lege Agraria, Vix iam uidetur locus esse, qui tātos
aceruos pecuniae capiat.

De secunda classe actiuorum.

Verba huius speciei praeter accusatiuum patien-
tem, petunt etiam à tergo genitiuum uel ablatiuum
ut accenso te homicidij uel homicidio. Genitiuus ti-
men est proprius huius speciei: nam ablatiuus sine
praepositione reducitur ad quintam: si uerò sit cum
praepositione, ad sextam. Propria autem huius or-
dinis uerba quincuplicia sunt, implendi, accusandi,
damnandi, emendi, aestimandi. Cum uerbis uacuādi
defendendi siue purgandi, absolucndi uēdendi, quae
sunt superioribus contraria: nam contrariorum
eadem solet esse disciplina & praepceptio. De qui-
bus omnibus gradatim est nobis differendum, ut tan-
tam rerum confusionem, quae in hanc speciem à qui-
busdam intrudi solent, ad certam methodum redi-
gamus.

De uerbis implendi.

Verba

Libër quartus

Verba implendi qualia sunt, impleo, repleo, compleo, refectio, post accusatiuum, genitiuum uel ablatiui sine præpositione postulant ut impleui nauim frumento, referſi apothecam uino. Notat tamē Laurentius Valla lib. 3. cap. 33. addendam eſſe aliquādo neceſſariō præpoſitionē, DE. Quando ſcilicet ablatiui illius generalitatem, ſeu rerum diuerſitatem ſignificat, ut Impleui nauim de omni genere frumēti referſi apothecam de uaria natura uinorum, neque enim ſic loqui liceret. Impleui omni genere frumēti, & referſi uaria natura uinorum. Cuius rei cauſa eſſe cauſam exiſtimo, ne ſenſus orationum abſurdus & ineptus reddatur. Quid enim aliud ſignificaret impleui nauim omni genere frumēti, & apothecā uaria natura uinorum, quā me omni totius orbis frumento nauim impleſſe, & in apothecam omnia uina ex omnibus mundi regionibus cōportata inſu diſſe? Quod quantum cum ueritate pugnet, ipſe uideris. Additur, igitur præpoſitio, de, ut generalitas illa, ſiue rerum diuerſitas aliquantūm reſtringatur. Cuius præceptionis Cicero lib. 1. de Orato. nobis etiā aulhor eſt, Querebat (inquit) cur de proœmijs, & de epilogis, & de huiusmodi nugis referti eſſent eorum libri. Hic nequaquam licuiſſet ſine præpoſitione loqui, nō enim libri illi referti ſunt proœmijs & epilogis ſed præceptis proœmiorum & epilogorum. Sicut in ſuperioribus. non eſt nauis impleta omni genere frumēti, ſed frumento omnis generis, neque apotheca referta omni natura uini, ſed uino omnis naturæ.

Hinc

Hinc colliges, in huiusmodi orationibus germanū sexsum seruari posse, si cum præpositione loquaris aut in hunc modum. Impleui uauim frumēto omnis generis, & apothecam uino omnis naturæ.

Nomina impletionem significantia, ut refertus, plenus, apud Ciceronem cum genitiuo frequentius constructa reperiuntur, quemadmodū implendi uerba cū ablatiui. Cic. pro lege Manilia, Referto Prædonum mari. Idem ad Iulium. 7. in Verrem, Proce-dit in medium uini, somni, stupri plenus.

De uerbis accusandi.

Verba accusandi, qualia sunt, accuso, ago, posu-lo, arcesso, insinulo, arguo, noto, alligo, astringo, post accusatiuum, cū genitiuo uel ablatiui sine præpositione, aut cum ea construuntur, ut accuso te fur-ti, furto uel de furto. Neq; eorum opinio uera est, qui uitia speciatim dicta genitiuo tantū, generatim posita ablatiui debere exprimi contendunt. Quasi sic loqui necessarium sit. Accuso te fur-ti, sacrilegij, parricidij, nō furto, sacrilegio, parricidio, quia fur-tum, sacrilegiū, parricidium crimina sint specialia. Item accuso te crimine, peccato, scelere, non crimi-nis, peccati, sceleris, cū crimē peccatum, scelus, no-mina sint peccatorum generalia. Atqui hos Grāma-ticos falli, docet hic locus Ciceronis ad Atticū. lib. 7. Dam-nasse enim sceleris hominē amicum Reipubli-cæ causa uideretur. Item ille pro Rabirio perduel-lionis reo. An non intelligis, primū quos homines, & quales uiros mortuos summi sceleris arguas? Quibus locis nomina incerta peccatorum ponuntur

in ge-

in genitiuo. Nomina autē peccatorū certa & specia-
lia locari posse in ablatiue, testis est Plautus, Ita cū
furto alligat. Itē Plinius naturalis historie li. 18. Ne
cari iuebant grauius, quā: homicidio conuictum.

Sunt tamē certa nomina, quæ post huiusmodi uer-
ba, nō nisi in ablatiue poni soleant cū præpositione,
uel sine ea, repudiato prorsus genitiuo, quia sic do-
ctorū hominū usu & cōsuetudine receptū est. Qua-
lia sunt huiusmodi partitiua. uter, uterq; neuter, al-
teruter, alter, alius, ambo: quibus accedat omnis, nul-
lus, & superlatiua plurimus, maximus, ut in sequēti-
bus exēplis uidere est. Vtro hūc hominē accusas: nō
utrius, Itē accusasne hūc furti an sacrilegi, an de u-
troq; an neutro, an alterutro, an nullo, an altero, an
alio, an ambobus, an de omnibus, an maximo ex his?
Item de plurimis accusatus est, non plurimorum.

Notabis, cū uerbis accusandi siue dānādi, hos geni-
tiuos tāti, quāti, pluris, maioris, & similes, posse re-
cipere substantiuorū cōsortiū, ut quāte pecunie cō-
dēnasti: tāte summae damnari, quanta postulasti. Li-
uius Decadis quartæ li. 8. ad finem, Sed nec tantum
uedactum est, quanta summae damnatus fuerat.

Itē notabis, in uerbis ad accusationē crimēq; per-
tinentibus, tres illas solēnes Grammaticæ regulas uiol-
lari. Quo casu quereris, eodē respondere tineris ut
accusas hūc furti, an sacrilegi: respondēs, de utro
que, aut de neutro. Exponēs & expositū debēt esse
in eodē casu, in eodē exemplo, de utroq; hoc est
furti, & sacrilegi: de neutro hoc est, neque fur-
ti, neque sacrilegi. Coniunctio copulatiua debet si-

miles

miles casus connectere, ut arguam te homicidij, & adulterij, & de plurimis alijs: nō dices plurimorū.

De verbis damnandi.

Verba damnandi eandem cum verbis accusandi constructionem habent, nam aliquando construuntur cum genitio. Cicero in Rhetoricis ad Herennium. Maiores nostri si quando peccati mulierē dānabāt. Aliquando cum ablatiuo sine præpositione. Idem in Verrinis, Ego hoc uno crimine illum condemnem, est necesse. Aliquando cū præpositione. Idem secunda Philippica, Cuius etiam familiares deui cōdenati sunt. Sic etiā dicimus, dānare aliquē capitis, capite siue de capite. repetūdārū, siue de repetūdis, ambitus, siue de ambitu. Idē iudiciū est de verbis absolūēdi, ut absoluo te iniuriarū, uel de iniurijs,

De verbis pretij.

Non desunt Grammatici, qui asserant, uerba pretij & æstimationis nō esse huius classis sed primæ, quōd ablatiuus pretij, & genitiuus æstimationis sint casus communes, nulliq; uerborum generi denegentur. Ego tamen sic existimo in hoc ordine esse reponendā, & ablatiuum pretij, & genitiuum æstimationis cum reliquis uerborum generibus casus esse communes, uerbis uerō pretij, & æstimationis proprios esse, & peculiare, ac propterea priuatam cum his cōstituere speciem. Omnia igitur uerba pretium significātia, aut quorum actus pretio siue mercede efficitur, qualia sunt, emo, comparo, mercor, uendo, uenundo, distraho, laeo, conduco, sto, consto, paciscor, doceo, ago
& si

Liber quartus

Et si qua sunt alia similis horum significationis, regunt post se nomen, quod pretij rationē, obtinet siue ualoris in ablatiuo. Vergil. 6. Aeneid. Vendidit hic auro patriam. Liuius, Multo sanguine ac uulneribus ea Penis uictoria stetit.

Exceptiones præcepti generalis.

Sunt tamen triplicia nomina adiectiua, quæ cum uerbis pretij iunguntur, diuersam sequuntur rationem: nam eorum quædam ponuntur in genitiuo, alia in ablatiuo, postremò alia neq; in genitiuo neq; in ablatiuo sed fiât aduerbia, ut per ea cum uerbis pretij loqui liceat. Agamus de primis. Excipiuntur undecim nomina adiectiua, quæ si secum appellatiuum nomen adiunctum non habeant, in genitiuo poni semper solent. Sunt autē simplicia quatuor, tâti, quanti, pluris, minoris composita septem quantiuis quantilibet, quanticunq; quantidē, tantiuis, tantidē, tantilibet. Vs res tanti ualeat, quanti uēdi potest, itē quam rem ego pluris, tu minoris emisti, Et sic de reliquis. Hæc autem nomina adiectiua in genitiuis ponuntur substantiuè, atq; ita si illis adiungas appellatiuum nomen, quo pretium indicatur, orationē conuerteres in ablatiuum, nam in genitiuis non admittūt in consortium nomina substantiua, neq; enim dices, Mercatus sum equum tanti pretij, sed tanto pretio: neq; minoris pretij, sed minori pretio. Excipitur tantidem, quod in ablatiuū resolui nō potest, quia duos casus tantum habet, tantundem, Et tantidem. Nec liceret sic resolvere, Emi prædium tantidem, quanti tu, id est, tantodem pretio, sed sic, eodem pretio, aut tanto

tanto eodem pretio: quam rationē sequitur quantidem, si in usu sit.

Sunt tamen in his genitiuis multa scitu dignissima, nā tāti & quāti & reliqui genitiui aliquādo ad pretium non referuntur, sed ad aliqui l, quod magni pōderis sit & aestimationis ut in eo uersu Ouidij, Vix Priamus tanti, totaq; Troia fuit. Et tunc licebit loqui per genitiuum cum nomine substantiuo: ut non est tanti pretij uestis, quāti tu ducis. Simili forma loquendi usus est Terentius in Andria, Videtur esse quātiuis pretij. Item Sallustius in Iugurtha, Existimate facta, an dicta pluris sint pretij. Aliquando tāti & quanti neq; ad pretium, neq; ad aestimationē referuntur, sed quantitātē, aut exclusionem important, & tunc non reguntur in genitiuo, sed utimur his uocibus tantum & quantum: ut tantū operæ posui in studijs, quantum necesse fuit.

Pluris itē & minoris, cum ablatiuo ex ui comparationis cōstrui possunt. Plinius. 35. Naturalis Historia. Neminem minoris docuit talento. Iunguntur etiam his ablatiuis, fide, spe, opinione, solito. dicto, æquo, iusto. ut pluris opinione librum emi, minoris solito mercatus sum librū. Asciscunt præterea sibi aduerbia illa, tantò, quantò, eò, quò: ut tantò pluris, quantò minoris, eò pluris, quò minoris. De genitiuo maioris nulla mentio, quia rarus est eius usus apud authores. Polus his undecim genitiuis addit duos alios æris, & centussis, quòd legerit apud Columellā lib. 3. Quæ uulgus parui æris posse cōparari putat. Itē apud Marcum Varronē, Satyra de Edulijs, Pi

Libër quartus

Storem qui norunt, uolunt emere millibus centū, te qui nouit nemo centussis. Tu uerò id, quod ab authoribus rarissimè usurpatum est, ne ad imitationē tibi proponas, sed loquere cum his nominibus per ablatiuum in hunc modum, Paruo ære, centussi, decussi, aut per pluralem, centussibus, decussibus.

De adiectiuis, quæ ponuntur in Ablatiuo.

Sunt secundò alia nomina adiectiua, quæ cū uerbis pretij ponuntur in ablatiua, quibus addere appellatiuum, uel demere pro arbitrio possis magno, maximo, paruo: minimo, multo, plurimo, paulo, paulo, nimio, immenso, duplo, triplo, uili, caro: ut magno uel paruo mercatus sum, uel magno uel paruo pretio mercatus sum. Terentius in Eunacho, Quid agas, nisi ut te redimas captum quàm queas minimo? si nequeas paululo, at quanti queas, & ne te afflictes. Duobus tamen postremis, caro, & uili, addi appellatiua non solent: ut caro, aut uili emi, non caro, aut uili pretio.

De adiectiuis quæ fiunt aduerbia.

Sunt postremò quatuor cōparatiua, quæ neq; in genitiua, neq; in ablatiua, ut superiora. cum uerbis pretij ponuntur, sed loco eorū aduerbia ex se ipsis facta succedunt, carius, uilius, peius, ut carius, aut uilius emi, non carioris, aut uilioris.

Tria obseruatione digna.

Tria supersunt annotanda, ne quicquam eorum prætermittamus, quæ necessaria sunt, uerbum scilicet ualeo, cū accusatiua & ablatiua cōstrui, ut hic liber ualet tres nūmos argenteos, uel tribus nummis

argen

argenteis. Et numerā, pōdus, ac mensurā, in huiusmōdi uerbis, uel accusatiuo cū præpositione In uel ablatiue cū præpositione Pro, notari. Cicero in Verrē Quid ergo in singulos sestertijs millibus danari maultis? Idem pro Marco Fonteio, Titurius Tolosa quaternos denarios in singulas uini amphoras portorij nomine exegit. Rursus Idē in Verrē, Ipse pro tritici modijs singulis ternos abaratoribus denarios exegit. Postremò notabis, in uerbis pretij quēadmodū in uerbis accusationis, tres illas regulas, quarū in superioribus meminimus, frangi Quo casu quæreris: ut quanti emisti pileū? respōdebis, quatuor argenteis nūmis. Exponēs & expositū debēt. &c. ut tanti, id est, tanto pretio. Cōiunctio copulatiua: emi equū centū nūmis aureis, et pluris. Quæ regula etiā cū nominibus & pronominiibus possessiuis uiolatur, domus materna & patris, domus mea & fratris, item in uerbis impersonalibus primi ordinis, ut mea interest atque discipulorum in humanioribus disciplinis diligenter elaborare.

De uerbis AEstimationis.

Verba æstimādi qualia sunt æstimo, curo, puto, facio, cōsulo, duco, pēdo, & habeo construuntur cū ablatiue ut æstimo cētū aureis nūmis, nō facio aße. Tamē cū superioribus alicuius, tātus, quātus, plus, mi n⁹ & reliquis, cōstruuntur cū genitiue, ut tāti facio, quāti tu, pluris aut minoris facio, quā tu Et præter hos regunt etiā sequētes genitiuos, magni, maximi, parui, minimi, multi, plurimi, nauci, flocci, pili, teruncij, huius, nihili, equi, boni, qui omnes

Liber quartus

genitiui uerbis solum æstimationis iunguntur. Ut parui siue magni pendo, flocci facio, nauci facio, ne teruncij quidē, aut huius facio. In tribus tamē possemis genitiuis, nihili, æqui, & boni notabis, licere scilicet aliquando loqui per ablatiuum nihilo cū præpositione Pro, satis ex more Ciceronis, cū uerbis habeo, duco puto, sum ut pro nihilo habeo. Ciceron pro domo sua, pro nihilo habenda est adoptio cōtra omne ius facta. Pro nihilo duco. Idē in Verrinis Pro nihilo ducere alios præ se Pro nihilo puto. Idē pro Cecinna. Quæ cadere in hominem possunt, despicere, ac pro nihilo putare. Pro nihilo esse. Idem pro Marcello, Præterita uoluptas pro nihilo est. Persius cū pendo usus est, prima Satyra, Ten, Cirratorum centū dictata fuisse pro nihilo pendas? AE qui & boni, utimur cum uerbis facio & consulo: ut æqui boniq; fac siue consule adhortationem meam id est in bonā partem accipe. Aliqui iungunt genitiuis superioribus genitiuum aſis, ducti duabus autoritatibus: quarum prior est Vergilij in Priapo, Nō aſis faciūt, euntq; rectā. Posterior Catulli Omnes unius æſtmemus aſis. Verū per hoc nomē elegantiū & politius multō loquimur per ablatiuū, quā per genitiuum: per reliqua uerō semper loquimur per genitiuū. Sūt qui inter uerba huius classis numerēt laudādi & admonendi uerba, quōd uideāt, ea aliquando cū genitiuo aliquando cū ablatiuo cōstructa. Verū falluntur, nā uerba laudis, siue uituperationis sunt primæ speciei: uerba admonitionis, quartæ. Non nego ex uaria constructione solere uerba mu

tare

tare speciem, cæterum hæ sunt classēs propriæ horū uerborum, & ex his ad alias migrare solent.

De tertia classe Actiuorum.

Verba tertiæ classis præter accusatiuum patientē, postulāt datiuū acquisitiuum, in quo persona acquirens aliquid reponatur, ut do tibi pecunias. Vnde à ueteribus Grammaticis, huius speciei uerba acquisitiua sunt appellata. Qui datiuus licet damnum aut commodū uideatur significare, non regitur ab his uerbis ut casus cōmunis & generalis, sed ut proprius, & peculiaris, ut qui tertiam speciem constituit. Non nego posse recipere casus generales, postquam eorum natura fuerit expleta, ut Prætor panes distribuit pauperib⁹ propria manu in foro. Nā (ut id semel præcipiamus, ne audientium capita crebra eiusdem præcepti repetitione obtundamus, casus generales nulli uerborum generi, cuiuscunq; sint formæ aut naturæ, negari possunt. Hic idē datiuus si per uocem passiuam conuertatur oratio, manere perpetuò debet, & nominatiuus in ablatiuum cum præpositione. A. uel. AB. conuerti debet, nō in alterū datiuum, ut do tibi pecunias, pecuniæ datur tibi à me, nō tibi mihi. Quod fieri solet ad euitandā Amphibologiam, nesciremus enim, uter datiuus esset persona agens. Verum cum similis ambiguitas in oratione non fuerit, rectē nominatiuus conuerti potest in datiuū, ut cani porrigis ossa, ossa porriguntur tibi cani. Tūc enim nullus dubitat, datiuū tibi, agentē personā esse. Hæc sunt generalia huius classis præcepta modò ad formas uerborū particulares descendamus.

Liber quartus

De multiplicibus verbis Tertiæ classis.

Adeò multa sunt huius speciei verba, ut certa de his regulatradì non possit. Cæterùm percurramus præcipua. **SU** **V** **E** **R** **B** **A** **D** **A** **N** **D** **I** ut do, dono, tribuo, trado. **M** **I** **T** **T** **E** **N** **D** **I** ut mitto, scribo. **I** **V** **B** **E** **N** **D** **I** ut iubeo, impero, præcipio, mado. **S** **V** **A** **D** **E** **N** **D** **I** cū cōpositis, ut suadeo, psuadeo dissuadeo **P** **R** **A** **E** **P** **O** **N** **E** **N** **D** **I** postponēdi, æquādi ut præpono præfero, posthabeo. postpono, æquo ad æquo, æquiparo. **M** **V** **T** **V** **A** **N** **D** **I** ut mutuo, loco, cōduco. **C** **O** **M** **M** **I** **T** **T** **E** **N** **D** **I** ut cōmitto cōmēdo, credo. Postremò verba cū his præpositioni b⁹ **A**d **I**n, **O**b, **S**ub, cōposita, aut adiūgo, impono, offero, subijcio In quibusda tamē verbis ex his, sunt aliqua animadversione digna circa cōstructionē. Neq; enim animus est, verborū differētias & significatio nes varias vocabulorū sigillatim percurrere, ne videar (ut multi nostrī temporis Grāmatici in bonorū ingemorū perniciē fecerūt) Laurētios, Calepinos, Perottos, linguæ Latine Thesauros & reliqua dictionaria cōpilasse, & tot verborū significationibus recensendis puerorū ingenia turpiter obruisse.

De verbis dandi.

Hoc verbum do, præter naturalem cōstructionem accusativi & dativi, regere solet accusatiuum medijs illis præpositionibus. **I**n, **A**d, **I**nter. Vt Tetrētius, Hanc mihi in manum dat. Itē: literas tabellario ad aliquem dare. Item obsides inter se dare. Est, cū post datiuum ablatiuum regit cum his præpositionibus, **A**: uel **A**b **D**e **I**n, nempe cū aliquid da

mus alicui ab aliquo. *Plautus in Captivis*. Sequere me, quia tunc ut idē d. *Trapezita tibi*. *Cicero ad Atticū lib. 7.* Qui tūc de rebus hūc mādātā dederit. *Plinius* hoc etiā in mādātis dedit. Et cum duos dativos regit, quorū posterior per accusatiū cum, In uel Ad exponitur, cum his uerbis potissimū do, uerto dūco, habeo, adscribo. Ut dare laudi dare uitio id est in laudem, uel in uitū, idem de reliquis dicatur.

De verbis mittendi.

Hoc uerbum mitto, prāter cōstructionem accusatiui loco datiuū regit alterū accusatiuum cum Ad, ut mittere alicui literas uel ad aliquem scribere alicui uel ad aliquem. Eandem naturam habent iungendū uerba ut se sceleratis hominibus adiungere uel ad sceleratos homines. *Cicero in Philippicis* Cæsar se ad neminem adiunxit.

De verbis Iubendi.

Iubeo cum accusatiuo olim construebatur. *Plautus in Aulularia*, aut si respexeris donec ego te iussero. Itē *Quintil.* Pater me iussit. Solet etiam satis eleganter cōstrui cum accusatiuo, quando significat legem promulgare aut magistratum creare, ut legem iubere, consulem iubere. *Cicero pro Cornelio Populo Romano* legem iussit de ciuitate tribuenda. Idem in *Philippicis*: Cæsar ostēdit se prius quam proficisceretur *Dolabellā* Consulem esse iussurum. Aliquando cōstruitur cum accusatiuo & datiuo & est huius speciei, ut iubeo tibi rem factū facilem. Aliquando cum duobus accusatiuis & reducitur ad quartam. *Cicero. 13. familiarium.* Litere

Libér quartus.

nō quæ te aliquid iuberet, sed cōmēdatitiæ. Si cū solo datiuo cōstruatur, efficitur neutrū secūda clāssis, ut malè res agitur, cū inferiores superiorib⁹ iutēt.

De verbis Acquandi.

AEquo, si significet æqualem esse, regit accusatiuum: ut rebus gestis Herculē æquare, id est, æquale esse Herculi. Si significet æqualem facere, accusatiuum & datiuum, & est huius clāssis ut Alexandrū Herculi æquare, id est, æqualem Herculi facere.

De quarta classe actiuorum.

Verba quartæ clāssis duplicē accusatiuū regunt, alterū quidē principale ex ui transitionis, alterum min⁹ principale ex natura uerbi: & accusatiuus principalis non constituit speciē, quum is sit omnibus uerbis actiuis communis, sed min⁹ principalis est proprius casus huius speciei. Nā eā primū cōstituit: deinde facit, ut à reliquis clāssibus differat, ut doceo discipulos Grāmaticā. Caterū hi duo accusatiui, quos hæc uerba exigunt, debēt pro diuersis rebus accipi, nā bene alia uerba regūt duos accusatiuos ad eandē rē pertinentes, siue pro eadem re acceptos, ut uoco te hominem, præsta te hominem.

Sed tria hic notes oportet. Primū quis dicatur accusatiuus principalis, quis min⁹ principalis. Deinde, quare hæc uerba dicantur significare transitionem uehementissimā. Postremò quo pacto in his uerbis fiat conuersio uocis actiue in passiua.

Circa accusatiuum principale & min⁹ principale, duplex fuit quondam Grammaticorum opinio. Alij dixerunt, eum esse accusatiuum principale,

• cipalem, qui significaret personam minus principalem, qui significaret rem. Sed decepti sunt, nam in hac oratione, Doceop sittacum uoces humanas p sit tacum, accusatiuus principalis est, & personam non significat. Alij præceperunt, eum debere dici accusatiuum principalem, qui rem animatam significaret minus principalem, qui rem inanimatam. Hi etiam in similem errorem prolapsi sunt, nam in hac oratione. Induo truncos hostilia arma, truncos, accusatiuus principalis est, & rem animatam non significat. Erit igitur ex nostra sententia accusatiuus principalis, in quem transit, & dirigitur actio uerbi, & rem significat recipientem: minus principalis, in quæ actio uerbi non dirigitur, & rem significat receptam. Vt in hac oratione, Magister docet discipulos Grammaticam, docendi actio ad discipulos refertur, ac propterea, discipulos, erit accusatiuus principalis, Grammaticam, erit minus principalis, quia docendi actio ad Grammaticam non refertur, non enim magister Grammaticam instituere uult, sed discipulos.

Vt secundum expediamus, notare oportet triplicem esse transitionem, uehementem scilicet, debilem, atque uehementissimam. Transitionem uehementem significant uerba actiua primi ordinis, quæ accusatiuum tantum regunt. Debilem uero uerba neutra, quorum actus in accusatiuum non transit. Uehementissimam autem uerba quarti ordinis, propterea quod eorum actus tanti sit uigoris, ut in duplicem accusatiuum transire ualeat. Hæc eò notare libuit,

Libert quartus

ne ignotum eſſet ſcholasticis , que eſſet tranſitio uehementiſſima , quam hæc uerba ſignificare dicuntur.

In conuerſione autem uocis actiue in paſſiuam, que fit per hæc uerba accuſatiuus principalis mutatur in nominatiuum, & minus principalis manet: ut doceo te Grammaticam , tu doceris a me Grammaticam. In uerbis uerò petendi ſeu orandi, uterq; accuſatiuus mutari poteſt. Verùm ſi mutetur principalis, minus principalis manet eodem pacto , quo erat in actiua : ut miſeri orant principes ueniam, principes orantur à miſeris ueniam. Sed ſi mutetur minus principalis, accuſatiuus principalis uertetur in ablatiuum cum præpoſitione Ex, ut uenia oratur à miſeris ex principibus , que uox paſſiua uerbis ſextæ ſpeciei tribui ſolet.

De multiplicibus uerbis quartæ claſſis

Quincuplicia ſunt uerba huius ſpeciei : DOCENDI, ſeu dedocendi, ut doceo, dedoceo. MONENDI, ut moneo, admoneo. ORANDI, ſeu interrogandi, ut oro, rogo, interrogo. PETENDI, ut peto, ſagito, poſtulo, poſco. INDVENDI ſiue calciandi cum contrarijs, ut induo, uestio, cingo, calcio, exuo, expolio, ex calcio.

De uerbis docendi.

Docceo conſtruitur cum duobus accuſatiuis, & eſt quarti ordinis. Valerius Maximus lib. 6. Dionyſius propter inopiam, literas puerulos Corinthi docuit. Aliquando conſtruitur cum ablatiuo media præpoſitione De, efficiturq; ſexti: non tantum quãdo

do significat certiore[m] facere, sed quando refertur ad doctrinam. De prior[e] significatione Cicero pro Sexto Roscio, Vsq[ue] adeò autem ille pertinuerat, ut mori mallet quàm de his rebus Syllam doceri. De posteriore, Idem pro domo sua, Quid est enim aut tam arrogans quàm de religione, de rebus diuinis, caeremonijs sacris, Pontificum collegium docere conari? Aufertur aliquando praepositio, De. Cicero in Bruto, Homo & Graecis doctus literis, & Latinis. Quinque tamen uerba sunt docendi, quae post accusatiuum principalem, cum ablatiuo potius sine praepositione, quàm cum altero accusatiuo minus principali cõstrui gaudent, imbuo, instituo, instruo, informo, erudio. Vt magni refert quibus artibus: & quibus moribus puerorum animos imbuamus quae oratio per reliqua uerba simili constructione uariari poterit. Erudio tamen aliquando duos sibi adiungit accusatiuos, quae constructio non adeò frequens est apud Oratores. Papinius libro decimo Thebaid. Quae te leges, praepceptaq[ue] fortia belli erudiat.

De uerbis monendi.

MONEO siue admoneo, cum duobus accusatiuis est huius speciei. Sallustius in iugurtha, Eam rē locus nos admonuit. Aliquando accusatiuum minus principalem, in genitiuum uel ablatiuum conuertunt authores & ad secundam uel sextam classem huiusmodi uerba reducuntur. De genitiuo idem Sallustius in iugurtha, Sed quoniam tãti uiri tempus admonuit. De ablatiuo Cicero libro quarto Episto.

Putat-

Libër quartus

Putauĩ ea de re te esse admonendum.

De verbis orandi seu interrogandi.

Oro & interrogo cum duobus accusatiuis, sunt huius speciei, ut oro te rem honestam, item interrogas me questionem arduam, quæ fiunt etiam actiua sextæ, ut oro à te rem honestam, interrogas à me questionem arduam. Quibus iunge petendi uerba, quæ cum duobus accusatiuis, & cum accusatiuo & ablatiuis construuntur: ut te ueritatem exigant, uel à te, peto te rem satis facilem uel à te. Item peto post accusatiuum habet datiuum, ut militibus missio nē petere. Si significet percutere, est quintæ, ut peto te saxo.

De verbis induendi.

Verba uestiendi cum duobus accusatiuis, sunt huius classis, cum accusatiuo & datiuo, tertiæ, cum accusatiuo & ablatiuis sine præpositione, quintæ. Ut induo te tunicam, induo tibi tunicam, induo te tunicam.

De celo, & consulo.

Celo quando sine diphthongo scribitur, significat tegere siue occultare, & aliquando cum duobus accusatiuis construitur. Cicero lib. 2. Epistolarum, Non enim te celauĩ sermonem. Aliquādo cum accusatiuo & ablatiuis cum, De. Idem. 5. Episto. Debes existimare te maximis de rebus à fratre esse celatam. Postremò cum accusatiuo & datiuo, Terētius in Phormine, Si hoc celetur patri, in metu sum. Atque ita ex uaria constructione uarias sortitur species.

Consu

Consulo pro uaria significatione uariam habet constructionem, uarias etiam species. Si significet petere consilium, exigit simplicem accusatiuum, & est primæ. Cicero actione. 2. in Verrē, iam uos cōsulo iudices, quid mihi faciendum putetis. Aliquando duplicem, & est quartæ. Plautus in Menæchmis Ibo, & consulam hanc rem amicos, quid faciendum censeant. Aliquando accusatiuum cum ablatiuo & præpositione, De & est sextæ, ut consulere de salute medicum. Si significet providere, cōstruitur cū datiuo, & est neutrum secundæ, & ex uarijs datiuus uariatur eleganter oratio, ut consulere Reipublicæ, honori, famæ, existimationi, dignitati, salutis, tempori, paci, id est, habere rationem siue respectum. Si iungatur his genitiuis, boni, & mali, significat in bonam, aut in malam partem accipere siue interpretari, & est secundæ, ut laborem alicuius, boni, uel mali consulere. Si significet statuere, post accusatiuum exigit alterum, cum In. Terentius in Heautontimo. Pessimè isthuc in te, atque in illum consulis, id est statuis. Si significet consultare, ponitur absolatè, nec regit casum, nisi interiecta præpositione, In, ut consulere in longitudinem id est consultare in posterum, in commune siue in publicum consulere, id est, de publica utilitate & commodo consultare.

De quinta classe Actiuorum.

Verba huius speciei, post accusatiuum desiderant ablatiuum sine præpositione, uel effectiuum, ut ego donabo te corona laurea. Cuius rei gratia uerba huius

Liber quartus

huius classis appellari solent effectiua, quia post accusatiuum, effectiuum regunt, qui speciem hanc constituit. Ac licet effectiuus sit casus generalis: hic tamen proprius est, quia sine illo natura horum verborum non absolueretur. Post hunc tamen, & aliarum effectiuum recipere possunt ex ui instrumenti: ut latro viatorem vita priuauit insidijs. Hic tamen unum notes necesse est, ablatiuum sine præpositione à Nabrissensi dici effectiuum siue septimum casum, siue instrumentum significet siue non. siue à nomine regatur, siue à uerbo. Et licet reclamet Priscianus, septimus hic casus ponendus est, qui licet cū ablatiuo in uoce conueniat, dissidet tamen significatione: nam ablatiuus separationem significat, effectiuus instrumentum. Item ablatiuus præpositionem uel expressam uel subintellectam semper habet, effectiuus nunquam similem præpositionem recipit.

De multiplicibus verbis quintæ classis.

Sexuplicia sunt uerba huius speciei, DONANDI, ut dono afficio: PRIVANDI, ut priuo, orbo, uideo, defraudo. ONERANDI, seu leuandi, ut onero, exonero. leuo. MUTANDI, ut muto. SATIANDI, ut satio, saturo. PERCVTIENDI, ut peto, percutio.

Donandi uerba.

Dono si significet gratis dare, construitur post accusatiuum cum datiuo & est tertiæ classis, ut dono tibi uestes. Si significet dare præmij aut beneuolentiæ gratia, post accusatiuum regit ablatiuum siue præpositione, & est huius speciei, ut donabo te

CORONA

corona laurea in præmium scilicet meritorum. Naturam huius uerbi sequuntur etiam illa. spargo, sterno, augeo, cumulo, impertio. Quæ omnia reciprocam quandam constructionem habent, ut sparsi corpori aquam, uel corpus aqua stravi equo phaleras, uel equum phaleris auxi siue cumulaui tibi rem familiarem, uel te re familiari, impertio tibi salutem, uel te salute. Quod uerbum datiuum etiam regit cum ablatiuo & De. Cicero. 2. Officio. Sæpe idoneis hominibus indigentibus de re familiari impertiendū est. Hoc idem uerbum eadem significatione & constructione efficitur deponens. Terentius in Adelphis Sed, cesso heram hoc malo impertiri? Cicero pro Archia, Multis aliqua arte præditis gratuito ciuitatem impertiebantur. Afficio ex ablatiuo sibi adiuncto accipit significationem, ut afficio te molestia, iniuria, leuitia, uoluptate,

Satiandi.

Satio ad omnes sensus pertinet, ut animum spectaculis satiani, saturo ad solū gustū, ut saturabo te pane. De uerbo peto in quarta satis fusè disputauimus

De sexta classe Actiuorum.

Verba sextæ speciei requirunt post accusatiuum ablatiuum cū illis sex præpositionibus, A, AB, ABS, De, E, EX. Verū tres præpositiones priores, ablatiuus frequētius iunguntur. Differunt tamen, nam A iungitur dictionibus à consona inceptis ut à Petro: Ab dictionibus inceptis à uocali ut ab Alfonso & quibusdam consonantibus ab Ioue ab Rege ab lege iungitur etiam licet rarò & tribus alijs

alijs. ab senatu, ab Decio, ab natura. Abs iungitur dictionibus inceptis à. T. & Q. ut abs te, abs Tit o Terentius, Abs quivis homine beneficium accipere gratum est. Verba huius classis uocantur separatiua, quia separationem quadam significant, quæ per ablativum importari solet. Hic autem ablativus cū præpositione, licet casus sit cõmunis & generalis, huius tamẽ classis proprius est, nam & speciem cõstituit & à reliquis distare facit.

Notabis, per passivam personam agentem in dativum, & non in ablativum debere conuerti, uitandæ Amphibologiæ gratia, ut literæ acceptæ fuerunt mihi à te, non à me à te, nescires enim uter ablativus esset persona agens. Aut ablativus uerbi uertatur in ablativum cum præpositione, Ex, ut literæ acceptæ fuerunt à me ex te. Per hæc igitur uerba quado non fuerit ambiguitas in oratione, rectè personæ agēs ponetur in ablativo, ut in hoc exemplo, Cicero eripuit Rempublicam Romanam à faucibus Catilinæ, bene sic conuertes in passivam, Republica Romana erepta fuit à Cicerone à faucibus Catilinæ.

De multiplicibus uerbis sextæ classis.

Quincuplicia sunt uerba in hanc classem cadentia **ABSTINENDI**, ut abstineo, contineo. **AUDIENDI**, ut audio, disco, intelligo. **ACCIPIENTI**, ut accipio, suscipio. **AMOVENDI**, ut amoueo, aufero, auerto. **ERIPIENTI**, seu liberandi, ut eripio, libero.

Abstinenti verba.

Absti-

Abstineo & contineo differunt, teste Laurentio lib. 4. ca. 41. Nā abstinemus ab alienis, nulli uim inferentes, nihil cuiquam eripientes, ut abstineo me ab iniurijs. Continemus nos à proprijs, ut cōtineo me à uoluptatibus. Hæc fiunt quintæ, si demas præpositionem. Iustinus, Cōtenti uictoria, imperio abstinebant. Aliquando ex idiomatis Græci imitatione construuntur cum genitiuo. Horatius lib. 3. Car. Abstineto irarum, calidæq; rixæ, Aliquādo loco ablatiui cum præpositione, datiuum habent. Plautus, Abstine isti hanc tu manum, id est ab ista.

Audiendi

Audio aliquando significat, uocem alicuius animalis, siue alterius rei sonum auribus percipere, & cōstruitur cum accusatiuo, & est primæ speciei, ut attentè satis tuam orationem audiui. Si uerò referatur ad doctrinam, est sextæ, & construitur cum ablatiui medijs his præpositionibus, A, uel. A B. D E. Ex, E. ut audiui à patre meo, de patre, ex patre, è patre, Idem significare inueniet, qui bonos libros euoluerit. Firmemus id authoritatibus. Audiui à, uel ab. Cicero de Senectute, Sæpe à maioribus natu, audiui. Audiui, De. Cicero. 1. Officio. Audiui hoc de parēte meo puer. Audiui. E. Idē. 1. de Finibus, At etiam Athenis, ut è patre audiebam. Audiui Ex. Idē actio. 3. in Verrem. Multos ex te uiros primarios audisse. Aliquando significat obedire, & fit neutrū secundæ, sed tunc loquimur per participium præsentis, & datiuum dicto, ut audiens dicto. Cicero. Actio. 6. in Verrem, Quæsiui an misisset, respōdit

Liber quartus

id, quo Ineſſe erat, ſcilicet dicto audientem fuiſſe prætori. Idem Philippica. 7. Et dicto audiens eſſet huic ordini. Quibus exemplis docemur, hoc participium audiens, duos datiuos interdum admittere, ali quando tamen alter datiuus in genitiuum mutatur. Liuius lib. 1. ab urbe condita, interim Serui Tullij iubere populum dicto audientem eſſe. Rurſus ſecundum belli Punici lib. 9. Prætoris dicto audiens nō eſſet. In quo loquendi genere utimur etiam hoc uerbum, ut paruit dicto. Poſtremò iungitur his duobus uerbis bene & malè, & ſit neutrum abſolutum, ſignificatq; bonum aut malum rumorē colligere. Cicero ad Atticum lib. 6. Hanc nonnulli amici Appij ridiculè interpretantur, qui me idcirco putent bene audire uelle, ut ille malè audiat.

Eripiendi

Eripio quoties habet cum accuſatiuo ablatiuum cum præpoſitione, A, uel, Ab, ſiue, Abs, plerunq; in bonam partem capitur, ut eripuisti me à periculo: interdum in malam, ut eripuisti à me filiā. Quoties cum accuſatiuo habet datiuum, ferè in malam partem accipitur, ut eripuisti mihi omnes bene uiuendi facultates.

De ſeptima claſſe Actiuorum.

Multi Grammatici inconfultè ſatis ac ſine iudicio ſeptimam claſſem uerbis actiuis addūt: quam faciunt ex uerbis iubendi, perſuadendi, bene aut malè dicendi, quæ pro perſona patienti datiuum habent, ut iubeo tibi, perſuadeo tibi, maledico, aut benedico tibi: itē interdico tibi aqua & igni. Verū qui

qui eam addunt, animaduērtant necesse est, ut à sua sententia discedant, eiusmodi uerba duplicem habere naturam, transitiuam, & acquisitiuam, illa accusatiuū posteriorem, hac datiuum exposcere, illa actiua esse, hac neutra secundi ordinis. Si ergo hæc uerba cum accusatiuo construuntur & datiuo, sunt actiua tertij ordinis: si cū solo datiuo, sunt neutra secundi. Non est igitur opus nouam classē fingere pro arbitratu, nam si ex uaria uerbi constructione species uellemus multiplicare, fieremus, ut incertum numerum & re- digere non possemus.

De uerbis Passiuis.

Post uerba actiua, passiuū uerbum proximum locum tenet, quia ab illis originem trahit, propterea à secundo loco de passiuis differit Antonius. Et quoniam hæc materia latissimè uidetur patēre, ne quisquam nos confusionis, aut obscuritatis iure optimo notare possit, in tria membra partiamur, in uerba scilicet passiuā, uocatiua, & reciproca. De passiuis primum disputabimus, & eorum tractatio tribus illis articulis concludetur, quid sit uerbū passiuum, in quot species spargatur, & quo pacto orationes ex uoce actiua in passiuam conuertantur.

Quid sit uerbum Passiuum.

Quemadmodum uerbum actiuum ab agendo ducitur, non quòd agat, sed quòd personam agentē demonstrat, cum qua in numero & persona conueniat: ita passiuum à patiēdo dictum est, non

Liber quartus.

quod in significando patiatur, sed quod à fronte rectum personæ patientis exigat, cum quo in numero & persona concordet. Et ne ignores de quo uerbo passiuo tradi debeat diffinitio, notes oportet triplex esse uerbum passiuum uoce tantum, significatione tantum, uoce & significatione simul. Voce tantum, Quod habet uocem passiuam, & significationem actiuam. cuius generis sunt uerba deponentia, ut loquor, obliuiscor. Significatione tantum, Quod habet significationem passiuam, & uocem actiuam, cuiusmodi sunt uerba neutra tertie. & quartæ classis, ut frigeo, exulo. Voce & significatione simul, Quod habet uocem passiuam cū significatione passua, ut amor, diligor: & tale uerbum dicitur passiuum passiui generis, & de hoc erit sermo in definitione.

Est igitur uerbū passiuum, Quod desinit in Or, & habet actiuum in O, & exigit ante se nominatiuum pro persona patienti: & ablatiuum cum præpositione, A, uel, AB, uel datiuum pro persona agentis uel facienti. Præsentem diffinitionem exponamus. Desinit in, Or, ad differentiam actiuorum, & neutrorum, quæ terminantur in O. Et habet actiuum in, O, ut seiungatur à communibus & deponentibus, quæ ea uoce prorsus carent. Et exigit ante se nominatiuum pro persona patienti. ut differat ab actiuis, & neutris actionem significantibus, quæ regunt ante se nominatiuum pro persona agentis. Intellige eam partem diffinitionis in suis modis finitis, nā in infinito diuersam habet constructionē, quæ ad-

modum & reliqua uerborū genera, ut inferius patebit. Aduerte etiam uerba passiuā a fronte regere nominatiuum patientem, uel aliquid loco nominatiui. Verg. 1. AEnēid. Cur dextram iungere dextræ non datur? Et ablatiuum cum præpositione, A, uel Ab, pro persona agentis uel facientis, ut distinguatur à reliquis uerbis, quæ casus posteriores habent loco personæ patientis. Notabis personam agentē aliquando poni in ablatiuo cum præpositione. A. uel Ab, ut filij à parentibus diliguntur. Aliquando sine præpositione quando significat rem inanimatam, ut animus fractus uoluptate, cupiditate; non à uoluptate, & a cupiditate. Aliquādo in datiuo. Verg. 1. AEnēid. Nec cernitur ulli, id est, ab ullo. Interdū in accusatiuo medijs præpositionibus, per, apud, inter. De, per, Cicero pro domo sua, Quis meminisset eū bene de Republica meritū, nisi & ab improbis expulsus esset, & per bonos restitutus? id est, à bonis. De apud, Tacitus lib. 1. Augustus apud prudentes uita eius uariè extollebatur, arguebaturq; id est à prudentibus. De inter, Cicero pro Sestio, Iudicium inter sicarios committitur, id est à sicarijs. Aliquādoneque in datiuo, neque in ablatiuo poni potest, ne in Amphibologiam incidamus, ut in uerbis actiuis tertix & sextæ classis fuit à me superius annotatum.

Queritur hac in parte, Vtrum uerbum passiuum regere possit accusatiuum? Respondeo, ex natura sua regere non posse, sed bene figuratè: idq; uideo contingere potissimum quatuor de causis.

Liber quartus

Prima, per Synecdochen. Verg. 1. AENEID. Exple
ri mentem nequit. **Secunda**, per transumptionē, quā
do uerbum passiuum pro actiuo ponitur. Florat. in
Arte Poetica, Qui purgor bilem, id est, purgando
expello bilem. **Tertia**, quando componitur cum prae
positione, quae sua natura regit accusatiuū, ut traij
cior flumen. **Quarta**, quando descendit à uerbis acti
uis quarti ordinis, ut doceor Grammaticam His cau
sis exceptis, nunquam uerbum passiuum reget ac
cusatiuum.

Eius tot sunt species.

Spargitur uerbum passiuum in sex species, quae
admodum & actiuum, à quo generatur. **Prima** cō
struitur à tergo cum ablatiuo & praepositione, A,
uel, Ab, uel cum datiuo pro persona agēti, ut Deus
amatur à me uel mihi. **Secūda** post ablatiuum uel da
tiuum, cōstruitur cum genitiuo uel ablatiuo, ut gra
narium impletur à me frumenti uel frumento. **Ter
tia** post ablatiuum uel datiuū, cum datiuo: ut pecu
niae dantur tibi a me. **Quarta** post ablatiuum uel da
tiuum, cum accusatiuo: ut tu doceris a me Gram
maticam. **Quinta** post ablatiuum uel datiuum, cum
ablatiuo sine praepositione, ut tu donaris a me coro
na laurea. **Sexta** post ablatiuū uel datiuū, cum abla
tiuo & praepositione, Ex, ut Grammatica auditur
à me exte.

Sed animaduertendum est, quòd cum muta
tamus uerbum actiuū in passiuum.

Ex superioribus classibus uerborum passiuorū
praecipit Antonius, casus illos qui in oratione ponū
tur

tur post accusatiuum principalem, nunquam mutari, sed inuariatos perpetuò manere. Absoluamus igitur tertium, quod de uerbis passiuis reliquū est, quo pacto. s. fiat orationū conuersio ex uoce actiua in passiuam. Quod ut clarius præcipiamus, notemus oportet, quædam esse uerba, quæ nulla ratione ex passiuâ uoce in actiuam conuerti possunt, qualia sunt quæ sequuntur, *linquor, consternor, creor, desideror, capior, condor, rumpor, afflor, inuehor, discrucior, findor, icor.* Vt *linquor* siue *cōsternor* animo, *creatus* est Consul, multi milites in prælio *desiderati* sunt, uirgines Vestales à summo Pontifice *capiebantur*, *conduntur* Tybridis alueo, *rūpor* in uidia, *afflatus* fulmine, *inuehor* in malos, *discrucior* animi, *findor* animo, *ictus* fulmine. Quædā tamen horū in uoce actiua reperiuntur, sed rarò, & præceptiones de ijs quæ in plerisq; contingūt, tradi solēt, nō de ijs quæ tā sunt infrequētia, ut crebra authorū lectio uix unū aut alterū exēplū suppeditare possit. Cicero Philippica. 14. Quarta legio uictrix *desiderat* neminē. Gelli⁹ li. 1. ca. 12. in libro Fabij pistoris, quæ uerba pontificē maximum dicere oporteat, cum uirginē capit, scriptū est. Et paulò inferi⁹ Quod optima lege fiat, ita te Amata capio.

Sunt alia, quæ in certis quibusdam significationibus ex uoce actiua in passiuam conuerti nequeunt, qualia sunt *pario, applico, æquiparo, succollo, maneo, occulo, lacto, fugio, aborto, fallit, præterit, fugit, leto, delecto, oblecto, scenero, mutuo.* Nam eorum priora, uoce carent passiuâ: posteriora ue-

Liber quartus

rò leto, delecto & reliqua, significatione carēt passiva, nam fiunt in uoce passiva deponentia, & actionem significant.

Sunt alia postremò, quæ ex uoce passiva in actiuam, ex actiua in passiuam migrare possunt, de quibus traditur sequens regula. Accusatiuus patientis mutatur in nominatiuum eiusdem numeri: uerbum actiuum in passiuum eiusdem temporis & modi, & cum nominatiuo concordat in numero & persona: nominatiuus agentis conuertitur in ablatiuum cum præpositione A, uel, Ab, uel in datiuum, uel in accusatiuum medijs præpositionibus, Per, Inter, Apud, ut paulò ante explicauimus, reliqui casus manet eodem loco & situ.

Fallit tamē hæc regula uarijs modis. Primò, quòd uerbum actiuum caret supino, ut metuo, disco. unde hæ orationes transire non poterunt in passiuam, metui hostem, didici bonas literas, quia metuo & disco supinis carent.

Secundò, quando accusatiuus est reciprocus, ut omnes homines amant seipsos. Accusatiuus, se, in nominatiuum mutari non potest, quia eo caret, conuertetur igitur in hunc modum, omnes homines amantur à seipsis. Persona itaq; agens fit patiens in eodē casu & accusatiuus mutatur in ablatiuum agentem. Sed si persona patiens fuerit nomen aliquod quod careat recto, nomen aliud eiusdem significationis in prioris locum succedet: ut fero opem amicis, auxilium fertur à me amicis.

Tertiò, quando uerbū est imperatiui modi, & ha
bet

bet pro persona patienti accusatum. Me, conuerti non potest per imperatiuum, quia caret prima persona: sed huiusmodi oratio fiet per subiunctiuum, ut magister doce me, magister, fac ut ego docear abs te: neq; apte dixeris, à magistro ego docear, quia sensus orationis mutaretur.

Quartò, quando in oratione fuerint iubendi, per suadendi, fœnerandi, aut mutuandi uerba, tunc datiuus mutari solet in nominatiuum: ut iubeo tibi hoc, tu iuberis à me hoc, non, hoc iubetur tibi à me. Persuasi hoc ciuibus, ciues persuasi sunt hoc à me, sed multò uenustius: hoc persuasum est a me ciuibus. Fœnero siue mutuo tibi nummos, tu fœneraris siue mutuaris à me nummos, neq; sic liceret conuertere nummi fœnerantur siue mutantur tibi à me, quia in uoce passiuua deponentia fiunt, nec significare passionē possunt. Similē fere rationem sequuntur oblectandi uerba, ut ego delecto te, non posses sic mutare, tu delectaris à me, sed tu delectaris mecum: quia efficitur uerbum deponens.

Postremò, cum uerbo interdico, regula conuersionis uaria est. Quod ut melius percipere possis: notes necesse est, hoc uerbum interdico uariā habere à tergo constructionē. Aliquando iungitur datiuo & ablatiuo. & satis eleganter (authore Laurentio lib. 3, cap. 39. & tunc est neutrum, ut interdico tibi aqua & igni. Aliquando accusatiuo & datiuo, & est actiuum tertij ordinis, ut interdico tibi aquā & ignem, quę constructio licet à Laurentio negetur, quam plurimis authoritatibus multum suscepit ro-

Libër quartus

boris. Suetonius in Domitiano, Interdixit histrioni
bus scenā. Liuius. 34. Fœminis duntaxat usum pur
puræ interdicens? Iustinus, Cui paulò antè omnē
humanam operam interdixerant. Valerius Maxi
mus lib. 2. Interdixit ei conuietum hominum, usumq;
balnearū. Postremò adhæret accusatiuo & ablati
uo, & est actiuū quinti. Vt interdico te aqua & ig
ni. Cæsar de bello Gal. Omni Gallia Romanos inter
dixisset. Verūm hæc constructio cæteris rarior est.
Ex prima actiua, fit hæc passiua per uerbū imperso
nale: uocis passiua, Interdicitur tibi aqua & igni,
qua locutio frequentissima est. Ex secunda actiua,
fit hæc passiua, aqua & ignis interdicitur tibi à me
Ex tertia fit hæc passiua, tu interdiceris à me aqua
& igni, cuiusmodi locutio non admodū frequens est
apud authores. Cæterū si interdico pro obistere
uel obstare ponatur, cum solo datiuo cōstruitur: &
est neutrū secundi ordinis. Cice: in Verrem, Pater
improbus, cui nemo interdicare posset.

De uerbis Vocatiuis.

Absoluimus uerba passiua: agamus de uocatiuis,
breuiterq; explicem⁹ quid sint, quid significant, quo
pacto construantur. Cū uerba uocatiua à uocādo
dicta sint, quòd his soleamus in nostris appellationi
bus uti, illa dicuntur uocatiua, quibus nomina perso
nis imponimus. Sunt tamen propriè quinq; , dicor,
uocor, nominor, appellor, nūcupor: nā illa cognomi
nor, agnominor, inscribor, salutor, & similia, nō uo
catiua, sed quasi uocatiua appellātur à Grāmaticis.

Quid significant.

Hec

Hæc uerba nō minus significant passionē, quam passiuā, sed dicuntur uocatiua, quod per ea uocemur & quod utrinq; tā à frōte, quam à tergo nominatiuū regāt, ac propterea inter reciproca numerantur. Hanc autem appellationem non habent eorum actiua, cū eam constructionem non sortiantur.

De constructione uocatiuorum.

Verba uocatiua descendunt à uerbis actiuis regētib; duos accusatiuos pro eadē re acceptos, ut uoco te uirum iustum. Exigunt quemadmodum & reciproca, duos nominatiuos, alterū à fronte, alterū à tergo pro eadē etiā re acceptos, ut ego uocor uir iustus. Nec licebit addere ablatiuū cū præpositione loco personę agentis à Petro, uel ab Antonio. Secus est, si passiuā sint horū uerborū, uoco, appello: tunc enim bene licebit loqui per ablatiuum cū præpositione, ut ego uoco te Petrū, tu uocaris à me Petrus. De cōstructione infinitiuorū, qui à uerbis uocatiuis formantur, nō est animus quicquā presenti loco dicere, quia eandē prorsus cōstructionē habēt cū infinitiuo, esse, de quo in materia infinitiuorū latissimè disputabimus. & quæ de eius cōstructione regulæ tradētur, uerbis uocatiuis & reciprocis etiā deseriuet. Illud tamē dicere nō pigebit, horū uerborū gerundia nullū casum à tergo regere, quia in significatione passiuā gerundia omni casu priuari solent: fient autem huiusmodi orationes per subiunctiuum, ut ueni Complutum, ut dicar, siue habear sapiens, non gratia dicendi, siue habendi sapiens.

Quot modis latinè poteris, q̄ uocaris expm̄ere

Et quia

Liber quartus

Et quia uideo non tantum pueros, quorum ignorationi parcendum est, sed uiros etiam doctos, qui sine graui culpa errare non possunt, hac una in re hallucinari, & uix scire, qui uocetur, Latine & eleganter exprimere, ideo placuit de hoc etiam precepta tradere. Quatuor modis rogare solemus de nomine proprio alicuius, & totidem respondere. Primo rogamus per relatiuum, qui, & uerbum uocatiuum, & respondemus per idem uerbum uocatiuum, & nomen proprium in nominatiuo, ut qui uocaris? R. uocor Petrus, non quomodo uocaris, quia huiusmodi interrogatio barbaris mi notari solet.

Secundo interrogamus per hanc orationem, quod tibi nomen est? Respondemus aut per nominatiuum, est mihi nomen Petrus, aut per genitiuum Petri, aut per datiuum Petro. De nominatiuo Plautus in Menæchmis, Mihi est Menæchmus nomen. De genitiuo, Idem in Amphitryo. Nomen Mercurij est mihi De datiuo, Liuius. l. lib. Decadis. i. Cui Faustulo nomen fuisse ferunt. Verg. AEnëid. i. Cui nunc cognomen Iulo. Et hic loquendi modus per duos datiuos, cæteris multo & elegantior & politior est. Tertiò quarimus per hanc orationem, quod nomen habes? Respondemus aut per nominatiuum, habeo nomen Petrus, aut per genitiuum Petri, aut per accusatiuum Petrum. De nominatiuo, Ouidius. l. Metamor. Lætea nomen habet. De genitiuo passim ad manū sunt exēpla. Responsio uerò quæ per accusatiuum fit, non habet tantum nitoris & elegantie. Quartò, fit interrogatio per hanc orationem, quò nomine ap-
pella-

pellaris: Et respondere licebit, aut per nominatiuū, appellor nomine Petrus, aut per genitiuum, aut per ablatiuum Si uelis significare nomen, quod tibi a sacerdote in sacro Baptismo inditum fuit, id facies eleganter per duo uerba indo, & impono: dummodo per nominatiuum, genitiuum, datiuum, aut postremo per accusatiuum loquaris, in hunc modum. Sacerdos indidit siue imposuit mihi nomen Petrus, Petri, Petro, Petrum. Verum priores responsiones uisitatiores sunt.

De co ordātia uocatiuorū cū nominatiuis.

Illud postremo de uocatiuis notabis, nimirum uerba uocatiua Latine & eleganter poni posse inter nominatiuos diuersi numeri. & tunc ferè cum precedente conuenire in numero & persona: ut hæc urbs uocatur Athenæ. Quod si uterq; præcedat nominatiuus, similiter cum uiciniore cōcordat, ut hæc urbs Athenæ uocantur. Hæc satis de uocatiuis.

De Reciprocis.

Verba reciproca cum à reciprocando, hoc est repetendo dicta sint, casum similem precedenti exposcunt. Hæc autem duplicia sunt, actiua, & passiua. De actiuis, qualia sunt ambulo, incedo, euado, in cōsiderationibus erit sermo. De passiuis est præsens institutum qualia sunt scribor, habeor, iudicor, prædicor, agnoscor, existimor reputor, censeor, quibus etia adaitur uideor. Hæc passionem significant quæ admodum & uerba passiuæ, dicuntur tamē reciproca quia à tergo regunt casum similem precedenti, ut habeor doctus, prædicor sapiens, iudicor probus, neque

Liber quartus

que opus est ablativum addere cum præpositione. Descendunt autem, quemadmodum & uocatina, à uerbis finitis recipiuntur duos accusativos pro eadem re acceptos.

Quotuplex sit reciprocatio.

Reciprocatio duplex est, rei, & casus. Rei est agētis passio, hoc est quādo persona agēs patitur: ut Petrus amat se. Casus, est repetitio eiusdem casus à tergo, qui erat à fronte, & de huiusmodi Reciprocatatione loquuntur Grammatici in præsentia.

Inter uerba reciproca numeratur hoc uerbū, uideor, quod si referatur ad sensus externos, habet constructionem uerbi passiuī, ut Paries a me uidetur, hoc est proprijs oculis parietē intueor. Si ad interiores, deponēs uerbū est, & tunc loquimur per uideor mihi aut tibi, uideris mihi aut tibi, in hunc modum, uideor mihi sapiens, uideor tibi sapiens, uideris mihi sapiēs uideris tibi sapiēs, non uidetur mihi quòd sim sapiēs, aut uidetur tibi quòd sim sapiēs, nam rusticanus hic sermo est, & planè agrestis.

De uerbis Neutris.

Definitis probeq; explicatis uerbis actiuis ac passiuīs, tertio loco differit Nebriffensis de neutris. Quæ ideo neutra dicta sunt, quòd neq; actiua, neq; passiua sint, nō actiua cū uocē passiuā in, Or, non habeāt, nō passiua, cū nō desinant in, Or. Itē etiā quia nec planè actiua nec planè passiuā significatio nē sortiuntur, nā uerbis actiuis proprium est, ac ueluti naturale significare actionē, passiuīs passionē, quod alienum est a natura uerborum acutorū, quæ

partim

partim actionem, partim passionem significant. Exponamus iā, quidnā sit uerbum neutrum, & in quot species distribuatur

Quid sit uerbum neutrum.

Vt intelligas de quo uerbo neutro tradi debeat definitio, nota triplex esse uerbum neutrum. Quoddam est uerbum neutrum actiuum, quoddam neutrum passiuum, quoddam neutro passiuum. Verbum neutrum actiuum est, quod significat actionem, ut seruiro, careo. Verbum neutrum passiuum, quod significat passionē, aut innatam, ut caleo, frigeo, aut illatam, ut sapulo, exulo. Verbum neutropassiuum, quoddam cum uerbum neutrum sit, prateritum tamen habet passiuum, ut audeo ausus sum, gaudeo gausus sum, solco solitus sum. De prioribus duobus generibus neutrorum proprie traditur definitio, quae sic se habet, Verbum neutrum est, quod desinit in O, & non habet passiuum in Or, & exigit antese nominatiuum rei agentis in significatione actiua, & rei patientis in significatione passiua, post se uerò omnes obliquos præter accusatiuum. Exponamus huius finitionis partes. Desinit in O, ad differentiam passiui, deponentis, & communis, quae omnia desinunt in Or. Et non habet passiuum in Or, ad differentiam uerbi actiui, quod habet uocē passiuā in Or. Et exigit ante se nominatiuum rei agentis in significatione actiua, nā uerba neutra significantia actionem, qualia sunt primæ, secundæ, & quintæ speciei, exigunt ante se nominatiuum pro persona agente uel faciente, ut ego seruiro. Et rei patientis in signifi-

Libër quãrtus

significatione passiua. Nã quæ passionẽ innatã, aut illatã significant, qualia sunt uerba tertiæ, quartæ classis, exigunt ante se nominatiuum pro persona patienti, ut ego ardeo, tu friges. Intellige etiã hãc partẽ in molis finitis, nã modus infinitus diuersam in omnibus uerborum generibus habet constructionẽ, ut in materia infinitiuorum latissimẽ patebit. Post se uerò omnes obliquos præter accusatiuum. Nã uerba neutra quatenus neutra sunt, cum accusatiuo construi non possunt, admittunt tamen à tergo reliquos obliquos pro classium diuersitate, nisi fortẽ ponatur absolute in oratione ut ego sedeo, tu stas.

Hæc diffinitio traditur de uerbis integris & regularibus, non de defectiuis, aut de ijs quæ reliquorum normã non seruant, quod dictum uolo propter sum, meminì, cœpi, & reliqua id genus, quæ inter neutra numerantur, carent tamen uoce actiua in. O Traditur etiam de neutris, quæ in actiua nõ transierunt, nã illa dormio, uiuo, iubeo, impero, fiunt sepe actiua, & propterea in uoce passiua frequētissime reperiuntur, ut in his locutionibus, iam tertia uiuitur ætas, tota mihi dormitur, hyems, tu iuberis, ciues sunt oratione persuasi.

In quot species, distribuuntur

Verbum neutrum in quinque species distribuitur nã quinque modis tantum à tergo constructum reperitur. Quæ cum genitiuo uel ablatiui cōstruuntur primam classẽ cōstituunt. Quæ cum datiuo, secundã. Quæ cum septimo casu tertiã: Quæ cum ablatiui & præpositione A uel ab quartam. Quæ cum
nullo

nullo casu nisi media præpositione, quinta. De quibus operæpretium erit sigillatim tractare.

De prima classe Neutrorum.

Verba huius classis à fronte nominatiuum agentem requirunt, à tergo genitiuum uel ablatiuum patientem sine præpositione: ut careo pecuniarum uel pecunijs. Ac licet tam genitiui quàm ablatiui constructio omnibus uerbis primæ classis communis sit, & propria, ut quæ hanc speciem constituit: communior tamen est ablatiui constructio, & apud bonos authores magis frequens. Genitiuus uerò non possessionem (ut quidam Grammatici somniarunt) sed passionem significat, cum in eum transeat uerbi actio. Postremo uerba huius ordinis, quemadmodum & reliqua uerba neutra, dicuntur significare debilem transitionem, cum eorum actio non in accusatiuum, sed in genitiuum uel ablatiuum, aut reliquos obliquos dirigatur, ac propterea obliqua transitio dicta est: quæ uerò in accusatiuum refertur, transitio recta à Grammaticis est appellata.

De multiplicibus uerbis primæ classis Neutrorum.

Quadruplicia sunt uerba huius classis. CAREN-
DI, seu indigendi, ut careo, egeo siue indigeo, uaco.
ABUNDANDI, ut abundo, redundo, affluo, exuber-
ro. SATAGENDI, ut satago. ABSTINENDI, ut absti-
neo, supersedeo.

Carendi & Indigendi uerba.

Careo & indigeo differunt: nā caremus rebus de-
sideratis, inest enim (teste Cicerone prima Tuscula

na) uelle in carēdo: indigemus uerò rebus ad ista cō
seruationem necessarijs. Sed id nō semper uerū est.
nā nō inueniste dicimus, carere culpa, uitio crim-
ine, labe, febris quartana, quarum rerū nos nō tunc
desiderium. Itē carco cum ablatiuo, indigeo cū gen-
tino frequētius constructur. Carco prater uulgatā
cōstructionē genitiui & ablatiui olim accusatiua re-
gebat. Plautus in Curcul. Perdit⁹ sum, quia id, quod
amo, carco. Itē Marcus Varro dixit, Multa carco.
Ceterū propriē accusatiuū regit. cū significat la-
nā carminare. Plautus, Ancillas sedere iubeas. lanā
carere, id est, carminare. Ab hoc uerbo quatuor de-
scēdunt participia, carens, cariturus, cassus, carēdus
Cice. de Natura Deorum, Meliora sunt, quā ea
quæ sunt his carentia. Iuuenalis, Cariturus turlu-
re magno. Verg. 2. A Eneid. Nūc cassum lumine lu-
gent. tametsi Priscian. asserit nomen esse, & uacuū
siue priuatum significare. Quid. in Epistola Penelo-
pes, Virq; mihi dempto sine carendus abest.

Vaco significat aliquando operā dare, & exigit
datiuum, sitq; neutrum secundæ clascis: ut uaco sapiē-
tia, id est, do operā sapientiæ. Aliquādo cōtrariā ha-
bet significationē. & desiderat ablatiuum cum præ-
positione, ut uacare à sapiētia, id est, nō dare operā
sapientiæ. Interdum significat carere, & petit abla-
tiuum sine præpositione, & est huius ordinis, ut ua-
co culpa, crimine. Cicero. 1. Officio. Omnis actio ua-
care debet temeritate, & negligētia. Quo sensu ab-
latiuum etiā habet cum præpositione A, uel Ab. Ce-
sar lib. 3. bellorum Ciuium. Hæc à custodibus clas-
sum

De constructione.

sum loca maximè uacabant. Interdum capitur pro
otium est, & fit impersonale: & aliquando ponitur
absolutè ut uacat, non uacat, aliquando cum casu, ut
uacat mihi, non uacat mihi. Sæpe sequitur infiniti
uus. Verg. 2. AENEID. Et uacat annales nostrorum
audire laborum:

Abundandi.

Abundo, affluo, & reliqua uerba copiam signifi
cantia, frequentius adherent ablatiuo, ut abundat si
ue affluit diuitijs. Iunguntur etiam genitiuo. Ver
gilius in Bucolicis. Quàm diues niuei pecoris, quàm
lactis abundans. Hæc, oratione conuersa, petunt da
tium, ut mihi diuitiæ si affluerint, ad eas mentē
cogitationemq; non conuertam.

Satagendi.

Satago, à satis & ago cōpositum est, & cōstrui
tur cum genitiuo uel ablatiuo, ut hic satagit rerum
suarum uel rebus suis. Frequentius tamen ponitur
absolutè. Cæsar in cōment. Qui satagentibus celeri
ter occurrant. Aliquando resoluitur, eadem seruata
cōstructione. Plautus in Bacch. Nūc agitas sat tute
rerū tuarū. Est. cum ablatiuū accipit cū præpositio
ne, De. Aulus Gellius li. 9. Instruebātur acies à Cō
sulibus, de ui ac multitudine hostium satagentibus.

Abstinenti.

Abstineo sextæ actiuorum est, rarò tamen cum
genitiuo construitur, & in hoc ordine reponitur.
Vnde Horat. dixit in Odis, Abstine irarum. Absti
ne risus, Terentius. Cum uerbis præcedentibus
numerantur & illa, quæ sequuntur, sto & consto.

Liber quartus

Quæ si pretiū significant sunt secundæ actiuorum: ut sapientia magno stare siue constare solet. Sed si sto significet consistere, & consto compositum esse, sunt huius classis, ut stare dictis, promissis: itē homo anima & corpore constat, id est cōpositus est. Superioribus accedit memini: quod uerbū cū significat memoria tenere, siue recordari, tripliciter cōstruitur. Cū genitiuo, Seneca lib. 5. Controuersiarum. Illa dū meminit noueræ, matris oblita est. Cū accusatiuo Verg. in Bucolicis, Numeros memini. Cū ablatiui & De, Cicero pro Lucio Flacco, De copijs meminere. Si significet mentionē facere, cū genitiuo & ablatiui tantū cōstruitur, cū accusatiuo minime, ut Cicero meminit huius rei, uel de hac re, hoc est mentionē facit. Item uerbū substantiuum sum, cū cōstruitur cū genitiuo. & fastidit, & pendeo, ad hanc speciem reducuntur, ut uirtus est hominis. Plautus in Aulularia, Fastidit mei, quia uidet me suam amicitiam uelle. Item animi pendeo, pro dubium esse & ancipitem.

De secunda Neutrorum.

Neutra secundæ exigunt à tergo datiuū acquisitiuū, & propterea acquisitiua appellantur à Grammaticis: & hic datiuus est proprius casus speciei, cū eā constituat, ut seruus frugi seruit dño fideliter.

De multiplicibus uerbis secundæ classis.

Verba huius classis adeo multa sunt, ut in certum numerum colligi non possint: ea tamen deprehendere licebit, aut compositione, aut significatione. Compositione tripliciter. I. omnia cōposita à uerbo substantiuo,

statiuo, sum, cum datiuo construuntur. Et in hoc gradu reponuntur. ut adfui siue interfui lectioni, prae-
fui exercitui, profuit siue obfuit mihi. Excipitur
possum, quod aut absolutum ponitur in oratione, ut
plurimum potest uirtus apud omnes: aut cōstruitur
cum accusatiuo, ut Deus omnia potest. Deinde com-
posita ab his aduerbijs bene, malè, satis, ut lex diui-
na iubet omnibus benefacere, nemini malè, cumula-
te satisfacere alicui. Quæ uerò cum satis composita
sunt, si genitiuo iungantur, genitiuus ab aduerbio
satis, non à uerbo ex natura sua regetur, ut satis de-
dit pecuniarum. Postremò cōposita cum his prepo-
sitionibus, In, ut inseruio, in sto, illudo, inuideo. Sub,
ut subuenio, succurro, supplico, Ad, ut assurgo, ad-
sto, Præ, cum uerbis excessus, ut praeuenio, præcel-
lo, præsto, præcurro. Quæ omnia licet cum accusa-
tiuo constructa reperiantur aliquando, plerunque
tamen sunt huius ordinis.

Deprehenduntur etiam significatione. Et pri-
mum omnium ponuntur in hac specie, CEDENDI
uerba ut cedo, FAVENDI, ut studeo, faueo, aspiro,
PARCENDI, siue indulgendi, ut parco, ignosco, in-
dulgeo. SERVIENDI, ut seruio, inseruio. Postremò
TIMENDI, PROVIDENDI, PLACENDI cū cōtra-
rijs, ut timeo, metuo, prouideo, placeo, displiceo. De
primis aliquid notemus necesse est,

De Cedo.

Hoc uerbum cedo, si diphthongo scribatur, si-
gnificat propriè flagellare, et est perpetuò acti-
uum primæ, ut uirgis aliquem cedere ad necem,

Liber quartus

Si scribatur sine diphthongo significat aliquādo dare locum alicui, & est actiuum ter.ti.e, ut cedere locū maiori, Interdum significat uictum se fateri, aut alicui non repugnare, & est huius formę, & ex uarijs datiujs quibus iungi solet, uarię etiam loquendi formulę promanarunt, ut cedere fortunę, oneri, religioni, authoritati, tēpori, precibus, hoc est his omnibus succumbere, & ab his se uictum fateri. Interdum capitur pro discedere & construitur cum ablatiuo, aliquando sine prępositione, aliquando medijs his prępositionibus, A, De, Ex. Vt cedere patria, urbe, domo, foro, uita, iure, possessione. Siue cum prępositionibus prædictis.

Studendi.

Studeo pro fauere, est huius ordinis. Cicero pro Celio, Multi boni adolēscētes illi homini nequam atq; improbo studuerūt. Significat irē alicui rei opera dare, & iungitur aliquando datiuo: aliquādo accusatiuo. Datiuo, ut studere rebus nouis, pecunię, imperijs, opibus, laudi, glorię, artibus, disciplinis: quę in frequenti usu sunt apud probos authores. Accusatiuo in eadem significatione. Cicero de reditu suo. Cū uerō literas studere cœpit, captus est uno uerbo uoluptatis. Regit quoq; accusatiuū ex ui idiomatis Latini, cū capitur pro uolo siue affecto. Cicero sexta Philippica. Vnum sentitis omnes, unum studetis, id est, affectatis. Postremò adhæret ablatiuo siue accusatiuo, prępositione In interiecta. Gellius lib. 11. Si quis in ea re studebat, Fabius lib. 10. Poete in id solum student.

Parcen

¶ Pareendi & indulgendi.

Parco & indulgeo ex uarijs datiujs, quibus socia-
ri solent, uariâ significationē sumunt, unde parcere
ualetudini, uite, auribus, dolori, iracūdiæ. Itē indul-
gere ludis, nugis, amori. Veneri, genio, hoc est, ope-
ra dare. Huius naturæ est incumbere, ut studijs incum-
bere uel (Latine magis) in studia. Cæterum parco
pro conseruare actiuum est. Verg. 10. A Eneid. Ar-
geri atq; auri memoras quæ multa talēq; Natis par-
cetis id est, seruas. Postremò indulgeo cum accusa-
tione etiam reperitur cōstructum apud Terentium,
ex imitatione antiquitatis, in Heautontimo. Ejiciū-
da hercle hæc mollities animi, nimis me indulgeo. Si
uerò capitur pro sese dedere, siue permittere, nul-
lus negat actiuum esse tertiæ Iuuenalis Saty. 2. Ar-
denti sese indulsiße Tribuno hoc est permisisse.

¶ De tertia neutrorum.

Verba huius speciei à fronte exigunt nominati-
uum patientis, à tergo ablatiuum sine præpositione,
uel effectiuum agentis, ut ardeo calore. Ablatiuus
uerò ille proprius est speciei: cum eā constituat &
regitur aut ex natura uerbi aut ex ui instrumenti.
Notabis tamen, huiusmodi uerba & significationem
& constructionē uerborum quartæ gerere, nā cum
ablatiuo & præpositione A uel Ab constructa repe-
riūtur, tu uerò id non trahes in usum cōsuetudinēq;
loquēdi. Ouid. 1. Meta. Postquàm uetus humor abig-
ne perecaluit solis. Idē alibi. Tumida feruebat ab ira
Idē etiā alibi. Pluuioq; madescit ab austro. Cice. 2.
de Natura Deorū. Ea calefcit primū ab ipso spū.

Liber quartus

Sunt etiam absoluta, ut ego paleo, tu friges.

Præcipiunt ueteres Grammatici, uerba huius classis hoc potissimū de nomine à uerbis quartæ differre, quòd hæc significat passionē innatam, hoc est intus natam, ut ardeo amore, aestuo febris, illa uerò illatā, hoc est aliunde siue extrinsecus prouenientē, ut discipulus uapulat à magistro. Verū ea differentia nulla est, nam uerba huius formæ passionē etiam aliunde illatam significant. Nullus enim sanæ mentis huiusmodi locutiones negabit Latinas esse, Ardeo solis feruore, calco igni, frigeo gelu, terræ humore madescent equorum ungulæ. Nos itaq; eā differentiam assignamus, quòd uerba tertię tam innatā, quàm illatā passionem significant, quartæ, illatam tantum.

De multiplicibus uerbis tertię classis.

Sexcuplicia sunt huius classis uerba. CALORIS, & frigoris, ut caleo, ferueo, aestuo, flagro, frigeo, algeo. INCHOANDI, ut frigesco, feruesco, caleasco. Itē TERMINATA IN FIO, ut calefio, frigeo, tepesco. MANANDI, ut mano, fluo, scaturio. GAUDENDI, cum contrariis, ut gaudeo, exulto, gestio, doleo, mereo. Postremò CRESCENDI, ut glisco, cresco, augeo. Illa etiam ad hanc speciem reducuntur, arceo, uiro, paleo, squalco, tumco, mado, & similia.

De uerbis inchoandi.

Veteres Grammatici (ut testis est Laurentius lib. 1. Elegantiarum cap. 22) uno ore uniuersi affirmarunt uerba in, sco, ut caleasco, frigesco, significare inchoationem quandam, ac propterea appellari debere inchoatiua. Verū Laurentius non senten-

sententiam confutat, & multis cum rationibus, tum authoritatibus probat, hæc uerba augmentatiua potius appellanda, & passionem intrinsecus natam significare, cum incremento tamen assiduo atque continuo eiusdem passionis: ut caleſco, indies calidior fio, & gresco, indies fio ager. Est tamen duplex differentia inter hæc uerba, & primitiua à quibus formantur. Prior est in significatione, nam primitiua passionem perfectam & iam consummatam significant, ut frigeo, id est, frigidus sum, deriuata uerò significant passionem nondum perfectam, sed tantum inchoatam, ut frigesco, id est, frigidior fio. Posterior est in resolutione, nam primitiua resoluntur per uerbum substantiuum & nomen adiectiuum, ut caleo, id est, calidus sum, deriuata uerò per adiectiuum & fio, ut caleſco, id est, calidior fio. Vnde colliges nullam esse differentiam inter uerba in ſco, & fio, cum utraque passionem similem significant.

Manandi.

Hoc uerbum mano, reciprocā quandam habet constructionem. Nam aliquando construitur cum ablatiuo sine præpositione, & tunc locus qui manat ponitur in nominatiuo, liquor uerò in ablatiuo ut fons manat aqua. Aliquando construitur cū ablatiuo & præpositione, Ex, & tunc liquor qui manat, ponitur in nominatiuo, locus à quo manat, in ablatiuo cū præpositione, ut aqua manat ex fonte. Interdum, ex more magis Poetarum quàm Oratorum, construitur cum accusatiuo. Horatius. i. Epistola. 19. epistola, Fidis enim manare Poetica mella

E s te

te solum.

De quarta neutrorum.

Verba quartæ formæ, neutra passiua dicta sunt à Grammaticis: Neutra, quia non habent passiuam uocem in Or: Passiua, quia passionem illatam significant, hoc est à causa exteriori procedentē, & more uerborum passiuorum construuntur. Exigunt enim à fronte nominatiuum patiētem, à tergo ablatiuum cum præpositione A, uel Ab, agentem, ut discipuli uapulant à magistro. Differunt tamē à passivis, quòd datiuum loco personæ agentis recipere nō possunt, reliquos uerò casus perinde ac passiuia possunt admittere. Ablatiuus uerò hic ueluti proprius est speciei, cum eam constituat.

De uerbis quartæ classis.

Quinque sunt uerba huius classis, exulo, liceo, uapulo, ueneo, fio. Verū tria posteriora ablatiuū personæ recipere possunt, ut fures uapulant à Li-
 storibus, serui ueneunt à mangone, domus fit ab architecto. Duo uerò priora exulo & liceo, similem ablatiuum recipere non solent, nec enim dices, homicidæ exulant à prætore, liber licet à me. Sed exulo recipit ablatiuū loci, ut homicidæ exulant à patria, ab urbe, à focus & aris. Item recipit reliquos locorum casus, ut exulo Compluti, uel Compluto. Quādo uerò ablatiuus personæ intercesserit, aut fiet oratio per accusatiuum cum, Per, ut exulat per prætorem, per Regem. Aut per uerba relegor, agor, mittor, cum nomine exilium: ut relegatur à Præ-
 tore, agitur siue mittitur in exilium à prætore. Neq;
 est

est quòd Antonium in crimen uoces, cùm ille puero
rū gratia, quos Gramaticis præceptis formare stu-
debat, illa exempla composuerit, in quibus ablati-
uius personalis est, ut scilicet aperte & planè signifi-
cetur hæc uerba cum ablatiuo construi. Liceo etiā,
ablatiuum agentem repudiat, nam plerunque abso-
lutum ponitur in oratione. Si uerò personalis casus
interuenerit, fiet etiam oratio per accusatiuū cum,
Per, ut per me licet liber. Casus tamen pretium uel
æstimationem significantes semper licet illi appo-
nere. Mart. lib. 6. Paruo cū pretio diu liceret Ci-
cero ad Atticum lib. 12. De Drusi hortis quanti li-
cuisset tu scribis, id ego quoque audieram.

Quidam adscribunt huic speciei uerbum nubo,
sed falsò, nam est secūda neutrorum, ut puella nup-
sit uiro: non nego posse etiam reperiri alterius spe-
ciei, nam mutata Syntaxi, uerba in aliam & aliam
speciem transire solent. Cicero lib. 2. de Oratore,
Quocum nupta erat matertera nostra. Aulus Gel-
lius lib. 1. Vt una apud duos nupta esset.

De quinta Neutrorum.

Huius ordinis uerba dicuntur absoluta natura,
quia nullum casum post se regunt pro persona pa-
tienti, nisi media aliqua præpositione. Cætera uerò
uerba, cū suis casibus posterioribus quos sua natu-
ra regere solent, priuantur, dicuntur absoluta casu:
ut ego amo, tu doces. Exigunt igitur à fronte nomi-
natiuum agentis, à tergo accusatiuum uel ablati-
uum patientis, media tamen præpositione, ut ego ui-
uo in urbe, eo in forum, in ecclesiam. Hic tamen ac-

Liber quartus.

cusatiuus uel ablatiuus cum præpositione, casus proprius non est, sed tanquam proprius, cum quintam speciem constituat à reliquis diuersam ac distinctā, Possunt tamen huius speciei uerba accusatiuum regere, quinque modis. Primò, cum accusatiuus ille significat rem uerbi, ut uiuo uitam, dormio somnum, nauigo æquor, sed tunc potius actiua, quàm neutra dicenda sunt. Secundò, per Synecdochen: ut tremis pauore ossa, id est, habes ossa pauore trementia. Tertiò, per transumptionem, quando uerbum scilicet neutrum ponitur pro actiuo: ut auorū & proa uorum nomina sonare, id est, superbo quodam & elato sono representare. Quartò, per Enallagē partium orationis, quando una pars orationis pro alia ponitur: ut bacchanalia uiuit, dulce sonat, furit indomitum, id est bacchanaliter, dulciter, indomite. Quintò, compositione, quando scilicet componuntur cum præpositione, quæ sua natura accusatiuum regit: ut obire mortem, adire periculum.

De multiplicibus uerbis quintæ classis.

Quadruplicia sunt uerba huius classis. **VLVENDI**, ut uiuo, dego: **MOVBNDI** seu quiescēdi, ut co curro, uenio, incedo, deambulo, sto, sedeo, quiesco: **CERTANDI**, ut certo, pugno cōtēdo, **NATVRAE**, ut pluit, grādinat, ningit, fulgurat, tonat. In omnibus his uerborum generibus nihil est annotatione dignum, præterquàm in uerbis pugnandi, de quibus uerbum unum dicamus.

Pugnandi.

verba pugnandi in compositione actiua fiunt, li-

cet

cet non componantur cum præpositione accusatiui, ut impugnavit hostes, propugnauit urbē, oppugnauit oppidum. Hæc item datiuum regunt more Græcorum, ut noli mihi contendere. Si uerò mutant significationem, mutabunt etiam genus, ut contendo, si pro comparare, aut pro uehementer extendere capiatur, actiuum erit: ut contendere purpurā Tyriam cum Aquinate, contendere oculos, arcum, animum.

Animaduertendum est hoc verbū Sum es fui.

Quoniam uerbum substantiuum fons est, & caput omnium aliorum uerborū, propterea in nullo genere determinato constituitur sed eminentia quadam ac dignitate præcellens, liberū ac sui iuris esse censendum est. Et quoniam uariam habet constructionem, in certam quandam speciem cadere non potuit, unde non immeritò illud à reliquis separauit Author, & præsentī loco seorsum de illo suscepit dissertationem. Exordiamur igitur uerbi substantiui tractationem, ab eius definitione.

Verbum substantiuum est, Quod significat substantiam uel essentiam rei, sine actione uel passione, & cæteris uerbis substat, uel in coniugando, uel in resoluendo. Membra definitionis explicemus.

Quod significat substantiam uel essentiam rei. Nam uerbū substantiuum substantiam significat, quæ soli Deo propriè conuenit, qui cū æternus sit, & nec mutari nec corrumpi possit, solus uerè esse dicitur iuxta illud Exodi, Ego sum qui sum, & rursus, Qui est, me misit. Cætera uerò cū corruptioni uarijsq;

Libër quartus

mutationibus subiecta sint, nō ita dicuntur esse, cū
eorum natura tota à Deo Opt. Max. dependeat. Si
ne actione uel passione. Hac parte definitionis ex-
cluduntur uerba adiectiua, quę non substantiam, sed
actionem uel passionem significant ut amo, lego, a-
mor, legor, quam uerbum substantiuum nunquā im-
portat. Et ceteris uerbis substat, uel in coniugando
uel in resoluendo. Nam quemadmodum substantia
ipsa cunctis accidentibus substat, neque accidentia
ullo modo esse possunt, nisi quātisper substantiæ ad-
herescunt, sic uerba, quę aliquid certum nobis di-
cuntur significare, uerba ullo pacto esse nequeunt,
nisi quatenus substantiuum uerbum includunt, hoc
est. uim illam copulandi suppositum cum appposito.
Solet autem substat in coniugandō quinque tan-
tū generibus uerborum, quę in sua coniugatione
uerbo indigent substantiuo. Verbis primū passi-
uis, ut amatus sum: Deponentibus, ut locutus sum:
Communibus, ut largitus sum: Impersonalibus pas-
siuę uocis, ut cursum est, Neutro passiuis, ut gaudi-
us sum. In resoluendo uerō substat omnibus uerbis
cuiuscunque generis, & naturę sint, quę resolu-
tio, si uerbum sit actiuum, fit per participium prę-
sentis, & uerbum substantiuum, ut ego amo, id est,
sum amans, si passiuum, per participium pręteriti,
& idem uerbum, ut ego amor, id est, sum amatus.
Hac parte definitionis excluduntur uerba illa, fio,
exto, existo, quę substantiua non sunt, cū nec in
coniugando, nec in resoluendo ceteris substat uer-
bis, sed ipsis, ut ceteris, substat sum, dicuntur tamen
quasi

quasi substantiua, quia in sua syntaxi, uerbi substantiua naturam imitantur.

De constructione uerbi substantiui.

Proximū est, ut agamus de cōstructione. Hoc uerbum, sum, aut est impersonale, aut personale, si impersonale sit, suā habet peculiare cōstructionē, de qua in impersonalibus dicemus. Si personale sit, ponitur aliquando absolute, aut quando positi se nō regit casum, ut Deus est, aut quando sequitur aduerbiū, ut Deus est ubiq;, aut quando sequitur casus cū præpositione ut Deus est in omni loco. Interdum ponitur inter duos nominatiuos, quorum alter à frōte regitur, alter à tergo, & siue sint eiusdē psonæ, siue diuerse, ut Petrus est cordatus homo, ego nō sum tu, siue eiusdem generis, siue diuersi ut Deus est iustissimus Deus est summū bonum, siue eiusdē numeri, siue diuersi, ut Deus est misericors, Deus est delicia meæ, semp cōcordabit cū præcedēti. Si uerò uterq; nominatiuus præcesserit, cōcordabit cū uiciniorē. Ouid. 1. Meta. Omnia pontus erat Tacitus lib. 4. Præcipuum robur octo legiones erant. Terentius in Andria, Amantiū ire redintegratio amoris est Aliquādo tamen concordat cum remotiori. Valerius Maximus lib. 4. Dotis modus quadraginta millia aris fuit.

Construitur etiam cum genitiuo quatuor potissimum modis. Aut ex ui possessionis, ut herba est sui uisissimi odoris. Aut ex ui æstimationis, ut plaris est uirtus, quā pecunia. Itē ex ui loci, ut sum Compluti postremo ex ui laudis, uel uituperationis, ut uir est magnæ sapientiæ, aut magni uasi.

Liber quartus

Aliheret etiam datiuo, aliquando simplici, ut est mihi seuerissima nouerca, aliquando geminato, ut est mihi lucro, uoluptati, curæ, usui, honori, infamie. Quorum posterior exponi solet per accusatiuum, cum In, uel Ad, ut est mihi lucro, id est, in lucrum, uel ad lucrum, & sic de reliquis. Qui loquendi modus per duos datiuos elegantior est, quam si per datiuum & nominatiuum loqueremur, in hunc modum, Est mihi lucrum, uoluptas, cura.

Cum accusatiuo construi proprie non potest, improprie tamen tribus modis regere accusatiuum potest. Aut quando capitur pro Edo. Verg. 4. AEni. Est molle si immixta medullas, id est, exedit. Aut si accusatiuus sit temporis, ut fui apud eum decem dies. Aut quando non uerbale pro ipso uerbo usurpatur, quod et antiquis frequenter fieri solebat. modo uerò in obliuionem defæctudinemq; uenit similis constructio. Plautus in Amphitr. Quid tibi hanc rem curatio est? id est, qui t curas: Idem in Aulularia, Quid tibi nos mendicæ homo tactio est? id est, cur nos tangis?

Cum accusatiuo construi non potest, neque enim dices, Petre esto bone, sed bonus. Excipitur nomen masculinum, quod in uocatiuis tantum utriusque numeri reperitur, cui uerbum substantiuum bene iungitur, ut puer masle uirtute esto, item pueri masli uirtute esote.

Construitur postremo et ablatiuo ex ui laudis, uel uituperationis, ut ut esse duro capite, & hic per ablatiuum sermo fere perpetuus est. Oratorum, quem

quem tamen per genitium Grammatico more sæpe prolatum leges, ut uir est duri capitis. Interdum adiectiuum, cum aliquo quod præcedit, intransitiuè construitur, & appellatiuum ipsum in ablatiuo ponitur; quæ ratio Historicis frequens est. ut uir durus capite. Nonnunquam appellatiuum in accusatiuo ponitur, Poetico duntaxat more, ut durus caput.

Præter casus præcedentes, quos habet uerbum substantiuum sine aliqua præpositione, potest etiam habere uarios casus, si his atque illis præpositionibus adiungatur. Sunt autem quæ in frequentiori usu sunt apud authores, quæ sequuntur. De, ut de grege illo est. E, ut non est e Republica. Ex, ut ex usu tuo erit. In, ut quantum in me erit. Infra, ut quem ego infra omnes infimos homines esse puto. Penes, ut iam penes me est. Pro, ut unus est pro centum millibus. Sub, ut sub meo imperio est: & sic de alijs.

Cum hoc nomine opus, omnibus ferè casibus iungi potest.

Veteres illi, de quorū grege fuit Diomedes, sic cōfusse præceperunt, uerbum substantiuum cum nomine opus, omnibus casibus iungi posse præter uocatiuum. Tenebāt itaque nobis sic loqui licere. Opus est salus, salutis, salutis, salutē, salute. Verū ut nos tantam confusionem illustremus, de nomine opus distinguamus necesse est. Nam aut est substantiuum, aut adiectiuū: tunc est adiectiuum, cū ponitur in eodem casu cum substantiuo, ut dux nobis opus est: tunc uerò substantiuum est, cū ponitur in diuerso

Liber quartus

casu à substantiuo. ut opus est artis. Si substantiuum sit, capitur pro inopia siue indigentia, & iungitur tribus tantum casibus, genitiuo, ablatiuo, & accusatiuo. De genitiuo, Cicero lib. 10. Epistol. 1. Nobis & magni laboris, & multæ impensæ opus fuit. De ablatiuo, Idem lib. 7. Epist. Opus est hic limatulo & polito tuo iudicio. Vbi aliqui, de limatulo, legunt. sed falsò & mendosè satis. De accusatiuo, Plautus in Truculento, puero opus est cibum. Hec tamen accusatiui Syntaxis rara est, & Poetica. Si adiectiuum sit, capitur pro necessarius, & in duobus tantum casibus reperitur, in nominatiuo in modis finitis, in accusatiuo in modo infinito. De nominatiuo, Cicero. 2. Epistola. Dux & author nobis opus est. De accusatiuo, Idem tertia actione in Verrem, Multa sibi opus esse, multa canibus suis. Tunc igitur opus, nominatiuo & accusatiuo tantum iungi solet. Præterea opus iungitur infinitiuo, ut opus est dicere, non dicendi. Item participio pro infinitiuo posito, ut opus est maturato, id est, maturare, opus est facto, id est, facere.

Notabis præterea, opus cum uerbo habeo iungi eisdem casibus, quibus iungebatur cum uerbo substantiuo. ut opus habeo cibi, cibum, cibo. Quale est illud Columella lib. 9. capite primo, Nam ut graminibus, ita frugibus roburneis opus habent. Itē illud Euangelicum, Dicite quia dominus his opus habet. Ceterum licet uideam quosdam nō infimæ notæ aucthores per uerbum habeo loqui, uos tamen per uerbum substantiuum loquimini, quia similem locutionem

nem

nem à grauioribus multò autoribus usurpatam uideo.

Nascuntur præterea ex hoc uerbo undecim alia, ea sunt, adsum, absum, insum, intersum, obsum, desum, prosum, præsum, possum, subsum, supersum. Et duo alia Plautina, exsum, persum. Quæ omnia cum datiuo construuntur, et aliquando etiã cum ablatiuo ut in secunda neutrorum notauimus: præter Possum, quod accusatiuum regit, ut non omnia possumus omnes. Notabis postremò tria tantum composita ex his generare participia presentis, absum, absens: præsum, præsens: possum, potens. Hæc satis de uerbo substantiuo.

De quibusdam uerborum considerationibus.

Hoc loco Antonius agit de quibusdam uerborum considerationibus, quæ à Grammaticis, Præterea, barbarè appellantur, quòd ab eo aduerbio initium habeant, nos uerò illis diuersum nomē imposuimus, quia hic quorundam uerborum naturæ examinantur.

Sunt præterea quædam alia uerba.

Hæc est prima consideratio, cuius sensus est, Ultra uerbum substantiuum, sum, quod propriã et ueram substantiam significat, ut ex eius definitione satis constat, esse uidelicet nonnulla uerba, quæ quasi substantiua à Grammaticorum uulgo nuncupantur. Non quia tam uerè et propriè substantiam significant, quàm substantiuum uerbum, sed quia simillimam cum eo constructionem habeant, desiderant enim post se casum similem præcedenti, ut existit inutiles, extat incorruptus, manet immortalis, uiuit felix

Liber quartus.

Quibus accedunt & passiva illa, agnominor, cognominor, inscribor, ut agnominor bonus, cognominor iustus, inscriber fortis. Obiter notabis ex sententia Laurentij lib. Elegant cap. 53. Existere & Extare licet unum atque idem præteritum sortiantur, differre tamen inter se. Nam existere prodire significat, & exurgere, unde montes & colles dicuntur existere, id est, apparere. De rebus quoque mutis existere dicitur. Cicero in Laelio, Existu hoc loco quædam quaestio subdificilis. Extare uero significat superesse, ut extant paucissimi Varronis libri, plurimi non extant. Item existit quod uidetur cum motu imminere. Cicero de claris Oratoribus, Tum etiam magistri dicendi multi subito extiterunt. Extat uero quod est sine motu, unde extare dicuntur ædificia ab humo.

Sunt & alia, quæ cum sint intransitiua.

Hæc est secunda consideratio, cuius intellectus est: Multa esse uerba neutra intransitiua, hoc est quorum actio non transit in personam patientem, quæ recipiuntur, id est, similes & à fronte & à tergo casus desiderant, in morem uerbi substantiui. In hoc autem gradu primum numerantur uerba neutra motum præseferentia, ut incedo, tristis, ambulo, letus, euado doctus, pergo mortuus, occurris hilaris, eo exul, uenio bene fortunatus. Deinde uerba quietis importantia, ut sto rectus, dormio supinus, iaceo ebrius, taceo ægrotus, siudeo pronus, sedeo tristis. His accedunt & uerba passiva, quæ descendunt à uerbis actiuis regentibus duos accusatiuos pro con-

dem

dem acceptos, quæ reciprocari etiam solent, ut habeor doctus, uocor Alfonso, prædicor humanus. Itē uerba deponentia, ut nūlus egressus sum ex utero matris meæ. Quibus iunge & illa uerba, disco, audio, facio, ut disco sedulus, audiui hoc puer de patre, feci imprulens. Non nego tamen posteriorem nominatiuum à fronte regi posse, & sic non dicerentur reciproca. Superest unicū illud uerbum, orationes cum uerbis reciprocis fieri non posse pergerunt illa, sed per subiunctiuum, ut, ueni Complutum ut euadam doctus non gratia euadendi doctus. Per participia tamen nihil est quod impediāt fieri posse, ut sum incedens tristis, ille est ambulans lætus.

Prætere uerba illa quæ dicuntur Neutra transitiva.

Hec est tertia consideratio, in qua Antonius ueteres Grammaticos, sed præcipuè Priscianum notat, qui asseuerabat, esse quædam uerba neutra transitiva, qualia sunt, aro, semino, bibo, comedo, coëno, manluco, & reliqua ad terræ arationem, uel gustatum pertinentia: quæ in uoce passiuā tertias personas tantum habent, cum repugnet naturæ, & ueritati, in primis & secundis personis pronuntiari. Veræ enim sunt huiusmodi locutiones, terra aratur, terra seminatur, uinum bibitur, cibus comeditur: false autem illæ, ego aror, ego semino, tu biberis, tu comederis. Appellat autē Priscianus huiusmodi uerba neutra transitiva: Neutra, quia in uoce passiuā primis & secundis personis carent: Transitiva,

Libert quartus

quia eorum actio trāsit in accusatiuum, quem à tergo regunt. Affirmat tamen idem author, hæc eadem uerba posse primas personas habere per Prosopopœiam, hoc est personæ fictionem, ut si terra diceret, ego aror: uinum diceret, ego bibor. Possent etiam habere secundas personas per Apostrophem, hoc est per conuersionem sermonis ad rem inanimatam: ut si quis cum terra & uino loquatur, dicere possit, Terra araris, uinum biberis. Hæc est Prisciani sententia.

Antonius tamen Nebrissensis huiusmodi argutias irridet, asseritq; hæc uerba non neutra transitiva, ut Priscianus affirmabat, sed actiua potius transitiva esse appellanda, cum & accusatiuum regant, & omnes numeros, & personas in uoce passiuæ sortiantur. Præcipit itaque nobis in hunc modum loqui licere, Ego aror, ego semino, tu biberis, tu manducaris. Nam & si huiusmodi orationes falsæ sunt, ad Grammaticum tamen non spectare ueritatis, aut falsitatis orationis considerationem, sed id munus Dialectici esse proprium. Aut saltem negatione adhibita, ego non aror, non semino, tu non biberis, non manducaris. Hac igitur in parte Antonij sententia tenenda est, Prisciani uerò repudianda. Quid enim Grammatici interesse debeat non uideo, si sermo eius repugnet nature, modò omnes leges & Grammaticas præceptiones seruet.

Præterea uerba, quæ dicuntur ad solam naturam pertinere.

Hæc

Hæc est quarta consideratio, in qua idem Pri-
 scianns cum eiusdem sententiæ consortibus repre-
 henditur, qui affirmabat, esse quædam uerba natu-
 ræ, qualia sunt, pluit, ningit, grandinat, sercnat, ful-
 gurat, tonat, rorat, coruscat, lucefcit, uesperascit &
 similia: quæ in tertijs personis numeri singularis tã-
 tum reperiuntur, quia sub illis duo tantum supposi-
 ta intelliguntur, Deus scilicet, aut Natura. Afferit
 tamen idem, hæc eadem uerba habere posse omnes
 personas utriusque numeri, aut per Prosopopœiã,
 hoc est personæ fictionem, ut si natura diceret, ego
 pluo: aut nubes, pluimus. Aut per Apostrophem, id
 est, conuersionem sermonis ad rem inanimem, ut si
 nubibus diceremus, uos pluitis.

Antonius tamen probat, hæc eadem uerba repe-
 riri posse, in primis & secundis personis in hunc mo-
 dū, Ego pluo, ego grandino, tu sercnas, tu coruscas,
 Aut negatiue, ego nō pluo, tu nō sercnas: cum Grã-
 maticus non debeat ueritatē, aut falsitatē orationis
 spectare, sed partiū orationis cōgruitatē, ac debitā
 earum structuram. Per translationē nemini dubiū,
 quin liceat primis & secundis personis horum uer-
 borum uti, ut quoties dico in Theatro, fulguro, ac
 tono: quoties in foro causas agis, fulguras ac to-
 nas. Quod de Pericle Atheniensium oratore ue-
 terum scriptis proditum est, qui quoties sugge-
 stum dicturus ascendebat, tonare, ac fulgura-
 re uidebatur. Illud in fine non pigebit adde-
 re, huiusmodi uerba à Grammaticis appella-
 ri exceptæ actionis, quòd eorum actio soli Deo

Liber quartus

aut natura conueniat.

Præterea nullum esse verbum actiuum, quod non possit esse absolutum.

Hæc est quinta consideratio, cuius sensus: Omne uerbum actiuum fieri absolutum, si post se cum nullo casu construatur, ut ego amo. Nec de actiuis tantum intelligi debet consideratio, sed de omnibus uerborum generibus, quæ sua syntaxi priuantur, ut ego amor, tu seruis, ego loquor, tu criminaris. Hic tamen repetamus necesse est, quod in quinta neutrorum de duplici uerbo absoluto notauimus: est enim aut absolutum natura, aut casu. Absolutum natura dicitur, quod suapte natura nullum regit casum, ut eo. Absolutum casu, quod casu quem sua natura regebat priuatur, ut amo. Quinta neutrorum de uerbo absoluto natura loquebatur, præsens consideratio de absoluto casu.

Præterea uerba neutra posse constitui cū accusatiuo.

Hæc est sexta consideratio, cuius intellectio talis est: Nonnulla esse uerba neutra (neque enim de omnibus traditur præceptio) quæ cum accusatiuo constitui possunt significante rem uerbi, ut uiuo uitam, pecco peccatum, iter seruo seruitutem. Verum hæc actiua potius quam neutra dicenda sunt, cum ea per passiuam conuertere liceat, uita uiuitur à me, peccatum peccatur, iter à me itur, Ouid. 12. Motamor Vixi hic cētum, iam terra uiuitur ætas. Item Cicero. 1. Offi. 10. Quo in genere etiam multa peccantur in Republica. Sed quæres, quis dicatur accusa

accusatiuus rē uerbi significans? Id ego facillē ex pediam, si prius intell. xeris eos Grāmaticos deceptos fuisse, qui arbitrati sunt, cum accusatiuum dici rem uerbi significare, qui esset nomen uerbale a uerbo ipso deductum: nā in his, nato aquas, nauigo a quor, accusatiuus à uerbo non promanat. Erit igitur accusatiuus rem uerbi significans ille, qui significat id, quo uerbi actus exercetur: ut in hoc exemplo, uiu uita, accusatiuus significat rem uerbi, quia actus uiuendi exercetur uita, nisi enim uita nobis esset, uiuere non possemus.

Præterea nullum esse uerbum, quod non cum accusatiuo uel ablatiua.

Hæc est septima consideratio, cuius intellectus ille est. nullam uidelicet esse uerbum, cuiuscunq; sit generis, quod nō cum accusatiuo uel ablatiua significante tempus sine ullo discrimine construi possit: ut studuit Grammaticæ tres annos uel annis, dedit & perā Dialecticæ quatuor annos uel annis. Sed circa accusatiuum & ablatiuum temporis, fuit opinio Nonij Marcelli, Grāmatici alioqui nobilissimi, qui tēpus perpetuum & continuatum in accusatiuo, intermissum uerò in ablatiua semper collocari docuit. Qui (ut salua eius pace loquar) in re clara & aperta hallucinatus est. Nam & tempus interruptum per accusatiuum, & continuatum per ablatiuum sæpissimè significarunt authores. Cicero in prologo primi Officiorum. Quamquam te Marce fili annum iam audientem Cratippum idq; Athenis, abundare oportet præceptis institutisq; Philosophiæ,

Libert quartus

Hic per accusatiuum, tempus interpositum signifi-
catur: non enim Ciceronis filius tam continenti, &
perpetua opera totum illam annum Cratippum au-
diuit, ut nūquam interquieuerit, respiraueritq;. Idē
lib. 3. Officio. Scriptum à Posydonio est, triginta an-
nis uixisse Panetium, postquam eos libros edidisset.
Hic tempus perēne per ablatiuum notatur, semper
enim uixit Panetius, quādiu in uita fuit.

Accipe igitur regulam, quæ & uerior, & cer-
tior est, ut intelligas quādo tempus accusatiuo, quā-
do ablatiuo adsignificari debeat. Cū de parte, non
de toto tempore loquimur, utemur ablatiuo: ut si di-
cas, ego hoc anno ad te ueniam, id est, aliquo tempo-
re huius anni: pro quo non recte dixeris, ego hunc
annum ad te ueniam. Cū uerò de toto tēpore fue-
rit sermo, commodius utemur accusatiuo, ut uiginti
annos hanc domum habitauī. Notabis præterea, si
fiat interrogatio per quādiu, uel quāduidum, re-
sponsionem fieri debere per accusatiuum cum præ-
positione, uel sine ea, rarò per ablatiuum. Vt quan-
diu studuisti Compluti? respondebis sex annos, uel
annis, uel per sex annos, quāduidū obiit pater tuus?
ab hinc tres menses uel mensibus. Si uerò interroga-
tio fiat per quando, aut quanto tempore? responde-
bimus per ablatiuum, aut per accusatiuum cum In-
tra, ut quando uenies? hora tertia, aut intra horam
tertiam: quanto tempore hæc scripsisti? tribus horis
aut intra tres horas. Quibus responsionibus caue-
ne pro Intra, utaris Infra. nā Intra refertur ad spa-
tium temporis, ut intra uiginti dies: Infra uerò ad
dignitatem

tatem, ut infra dignitatem meam est: aut cum Per,
ut quanto tempore Grammaticam es professus: per
viginti annos.

Præterea complura esse verba neutra abso-
luta, quæ figuratè.

Hæc est octaua consideratio, cuius sensus est: Cō-
plura esse uerba neutra absoluta, quæ uirtute tran-
sumptæ significationis accusatiuo iunguntur, ut de-
perco uirginem, id est deperditè amo uirginem. Co-
rydon ardebat Alexim, id est ardēter amabat. Nec
per figuram, hic intelligas Metaphoram, aut aliud
genus tropi: sed Transumptionem, quæ facit, ut uer-
bum neutrum pro actiuo positum regere possit ac-
cusatiuum. Repete ad præsentem locum quinque
illos modos, quos in quinta neutrorū descripsimus,
quibus cōtingit uerba neutra absoluta regere posse
accusatiuū. Huc etiam spectant & illa, quæ ex idio-
mate sermonis Latini affirmat Antonius cum accu-
satiuo construi posse, uirtute enim nouæ signifi-
cationis, quam usurpant, accusatiuum regunt. Ut sa-
pit piscem, id est, sapore refert piscem: olet unguen-
tum, id est odore repræsentat unguentū, nescio quis
me manet exitus: id est, expectat. Simile iudiciū erit
de reliquis.

Omnia etiam uerba Neutra posse iūgi datiuo.

Hæc est nona consideratio & ultima, quæ nobis
nihil aliud præcipit, quàm uerba omnia non tan-
tū neutra, sed cuiuscunque alterius generis posse
recipere datiuum damni, aut commodi post com-
pletam suam naturam, quia casus generalis est:

ut

Liber quartus

ut dormio mihi, amas tibi, loqueris tibi, ueneror
Deum mihi & sic de similibus.

De verbis Deponentibus.

Verbi actiui passiui, & neutrius natura ad un-
quem satis explicata, quarto loco differit Antonius
de deponentibus. Quæ ille deponentia dicta sunt,
quia cum olim fuerint communia & actiua & pas-
siuam significationem retinuerint, seruata tantum
actiua passiuam deposuerunt. Nec uera est eorum
sententia, qui dicunt deponentia per Antiphrasim
fuisse dicta quod scilicet, R, literam nunquā depo-
nant, ut loquor, nascor, sequor: non enim dicimus, lo-
quo, nasco, sequo. Nā multa passim uidemus uerba
deponentia, quæ aliquando in actiua, aliquando in
neutra migrant, R, litera prorsus deposita, ut par-
tior, assentior, delector, fœneror, mutuor, palpor,
medicor, populo: pro quibus reperiuntur illa, par-
tio, assentio, delecto, fœnero mutuo, palpo, medico,
populo. Exordiamur iam uerborum deponentium
tractationem ab eorum definitione, eaq; deinde in
suas species partiamur.

Vt intelligas de quo uerbo deponenti traditur de-
finitio, notes oportet, duplex esse uerbum deponēs:
uoce tantum, uoce & significatione simul. Uoce tan-
tum est illud, quod habet uocē passiuam, & signifi-
cationem passiuam, ut nascor: uerum non est passi-
uum, quia non habet uocem actiuam in O. Uoce &
significatione illud est, quod habet uocem passiuam
& significationem actiuam, ut loquor, obliuiscor.
Definitio propriè traditur de uerbo deponenti, uo-

et significatione simul, quæ talis est.

Deponens uerbum est illud, quod in Or desinit, et non habet ælium in O, retinetq; tantum actiui significationem. Singula diffinitionis membra discutiamus. Quod in Or desinit: ad differentiam actiui et neutrius quæ desinunt in O. Et non habet actiuum in O, ut differat à passiuis eam uocem habentibus. Et retinet tantum actiui significationem: ut coniungatur à communibus, quæ sub uoce passiuæ actiuam et passiuam significationem habent, ut criminor, quod accusare et accusari significat. Notabis tamen hac in parte, reperiri apud probos illos et perfectos authores uerba deponetia sæpissimè in significatione passiuæ Cicero in Paradoxis, An quisquā in potiundis uoluptatibus, gloria se et prædicatione effert? Idē pro Marco Cato. Magnā crimē in legatis insidiandis. Item Hora. i. Epist. ii. Epistola, Oblitusq; meorum, obliuiscendus et illis.

In quot species distribuatur.

Verbum deponens in sex classes distribuitur, nā totidem modis à tergo constructum reperitur. Quæ cum genitiuo sociata sunt, primā classē cōstituūt. Quæ cum datiuo, secundam. Quæ cum accusatiuo, tertiā. Quæ cum ablatiuo sine præpositione, uel septimo casu, Quartam. Quæ cum nullo casu nisi præpositione interiecta, quintam. Quæ cum ablatiuo et præpositione, uel Ab, sextam. De quibus seruatō cuiusq; ordine disputemus.

De prima classē Deponentium.

Verba huius ordinis, exigunt à tergo genitiuum
patientis,

Liber quartus

patientis, ut misereor pauperis. Qui genitiuus non possessiuus, sed passiuus est, & proprius huius speciei casus, ut qui eam constituit.

De multiplicibus verbis primæ classis.

Triplicia sunt uerba huius formæ. MISERENDI, ut misereor, miseror. REMINISCENDI, ut reminiscor, recordor. OBLIVISCENDI, ut obliuiscor.

Miserendi.

Misereor & miseror, non in significatione, sed in constructione differunt. Nam misereor aliquando regit genitiuum. Cicero ad Atticum, Qui misereri mei debent, non desinunt inuidere. Aliquando datiuum, sed non tam frequenter, ideoq; non imitaberis. Cicero lib. 2. Tusculana. Patris pestibus miserere. Seneca lib. 2. Controuersiar. Misereor tibi puella, qua constructione Ecclesiastici etiam utuntur, misereere nobis. At uerò miseror. aris. cum accusatiuo tantum construitur, & in tertia classe reponitur. Cicero pro Muræna, Vt non queam satis, neque communem omnium nostrum conditionem, neque huius euentum fortunamq; miserari.

Recordandi.

Verba recordandi præter uulgatam genitiui syntaxim, construuntur etiam cum accusatiuo eleganter satis, nec ferè uideo Ciceronem aliter fuisse locutum. Cicero lib. 4. Familiarium. Ea potius reminiscere, quæ digna tua persona sunt. Idem de Oratore, Cum omnes gradus ætatis recordor tuæ. Aliquando cum ablatiuo, & De, licet non ita frequenter. Idem pro Sulla, Nam profectò, si recordari uolueris

Iueritis de nouis hominibus. Ponuntur aliquādo absolute cum infinitiuo, ut non sum recordatus plura dicere.

Obliuiscendi:

Obliuiscor quemadmodum & recordor, præter communem genitiui constructionem, habet frequenter accusatiuum, cum multa Romani sermonis uenustate. Cicero pro Cælio, Obliuiscor iniuriam, depono memoriam doloris mei. Rarò ablatiuum, cū De, ut de patria obliuisci turpe est. Ponitur aliquando absolute cum solo infinitiuo, ut oblitus sum dicere nescio quid tibi. A uerbis huius speciei nascuntur terena participia præsentis, præteriti, & futuri inrus, ut recordans, recordatus, recordaturus. Aliquādo etiam habent participium futuri in, dus, passiuæ significationis. Plautus in Mil. muliebres mores discendi, obliuiscendiq; tui.

De secunda deponentium.

Verba huius ordinis, post se regunt datiuum æquisitiuum, qui adeò proprius est huius speciei, ut eam constituat, ut suffragare mihi.

De uerbis secundæ classis.

Varia sunt huius gradus uerba. GRATULANDI, ut gratulor, grator. ASSENTIENDI, ut assentior. SVFFRAGANDI siue auxiliandi, ut suffragor, auxilior, opitulor, patrocinator. ADVLANDI, ut aduol, assentor, palpor, blandior. IRASCENDI siue insidiandi, ut irascor, indignor, insidior.

Gratulandi.

Gratulari est uerbo testari te gaudere de fortuna ac feli

Libertatū

ac felicitate alterius, apud eum ipsum qui affectus est felicitate. Differt à gaudere, nā gaudemus nostrā felicitate, gratulamur alienā. Variam habet cōstructionem. Aliquando iungitur datiuo, ut gratulor tibi fortunis aucto. Interdum cum datiuo habet accusatiuū sine prapositione. Cicero actione. 2. in Verrem, Appellat hominē, & ei uoce maxima uictoriā gratulatur. Interdum accusatiuus habet adiunctam prapositionem Ob, uel Propter, ut gratulari alicui ob uel propter uictoriam partam. Postremò post datiuum habet ablatiuum cum prapositione De. Cicero. 1. Familiarium Quod mihi de filia gratularis, agnosco humanitatem tuam. Grator eiusdem significationis est, Verum magis est Poeticum, quàm Oratorium: construitur cum datiuo. Vergil. 4. AEneid. Inueni germanauiam, gratare sorori. Aliquādo cū accusatiuo. Idem. 5. AEn. i. Gratatur reduces.

Assentiendi.

Assentior primū construitur cū datiuo. Cicero actione. 5. in Verrem, Vt ego assentiar orationi, defensionem tamen non probabo. Deinde cōstruitur cum accusatiuo. Idem ad Atticum, Timet multa, assentitur omnia. Tertiò cum accusatiuo & datiuo. Idē. 3. de Oratore, Namq; ego illud assentior Theophrasto. Postremò cum datiuo, & ablatiuo cū De. Idem. 12. Familiarium. Mihi enim est assensus Senatus de obtinendis prouincijs. Ex subiectis exemplis colliges, Ciceronem frequentius uti hoc uerbo in uoce passiuā. Verum & uoce actiua usus est, aliquando, Officiorum. 1. Cauendum est, ne his rebus time
re assen

re assentiamus. Qua uoce & authores, Qui post ipsum secuti sunt, uti non dedignantur.

Verbis huius speciei accedunt & hæc, ancillor, famulor, conuitor; minor, medeor, dominor, & aliqua cum bene & male composita. ut bene siue male precari, bene siue male ominari. De horum quibusdam aliquid notemus necesse est. Minor aliquando cum solo datiuo construitur, ut minari alicui: aliquando cum datiuo habet accusatiuum, ut mortem siue exitium alicui minari. Medeor differt à medicor, nam medeor cum datiuo construitur, ut mederi morbo: medicor uerò cum accusatiuo frequentius constructum reperies. Verg. 7. A Eneid. Sed non Dardaniæ medicari cuspide ictum Eualuit. Idem tamen adiunxit datiuo. 2. Georgi. Senibus medicantur anhelis. Voce actiua huius uerbi utuntur aliquando Poetæ. Idem. 1. Georgi. Semina uidi equidẽ multos medicare serentes. Dominor cum genitiuo rarò construitur & est primæ speciei, ut Deus omnium dominatur, cum datiuo frequentius, & est huius classis. Cicero pro Rabirio Posthumo, Dominatus est enim Alexandria. Item cum accusatiuo & In. Cicero de Senectute, Si usque ad extremum spiritum dominatur in suos. Capitur aliquando passiuè. Cicero. 1. Officiorum. O domus antiqua, heu quàm dispari domino dominaris Illud postremò notabis, à uerbis huius speciei prodire terna participia, præsentis, præteriti & futuri, in rus: ut suffragans, suffragatus, suffragaturus.

De tertia Deponentium.

G

Ver

Liber quartus

Verba tertiae speciei, à tergo regunt accusatiuū patientem ex utraque transitionis, qui tertiam classē constituit, cum eius sit proprius, ut execror te.

De multiplicibus verbis tertiae classis.

Verba huius classis uaria sunt. CONSOLANDI, ut solor, PRECANDI, ut precor, deprecor, SEQUENDI, ut sequor, prosequor, MERENDI, ut mercor, demereor, CONFITENDI, ut cōfiteor, fateor, Ac deniq; IMITANDI, & execrandi, ut imitor, emulor, execror, abominor.

Consolandi.

Solor & consolor ex sententia Laurentij lib. 4. Elegancia. cap. 77. differunt, nam solamur rebus, consolamur uerbis. Ab his promanant tria uerba, solatium, consolatio & solamē. Duo priora Oratoria sunt posterius uerò solamen magis poeticū. Verg. 3. Aenei. Solamenq; mali de collo fistula pēdet.

Precandi.

Precor aliquando cum simplici accusatiuo construitur, ut precari ueniam. Aliquādo post accusatiuum datiuum habet, ut mala precari alicui. Interdum post accusatiuum habet ablatiuum cum praepositione, *Ex*, uel *Ab*. Valerius Maximus lib. 1. Stultū est, à quibus bona precamur, ab ijs porrigētibus nolle sumere. Postremò habet duos accusatiuos, quos reliqua orandi uerba habere solent, ut precor Deos ueniam. Differt à deprecor, nā deprecari est precibus aliquod malum à nobis auertere, ut deprecari poenam, culpam, crimen.

Sequendi.

Prosequor, quod à sequor compositum est, post accusatiuum desiderat ablatiuum sine præpositione à quo mutuò sumit significationem, quemadmodum & afficio, ut prosequor te honore, id est honoro te, amore, id est, amo, odio, id est, odi. Differt à perse quor, nam perse quor aliquando in malam partem capitur, & significat ad finē usque insectari, ut persequor hostes, aliquando in bonam, & significat in re semel cœpta perseuerare, ut persequor literarū studia.

Merendi.

Verbum mereor, si componatur cum aduerbijs bene & male, construitur cum ablatiuo media præpositione De. Vnde bene mereri de aliquo, aut male mereri, est aliquid beneficij siue maleficij in eum conferre. Itaque in huiusmodi constructione, ablatiuus persona patiens est, non agens. Hoc uerbum in uoce actiua sæpissimè reperitur. Cicero in Familiaribus. Ac uelim, ut de Republica meremur, sic felices simus. A uerbis huius speciei præter terna illa, participia nascitur & participium futuri in, dus passiuæ significationis. Cicero in Familiaribus, Et si egomet, qui te consolari cupio, consoladus ipse sum.

De quarta Deponentium.

Verba quartæ speciei, uolunt à tergo ablatiuum sine præpositione uel effectiuum, qui hanc speciem constituit: ut utere meis rebus, perinde ac tuis.

Libert quartus.

De verbis quartæ classis.

Verba huius classis pauca sunt, in primis **L A E**
T I T I A E, cum contrarijs, ut **lato**r, **delecto**r, **tri-**
stor, **V T E N D I**, ut **utor**, **fungo**r, **fruo**r, **V E S**
C E N D I, ut **uesco**r.

Lætandi.

Hoc uerbum **lætor**, uariam habet cōstructionem
Aliquando cōstruitur cum ablatiuo, sine præposi-
tione. Cicero pro Aulo Cluentio, Mater squalore
filijs, & sordibus lætatur, Aliquando habet ablatiuū
medijs præpositionibus, **De**, **In**, **Ex**. Idem pro Mar-
co Marcello. Nam lætari omnes de cōmuni salute
sentio. Idem ad Atticum. lib. 4. Epistola Leonidæ
quid habet, quæso, in quo magnopore lætemur? Di-
uus Cyprianus ad Rogatianum, Quantum dolemus
ex illis quos potestas inimica prostrauit, tantum læ-
tamur ex uobis, quos Diabolus superare non potuit
Ultimò habet aliquando accusatiuum, media præpo-
sitione **Ob**, uel **Propter**. Cicero pro Milone, Quid
ingratius, quàm lugere eum solum, propter quē cæ-
teri lætentur? Verbum autem **delecto**r, & actiuum
primæ speciei reperitur: ut tuæ literę me magnope-
re delectarunt.

Vtendi.

Vtor, præter uulgarem cōstructionem ablati-
ui, ex natura antiqua cōstruitur cum accusatiuo.
Teretius in prologo Andrię, Nam in prologis scri-
bundis operam abutitur. Si uerò ablatiuus, quem re-
git **utor**, sit personę, tunc **utor** significat conuersa-
ri, ut **utor** Petro familiarissimè. Differunt autem
utor

utor, fruor, fungor, potior : quæ omnia sunt huius speciei. Vtimur rebus ad aliquid aliud per eas obtinendum: fruimur rebus, propter seipsas : fungimur munere, quod nobis demandatum est : potimur re, quam per laborem obtinuimus. Illud tamen notes necesse est, hoc uerbum potiri triplicem habere constructionem. Aliquando adheret ablatiuo sine præpositione. Verg. 1. A Eneid. Egressi optata potiuntur Troes arena. Aliquando accusatiuo ex antiqua syntaxi. Terentius in Adelphis, Ille sine labore patria potitur commoda. Si uerò iugatur huic nomini, res rei, semper construitur cum genitiuo, & reducitur ad primam deponentium: ut Lacedæmonij rerū diu potiti sunt, non rebus. His accedunt hæc duo uerba tristor, & cōtristor, quæ huius formæ sunt, & passionem significant, ut tristor tua aduersa ualitudine. Verum si ablatiuus sit rei animatæ, fieri oratio nō potest per hæc uerba, sed per uerbum reddo, uel afficio. Non enim dicimus, tristor Petro, sed Petrus reddit me tristem, uel afficit me tristitia. Vltimò notabis, aliquando uerba huius classis præter terna illa participia, habere etiam participium futuri indus, passiue significationis: quia olim fuerūt tertie speciei. Cicero lib. 1. de Finibus, Non solum paranda nobis, sed etiā fruenda est sapientia. Idem. 2. Officio. Iustitiæ fruendę causa uidetur olim bene morati Reges constituti.

De quinta Deponentium.

Verba quintæ classis à tergo cum nullo casu construuntur, nisi cum accusatiuo uel ablatiuo media

Libert quartus

præpositione: ut Cicero iocatus est, in Antonium, itē rusticatur in otio. Casus autem hic media præpositione est casus tanquam proprius huius speciei. cuius uerba dicuntur absoluta, quia nullum casum regunt, nisi interiecta præpositione.

De uerbis quintæ classis.

Non admodum multa sunt huius speciei uerba. IOCA^NDI, ut iocor, cachinnor. Verba item DISCIPLINARVM, ut philosophor, rusticor grammaticor. In quibus nihil est annotatione dignū, nisi quod iocamur uerbis: ludimus uerò factis. Item notabis à uerbis huius formæ prodire terna tantum participia præsentis, præteriti, et futuri in rus ut iocas, iocatus, iocaturus,

De sexta Deponentium.

Verba sextæ classis passionem significāt, ac propterea dicuntur passiuæ: à quibus nihilominus differunt, quia non habent actiuam uocem in O. Exigūt à fronte nominatiuum patientis à tergo uerò ablatiui agentis, cum his præpositionibus. A. AB. DE. E. Ex, ut ortus à parētibus honestissimis: quæ oratio per reliquas præpositiones poterit uariari. Demitur aliquando præpositio elegantiae gratia, ut in his locutionibus, claro loco natus, obscuro loco natus, honestissimis ortus parētibus. Ablatiuus media præpositione, in uerbis huius speciei non est proprius, sed tanquam proprius.

De uerbis sextæ classis.

Verba huius classis tria tantum sunt orior, nascor, patior: de quibus pauca notemus necesse est.

se est.

De Orior.

Orior aliquando tertiæ, aliquando quartæ coniugationis est, oreris uel oriris: infinitiuus uerò Ori-ri semper est quartæ. Ponitur in oratione aliquando absolutè, ut ortus est puer Aliquando cum ablatiuo cum præpositione, uel sine ea, ut ortus clarissimis maioribus, uel à clarissimis maioribus. Si uerò uelis alijcere ad quam rem ortus sis, orationem in hunc modum uariabis, aut per datiuū, ortus sum militi, aut per accusatiuum media præpositione Ad, ad militiam: aut per gerundium accusatiui casus, ad militandum: aut per subiunctiuum cum Vt, ut militem. Ab hoc uerbo nascitur participium ortus, & nomen uerbale oriundus, quæ differunt: nam ortus significat differentiam loci in quo, ut ortus sum Cōpluti oriundus uerò differentiam loci, à quo aliquis originem ducit, ut oriundus ex Africa. Verbo nascor eodem modo prorsus utimur, à quo natalis, & natales iam, descendunt, cum differentia tamē: nam natalis refertur ad diem natalitium, natales uerò ad generis conditionem, ut clarissimis natalibus ortus. Patior aliquando solo accusatiuo gaudet, ut grauem iniuriam passus sum. aliquando cum accusatiuo ablatiuum desiderat, ut rustici iniuriam patiuntur ciuibus. A uerbis huius speciei, manant terna illi participia.

De uerbis Communibus.

Quinto loco differit Antonius de uerbis communibus

Liber quartus

bus, quæ ideo cōmunia dicta sunt, quòd eiusdem sint muneris & constructionis cū uerbis actiuis, & passiuis, nam & significant actionē, quemadmodū uerba actiua, & passionem, quemadmodum passiuā. Item in significatione actiua construuntur cum accusatiuo more uerborū actiuorum, ut ueneror Deos: in significatione uerò passiuā construuntur more uerborum passiuorum cum ablatiui, ut Dij uenerātur à me. In qua conuersione ex significatione actiua in passiuā manet perpetuò uox passiuā, & accusatiuus uertitur in nominatiuum: & nominatiuus in datiuum uel in ablatiuum cum præpositione A, uel Ab, ut ego criminor te. & uerbum ex significatione actiua migrat in passiuā, tu criminaris mihi uel à me, Tradamus igitur definitionem uerbi cōmunis quando unicum est tantū genus uerborum communium.

Commune uerbum est, Quod desinit in, Or, & non habet actiuum in, O, & retinet actiui & passiui significationem. Quod desinit in Or, ad differentiam actiuorum & neutrorum, quæ desinūt in, O. Et non habet actiuum in, O, ad differentiam passiuorum, quæ similem uocem habent. Et retinet actiui & passiui significationem: ad differentiam deponentis, quoniam deponens actiuā tantū habet significationem, commune uerò actiuā & passiuā. Qua de causa cauēdum est, ne per uerba communia sine casu posteriori loquamur, ne in amphibologiā & sermonis ambiguitatem incidamus Ab his uerbis omnia formantur participia, ut criminans, crimina-
tus

tus, criminaturus, & criminandus. Verba cōmunia pauca sunt, & quia in his nihil dignum est annotatione, ad uerba impersonalia properemus, ne in re facili tempus & operam perdamus.

De verbis Impersonalibus actiuae uocis.

Egit in superioribus Nebrissensis de uerborum personalium constructione, nunc de impersonalibus disputat, quæ à persona nomen acceperunt. Atque idcō impersonalia per negationem dicta sunt, quasi non personalia, non quòd omnino personis careant, sed quòd in uoce siue actiua, siue passiuā, nullā præter tertiam personam, & eam singularem habeant. Hoc duplex esse testatur Nebrissensis, alterum quidam actiuae uocis, alterum uerò passiuæ, Actiuae uocis est illud, quod est simile tertijs personis uerbi actiuae uocis, ut miseret, pudet. Passiuæ uocis, quod est simile tertijs personis uerbi personalis passiuæ uocis, ut curritur, statur. Neq; existimes dicta fuisse aut actiuae uocis, quòd actionem significant, quā improprie dicuntur significare, aut passiuæ uocis, quòd passionem significant, cū in aperto sit, ea à quibuscunque uerbis descendant, actionem significare. Sed id pro certo habeas, actiuae, aut passiuæ uocis appellata fuisse, propter similitudinem, quā habet cum uerbis personalibus, tam actiuae, quā passiuæ uocis. De uerbis impersonalibus passiuæ uocis posterior erit disputatio, nūc de impersonalibus uocis actiuae differamus. Ac primum omnium explicare oportet, quidnam sit uerbum impersonale, quā ratione ab infinitiuo differat, postremò in quot spe-

cies distrahatur.

Antequam uerbi impersonalis tradatur definitio, quia frequens de numero & persona futura est mentio, explicemus necesse est. quidnam sit numerus, quid item persona, quatenus ad Grammaticum uidetur spectare. Numerus est incrementum quantitatis ab uno ad plura procedens. Vnde colliges binarium esse numerum dici, cum duabus constet unitatibus, unitatem uero improprie numeri nomen sibi uendicare, cum ab alio non procedat, satis tamen sit numerandi esse principium. Persona uero in praesenti disputatione, capitur pro uoce fixa & alicui certae personae constituta. Vnde fit, ut uox, amo, sit primae personae, amas, secundae, amat tertiae, & sic de alijs. Aut si inanis, capitur pro mutuo illo consensu & concordia nominatiui & uerbi in persona, ita ut eiusdem personae sit uerbum, cuius est nominatiuus, qui ei suppositum reddit. Qui consensus ubicunque reperitur in uerbo, personale erit, si uero talis consensus non fuerit, uerbum efficietur impersonale. His igitur fundamentis, uerbum impersonale diffiniamus.

Daë diffinitiones à Grammaticis tradi solent uerbi impersonalis, quae licet uerbis uideantur discrepare, re tamen ipsa in idem recidunt. Prior est, Verbum impersonale est, quod caret numeris & personis, & eas figura tertiae personae representat. Quod caret numeris & personis, hoc est, quod in suis temporibus non habet desinentias praefixas, & determinatas alicui certae personae, ut miseret, pudet. Quo potissimum nomine differt a uerbis personali-

nalibus, quæ uoces habent certis quibusdam personis constitutas. Est enim uox primæ personæ, ut diligis, & sic de reliquis, qua determinatione prorsus carent uerba impersonalia. Et eas figura tertiæ personæ representat. Hoc est, uerbum impersonale, licet careat numeris & personis, sub uoce tamen tertiæ personæ numeri singularis, ad omnes numeros & personas refertur: ut pudet, licet uox sit singularis tertiæ personæ sub ea tamen ad omnes personas utriusque numeri refertur, ut pudet me, pudet te, pudet nos, & uos. Qua de causa differt ab infinitiuis (ut paulò inferiùs explicabimus) nā infinitiuus sub uoce nulli personæ præscripta ad omnes personas & numeros refertur.

Posterior definitio, Verbum impersonale est, quod recti suppositi conuenientia caret. Hoc est quod suppositum personæ certæ ante se non admittit, cum quo in numero & persona conuenire possit. Nam licet obliquos habeat à fronte, cum illis tamen in numero & persona conuenire non potest, nulla est enim concordantia uerbi cum obliquis, ac propterea nequeunt obliqui uerbo impersonali reddere suppositum. In hanc sententiam conspirauit omnium ferme Grammaticorum turba, cui ego libens adhæreo, ne uidear in re aliqua à communi doctorum hominum iudicio & opinione recedere. Neque habent quicquam ponderis aduersariorum rationes, quibus probare conantur, uerba impersonalia admittere ante se

Liber quartus

te se suppositum. Prima ratio est de particulis illis, quid, aliquid, nihil, parum, plurimum, multum, cum compositis si quid, nequid, quæ in his orationibus, nihil mea interest, plurimum mea refert, uidetur reddere suppositum uerbo impersonali. Respondeo, eas particulas exleges esse, & in neutra terminatione quodammodo aduerbiascere, & siue uerbis addantur siue detrahantur, de eorum natura nihil immutare. Secunda ratio. Infinitiuus, qui pro nomine re uerbi significante plerunque ponitur, uerbis impersonalibus potest reddere suppositum, tantum namque ualet, mea interest legere, quantum, lectio ad me pertinet: tua refert audire, quantum, auditio in re tua est. Respondeo, in huiusmodi locutionibus infinitiuum determinari à uerbo impersonali à tergo, & minime posse eidem uerbo impersonali à fronte reddere suppositum. Quod idem dici posset de oratione subiunctiui (quam isti pro tertia afferunt ratione) quæ cum à tergo determinetur, ut mea interest ut legam, non posset à uerbo impersonali regi à fronte: fieri enim non potest, ut eadē orationis pars & à tergo determinetur, & à fronte simul regatur. Illud igitur habeant omnes pro certo, uerbum impersonale, quatenus impersonale est, non posse habere suppositum, si uerò ex impersonali personale fiat, nullus dubitet habere posse suppositum, quemadmodum & uerba personalia. Cicero primo Officio. Quod decet, honestum est, & quod honestum est, decet. Idem eodem opere, Pulchritudo corporis mouet oculos, & delectat, ubi decet & delectat personalia

alia sunt, ac propterea supposita habent.

Differentia infinitiui & verbi impersonalis.

Ex his colligitur triplex differentia uerbi impersonalis, & infinitiui, qui æquè numeris & personis caret. Prima est, Quòd uerbū impersonale licet careat numeris & personis, sub uoce tertie personæ destinata, ad omnes numeros & personas refertur. Infinitiuus uerò sub uoce nulli personæ cōstituta, omnes personas & numeros repræsentat. Amare enim nullius est personæ, quod si adiunxeris accusatiuū primæ personæ, efficies primæ personæ, ut me amare: si secundæ, efficies etiam secundæ personæ, ut te amare: idem iudicium esto de reliquis personis. Secunda, Quòd uerbum impersonale ad perfectam orationem constituendam non indiget præsidio alterius partis, ut mea refert audire, infinitiuus uerò perfectam orationem constituere non potest, nisi aliunde accedat præsidium aliquod, ut me amare, imperfecta oratio est, nisi adiunxeris, æquum uel honestum est. Tertia, Verbum impersonale per omnes modos & tempora spargitur, at uerò infinitiuus intra unum modum tantum, & eum quidem ex quinque postremum atque imperfectum, continetur.

In quot species distrahauiur.

Verbum impersonale actiue uocis, in quinque species diuiditur, quia quinque modis constructum deprehenditur. Quæ uerba exigunt post se genitiuum, cōstituunt primam, ut interest. Quæ datiuū secundam, ut conuenit. Quæ accusatiuum, tertiam, ut decet. Quæ post accusatiuum genitiuum uel infiniti

Liber quartus

nitium, quintam, ut tædet, pœnitet. Quæ iunguntur infinitiuis impersonalium quintæ speciei, quartâ faciunt, ut incipit me tædere, quas omnes suo ordine percurramus.

De primæ classe Impersonalium vocis actiue.

Verba impersonalia Primæ classis à fronte nulum casum regunt, quod (ut semel præcipiam) est omnibus uerbis impersonalibus commune. A tergo uerò exigunt genitiuum, post quem desiderant infinitiuum uel orationē subiunctiui, ut interest præceptoris uera discipulis tradere præcepta, uel ut uera discipulis trahat præcepta, qui genitiuus neq; actionē, neque passionem, sed possessionem significabit. Nam cum uerba huius formæ bonum aliquod utile significant, quod debeat ab aliquo possideri, necessario genitiuus ille possessoris personam rebræsentare debet, nam alioqui uerborum natura frustraretur. Vt in his orationibus, præceptoris interest legere, Senatoris refert administrare Rempublicam, genitiui illi præceptoris et Senatoris, possessiue capiuntur, quasi dicas officium præceptoris est legere lectionem, et Senatoris munus administrare Rempublicam. Vbi nullus est qui ambigat, genitiuos illos, præceptoris et Senatoris, possessiue capi. Aliquando tamen loco genitiui habet accusatiuum cum Ad, uel in. Cicero de natura Deorū. Magni interest ad decus et ad laudem ciuitatis, ita fieri. Terentius in Hecyra Ita Diij Deeq; faxint, si in rem est Bæbiidis. Aliquando ponuntur absolutè cum solo infinitiuis, uel oratione subiunctiui, Cicero ad Atticum, Ma-

gnoscere interest opprimi Dolabellam, uel ut opprimatur.

Notabis praterea (authore Laurentio lib. 3. Elegan. cap. 3.) uerba huius speciei post suam peculiarē cōstructionem, admittere quosdam genitiuos aī. mationem significantes, quales sunt tanti, quanti, magni, parui, permagni, ut tanti mea interest quanti tua magni mea refert, parui tua refert. Reliqua uerò nomina aduerbialiter his uerbis apponuntur, qualia sunt, multum plus, plurimum parum, paulum, paululus, pauxillus, nihil nunquid aliquid magis, minus, maxime, minime. Ut, multū siue per multum interest perturbatione quis peccet, an cogitatio. Item plus interest Reipublicæ castellum capi, quàm agros tantum uastari.

Et sunt duo Interest, & Refert.

Verba huius speciei tria sunt, interest, refert, est. Huius tamen postremi mctionem Antonius nō fecit, quia diuersam a reliquis duobus cōstructionē habet. Caterum ut horum trium uerborum natura omnibus innotescat, de his libuit pauca dicere.

De interest.

Interest, aut est uerbum personale, aut impersonale. Si sit uerbum personale, diuersam habet tunc compositionem tunc significationem, tunc etiam cōstructionem, quā quando inter impersonalia numeratur. Nam componitur à præpositione, inter, & est: ac per omnes personas & numeros coniungatur & tunc ex uaria significatione uariam etiam sortitur cōstructionem. Significat aliquando præ-

Libert quartus

presentem esse, & tunc constructur cum datiuo uel ablatiuo media præpositione In. Cicero de Senectute, Sæpe interfui querelis meorum æqualium. Idem pro Sexto Roscio, Roscius ne in conuiuio quidem ullo fere interfuit. Significat præterea differre, & constructur cum accusatiuo media præpositione Inter, uel cum datiuo. Cicero. 1. Officio. Sed inter hominem & belluam hoc maximè interest. Terentius in Eunuch. Stulto intelligens quid interest? Præterea significat in medio esse, siue interiacere, & constructur cum accusatiuo & Inter, Cicero in Catilinam, Dummodò inter me atque te murus intersit. Ponitur etiam absolutè. Liuius de secundo bello Punico. Id morari uictoriam rati, quod interesset annis. Postremo refertur ad distantiam, & constructur cum eodem accusatiuo &, Inter. Cicero de Senectute, Cuius inter primum & sextum cōsulatus sex & quadraginta anni interfuerant Si uerò sit uerbum impersonale, componitur à præpositione, In, & ablatiuo re. & est, quasi in re est, & significat utile esse, siue ad nostram utilitatem pertinere, & constructur tunc cum genitiuo, & est huius speciei ut Regis interest Rempublicam in pace administrare.

De Refert.

Refert, si sit uerbum personale, componitur à Re præpositione, & fero, & significat narrare, re presentare, dirigere, consultare. In quibus significationibus explicandis morari non est necesse, sunt enim apud authores uulgatissimæ. Si sit impersonale,

le, componitur ab ablatiuo, re, & fert, quasi pro re fert, id est. utilitate & commodo, & significat utile esse, siue ad rem spectare: & construitur cum genitiuo, ut Senatoris refert, rerum communium curam gerere.

De est.

De Est uerbo personali satis multa diximus in uerborum considerationibus. Si uerò sit uerbum impersonale, significat utile esse, siue ad rem nostram pertinere, quemadmodum & superiora, & cōstruitur cum genitiuo, ut adolescentis est maiores nati uereri. Construitur etiam cum accusatiuo & præpositione In, ut in rem meam est, id est, ex utilitate mea.

Construuntur uerò cum ablatiuo generis fœminini.

Exceptio est eorum, quæ dicta sunt. Nam cum interest, & refert postulent à tergo genitiuum, si iungantur pronominiibus possessiuis, meus tuus, suus, noster, uester, iam non genitiuum, sed ablatiuum potius generis fœminini numeri singularis exposcunt: ut mea interest legere, tua refert audire. Quibus additur & cuius: ut eius interest fures suspendere, cuius interest iustitiam inuiolatam seruare. Nec loqui posses per genitiuos primitiuorum, mei interest legere, tui refert audire. Cuius ratio est, nam hæc uerba interest & refert, exigunt suo iure genitiuum possessiue significationis, cum uerò genitiui primitiuorum, mei, tui, sui, qui adhuc extant, passionem significant, sit, ut cum his genitiuis construi non possint.

Liber quartus

sint. Necessariò igitur recurrendum est ad pronomina possessiua, quæ possessionem significant: cum in locum genitiuorum, qui iam olim ab usu recesserunt, *mis, tis, sis*, possessionem etiam significantium, substituta sint.

Per ablatiuum autem loquimur, non per aliũ casum, quia nullus casus est genitiuo (significatione saltem) similior, quàm ablatiuus. Cuius rei satis apertum testimonium præstat nobis lingua Græca, quæ cum ablatiuo careat, genitiuo pro ablatiuo perpetuò utitur, propter significationis similitudinem. Sed cur potius fœminina terminatione, quàm masculina utimur? Quia ut paulò ante explicuimus, interest ab in, & re, & est, compositum est: refert ab ablatiuo re, & fert. Vt igitur concordantia pronominis possessiui cum ablatiuo re seruaretur, utendum potius fuit fœminina, quàm masculina, aut neutra terminatione. Idem enim ualet mea interest, ac si diceres in re mea est. Idē mea refert, ac fert pro re mea, id est, utilitate & commodo. Si interest & refert Etymologia tibi non arriserit, recurre ad authorum uoluntatem, quibus fœminina uti placuit, potius quàm masculina aut neutra.

Sed rogabis, quare nobis uti non liceat his genitiuis, mei, tui, sui, non à primitiuis, ego, tu, sui, sed à derivatiuis, meus, tuus, suus, cum possessioē significant, quod unum postulant uerba huius formæ? Respondéo id à Grammaticis fuisse cautum, ne in Amphibologiam incideremus, quam Latini sermonis puritas & castimonia uehementer formidat. Quid enim

enim turpius quàm id quod possis omnibꝫ manifestum facere, tenebris quibusdam & ambigui sermonis caligine inuoluere, ut ne à doctissimis etiam hominibus intelligaris? Cæterum si rem possesam subiungas, nihil obstat, quominus sic Latine loquaris, mei serui interest, tui mancipij refert.

Sed rogabis ulterius, quare non utamur his genitiuis nostrum & uestrum, cum actionem etiam siue possessionem significant? Respondeo, hos genitiuos nostrum & uestrum uix aliter quàm partitiuè à uiris linguæ Latinæ peritissimis usurpari, ut aliquis nostrum, pauci nostrum, multi nostrum: & propterea in ablatiuum fuisse conuersos. Tum etiam propter proportionem & affinitatem, quam habent cum mea, tua, sua: quod idem de cuius dicendum est, nam cum possemus per genitiuum cuius loqui, propter eandem Analogiam loquimur per cuius.

Hæc dicta sint de interest & refert, quando iunguntur possessiuis. Cæterum si eisdem possessiuis iungatur uerbum impersonale, est, uult illa in nominatio singulari, idq; in neutra terminatione, ut meum est, tuum est: quæ loquendi formæ per genitiuum exponuntur, id est, mei muneris & officij est, uel sic, ad meum munus siue officium spectat. Nec loqui possemus per ablatiuum mea est, tua est: quia est, non habet intra se inclusum ablatiuum re, cum quo possessiuum, conuenire possit, quemad-

Liber quartus

modum de interest & refert non multò antè præcepimus.

De nominibus quibus iunguntur mea, tua, sua.

Illud postremò notabis, quod est omnium maxime necessarium, hos ablatiuos mea, tua, sua, capi substantiuè. Vnde fit, ut nominibus substantiuis iungi non possint, nisi facta circumlocutione per uerbū substantiuum, & nomen relatiuum quis, in hūc modū, mea qui sum præceptor, interest legere. tua qui es discipulus, refert audire: nec dices, mea præceptoris, tua discipuli. Præterea nec iunguntur adiectiuis, nisi facta eādē circumlocutione, ut mea qui sum fortis, refert pro patriæ salute mortem subire: nō mea fortis. Cæterum excipiuntur certæ quedam adiectiuorum formæ, quibus ex usu Latinorum iungi possunt. Primum omnium iunguntur his genitiuis unius, solius, ipsius: ut mea unius, tua solius, siue ipsius refert musas colere. Sed si has orationes in pluralem numerum conuertas, loqueris per aduerbia: nostra solum interest, non nostra solorum: uestra tantum interest, non uestra unorum: quoniam solus & unus genitiuis pluralibus carent. Cæterum cum genitiuo ipsorum, satis Latine & eleganter dices, nosira ipsorum uestra ipsorum. Cicero. 6. Familiarium in Epistola Bythinij ad Ciceronem, Itaque contentus ero nostra ipsorum amicitia, cuius fiducia peto à te, ut absentem me, quibuscūque in rebus opus fuerit, tuare.

Item iunguntur participijs præsentis temporis,
ut

ut mea legentis refert bonos libros euoluere. Ceteris uero participiorum formis, præteriti scilicet & futuri, non ita eleganter adhærere solent, ut mea percussî interest chirurgum querere, mea locuti refert dicta defendere.

Item adherent nominibus numeralibus cardinalibus, ut uestra duorum interest ad literas animum conuertere, uestra trium refert mori pro patria.

Præterea iunguntur nominibus adiectiuis quæ à Grammaticis uniuersalia appellantur, ut omnis, cunctus, uniuersus: ut nostra omnium interest in literas uehementer incumbere: quibus adde & partitiua multorum, paucorum, ut nostra paucorum, uel multorum interest patriam defendere.

Postremo nostra & uestra iunguntur huic nomini collectiuo uterque, sed prærogatiua quadam nominis & linguæ Latinæ proprietate in genitiuos migrant, ut utriusque nostrum interest: non nostra utriusque, utriusque uestrum refert, non uestra utriusque.

Grammatices regulæ, quæ in his ablatiuis franguntur.

Vt ultimam manum imponamus huic primæ impersonalium classi, notabis, propter naturam pronominum possessiuorum aliquot Grammaticæ regulas deficere. Prima est, Cōiunctio copulatiua: ut mea & Petri interest. Secunda, Exponens & expositiua: ut mea interest, id est Alfonsi. Tertia, Quocasu quereris: ut cuius interest Deo seruire? omnium. Quarta, Adiectiui & substantiui concordantia, ut

Liber quartus

mea clamantis. mea agrotātis. Quinta, Relatiui & antecedentis, ut nostra qui sumus boni, interest Dei mandatis obtemperare. Sexta. Verba impersonalia primæ formæ regunt genitiuum, cum his tamen pronominibus regunt ablatiuium. Violantur tamen omnes hæ regulæ uoce tenus tantum, nam in significatione omnes manent saluæ & incolumes: cum mea, tua, sua, ponantur loco genitiuorum mis, tis, sis, qui iam intercederunt. nostra, uestra, cuius, loco genitiuorum nostrum, uestrum, cuius, qui adhuc in Latino rum ore & linguis uersantur.

De secunda classe impersonalium.

Verba secundæ classis regunt post se datiuum, et post datiuum infinitiuum, uel orationem subiunctiui, ut conuenit tibi audire, uel ut audias. Quæ cum infinitiuo, & sine supposito, impersonalia sunt. cum datiuo uerò, & supposito fiunt personalia, ut tuum consilium mihi magnoperè placet, magnum mihi accidit infortunium. Si uerò infinitiuus, quem regunt à tergo, sit esse uel fuisse, sequetur post infinitiuum datiuus uel accusatiuus. De datiuo Martialis, Nobis non licet esse tam disertis, Qui musas colimus seuiores. De accusatiuo Terentius in Heautontimo. Nobis esse bonas non licet. Ratio huius præceptionis est, nam ante infinitiuum, esse, subauditur alter accusatiuus. Notabis præterea, id quod alioqui his uerbis apponi solet in datiuo, nonnunquam in accusatiuum transferri, ratione sequentis infinitiui. Cicero pro Lucio Flacco, Hanc te capere non licuit. Et. i. Officio. Hæc præscripta seruantem licet ma-
gni

gnificè, grauiter animosq; uiuere. Et ne existimes id tantum licere in uerbo licet, idem Cicero eadem usus est constructione in uerbo conuenit, pro Sexto Roscio, Homines ista potestate præditos, his rebus maxime mederi conuenit.

De multiplicibus uerbis secundæ classis.

Quadruplicia sunt uerba huius ordinis. **CONVENIENDI**, cum contrarijs, ut conuenit, conducit, expedit, confert, obest, nocet, officit. **FACULTATIS**, ut licet, uacat. **CONTINGENTIAE**, ut accidit, euenit, contingit, usuuenit. **CLARITATIS**, ut liquet, patet, constat.

Conueniendi.

Conuenio quando est uerbum personale, uarios habet usus, nam significat congregari, & construuntur cum accusatiuo media præpositione In, uel Ad. Sallustius in Catilina. Hi postquam in una moenia conuenere. Cicero pro Sexto Roscio, Quanta multitudo conuenerit ad hoc iudicium, uides. Significat etiam alloqui, cum accusatiuo sine præpositione: ut uellem te paucis secretò conuenire. Quando est impersonale, significat decens & conueniens esse, cum solo datiuo: ut conuenit mihi insistere maiorum uestigijs. Aliquando significat concordare, aut cum accusatiuo & inter, ut conuenit inter nos, aut cum datiuo & ablatiuo, ut conuenit mihi cum fratre.

De Licet.

Libert quartus

Licet aliquando adhæret datiuo, ut nemini licet peccare. Aliquando cum accusatiuo & per, & negatiuè prohibitionem, affirmatiuè potestatem rei alicuius faciundæ significamus: ut non licet tibi per me, uel contra licet tibi per me. Postremò absolutū miram habet elegantiam, ut rideas licet, conuitieris licet, facias quicquid uoles licet, Inter uerba huius speciei quedam sunt, quæ duplex habent præteritū, placuit placitum est, libuit libitum est, licuit licitū est, displicuit displicitum est.

De tertia Impersonalium.

Tertiæ clāssis uerba exigunt à tergo accusatiuū post accusatiuum infinitiuum, uel orationem subiūctiui: ut decet te facere, uel ut facias. Quæ cum supposito & accusatiuo, sunt personalia: ut talis oratio non decet uirum honestatis studiosum. Sine supposito & cum infinitiuo, impersonalia sunt, ut decet me legere. Sed si infinitiuus quem regunt à tergo, sit esse, uel fuisse, semper post infinitiuum sequetur accusatiuus, ut decet te esse honestum hominem. Loco tamen infinitiui, quem à tergo determinant, habent aliquando accusatiuum participij præteriti temporis, ut uos exoratos decet: id est, exorari. Notabis ultimò, duo uerba huius speciei: decet, & oportet. reperiiri tantū personalia in tertijs personis quia primis & secundis carent: non enim sunt in usu, deo, aut oporto. Reliqua duo, iuuat, & delectat, personalia reperiuntur in omnibus personis, sunt enim usu quotidiano trita, iuuo, & delecto.

De uerbis tertiæ clāssis.

Qua

Quatuor tantum sunt uerba huius classis, delectat iuuat, oportet, decet, quæ neq; actionem, neq; passionem propriè significant: sed bonum aut iucundum, ut delectat, iuuat, aut honestum, ut decet, oportet, His adduntur & composita dedecet, periuuat. Illa autem, fugit, præterit, latet, quæ multi huic ordini adiungunt, usitatius personalia quam impersonalia reperiuntur, ut hoc non me fugit, latet, aut præterit. Illud tamen unum notabis circa uerba decet & oportet, fuisse scilicet olim cum datiuo constructa, & inter uerba secundæ classis numerata. In uirgilio lib. 34. Honestæ aut solæ, aut primæ certè pensari, decet principi orbis terrarum populo, & tanto regi. Plautus in milite, Homini seruo suos domitos habere oportet oculos. Sed tu caue ea utaris constructione, quæ in obliuionem iam uenit.

De quarta impersonalium.

Verba quarti ordinis postulant à tergo accusatiuum, & infinitiuum uerborum quintæ speciei, qui accusatiuus potius ab infinitiuo dependet, quam à uerbo impersonali, ut debet malos pudere. Hæc autem uerba cum supposito & infinitiuis aliorum uerborum, præterquam quintæ, personalia sunt, ut incipio legere. Sine supposito uerò, & cum infinitiuis uerborum quintæ, sunt impersonalia, ut incipit me tædere uitiorum. Sed si obijcias reperiri aliquando personalia cum infinitiuis uerborum quintæ in huiusmodi locutionibus, cæpit ille pænitere, posses pigere, desinam tælere. Respondeo, ex sententia Laurentij li 3 Elegant. ca. 46. sæpius & usitatius dici,

H I cæpit

Libert quartus

cœpit illum pœnitere, posset te pigere, desinet mē
reddere, in quibus orationibus uerba sunt impersona
lia. Quintilianus in milite Mariano, Neq; si sit cu
pidissimus uitæ pœnitere cum sui facti potest. Cice
ro de petendo Consulatu, Si hic ciuis liber est, cuius
authoritatis neminē posset pœnitere. Notabis præ
terea, uerba huius speciei posse aliquādo habere in
finitiuum uerborum passiuorum, ut solet dubitari:
item uerborum impersonalium passiuæ uocis, ut so
let ab omnibus curri, item uerborum naturæ, ut in
cipit lucescere, solet tardius in quibusdam regioni
bus aduesperascere.

De uerbis quartæ classis.

Quinque sunt uerba huius ordinis, incipit, siue
cœpit, desinit, solet, debet, potest: ex quibus aliqua
duplex habet præteritum, ut incipit inceptum est,
desijt desitum est. Soleo tamen tantum habet solitum
est. Inijciēt tamen tibi aliquem scrupulum huiusmo
di dubitatio, Si uerba tertiæ cum accusatiuo cōstruā
tur, item uerba quartæ, & quintæ, quidnam inter
has species intersit? Respondeo, uerba tertiæ cū ac
cusatiuo & quolibet infinitiui cōstrui, uerba quar
tæ cum accusatiuo & infinitiui: sed neque accusa
tiui ille regitur à uerbo impersonali, neque infiniti
uius à quibuslibet uerbis descendere potest, sed à
uerbis tantum quintæ. Verba autem quintæ nō tan
tum cum accusatiuo, sed cum genitiui etiam con
struuntur. Latissima itaque erit differentia inter
has tres species.

De quinta impersonalium.

Verba

Verba huius gradus regunt accusatiuum à tergo, post accusatiuum genitiuum, uel infinitiuum loco genitiui, quando genitiuus rem uerbi significat, aut à uerbo descendit, ut *pœnit* me uitæ uel uiuere. Si uerò à uerbo non descendat, loco genitiui non ponitur infinitiuus: ut *pudet* me patris, *miseret* me. pauperis. Hæc autem uerba cum supposito & accusatiuo, sunt personalia, ut non te hæc pudent? Sine supposito & cum accusatiuo & genitiuo, uel infinitiuo loco genitiui, sunt impersonalia, ut *pœnit* me peccati, uel peccasse. Fiunt autem personalia in tertijs personis tantum, non in primis, neque secundis: sunt enim ab usu authorum aliena uerba illa. *pœniteo*, *pigeo*, *pudeo*, *miserere*, *tædeo*. Ac propterea *Antonius* dixit, hæc esse proriè impersonalia, si ulla usquam essent: nam reliqua impersonalia, fiunt personalia in primis, aut secundis personis, hæc autem in tertijs tantum & raro.

De uerbis quintæ classis.

Quinque sunt tantum uerba huius ordinis, *pœnit*, *piget*, *pudet*, *miseret*, *tædet*, de quibus pauca quædā dicamus. *Pœnit* dolere significat, cum quæ ipsi fecimus, ea nobis postea displicere incipiunt, & molesta esse, ut *pœnit* me tam turpe facinus patrasse. Aliquando significat parum uideri. *Cicero* in prologo. i. Officio. Tandiu autem uelle debebis, quoad te, quantum proficias non *pœnitebit*, id est, non parum uidebitur. Ab hoc uerbo descendunt

Liber quartus

dunt duo participia, poenitens & poenitendus. Cicero Familiarium. 12. Portus optimus poenitenti mutatio consilij. Suetonius in Vespasiano, Firmavitq; tandem gens Flavia, obscura illa quidem, ac sine ullis maiorum imaginibus, sed tamen Reipublica nequaquam poenitenda, id est, non parui aestimanda. Item poenitendum gerundium. Sallustius in Iugurtha. Num eorum poenitendum sit. Poeniturus raro reperitur. Accius, Quod si procedit, neque te, neque quenquam arbitror poeniturum tuae laudis.

Piget raro personale reperitur. Plautus in Menæce. Adolescens quæso loquere tuum mihi nomen, nisi piges. Habet duplex præteritum piguit uel pigitum est. Gellius lib. 12. Pigitum est cunctos saltem esse penulatos. Inde participiū in, dus. Propertius lib. 4. Hostis ab inuita uerba pigenda lyra. Cicero de claris Oratoribus usus est gerundio, Ad misericordiam inducitur, ad pudendum, ad pigendum. Pudet duplex habet præteritū, puduit uel puditum est. Apuleius pro Magia, Nonne uos puditum est hæc crimina tali uiro obiectare? Hinc prodeunt tria participia, pudens, puditus, pudendus. Cicero. 13. Familiarium, Hominem pudentem & officiosum cognosces, & dignum qui à te diligatur. Plinius. 36. Tanquam puditurū esset extinctos. Gellius lib. 1. Nec pudenda dico aut poenitenda.

Miseret format præteritum misertum est. Terentius in Heautontim. Ita me Diæ amabūt, ut me tuum misertum est Menedeme fortunarum. Ab hoc uerbo proficiscitur miserescit, quod impersonale reperitur

peritur. Idem in Heautontimo. Inopis miserescat
mei.

Tædet præterito caret, illud tamen mutuo sumit
à uerbo composito pertasum est. Inde nascitur par
ticipium pertasus, quod omiſſa ſui uerbi origine cū
accuſatiuo coſtruitur. Suetonius in Iulio, Pertasus
ignauiam ſuam. Idem in Auguſto, Pertasus morum
peruerſitatem.

De uerbis Impersonalibus paſſiuæ uocis.

Poſt tractationem uerborum impersonalium ac
tiuæ uocis, diſputat Nebriffenſis de impersonalibus
uocis paſſiuæ: quæ ideo paſſiuæ uocis dicta ſunt,
quòd ſimilia ſint tertijs perſonis uerbi perſonalis
uocis paſſiuæ. Formanturq; à tertijs perſonis ſin
gularibus uocis actiuæ addita, ur, ut currit curri
tur, pugnat, pugnatur. Neq; exiſtimes eadem eſſe
uerba cum paſſiuis, quia terminatione uocis ſimilli
ma ſunt inter ſe, nam licet uocis gerant ſimilitudi
nem, triplici tamen de nomine differunt. Tum pri
mò quia uerba paſſiua paſſionem ſignificant, im
personalia uerò paſſiuæ uocis perpetuò ſignificant
actionem, à quibuſcunq; uerbis oriuntur. Præ
terea paſſiua uerba ſuppoſitum habent, cum quo in
numero, & perſona conueniant, impersonalia uerò
eo prorſus ſunt orbata. Poſtremò paſſiua à uerbis
actiuis deſcendunt, à quibus impersonalia originem
trahere non poſſunt, quatenus actiua ſunt, ut non
multò poſt apertè demonſtrabimus. Aggrediamur
igitur propoſitam materiam, & explicemus, quid
nam ſit uerbum impersonale paſſiuæ uocis, quid ſi
gniſi-

Liber quartus

gnificet, à quibus uerbis descendat, quo pacto construatur. Nam præter hæc nihil est, quod amplius possit in hac materia desiderari.

Quid sit.

Verbum impersonale passiuæ uocis est, quod neque expressum, neque subintellectum suppositum habet, cum quo conueniat, & est simile tertijs personis numeri singularis uocis passiuæ. Exponamus membra diffinitionis. Quod neque expressum, neque subintellectum suppositum habet. Nam hoc est uerbis omnibus impersonalibus commune, ut supposito careant: cum quo in numero & persona conueniat, quemadmodum & uerba personalia hoc habent proprium, ut à fronte suppositum habeant, cum quo in duobus accidentibus, numero scilicet & persona concordent, ut ego amo. Additur tamen in definitione, Neque subintellectum. propter Priscianum, qui asserit sub uerbis impersonalibus passiuæ uocis nominatiuum rem uerbi significantem subintelligi. Nam cum dico (inquit, curritur, cursus intelligitur, cum dico sedetur, sessio, cum ambulatur, ambulatio. Quæ opinio falsa est, tum quia tollit omnia uerba impersonalia nã ea uerba manifestè personalia sunt, sub quibus similis intelligitur nominatiuus. Tum quia sic tribuit passiuam significationem uerbis impersonalibus passiuæ uocis. Et est simile tertijs personis passiuæ uocis. Nam impersonalia in uoce finali sunt tertijs personis passiuorum. & per eas tantum coniugantur, idq; non tantum in presenti, sed in reliquis temporibus, ut curritur, correbatur, cursum

sum est.

Quid significet.

Verbum impersonale passivæ uocis semper significat actionem idq; ex resolutione patere potest. Resolvitur enim per uerbum actiuum numeri pluralis sub eodem tempore, & ablatiuo personæ agentis in nominatiuum conuerso, ut reclamatur ab omnibus, id est, omnes reclamant, curritur ab omnibus id est omnes currunt. Quæ resolutio multò aptior est, quàm illa Prisciani per nomen uerbale & uerbū fio, curritur, id est cursus fit, certatur, id est, certamen fit. Sic enim significarent passionem impersonalia, quæ significatio ab eorum natura plurimum abhorret.

A quibus uerbis descendat:

Oritur autem uerbum impersonale passivæ uocis propriè à uerbis neutris absolutis, ut itur, curritur, certatur. Verg. 10. AENEID. Macte noua uirtute puer, sic itur ad astra. Hora I. Sermo. Saty. 1. Cōcurritur, horæ momento cita mors uenit, aut uictoria lata, Itē Verg. 10. AENEID. Certatur limine in ipso Ausoniæ. Oritur etiam à uerbis neutris secundæ ordinis, ut à noceo nocetur, à seruiō seruitur. Cicero. 1. Officio. Primum ut ne cui noceatur, deinde ut communi utilitati seruiatur. A reliquis uerborū neutrorum formis, cæterisq; uerborum generibus impropriè & rarò descendunt. Plautus in Pseud. Quid agitur Callidore? amatur, atque egetur acriter. Idem in captiuis duobus, Quasi cum caletur, Cochleæ in occulto latet. Sallustius in Iugurtha,
Vti

Libert quartus.

Vti ex libris Punicis interpretatū nobis est, quā paucissimis dicam. Apuleius li. 4. Metamor. Mœretur, fletur, lamentatur diebus plusculis. Quæ quoniam rara sunt, pro regula assumi non debent neq; enim à nobis relata sunt, ut usui sint, sed ut noscātur tantum. Ab actiuis uerò absolutis, hoc est, regimine accusatiui casus carentibus, bene descendere possunt impersonalia, ut est communis omnium ferme Grāmaticorum sententia. Verg. Vsque adeò turbatur agris, Macrobius. 1. Saturnaliorum, Eundem esse Iouem & solem claris docetur indicijs. Cæterum à uerbis actiuis quatenus actiua sunt, & sui accusatiui constructione gaudēt, impersonalia passiuæ uocis descendere non possunt, nam si sic, iam post suam priuatam syntaxim. regerent accusatiuum, quod à ueritate prorsus abhorret. Non enim Latine dici posset, Matthæum legitur, sed Matthæus, Grāmaticam auditur, sed Grammatica. Si obijcias, eadē proportionē, qua Latine dicitur, læditur manum, frangitur pedem. posse etiam dici, legitur Matthæum, amatur Deum. Respondeo, diuersam esse rationem, nam in prioribus per Synecdochen toleratur constructio, in posterioribus synecdoche locum habere non potest, cum neq; ibi totum sit, nec pars, nec proprietas quæ conueniat toti. Si iterum obijcias, Nebrissensem in uerborum coniugationibus à uerbis actiuis formasse impersonalia, amatur, docetur, legitur, auditur. Respondeo, id fuisse consultò à Nebrissenſe factū, ut pueri in una uerbi positione tres simul uoces agnoscerent, actiuam, passiuam, & im
per

personalem, ut ad eam normam, & proportionem reliqua scirent declinare: Non tamen inde colligas, eam fuisse Nebrissenſis mentem, à uerbis. ſ. actiuis formari poſſe impersonalia.

Quo pacto conſtruatur.

Verbum impersonale paſſiuæ uocis à fronte nulum regit caſum, à tergo uerò ablatiuum cum præpoſitione A, uel Ab, ſignificantem generalitatem, ut curritur ab omnibus: ſiue ablatiuum nominis collectiui, ut curritur ab utroq; certatur à populo. Aliquādo tamen hic ablatiuus ex authorum uſu eſt numeri ſingularis, .Caſar. i. bellorū Ciuium, Nequis inuitus ſacramentum dicere cogatur, cauetur à Cæſare. Cicero. 5. Familiarium, Nihil eſt a me inſeruitum temporis gratia. Seneca Epist. 85. Sapienti nocetur non à paupertate, non à dolore. Tacitus lib. i. A Marco Martio proſperè pugnatū eſt. Ceterum præcepta de iis, quæ frequentius contingunt, tradi ſolent. Præterea regunt caſum uerbi à quo deſcendūt præter ablatiuum, ut ſeruitur tibi ab omnibus, nihil mihi noceri poteſt. Iūgūtur ad hæc caſib⁹ generalibus, quales ſunt caſus præpoſitionum, Itur in antiquam ſyluam. Effectiuus, certatur comminus armis. Caſus locorum, ut itur Romam. Caſus tēporis ut decem annos à Græcis cum Troianis certatū eſt.

De infinitiuis.

Poſt uerba impersonalia tam actiuæ quàm paſſiuæ uocis, diſſerit author de uerbis infinitis. Quæ licet cum impersonalibus in eo conueniant, ut utraq; numeris & perſonis careant, diſſident tamen longo

I inter

Liber quartus

interuallo: cum impersonalia sub figura tertia personae speciem quandam & effigiem numerorum personarumq; nobis repræsentent: infinitiua uero quantum in se est, nullos neq; numeros designent, neq; personas. Atq; idè dicta sunt infinita, quòd nihil habeant finitum, certum, aut determinatum, sed omnia sint in eis indefinita atq; indeterminata. Cū igitur iā liquèdò constet, unde infinita nomē acceperint, examine-
mus necesse est, quidnā infinitius sit, unde determinetur, quo pacto cōstruatur, & quā itē ratione ex uoce actiua in passiua cōuertatur. Quibus omnibus pulchrè examinatis, nihil erit quod in hac materia scholasticorū animis aliquid negotij possit facessere.

Quid sit infinitius.

Quoniā infinitius uarijs modis accipitur, uixq; posses intelligere de quo infinitiua finitio tradi debeat, ut omnis de medio tollatur ambiguitas, eos in principio disputationis libuit percurrere. Vsurpatur Primò pronomine, idq; in tribus potissimū casibus nominatiuo. Persius. i. Sat. Scire tuum nihil est, nisi te scire hoc sciat alter, id est, scientia tua nulla est. Accusatiuo. Idem eadem Saty. Tunc cū ad caniciē, & nostrum istud uiuere triste Aspexi, id est, nostram istam uitam tristem. Genitiuo (Tametsi raro) Terentius in Eunuchis. Certè extrema linea amare huiusmodi nihil est, id est, amoris. Tunc uero quando pro nomine capitur, ab alia parte orationis non determinatur, nec regit casum, sed perinde ac nomen siue a fronte, siue a tergo regitur. Secundò pro præterito imperfecto indicatiui tam uocis actiue quàm

quàm passiuè: & tunc nominatiuum pro supposito ante se exigit, & post se casum uerbi finiti. Quod ideò præstatissimos authores fecisse asserit Donatus, ut oratio sit maioris asseuerationis. concitatio-
risq; motus. Sallustius in Iugurtha. Milites Ro-
mani periculi insolito metu, arma capere, alij sese
abdere, pars territos confirmare, trepidare. Ver-
gilius. 2. A. Eneid. Iamq; dies infanda aderat, mihi
sacra parari. id est, parabantur, hoc dicendi gene-
re, quoniam elegantissimum est, & Poetis & Hi-
storicis uti licet. Tertiò pro gerundio genitiui &
accusatiui casus, Græcorum more: qui cum gerun-
dijs careant, infinitiuo pro gerundijs utuntur. Ver-
gilius. 2. Georgi. Et iam tempus equàm fumantia
soluere colla pro soluendi. Idem in Bucolicis Eclo-
ga 7. Et cantare pares, & respondere parati, id
est, ad cātandum & respondendum: hic modus pro-
pter metri necessitatem est Poetis admodum fami-
liaris. Quartò pro participio praesentis & futuri
in, dus. Vergilius in Bucolicis Egloga. 3. Phyllida a-
mo ante alias, nā me discedere fleuit, id est, disceden-
te. Idem. 5. A. Eneid. Argenti magnum dat ferre tā
lētū, id est, ferēdū. Quintò, p priori supino, ut uado
piscari, id est piscatū: tamē hic modus infrequēs est.
Sextò, p subiunctiuo, ut nō ueni soluere, id est, ut sol-
uā. Septimò in ppria forma & natura. quādo à par-
te anteriori ab aliqua orōnis parte determinatur. à
posteriori uerò regit casū uerbi à quo originē tra-
hit, ut honestissimū est me uoluptatib; carere. Ie in
finitiuo igit in ppria ui capto, tradii seqs definitio:

Liber quartus

Infinitiuus est, qui non habet determinatos numeros neq; personas, indigetq; altero uerbo ut perfectū sensum significet. Examinemus partes finitionis. Qui non habet determinatos numeros & personas. Nam infinitiuus per se sumptus nullius est numeri, nec personæ, sed per adiunctionē suppositi ad certū numerū & personam reducitur, ita ut me amare s. t. primæ personæ, te amare secundæ, illum amare tertiæ. In ligetq; altero uerbo, ut perfectū sensum significet siue eiusdem modi, siue alterius, Eiusdē, uerget. A. Enei. Nec posse Italia Teucrorum auertere regē, Alterius, ut cupio modis omnibus Deo seruire. Nota etiam eam partem finitionis nō tantū de uerbo, sed de nomine etiā & participio debere intelligi, nisi enim ab una harū partiū terminetur infinitiuus, perfectam sensum aut sententiā importare nō potest. Adeo enim debilis est uaturæ & imperfectæ ut per seipsum nec numeros certos, nec certas personas, nec certā sententiā habere possit, nisi aut nominis, aut uerbi, aut participij præsidij adiuuetur.

Vnde determinetur.

Ex definitione patet, infinitiuū esse modum imperfectum, & indigere determinatione alicuius partis orationis, ut aliquid perfectū significet. Declaremus igitur necesse est, quid sit infinitiuum determinari, & à quibus partibus orationis huiusmodi determinationem accipiat. Tunc infinitiuus determinari dicitur, cum ad certam personam & numerum coarctatur, ita ut ex uaga & incerta natura, tū numeris tū personis cert⁹ fiat. Solet autē deter-

determinari à tribus partib⁹ orationis, nomine, uerbo & participio. De quibus singulis dicamus oportet. Nomina aut sunt substantiua, aut adiectiua si substantiua, adherere solent gerundio genitiui, præter pauca quedam, quæ determinant infinitiuum. Ea sunt, res, opus, fas, nefas operæpretium, usus, & adiectiua in neutro genere substantiuè capta. Id exemplis uerum esse ostendamus, optima res est agricolare, non agricolan ti: non est mihi opus respondere, non respondendi. Fas siue nefas est dicere, non dicendi. operæpretiū est audire non audiēdi: honestū est inopi succurrere, non succurrendi. De usus, idē censeto, quod de opus. Si uerò sint adiectiua, ex his quedam determinant infinitiuum tātū, ut latus te bene ualere, dignus habere multas opes. Quedā tā infinitiuā, quā genitiui gerundiū, illa præsertim quæ à uerbis originem trahunt: ut timidus, cupidus, audius nauigare & nauigandi.

Secundo determinatur infinitiuus à uerbis uarij generis: uoluntatis, ut uolo, cupio, desidero, opto, de beo, habeo facere. Item a uerbis sensus, ut uideo, audio, intelligo sentio. Præterea principij, mediij, finis, ut incipio, solco, desino militare. Item imperij, ut impero, iubeo, præcipio tibi facere. Potestatis, ut possum, ualco tibi iniuriam inferre. Postremò à uerbis impersonalibus uocis actiuæ, ut conuenit mihi docere, iuuat me saltare. Lingue, ut dico, aio, affirmo, & ab alijs uerborum formis, quas superuacaneum esset recensere.

Tertiò à participijs suā naturā retinētibus ut ti

*timens nauigare, cupiēs discere. doctus, pröptus, cö
fuetus cātare. Cæterum si à sua natura degenerēt,
et in uim nominis trāseāt. gerundiū genitiui deter
minant: ut cupiēs discēdi, timēs nauigādi. Nam parti
cipia iuncta infinitiuis, dicūtur seruare uim parti
cipiorū, iunctā gerundio uim nominū. Aliquādo de
terminatur à uerbo et nomine simul iunctis, quādo
altero sublato, alterū determinare infinitiuum non
potest. ut non est animus acerbitatē tuarū literarū
hic cōmemorare: itē graue est Kemplicā guber
nare. Aliquādo ponitur sine determinatione per e
clipsim. Verg. 1. A. Enei. Mene incepto desistere ui
ctam? subintelligitur tamē decuit, aut aliud quidpiā,
à quo infinitiuus determinetur.*

Quo pacto construatur.

*Vt certa de infinitiuorū cōstructione præceptio
tradipossit, distinguas oportet de infinitiuo. Nā aut
est personalis: aut impersonalis, si personalis, aut ad
iectiuus aut substantiuus. Agemus igitur primo loco
de infinitiuo personali adiectiuo. 2. de substantiuo. 3.
de impersonali. Infinitiuus personalis uerbi adiecti
ui, à fronte regit accusatiuū personæ agētis in acti
ua significatione, et personæ patietis in passiuā, à
tergo uerò casum uerbi, à quo descēdit. ut me ama
re Deū bonū est. parentes castigare filios laudabi
le est, carere uoluptatibus, et inferuire amicis iocū
dum est. Per passiuam sic, Deum à me amari bonum
est, filios à parentibus castigari laudabile. Quoties
tamen infinitiuus actiue significationis cum duobus
accusatiuis ante se construitur, quorum alter à par*

te anteriori, alter à posteriori regatur, Amphibologica est constructio: quæ tanquam uitiosa modis omnibus fugienda est. Quale fuit oraculum illud Apollinis, Aio te AEacida Romanos uincere posse. Ambiguū erat, uter esset uicturus, an Pyrrhus Rex Epirotarum, an populus Romanus, quæ oratio si per uocem passiuam fiat, omnis tolletur Amphibologia. Aio te AEacida uinci à Romanis posse. Permittitur etiam huiusmodi locutio per duos accusatiuos, quando in sensu orationis nulla est ambiguitas: quale est illud Terentij uerbum in Eunucho, Ego me illam amare fateor, Item illud, Heus tu purgem me de isthac Thaidi, quòd me eam amare suspicatur? Aduertas etiam oportet, infinitiuum à fronte aliquando cum accusatiuo construi non posse, sed cum nominatiuo, quando scilicet uerbi determinati, & determinantis est idem suppositū. Quod cōtingere solet cum uerbis uoluntatis, potentiae, principij, medij, & finis: ut cupio legere, nō cupio me legere possum tibi inferuire, non possum me tibi inferuire, licet aliquando in oratione exprimat. Cicero in Catilinam, cupio me esse clementem. Terentius in Eunucho. Mori me malim, pro cupio esse clemens & mori malim. Cæterum quando suppositum uerbi determinantis & determinati, non est eiusdem personæ, necessario exprimitur accusatiuus, ut cupio te id facere, uolo te uti amico nostro familiarissime.

De infinitiuo Esse.

Libert quartus

Secundo loco promissimus nos tractaturos de infinitiuo uerbi substantiuu, cuius constructio, quoniam uaria est, quibusdam regulis explicabitur. Sit prima Si præcesserit nominatiuus solus infinitiuu esse, sequetur alter nominatiuus, ut cupio esse Poeta. Si uero præcesserit nominatiuus cum datiuo, aut sunt eiusdem personæ, aut diuersarum, si eiusdem, sequetur nominatiuus, ut uideor mihi esse doctus, si diuersarum, aut casus sequens respondet nominatiuo aut datiuo, si nominatiuo, sequetur nominatiuus, ut uideor tibi esse doctus, si datiuo, sequetur etiam datiuus ut Deus dedit tibi esse beato.

Sit secunda, Si præcesserit genitiuus, sequetur accusatiuus. Et non alter genitiuus, ut Ciceronis inter fuit esse eloquentem, Romanorum retulit esse bellicosos, non eloquentis, aut bellicosorum, quia huiusmodi constructio est Latinis auribus inaudita.

Sit tertia. Si præcesserit datiuus, sequetur datiuus uel accusatiuus, quia alter accusatiuus à fronte intelligitur, ut natura dedit omnibus esse beatis, uel beatos. De datiuo, Cice. lib. 1. Tuscula. Licuit otioso esse Themistocli, licuit Epaminondæ. De accusatiuo, Idem pro Cornelio Balbo, Cui Romana licet esse Gaditanum.

Sit quarta, Si præcesserit accusatiuus, sequetur semper accusatiuus, ut uolo me esse Poetam, Et non Poeta.

Sit quinta, Si præcesserit uocatiuus, sequetur nominatiuus, quia alter nominatiuus secundæ personæ à fronte intelligitur, ut Petre uis esse cōtubernalis meus?

Sit sexta, Si præcesserit ablatiuus sequetur accusatiuus

tius multò elegantius, quàm ablatiuus, ut utor Petro uolenti esse contubernalem meum, uel contubernali meo.

Sit septima, Si nullus casus præcesserit, sequetur accusatiuus, qui casus magis quadrat infinitiuorum naturæ. Ouidius. 5. Metamor. Quantum est esse Iouis fratrem. Et. 9 Et me dignus eras, uerùm nocet esse sororem. Quæ regulæ traditæ sunt pro infinitiui, esse, constructione, poterunt ad uerba reciproca & uocatiua accommodari.

De infinitiuo impersonali.

Infinitiuus uerbi impersonalis à fronte nullū casum regit, à tergo uerò tam in uoce actiua, quàm in passiua construitur cum aliorum modorum casibus, ut mea referre in uirtutis studio immori, quis dubitat? Item nihil est Deo gratius, quàm hominem peccati commissi pudere. Item etiam, ab scholasticis in arena literaria strenuè certari quis non gaudet?

De conuersione infinitiui actiui in passiuum.

Fit autem conuersio uocis actiue in passiuam, in hunc modum. Accusatiuus patiens, qui est à tergo, mutatur à fronte in eodem casu: accusatiuus uerò agens qui erat à fronte, mutatur in ablatiuum cum præpositione A, uel Ab, uel in datiuum à tergo. Ut bonum est me amare Deum, bonum est Deum amari à me uel mihi. Posses etiam accusatiuum agentem qui erat ante infinitiuum, mutare in accusatiuū post infinitiuum medijs præpositionibus, Per, Inter, Apud, ut intelligo uiros probos Deum colere, intelligo Deum coli per uiros probos, siue inter, uel apud

Liber quartus.

uiros probos. Fallit tamen conuersionis regula, quādo infinitiuus determinatur à uerbis significantibus potestatem principium medium, finem, aut obligationem aliquam. Tunc enim accusatiuus patiens mutatur in nominatiuum ut ego possum, incipio, soleo, desino, debeo Deum colere. Deus potest, incipit, solet, desinit, debet à me coli.

De circumloquijs.

Perductis iam ad finem infinitiui, reliquum est, ut de circumloquijs agamus, quæ idcò circumloquia dicta sunt, quòd per ea futurum infinitiui tam uocis actiua, quam passiuæ circumloquamur. Nam cum nullum in lingua Latina uerbum sit, quod proprium habeat infinitiui futurum præter solem defectiuū, quod habet fore pro futurum esse) illud necessitate quadam ex diuersis partibus cōficere coacti sumus. In primis explicemus, quidnam sit circumloquium, mox quotuplex sit, deinde sigillatim omnia circumloquia suo ordine percurremus, ex quibus partibus conficiantur ostendentes.

Quid sit circumloquium.

Circunloquium est quidam uerborum circuitus, quo pluribus uerbis explicamus, quod uno explicari poterat, ut ego sum amans, pro ego amo, ego e rā amans, pro ego amabam.

Quotuplex sit.

Est autem duplex circumloquium, uoluntarium, & necessarium. Volūtariū est, quādo id quod uno uerbo dicere possemus, pro uolūtate et arbitrio nostro pluribus explicamus. Quo pacto omnia uocis

actiua

actiua circumloquia uoluntaria sunt, quando ea fieri, aut non fieri ex nostra pendet uoluntate, ut ego sum legens, pro ego lego, utinam ego essem legens, pro utinam ego legerem, de quo circumloquio non est in praesentia sermo. Necessarium est, quando id quod uno uerbo dicere non possemus, cogimur pluribus dicere, quo pacto omnia circumloquia uocis passiuę quę fiunt per participium praeteriti & uerbū substantiuum necessaria sunt. Item etiam omnia circumloquia futuri infinitiui modi tam uocis actiuę quā passiuę, de quibus mo lō suscipitur disputatio. Sunt igitur tria circumloquia huius futuri in uoce actiua totidem in passiuā.

De Amatum ire, primo circumloquio

vocis actiuę.

Primum circumloquium actiuę uocis fit ex priore supino, & infinitiui ire, ut spero me amatum ire Deum. Vbi notabis, amatum ire, tempus futurū significare, non praesens: ac licet ire, per se sumptum motum significet, in circumloquio tamen nullum motum praeferre. Laurentius tamen Valla libro primo. Elegant. cap. 28. affirmat, amatum ire tempus praesens significare. Nam aliud est (inquit) oratum ire, quā oraturum esse, aliud coenatum ire, quā coenaturum esse. Nam oratum ire, coenatum ire, temporis sunt praesentis, oraturū esse, coenaturum esse, futuri. Quibus uerbis si sentiat amatum ire, quatenus prius supinum est à uerbo motus determinatum, tempus praesens significare, satis egregie praecipit, neque id quisquam qui sanis sit

cerebri

Libert quartus

cerebri negare audebit. Ceterum si sentiat amatum ire, quatenus futurum infinitiui est tempus presens importare (quod ego de tanto uiro mihi persuadere non possum) deceptus plane est. Notabis praeterea, hoc circumloquium a uerbis significantibus actionem, significare etiam actionem, ut spero te amatum ire Deum. A uerbis uero significantibus passionem, significabit etiam passionem, ut spero te uapulatum ire. Hoc idem circumloquium a fronte regit accusatiuum agentis, a tergo casum uerbi cuius est circumloquium, ut spero te seruitum ire Deo.

De Amaturum esse, secundo circumloquio uocis actiuae.

Secundum circumloquium uocis actiuae fit ex participio futuri in, rus, cum infinitiuo esse, ut spero me amaturum esse Deum. Quod per omnia genera & numeros uariatur, conuenitque semper cum accusatiuo rei agentis in genere, numero, & casu, ut spero me amaturum esse, spero uirginem nupturam esse, spero uiros amatuos esse, & foeminas etiam amaturas. Hoc etiam circumloquium a uerbis significantibus actionem, significabit actionem: a passione significantibus, passionem: ut spero te amaturum esse, spero te uapulaturum esse. Ante se habet accusatiuum post se casum uerbi cuius est circumloquium, ut spero te seruiturum esse Deo. Laurentius Valla li. 1. Elegant. cap. 26. affirmat dici non posse amaturum fore, ita ut loco esse, ponatur fore, ne duo participia tempus futurum significantia coniungantur, tantum enim ualeat amaturum fore, ac amaturum futurum.

rum Cum infinitiuo igitur fore, præcipit loquendū esse per nomina, amatorem uel amicum fore, uel per participia facta nomina, amantem fore. Caterum hæc præceptio authorum usu falsa esse probatur. Cicero ad Atticum lib 5 epistola ultima, Deinde ad dis, si quid secus, te ad me fore uenturum. Idem pro Milone, Vtuo Publio Clodio nihil horum uos uisuros fore, Idem sit iudicium de amandum fore. Idem Cicero tertio Familiarium. Quasi diuinarem tali in officio fore mihi aliquando expetendū studiū tuū. Liuius Decadis quarta libro septimo, Aut sub pelli bus habendos milites fore. Idem libro sexto eiusdē Decadis. Eò quoque mittendos eos fore legatos.

De amaturum, tertio circumloquio vo.

cis actiuæ.

Tertium circumloquium uocis actiuæ fit ex solo participio futuri in, rus, in accusatiuo posito, idq; in neutra terminatione indeclinabiliter: ut spero uiros amaturum. Quod deseruit omnibus generibus utriusque numeri, ut spero uirginem nupturum tibi, & uirgines nupturum uiris. Accipiet autem significationem, iuxta rationem uerbi à quo descendit, à fronte accusatiuum habet, cum quo non conuenit in genere, aut numero. à tergo regit casum uerbi. à quo descendit. Hoc tamē circumloquio licet propriū futurum infinitiuū esse dicatur, non utimur, licet antiqui eo frequenter fuerint usi.

De amatum iri, primo circumloquio

vocis passiuæ.

Primum circumloquiū passiuæ uocis fit ex priorisu-

ri supino & infinitiuo iri uerbi impersonalis uocis passiua, ut spero me amatum iri à Deo. Et quanuis fiat ex duabus partibus actionem significantibus, totum tamen circumloquium passionem significat. Cicerone lib. 5. Episto. 1. epist. Quinti Metelli, Existimaram pro mutuo inter nos animo, & pro reconciliata gratia, nec absentem ludibrio lesum iri, nec Metellum fratrem ob dictum, capite ac fortunis per te oppugnatum iri. Vbi bis in eadem periodo eodē circumloquio usus est Cicero in passiua significatione. Idem. 2. Rhetoric. Deinde ceteros à uirtutis studio repulsum iri. A fronte regit accusatiuum rei patientis, à tergo ablatiuum cum præpositione A, uel Ab, ut nunquam putaram fratrem meum lesum iri abs te. Qua in parte deceptus est Antonius, qui in commentarijs asserit, iri, uerbum esse impersonale uocis passiua, & actionem significare, & non posse conferui cum ablatiuo, nisi ablatiuus ille generalitatem significet, quemadmodum in uerbis impersonalibus passiua uocis ab eodem præceptum est. Vnde negat, Latine dici posse, spero me amatū iri à Deo, quoniam ablatiuus ille generalitatem nō significat. Sed opinionem hanc falsam esse ostendunt auctoritates Ciceronis à nobis paulō ante citatæ, & cōmunis etiam Gramaticorum schola.

De amandum esse, secundo circumloquio uocis passiua.

Secundum circumloquium passiua uocis fit ex participio futuri, in dus, cum infinitiuo esse, siue fore, ut amandum esse, amandum fore. Quod per omnia

Libër quartus

omnia genera & numeros uariatur, cōuenitq; semper cum accusatiuo rei patientis in genere, numero, & casu: ut spero Deum amandum esse à me, uel matrem à me colendam, uel studiosos adolescentes à me honorificis premiis exornandos. Significat semper passionem, & ante se regit accusatiuum patientis, post se casum uerbi passiui, à quo descendit, ut in exemplis propositis uidere est.

De Amandum, tertio circumloquio uocis passiue.

Tertium circumloquium passiue uocis fit ex solo participio futuri in, dus, in accusatiuo posito, idq; in neutra terminatione indclinabiliter, ut amandum. Quod deseruit omnibus generibus utriusque numeri, ut spero pacem petendum, uirtutes amandum. Nec concordat cum accusatiuo patienti, significatq; semper passionem, & ante se regit accusatiuum, post se uerò casum uerbi passiui à quo descendit, ut spero uirtutes colendum ab omnibus. Hoc tamē circumloquio nos non utimur, licet eius fuerit apud antiquos frequens usus. Lucretius AEternas quoniam pœnas in morte timendum. Verg. etiam ad antiquitatis imitationem, Et pacem Troia no ab rege petendum.

Hæc sunt circumloquia tam uocis actiue, quàm passiue. Si tamen quæras, an à uerbis deponentibus tertiæ classis oriatur secundum uocis passiue circumloquium, item à uerbis neutris passionem significantibus. Respondeo, ex duobus prius fieri posse, ut spero amicos à me consolandos esse: posterius uerò

Libet quartus.

uerò minimè, nō enim Latine dicitur, credo me exul-
landum esse, aut exulatum iri, sed exulaturum, aut
exulatum ire: ne duo passiua (teste Valla) coniun-
gamus.

De Gerundijs.

Post uerba infinita, disputat Nebrissensis de Ge-
rundijs, quæ à gerendo dicta sunt: siue quòd signifi-
cationem & constructionem aliquando gerant uer-
bi, à quo descendunt: siue (quòd multò mihi magis
placet) quòd rei administrationem siue habitum si-
ne tempore significant: gerere enim apud probos
authores, & Latinitatis principes administrare si-
gnificat. Vtrum uerò gerundium ab octo partibus
orationis diuersum sit, an inter eas connumerari
debeat, non est parua inter ueteres Grammaticos
cōtrouersia. Diomedes, Probus, Donatus uerbum
esse affirmāt, cū more uerbi post se casum regat,
ut tempus est carendi uoluptatibus. Verū horum
opinio falsa est, nam uerbum per modos & tempo-
ra inclinatur, & in ratione suppositi à frōte casum
regit, quod à natura gerundiorum prorsus abhor-
ret, quæ per casus & genera uariantur, nec regere
casum à fronte possunt. Priscianus asserit gerundiū
esse nomen, cū per casus & genera uarietur, ut
amandi, do, dum. Sed eius opinio nihil habet cum ue-
ritate coniunctum, nam gerundium suapte natura
in significatione actiua casum regit sui uerbi, nomē
uerò citra figuram regere accusatiuum non potest.
Laurentius Valla asseuerat nomen esse participia-
le, quòd partem accipiat à nominae, partem à parti-
cipio:

icipio, à nomine, casus, genera cum declinatione: à participio, significationem, & constructionem uerbi, à quo descendit. Hæc etiam sententia plurimum habet falsitatis. Nam participium significat tempus futurum sine ulla rei administratione, & à tergo in significatione passiuâ ablatiuum regit loco personæ agentis, ut causa est à me oranda, id est, orabitur: Gerundium uerò rei administrationem importat sine ulla temporis significatione, & casum à tergo regere non potest, cum passionem significat, ut est mihi cura iuris dicundi. Nos igitur cum Nebrissensiteneamus, gerundium esse aliam orationis partem distinctam ab illis octo, quæ ad eò nomini similis est, ut si casum uerbi non regeret, nihil quicquam præter nomen esset. His igitur omnibus leuiter prægustatis explicemus sic in commune, quidnam sit gerundium quo pacto construatur, quotuplex sit: ut facta partitione, omnia tum substantiua, tum adiectiua gerundia disputatione percurramus.

Quid sit Gerundium.

Gerundium est pars orationis declinabilis, per casus, sine tempore, gerens significationem & constructionem uerbi à quo deriuatur, & rei administrationem significans. Discutiamus huius finitionis membra. Est pars orationis, ut secludatur à litera & syllaba, nam litera est pars syllabæ, syllaba dictionis, gerundium uerò orationis. Declinabilis: ut seiungatur à quatuor partibus indeclinabilibus, præpositione, aduerbio, interiectione, coniunctione. Per casus, ut separetur à uerbo, quod per modos &

tempora, non per casus inclinatur. Sine tempore: ut à participio differat, quod præter suū principale significatum temporis differentiam aliquam importat. Gerens significationem & constructionē uerbi, à quo deriuatur: ut discrepet à nomine & pronome, quoniam nomen & pronomen nec significationem nec cōstructionem uerbi gerunt, gerundium uerò & significationem & constructionem uerbi representat (in significatione saltem actiua: nam in passiua absolutè in oratione ponitur, nec cum ullo casu construitur.) Et rei administrationē significās, ut distet à participio, quod ad tempus futurum refertur: gerundium contrā, modò sit adiectiuum. rei administrationem, hoc est, habitum, & rei alicuius faciundæ assiduum usum & consuetudinem significat.

Quo pacto construatur.

Hoc documentum habeant omnes pro comperto, neque in eo cuiquam detur dubitandi locus, gerundia ante se casum non regere, cum solius uerbi sit à fronte in ratione suppositi casum postulare, modò loco personæ agentis, modò patientis. Vnde teste Valla lib. 1. Elegāt. cap. 27. sacræ illæ locutiones in auditæ sunt, In conuertendo Dominus captiuitatem Sion, In deficiendo ex me spiritum meum, In conueniendo populos in unum. Græca enim figura interpretem decepit, nam infinitiuum his locis habent Græci, quo pro gerundijs utuntur, quibus carent. Casum ergo infinitiui gerundijs accommodauit interpretes, ac propterea in locis illis prolapsus est.

Debuisset enim aut per ablatiuū absolutum ē Græco idiomate in Latinum trāsferre, Cōuertente Domino, deficiente ex me spiritu meo, conuenientibus populis in unum: aut per subiunctiuum, hoc modo, cūm conuerteret Dominus, cūm deficeret spiritus, cūm conuenirent populi. Post se uerò regunt casum uerborum à quibus descendunt, ut tempus est amādi Deum, in seruiendi amicis, miserendi pauperum. Quod intellige, dummodò gerundia actionem significant, nam si passiuè capiantur, nullum casum regunt. Nec enim Latine dicitur, ueni Complutum ad docendum ab eloquentiæ magistris, sed ut docear. Nec, ueni ad uapulandum à præceptore, sed ut uapulem. Excipe etiam gerundium datiui, quod tamen si actiuè capiatur, cum accusatiuo cōstrui non solet, ut in huius casus constructione latius patebit. Excipe postremo uerborum reciprocorum gerundia, quæ cum suorum uerborum casibus construi non solent. Barbara est enim huiusmodi locutio, Veni Complutum gratia euadendi doctus. Barbara etiam illa, Cōmoda occasio sese obtulit ambulandi lætus, sed ut ambulem lætus.

Quotuplex sit.

Gerundia duplicia sunt, aut substantiua, aut adiectiua: de adiectiuis postremo loco erit disputatio, de substantiuis, modò differamus. Quæ non ideo substantiua dicta sunt, quòd substantiam significant, sed quòd cum substantiuis non concordent in genere, numero, casu, neque eorum uelint habere consortium. Reperiuntur autem in quinq; casibus. Nomi

Liber quartus.

natiuo, ut seruiendum est: genitiuo, ut cura seruiendi Deo tenet me: datiuo, ut non sum soluendo, accusatiuo, ut ad seruiendum paratus: ablatiuo, ut delector seruiendo. Antonius tamen Nebrissenſis in tribus tantum casibus reperiri affirmat, genitiuo, accusatiuo, ablatiuo, nam gerundium nominatiui prorsus negat, datiuu difficulter satis admittit.

De Gerundio substantiuo nominatiui.

Gerundium nominatiui conficitur ex uoce quaedam neutra terminata in, dum, quæ uox à gerundio adiectiuo iuncto in, dus, originem trahit, quod tamen si in usu non sit, fingendum tamen est, non tantum in hoc nominatiui casu, sed in reliquis casibus gerundiorum. A fronte non regit casum, sed determinatur à uerbo substantiuo per omnes modos & tempora, siue expresso, siue subintellecto. A tergo pro persona agentis datiuum regit, post quem desiderat casum sui uerbi, præter accusatiuum, quem si aliquando regit, illud est per quam raro, ut carendum est mihi uoluptatum, seruiendum est mihi Deo, utendum est mihi uirtute. At non dices, legendum est mihi Ciceronem, tamen si aliquando similis accusatiui constructio reperitur. Cicero de Senectute, Tanquam uia longam nobis quoque ingrediundum sit. Idem ad Atticum lib. 14. Iterandum eadem ista mihi. Item Columella lib. 2. Resecandum est, & ulcera medicamentis curandum. Item etiam Varro lib. 1. Rerum rusticarum, Præfectos alacriores faciendum est præmijs. Idem lib. 2. de Analogia, Sic enim omnes repudiandum artes, quod in eis discrepant scriptores. Descendit

dit ab omnibus uerborum generibus: & à uerbis significantibus actionem, significat actionem, ut amandum est, seruiendum est, consolandum est, criminandum est: à uerbis tamen neutris tertiæ & quartæ clāssis, à quibus rarò descendit, passionem significabit, ut uapulandum est. Notabis etiā importare semper necessitatem quandam, atque ita resolui per opus, uel oportet, uel debeo: ut moriendum est semel id est, opus est uel oportet semel mori. Viuendum est tibi tuis moribus, non alienis, id est, debes uiuere tuis moribus.

Circa hoc tamen nominatiui gerundium mirè se torquent omnes Grammatici. Alij censent in hac cōstructione & similibus, inseruiendum est mihi tempori, inseruiendum, esse participium futuri in, Dus. Sed falluntur, tum quia participium significat passionem, quam gerundium non significat, sed actionem potius: tum etiam quia participium non construitur cum accusatiuo, cum quo gerundium nominatiui construi non multò ante probauimus. Alij arbitrantur nomen esse uerbale: qui in eodem sunt errore, nam uerbale nomen passionem significat, & non construitur cum accusatiuo. Eisdem rationibus probari poterit, neque esse futurum infinitiui, neque uerbum impersonale passiuæ uocis. Reliquum igitur sit, gerundium esse nominatiui.

De gerundio genitiui.

Gerundium genitiui finitur semper in di, & fit ex neutra terminatione participij futuri in, dus,

Liber quartus

A fronte non regit casum, sed uult determinari à nominibus substantiuis appellatiuis, nō ab omnibus, sed ab ijs potissimum quæ rem significant incorpoream: qualia sunt nomina significantia tempus, uel temporis occasionem, ut tempus, hora, annus, dies, mensis, occasio, commoditas, opportunitas. Item nomina significantia uoluntatem, aut rei alicuius desiderium, ut uoluntas, amor, cupiditas, studium, labor, diligentia. Item significantia causam, uel artem aliquam, ut causa, gratia, ratio, ars, disciplina. Determinatur secundo à quibusdam nominibus adiectiuis uerbalem significationem habentibus, ut cupidus, timidus, auidus discendi: quibus adde certus & incertus, ut certus cundi, incertus nauigandi. Determinatur tertio à participijs transeuntibus in nomina, ut timens, cupiens, doctus, consuetus nauigandi. Notabis tamen, solere sæpissime nomina substantiua, tam genitiui gerūdium, quàm infinitiuum determinare, præsertim quando iunguntur uerbo substantiuo: quod utrum ad Græcorum morem referendum sit, ipse uideris, satis tamen sit illud obseruasse. Cicero libro secundo de Oratore, Si omnem uim Oratoris in argumentis posuisssem, tempus esset iam de ordine argumentorū dicere. Cæsar lib. 5. belli Gall. Respondit, non esse consuetudinem populi Romani accipere ab hoste armato conditionem. Liuius libr. 1. Tempus est maiora conari. Gellius libr. 1. Et quæ ipsi opinarentur, expromere potestas erat. A tergo si actionem significet, regit casum sui uerbi, ut tempus est Deum colendi, si passionem, nullum re-

git casum, ut tempus est uapulandi, neque addes à præceptore. Si quæras, quid significet? A uerbis actiuis neutris primæ, secundæ, & quintæ clâssis, deponentibus, & communibus in actiua significatione significabit actionem: à uerbis tamen neutris tertiæ & quartæ clâssis, & communibus passiuæ significationis passionem significabit. Est tamen cùm à uerbis actiuis non actionem, sed passionem significet. Cicero in Topicis, Causarum genera duo, unum quod ui sua efficit, ut ignis: alterum quod naturam efficiendi habet, ut æs: id est, ut efficiatur. Idem libro secundo de Officijs, Atque hæc quidem sunt causæ diligendi grauissimæ, id est, quibus diligamur. Suetonius in Claudio, Cui lectica per urbem uehendi ius tribuit, id est, ut uehatur.

Illud prostrems notabis, solere gerundium hoc genitiui substantiuum, regere genitiuū pluralem, idq; non tantum apud Comicos, sed apud Oratores & Historicos etiam. Cicero in Philippicis, Agitur, utrum Marco Antonio facultas detur agrorum suis latronibus condonandi. Suetonius in Augusto, Epulum præbuit, permissa iocandi licentia, diripiendiq; pomorum. Marcus Varro libro secundo Rerum rusticarum. Aliquod fuit principium generandi animalium. Plautus in captiuis duobus, Nominandi tibi istorum, magis erit, quàm edundi copia. Nec dixeris, gerundium genitiui in exemplis propositis poni pro gerundio adiectiuo, nam in hoc exemplo Terentiano pro eo poni non potest, Da-

Liber quartus

te copiam crescendi nouarum: non enim posses exponere crescedarum nouarum, cum uerbum cresco simile gerundium formare non possit. Nec item dixeris, fieri figuram Antiptosin, & casum pro casu poni, quoniam in eodem Terentij exemplo, non posses in hunc modum exponere, Crescendi nouarum, id est: crescendi nouas: cum cresco uerbum sit neutrum absolutum, neque accusatiuum regere possit. Reliquum est igitur, ut genitiuus ille pluralis à gerundio substantiuo regatur, cum multa Latini sermonis elegantia & nitore.

De gerundio datiu.

Gerundium datiu finitur in, do, & fit ex neutra terminatione participij futuri in, dus. A fronte non regit casum, sed determinatur à nominibus adiectiuis, uerbis, participijs, quæ sua natura datiuum regunt. De nominibus, ut aptus, idoneus, opportunus seruiendo. De uerbis, ut do operam, uaco, incumbo scribendo. Determinari etiam solet à uerbo substantiuo, ut non sum soluendo. De participijs, ut promptus, paratus, consuetus scribendo. A tergo uero construitur cum casu uerbi à quo descendit, si actionem significet, præter accusatiuum (ut auctor est Laurentius libro primo *Elegantiarum* capite. 27. de gerundijs) Absurdum namque ex eius sententia esset dicere, do operam colendo agrum, & legendo librum, sed per gerundium datiu adiectiuum, do operam colendo agro, uinex pastinandæ, nemori succidendo. Verum, ut ego quod sentio in hac parte dicam, quando gerundium
dati

datiui à uerbo, *sum, determinatur, ferè absolute ponitur in oratione, ut non sum soluendo: quòd si casum regat, nullum præter datiuum, ut non sum tibi soluendo. Quintilianus in Gladiatore, Placeamus licet nobis fortuna nostra, pater, pauperi soluendo non sumus. Cæterum si determinetur ab alijs uerbis, aut nominibus, aut participijs, quæ sua natura datiuum regunt, non dubito cum accusatiuo posse cõstrui. Quam præceptionem placuit multis authorum exemplis roborare, ne quisquam audeat eã falsitatis arguere. Valerius Maximus li. 3. Publius Scipio cum in Sicilia augendo exercitum, traiciendoq; in Africam opportunũ quæreret gradum. Cicero. in Hortensio, Magna animi contentio adhibenda est explicãdo Aristotelem. si leges. Sallustius in proœmio Catilinariæ coniurationis, Neque uerò agrũ colendo, aut uenando, seruilibus officijs intẽtum ætatem agere. Plautus in Epidico, Ego relictis rebus Epidicum quærendo operam dabo. Idem in Penu-lo, Ancillæ nos lauando operam dederunt. Quibus exemplis docemur, datiui gerundium cum accusatiuo construi posse, quando à uerbis, aut nominibus, aut participijs datiuum regentibus, determinatur. Dices, orationem fluere numerosiore, ac modulatiorem multò, si gerundijs adiectiuis potius, quàm substantiuis utamur. Non nego, sed nobis de Grammatica præcipientibus non tam elegantia, uerborũ q; ornatus querendus est, quam orationis proprietas & apta partium congruentia, ac postremò quid apud procures illos Latinitatis fuerit in usu. Si quæ*

Liber quartus

ras, quid significet? A uerbis omnibus actionē significatibus, actionē significabit: exceptis neutris tertiæ & quartæ classis, à quibus passionem significat.

De gerundio accusatiui.

Gerundium accusatiui finitur in, dum, & fit ex neutra terminatione participij in dus. Ante se nullū regit casum, quod est gerundijs omnibus commune, sed determinatur à tribus partibus orationis, nomine adiectiuo, participio, & uerbo. De adiectiuo, ut idoneus, facilis, difficilis, bonus, malus, commodus, incommodus, aptus, ineptus. De participio, ut paratus, succinctus, intentus, conueniens, sufficiens. De uerbo tum motū, tum quietē significanti, ut eo ad legendū, sedeo ad scribendū. Huiusmodi autē determinatio, quæ fit à parte anteriori, fieri solet frequentius medijs illis præpositionibus, Ad, Ob, Propter, Inter, Ante. ut ad, uel ob, uel propter numerādū pecunias ueni. Inter cœnandum, ante domandum. Quibus tu addere poteris duas alias, In, & circa. Titus Liuius In fossas & cloacas exhauriēdas demersere. Fabius lib. 4. Non enim solū Oratoris est docere, sed plus eloquentia circa mouendū ualet. Notabis tamē cum his uerbis, loco, cōduco, mōdo, curo, habeo, suscipio, depono, puto, aūco, existimo, censeo, dico, uideo, intelligo, arbitror, do, trado, propono, & similibus, gerundia adiectiua non determinari ab his præpositionibus. Vt locaui faciendam sepulturam, patris gloriam tuendā conseruandamq; suscepit, curauit hominem interficiendum, homines ui rapiēdos conseruandosq; mandauit, A tergo uerò si actionem significet,

ficet, exigit casum uerbi à quo descendit : si passionem, nullum, ut carmen difficile ad intelligendum, nō dices ab scholasticis. Notabis, quando determinatur ab Inter, & Ante, non solere casum regere, ut inter cœnandum, ante cœnandum. Aliquando tamē regit, licet rarò. Liuius lib. 2. Titius Herminius inter spoliandum corpus hostis percussus. A uerbis actiuis actionem significat frequentius, aliquādo passionem. Sallustius in Iugurtha, Pauca ut supra repetā, quò ad cognoscendum omnia illustria magis, magisq; in aperto sint. A uerbis neutris tertiæ & quartæ classis, passionem, à reliquis actionem, à deponentibus actionem, à communibus actionem & passionē. Hoc eodem pacto ferè debes percurrere omnes casus gerundiorum, quantum attinet ad significationē, quod nos breuitati consulentes aliquando dissimulamus.

De gerundio ablatiui.

Gerundium ablatiui finitur in, do, & fit ex neutra terminatione eiusdem participij in, dus. A fronte nullum casum regit, sed determinatur à uerbis, aut participijs, aut nominibus, medijs his præpositionibus, A, Ab, In, De, E, Ex. Quibus adde, Pro, & Cum. De sex primis præpositionibus adeò obuia sunt exempla, ut in his citandis nimium morari, hominis sit nimium otiosi, & in re parua diligentiam affectatis. De duabus postremis, quia rare sunt, authoritates in mediū proferamus. Plautus in Aulularia. Pro uapulādo hercle ego mercedem petam. Quintilianus lib. 1. Ratio rectè scribēdi iuncta cum loquendo est.

Liber quartus

Duo tamen hic notabis, in primis gerundium hoc ablatiui non posse determinari à uerbo significanti motū explicitum. Non enim dices, uenio ab orādo, sed ab oratione potius: non redeo à spectando, sed ab spectatione, non reuertor ab arando, sed ab aratione. Si tamen uerbum illud nō motum explicitum, sed motionem quandam animi internam significet, nō dubito ab eo determinari posse. Quā præceptio nem quā plurimis authoritatibus firmare placuit, ne Grammaticus aliquis tetrici nimium supercilij eam studeat labefactare. Cicero lib. 2. de Oratore, Ipse à discendo refugisti. Idē lib. 3. Pythagoras, Democritus, Anaxagoras à regendis ciuitatibus totos se ad cognitionem rerum transtulerūt. Idem in Bruto, Stoici traducti à disputando ad dicendum inopes reperiuntur. Idē in Verrem, Non uideor omnino à defendendis hominibus subleuandisq; discedere. Vbi quis negabit, in uerbis refugio, transfero, traduco, discedo speciē quandā motus interni representari, atq; ab illis gerundium ablatiui casus determinari?

Notabis deinde, in huiusmodi determinatione aliquando non posse præpositionē intercedere. Tum primò quando determinatur à uerbis sua natura regentibus ablatiuū sine præpositione, ut delector legendo, non in legendo. Tum secundò, quando gerundium denotat instrumentum aliquod, ut hos accusando, illos occidēdo totā ciuitatē labefactasti. Tum tertio, quando gerundiū significat passionem. Vergili. Georgi. 3. Vritq; uidēdo fœmina, id est, dū aut cū uidetur. Quintilianus lib. 11. cap. 2. Sed memoria ex colendo,

colēdo, sicut alia omnia, augetur, id est, dū excolitur.

A tergo uerò si passiue capiatur, nullum regit casum, si uerò capiatur actiue, regit casum sui uerbi. Quod intellectum uolo, quādo præpositionibus illis, In, De, E, Ex, A, Ab, Cū, Pro, nō adhæret, nā si ab illis determinetur, ex frequentiori authorum usu ab solutè ponitur in oratione, aut loquemur per gerundium adiectiuum. Nō enim qui optimè ac Latine locuti sunt, huiusmodi loquendi formis utuntur. Vaco ab scribendo epistolas, in iuuando homines multum operæ posui. Sed aut absolute, aut per adiectiuū sic Vaco ab scribendo; aut uaco ab scribendis epistolis, itē in iuuandis hominibus multum operæ posui. Obseruauit tamen tria aut quatuor exempla, in quibus gerundium cum præpositione casum regit, quæ legē Latinitatis facere non debent. Cicero lib. 6. ad Atticum, In quibus interscripseras de relinquendo ea, quæ me impugnabant. Idem lib. 3. Tusculana. Inuidiæ uerbum dictum est à nimis intuendo fortunam alterius. Varro lib. 3. rerum rusticarum, In supponēdo oua, obseruant, ut sint numero imparia. Liuius libr. 30. Eadem hæc Syphaci animā dederunt in alloquēdo uictorem. Quæres, de significatione. A uerbis adiectiuis significat actionē, aliquando passionē. Vergi. Georgi. 3. Alitur uitium, uiuitq; tegendo, id est, dum tegitur. A neutris tertiæ & quartæ passionē, à reliquis actionem. A deponentibus & cōmunibus actionem & passionem. Vergil. AENEID. 12. Aegrescitq; medendo, id est, dum illi medicamenta adhibentur.

De gerundijs adiectiuis.

Gerundia.

Liber quartus

Gerundia adiectiua non idè adiectiua dicta sunt quòd qualitatem aliquam alicui adiacentem significant, sed quia cum substantiuis in genere, numero, & casu concordant. Quæ gerundiua à Grammaticis appellantur, ut distinguantur à substantiuis, quæ gerundiorum nomen acceperunt. Finiuntur in, dus, dadum. Reperiunturq; in omnibus casibus, numeris, & generibus. Nominatiuo, ut uoluenda dies: genitiuo, ut iuris dicundi cura tenet me: datiuo, do operam iuri dicundo: accusatiuo, ueni ad ius dicundū: uocatiuo, ô dies uoluenda, ablatiuo, delector iure dicūdo. Gerundium hoc semper significat passionem, unde fit, ut à uerbis passiuis solum, & cōmunibus passiuæ significationis oriatur, & aliquando etiā à deponētibus tertiæ classis. Quintus Curti⁹. Misit cauceatorem ad consolandas eas. Inde etiam fit, ut cū nullo casu construatur, sed solum cum substantiuis concordet, quia, ut à me sepius proclamatū est, gerundia in significatione passiua nullum regunt casum.

De differentia inter gerundium adiectiuū

& participium futuri in, dus.

Licet gerundia hæc adiectiua conueniant in uoce cum participijs in, dus, differūt tamen ab illis tripliciter. In primis significatione, nam gerundia significant rei administrationē sine nota futuri tēporis, ut cura legendæ lectionis tenet me, participia uerò tēpus futurum important sine aliqua administratione, ut lectio est legenda. Differunt deinde constructione, nā gerundia cum nullo casu cōstruuntur, sed

cum

cum suis substantiuis tantum concordat, et uero participia cum ablatiuo construuntur loco personæ agentis, ut lectio est à me legenda. Differunt postremo resolutione, nam gerundia nominatiui per quis et uerbum resoluuntur: uel per nomen uerbale in bilis, ut uolunda dies, id est, quæ uoluitur, uel uolubilis. Reliqui casus gerundiorum resoluuntur in sua substantiua: ut mox præcipientur. At uero participia resoluuntur per futurum imperfectum uocis passivæ, ut causa est à me oranda, id est, orabitur.

De conuersione gerundij substantiui in adiectiuum, & è conuerso.

Illud in primis pro certo habeas, nullam orationem conuerti posse ex gerundio substantiuo in adiectiuum, nisi adsit accusatiuus: qui si adsit, fiet conuersio in hunc modum. Accusatiuus conuertetur in casum gerundij substantiui, deinde gerundium substantiuum conuertetur in adiectiuum in eodem casu. Confirmemus id exemplis per omnes casus. De genitiuo, cura legendi lectionem tenet me, cura lectionis legendæ tenet me. De datiuo, do operam legendo lectionem, do operam lectioni legendæ. De accusatiuo, ueni ad legendum lectionem, ueni ad lectionem legendam. De ablatiuo, delector legendo lectionem, delector lectione legenda. De nominatiuo mentionem non feci, quia oratio quæ per nominatiuum fit, conuerti non solet. Ex adiectiuo in substantiuum fit conuersio in hunc modum, Genitiuus siue quicumque alius casus in accusatiuum conuertetur, adiectiuum in substantiuum in casu gerundij. Si uero sit nomen uerbale, resoluitur
per

Liber quartus.

per hoc nomen dignus & infinitium uocis passiuæ ut magister colendus, id est, coli dignus, puer amandus, id est, amari dignus. Ne aliquid prætermittamus, quod ad rectā puerorū institutionē in re Grāmatica uideatur necessariū, notet puer, quatuor modis orationem ex gerundio substantiuo in adiectiuū conuerti non posse. Primò, quando accusatiuus non adest ut cura seruiendi Deo tenet me. Secūdò quādo significat passionem, ut cantando rūpitur anguis. Tertiò, quando accusatiuus est nominis relatiui, ut hic dies attulit initium dicendi, quæ uellē: nō dices dicen torum eorum, quæ uellem. Quartò, quando accusatiuus est nominum primæ aut secūde declinationis: tunc enim ineleganter conuerteretur oratio in adiectiuum, ut tempus est quærendi bonos libros, nō quærendorum bonorum librorum. Item tempus est inuestigandi bonas musas, non inuestigandarum bonarū musarum.

De supinis.

Post gerundia occurrit statim de supinis disputatio, quæ dicitur sic appellata sine, nondum perspicuum est, neq; nimis necessarium puto, cū multi Grammaticorum misere in hac re insudarint ad ineptias usq; & uanissimas nugas. Alij dicta uolunt quasi suprema, quòd in cōiugatione postrema sint, nam participia, quæ mox sequuntur, non inter nomina, sed inter uerba recēdenda sunt. Alij supina quasi superantia dicta uolunt, quòd naturam uerbi superent, cū uerbum per modos & tempora inflectatur, supinum sine modis & temporibus. Alij supina quasi

re su

resupina dicta existimat, id est contraria quia prius supinum prorsus evertit naturā posterioris tum determinatione, tum significatione, tum postremo constructione Tu elige quam malueris nam mihi omnes prædictæ Etymologiæ prorsus displicet. Vtrum autem inter octo partes orationis numerari debeant, an diuersam ab alijs octo partem constituisse, cōtrouersum fuit a ueteribus Grāmaticis. Nos tamen cum Nebrissensi diuersam esse partem affirmamus à reliquis, quæ tamen inter uerba numeretur, quia maximam cum eis habet similitudinem. Potest autem in hunc modum definiri.

Quid sit supinum.

Supinum est pars orationis indeclinabilis in, um, aut in, u, desinens: gerensq; significationem. & nō nunquam constructionem uerbi à quo descendit. Indeclinabilis: ut differat à quatuor declinabilibus. In, um aut in, u, desinens, ut distet à reliquis indeclinabilibus, & à gerundijs etiā, quæ diuersam ab hac desinentiam sortiuntur. Gerens significationē & non nunquam constructionem, nam cum significat actionem, gerit constructionem uerbi, à quo descendit, cum passiue capitur, cum nullo casu cōstruitur. Nō enim dixeris Latine, uenio uapulatum à præceptore, sed ut uapulem, aut uapulaturus à præceptore. Ex definitione colligitur duplex supinum. Prius quod terminatur in, tum, ut amatum, sum, ut uisum, xum, ut amplexum. Posterius, quod finitur in, tu, ut amatu, su, ut uisu, xu, ut amplexu.

De priori Supino.

L Triō

Liber quartus

Tria potissimum de priori supino explicabimus unde determinetur, quid a tergo regat, quid significet. Prius supinum à fronte non regit casum, sed uult determinari à uerbis significantibus motum, siue explicitum, siue implicitum. De explicito, ut eo uenatum: de implicito ut do filiā nuptum. Determinatur etiā à participijs ab his uerbis descenditibus. Horatius in Arte Poetica. Spectatum admissi risum teneatis amici? Motus explicitus est, qui fit motione corporis de loco in locum: implicitus uerò, qui mutatione propositi, & uoluntatis cōuersione ad rem aliquam fieri solet. Ex hac determinatione colliges differentiam inter prius supinum & gerundium accusatiui casus, nā prius supinum semper determinatur à uerbo significanti motū: at uerò accusatiui gerundium determinatur à uerbis motus, ut eo ad legendum, aut quietis, ut sedeo ad audiendum. Vnde fit, ut omnis oratio per prius supinum constituta conuertere possit in gerundium accusatiui, nō contrā. Inde etiā fit, ut prioris supini oratio per uarias partes orationis, aut dicendi formas uariari possit: quod in sequenti oratione patebit, Eo petitum ueniā eo ad petendum ueniam, eo ad petendā ueniam, eo petiturus ueniam, eo ut petam ueniam: eo petere ueniā Grecorum more, eo gratia petendi ueniam, eo gratia petende uenie.

A tergo si actionem significet, regit sui uerbi casum, ut eo Deo seruitū: si passionem, nullū recipit casum, ut eo uapulatum. A uerbis omnibus significat actionem: à neutris tertiæ & quartæ, passionem.

De

De posteriori supino.

Ho ordine procedemus in posteriori supino, quò in priori. A fronte non regit casum, sed determinatur à nominibus adiectiuis, cum quibus in re nulla cõuenit, ut res horrenda dictu, res miserabilis uisu. Itẽ determinatur ab adiectiuis, quæ fiunt substantiua in neutra terminatione, ut horrendum dictu, miserabile uisu. Item à tribus nominibus, fas, nefas, opus: ut fas dictu, nefas dictu, opus siue peropus dictu. A uerbis autem motum significantibus determinari nõ uult, neq; enim Latine dixeris, uenio lectu, sed de lectione. uenio uenatu: sed de uenatione. A tergo nullum casum regit, sed semper ponitur absolute: neq; enim dixeris, puer dignus flagellatu à præceptore, sed aut per subiunctiuum, ut flagelletur à præceptore, aut per infinitiuum uocis passiuæ, flagellari. Cuius ratio est, quia perpetuò significat passionem, in quia significatione supina non habent de more casum regere. Vnde fit, ut à uerbis tantum passiuis, & communibus oriatur: & aliquando à uerbis etiam deponẽtibus tertiæ classis, quæ olim communia fuerunt.

De resolutione.

Resoluitur autem posterius supinum tripliciter. Aut per indicatiuum cum his particulis, dum, cum, quando: ut monstrum horrendum uisu, id est, dũ uidetur, cum uel quãdo uidetur. Aut per subiunctiuũ cum, ut, ut uir dignus celebratu, hoc est ut celebretur. Aut per infinitiuum uocis passiuæ: in eodem exemplo, dignus celebratu, id est, celebrari.

Liber quartus.

Differētia posterioris supini, à nomine verbalis quartæ declinationis.

Posteriorius supinum & ablativus verbalis quartæ declinationis in uoce conueniunt: differunt tamē multis ac uarijs modis. Sit prima differētia, Gubernatu quando est nomen, uariatur per casus, quando supinum minimē. Sit. 2. Quādo est nomē significat actionem, quando supinum, passionem. Sit. 3. Quando nomen, regit genitiuū, ut dignus gubernatu Rei publicæ, quādo supinum nullum casum regit. Sit. 4. Quando nomen recipit consortium adiectiui, ut dignus magno gubernatu, quando supinum non adhæret adiectiuis. Sit. 5. Quando nomen recipit præpositionem, ut recebit ex gubernatu, quando supinum similem præpositionem admittere nō potest. Sit. 6. Quando nomē exponitur per aliud nomē, ut dignus gubernatu, id est gubernatione, quando supinū per uerbum, ut gubernetur. Sit septima, Quando nomē regitur à uerbo, ut orbatu est gubernatu Reipublicæ, quando supinum à simili uerbo regi non potest.

De participijs.

Post supina sequitur participiorū tractatio, quæ ideo participia dicta sunt, quòd partem à nomine accipiāt, partem à uerbo, ut mox patebit in definitione. Solent autem dupliciter considerari, aut quatenus nomina adiectiua sunt, aut quatenus participia. Quatenus adiectiua, cū substantiuīs more adiectiuorū cōueniūt in genere, numero, casu, et de his nō est sermo in præsentia. Quatenus autē à uerbo deriuatur
cuius

eiusedemq; significationem & cōstructionem habent, quod est participijs proprium, futura est disputatio. Exponemus igitur quidnam sit participium, quotu plex sit, quot modis in naturam nominum transeat, ac postremò quot de causis adinuentum fuerit.

Quid sit participium.

Participium est pars orationis, declinabilis, per casus, cum tempore, quæ pro uerbo accipitur, à quo deriuatur, genus & casus habens ad similitudinē nominis, & accidentia uerbi sine discretione modorū & personarū: Hæc definitio multis cōstat partibus, quæ nostra interpretatione uidentur plurimū indigere. Est pars orationis, ut differat à litera & syllaba: nam litera est pars syllabæ, syllaba dictionis, participium uerò orationis. Declinabilis: ut distet, à quatuor partibus orationis indeclinabilibus. Per casus: ut à uerbo discrepet, quod nō per casus, sed per modos, & tempora inclinatur. Cum tēpore: ut differat à gerundio, nomine item & pronomine, quæ nullam differentiam temporis importāt, cū participium ad tres tēporum differēcias referatur, præsentis, ut amans, præteriti, ut amatus, futuri, ut amaturus, amandus. Sub quibus ad alia etiam tempora referūtur, nam præsens fungitur præsentis & præteriti imperfecti munere, præteritum perfectū supplet etiam uices plusquam perfecti. Erunt igitur uoce tria tempora, significatione quinque. Quæ pro uerbo accipitur, à quo deriuatur: nam participium & uerbum substantiuum poni solent pro uerbo, à quo participium originem trahit, ut sum amans;

Liber quartus

pro amo, sum legens, pro lego. Et aliquando etiam participium sine uerbi substantiui consortio, ut his peroratis finem feci dicēdi, id est, postquam hæc perorata sunt. Notabis etiā dictum fuisse, quæ pro uerbo accipitur, à quo deriuatur, quia participium, si participij naturam retinere debeat, semper à uerbo debet deriuari. Vnde reperiēs multa nomina adiectiua, quæ formā quidē habent participiorū, ceterū quia à uerbo non deriuantur, nō inter participia, sed inter nomina numeranda sunt: qualia sunt galeatus, petasatus, ceritus, tunicatus, togatus, palliatus, umbellatus, sericatus, ocreatus, prægnans, letus, cretus, præditus, & similia. Genus & casus habens ad similitudinem nominis: quia participium, quemadmodum & nomen, quatuor habet genera, masculinum, ut amatus, fœmininum, ut amata, neutrum, ut amatum, commune trium, ut amans: item etiam suos septem casus habet more nominū. Et accidentia uerbi sine discretionē modorum, & personarum, quia participium, quemadmodum & uerbum, tria habet tempora, præsens, præteritum, futurum: duas item significationes actiuam & passiuam. suam item constructionem: sed modis explicitis, & certis personis non constat. Modò aperte intelligēs, aīclū fuisse participium, quod nominis & uerbi naturam participet, nam à nomine genera quatuor, casus septem, cum tribus declinationibus mutuò accipit: à uerbo tempora tria, significationes duas cum constructione sortitur, ab utroque figuram, & numerum. Nam quæadmodum in nomine figura duplex est, simplex & com

Et cōposita, numerus duplex, singularis & pluralis: idem contingit in uerbo, idem etiā in participio.

Quotuplex sit.

Duplicia sunt participia, quædam actiue uocis, quædam passiue. Actiue duo, præsentis & futuri in, rus, ut amans, amaturus. Passiue duo, præteriti & futuri in, dus, ut amatus, amandus. De quibus priusquam suo ordine dicamus, non erit à re præsentis alienum explicare quo pacto à singulis uerborum generibus oriuntur participia. A uerbo actiuo duo participia trahuntur, præsentis & futuri in, rus, ut amans, amaturus. A passiuo duo, præteriti & futuri in, dus, ut amatus, amandus. A neutro duo præsentis & futuri in, rus, ut seruans, seruiturus. A uerbis tamen neutropassiuis nascitur & participium præteriti, ut à gaudeo, gaudens, gausus, gauisus, ab audeo, audens, ausus, ausurus, à careo quatuor oriuntur, carēs, casus, cariturus, carendus. A deponenti tria, præsentis, præteriti, futuri in, rus, ut recordans, recordatus, recordaturus, si uerò sit tertiæ classis, quatuor, sequens, secutus, secuturus, sequendus, consolans, consolatus, consolaturus, consolandus. A communi quatuor secundum formam quidem actiuam præsentis & futuri in, rus, ut criminans, criminaturus, secundū passiuiam autem formam præteriti & futuri in, dus, ut criminatus, criminandus. Ab impersonali uerò participia nisi usurpata fuerint, non ueniunt, ut à pœnitet, pœnitēs, & pœnitendus. Hoc fundamento iacto, agamus de singulis.

De participio præsentis.

L 4 — Parti

Libert quartus

Participiū præsentis duas habet terminationes, ans, uerborum primæ coniugationis, ut amans: ens, aliarum coniugationum, ut docens, legens, audiens. A uerbis actiuis significat actionem, exceptis paucis, quæ Græcorum more passiuè capiuntur, ea sunt: uolens, uolens, quassans, præcipitans, tondens, euidēs, pro eo, quod uoluitur, uoluitur, quassatur, præcipitatur, tondetur, perspicuum atque perspectum est. A uerbis neutris primæ, secundæ, & quintæ classis significat actionem, ut carens, seruiens, currens. A neutris tertiæ & quartæ, passionem, ut ardens, uapulans. A deponentibus & communibus actionem, ut consolans, criminans. nisi sit à deponentibus sextæ, à quibus, quoniā ea uerba passiuia sunt, passionem significat, ut oriens, nascens.

Ante se nullum regit casum, sed more adiectiuorum cum substantiuis cōcordat: à tergo regit casum uerbi, a quo descendit, ut colens Deum. Solet autem exponi uarijs modis: aut per nomen relatiuum & suum uerbum, ut ego sum colens Deum, id est, qui colo Deum. Aut per gerundium ablatiui, ut benefaciens gaudeo, id est benefaciendo. Aut per has particulas, cū, dum, si, quia: ut me præsente non ausus es peccare, id est, cū uel dū ego præsens essem. Item uiuente patre tantam peccatorum labem non contraxisses, id est, si pater uiueret. Item sole lucente dies est, id est, quia sol lucet.

Duo tamen supersunt obseruatione digna. Alterum, participium præsentis poni pro participio præteriti. Cicero in Bruto, Cū à Sicilia discedens, Rhodum

Rhodum uenissem: hic discedens pro profectus ponitur, quod participium præteriti est. Hoc solum licet cum participium præteriti deest, secus autem non permittitur, ut cum è Sicilia proficiscens Rhodum uenissem: dicendum, Cum è Sicilia profectus Rhodum uenissem. Alterum sit, participia uidelicet præsentis temporis substantiua, si pro certo accipiatur substantiuo illius esse generis, cuius & substantiuum, si pro incerto, ad neutrum genus transire. Verbi gratia, cum dicitur oriens & occidens, intelligitur sol: cum fluens & confluens, fluuius: ideò masculina sunt. Sicut cum dicitur consonans, intelligitur litera: dum continens, terra: dum lactans, scemella: ideò sunt feminina. Animans autem, si subaudiatur, natura, femininum est: sin absolute ponatur, neutrum, unde animantia. Sic antecedens & consequens, si ponatur absolute, neutra sunt: si pro certa aliqua propositione, feminina: & sic qui propositæ argumentationi respondet, dicere deberet, nego antecedentem aut consequentem, propositionem scilicet.

De participio præteriti.

Participiū præteriti tres habet terminationes, in tus, ut amatus: in, sus, ut uisus: in, xus, ut complexus. Quod cum à supino formetur addita, S, fit, ut uerbum carens supinis, careat etiā participio præteriti: & habens duplex supinum, habeat etiam duplex participium, ut tentum uel tensum, tentus uel tensus. A uerbis passiuis significat passionem, ut doctus, amatus. Exceptis quibusdam quæ actionem significant, argutus, cautus, circumspectus, cœnatus,

L s potus

Liber quartus

potus, consideratus, falsus, profusus, scitus, sparsus, tacitus, & similia. A neutris raro descendunt, & actione significant, ut solitus, fluxus placitus, aliquando passionem, ut gaudius. A deponentibus actionem, ut recordatus, misertus, exceptis uerbis tertie classis, quæ passionem aliquando significant. Nam cum deponentia omnia fuerint olim communia, aliqua participia præteriti remanserunt passionem significantia. Quale illud Terentij. Meditata mihi sunt omnia mea incòmoda. Illud etiam Ciceronis ad Atticum lib. 1. Si uerò quæ de me pacta sunt seruâtur. Illud itê etusilem 15. Familiarium, Patrem mortuum habebamus, alij latronibus, alij à cruditate dicebât. A communibus actionem & passionem, ut criminatus.

Ante se nullum casum regit, sed cum substantiuo concordat, post se uerò casum uerbi, ut Deus est à me uel mihi dilectus. Exponitur per relatiuum & suum uerbum, ut doctus te docebit, id est, qui doctus est. Aliquando per postquàm, ut perlecta lectione id faciam libens, id est, postquàm perlegero lectionem. Notabis ultimò in ablatiuo & accusatiuo participium præteriti solere poni pro infinitiuo, ut oratos uos uelim, id est orauisse, opus est còsulto, id est, consulere, seu consuluisse.

De participio futuri in, rus.

Participium futuri in, rus, formatur à posteriore supino addita, rus. Atque inde fit, ut uerba quæ carent supino, careant etiam participio futuri in, rus, ea uerò quæ duplex habent supinum, duplex etiam futu-

faturum habent, ut tenturus, uel tensurus. Sunt tamen multa uerba, quæ cum habeant supinum, carent nihilominus eo participio, ut à nosco notum, non noturus, à pando pansum, non pansurus, à cano cantum, non canturus, à neco nectum, non neclurus, & sic de similibus. Ab omnibus uerbis actione significat, nisi sit à neutris tertix & quartæ classis, ut arsurus, uapulaturus.

Ante se nullum casum regit, post se uerò regit casum uerbi à quo descendit, ut sum amaturus Deum. Exponi solet per relatiuum, & futurum sui uerbi, ut ego lecturus libros uoluo, id est, qui legam, uel legere saltem debeam.

De participio futuri in dus.

Participium in dus, a quibuscunque uerbis significat passionem, ut amandus, criminandus, consolandus. A fronte nullum casum regit, à tergo casum sui uerbi, ut magister est à discipulis colendus. Elegantius tamen datiuum, quàm ablatiuum regit, ut præter ceteros magister mihi potissimum colendus. Exponitur per futurum passiuum & relatiuum, ut ui deo puerum à me amandam, id est, qui à me amabitur.

Quot modis participium fiat nomen.

Quinque modis participia fieri solent nomina. Amissione temporis, ut amans pro amatore, beatus pro diuite, amandus pro digno amari. Amissione constructionis, cum casum sui uerbi relinquunt, atque alienum assumunt, quod in uerbis actiuis frequentius fieri uidemus, ut amans uxoris, nomen est,

amans

Libër quartus

amans uxorem, participium: *fugitans litium nomen* est. *fugitans lites*, participium est. Amissione significationis, cum à sui uerbi significato degenerat: ut *diligens* non pro eo qui diligit, sed pro eo qui solers est. Compositione, quoties componuntur cum præpositione, cum qua suum uerbum cõponi nõ potest, ut *innocens*, non est *innocéo*: *indoctus*, non est *indoceo*. Comparatione, cum ex se formant comparatiua aut superlatiua: ut *amãtiór uxoris* notissimus omnibus. Quæres, quare participia fiant nomina, cum ex seipsis formant comparatiua aut superlatiua? Respondeo, idèò esse, quia cum participia à tergo regant casum uerbi unde descendunt, si post formata comparatiua aut superlatiua manerent participia. iam comparatiua & superlatiua accusatiuum regerent, quod est contra comparatiui & superlatiui nominis naturam. Quæres ulterius, Vtrùm omnia participia formare possint comparatiua & superlatiua? Respõdeo, à participijs præsentis & præteriti formari posse, à participijs uerò utriusq; futuri minime: non enim à *colendus* formabis *colendissimus*, neque à *reuerendus* *reuerendissimus*: sed admodum, aut perquam *colendus*, admodum aut perquam *reuerendus*. Quæres adhuc ulterius, Vtrùm participia futuri in *rus*, & in *du*, possint in nomina transire? Respondeo, utrũque participium posse nominis naturam induere: nam participium in, *rus*, fit nomen quando non tempus, sed hominis qualitatem, atque animi uoluntatem & propensionem significat. Quintilianus. 11. lib. cap. 2. Neque omnino hu

sus rei meminit usquam Poeta ipse, profectò nō taciturnus de tanta sua gloria: id est, talis ingenij & naturę, ut non taceret. Itē in hoc uulgato exemplo, Cōtulit mihi amicus quantum p̄tuit beneficiorū, plus collaturus si potuisset, id est eo ingenio, & tanta ad benefaciendum propensione, ut plus conferret, si posset. Participium item in, dus, nomen fit, quando exponitur per dignus, ut puer amādus, id est, dignus amari.

Quot de causis inuenta fuerint
participia.

Laurentius Valla li. 1. Elegant. ca. 32. tradit tribus de causis inuenta fuisse. Breuitatis & elegantię gratia, breuius enim & elegātius loquimur per participium, quā per aliam orationis partem, ut magistrum legentem attentē audio, quā magistrū qui legit. Postremò necessitatis gratia, ut in huiusmodi locutionibus, Circundedimus castris fossam & uallum, ne hostes uenire possint & nos opprimere: quasi fossa & nallum ideò fiant, aut hoc pręstare queant, ne hostes uenire possint. Item mulieres ornant se, ne homines uideant, & irrideant, quasi mulieres ideò seipsas ornent, ne ab hominibus uideantur. Loquendum itaque necessariò est, ex sententia Laurentij per participium in hunc modum, Circundedimus castris fossam & uallum, ne uenientes hostes, aut ne aggressi hostes, nos opprimant. Itē mulieres ornat se, ne homines uidentes irrideant, aut ne uise ab hominibus irrideantur. In hoc tamen potestremo, Laurentio non assentior, nam licet uenustius

Libert quartus

stius per participium loquamur, non tamen necesse
rion. Possent enim hae orationes fieri per circumio-
quium Circundedinus castris fossam & uallum, ne
hostes qui ueniant, nos opprimant. Mulieres ornāt
se, ne homines, qui uideant, irrideant.

De nominum constructione.

Postquam Nebrissensis egit de uerborum, gerun-
diorum, supinorum, participiorumq; constructione,
incipit iam ab hoc loco differere de nominum, alia-
rumq; partium orationis Syntaxi. Nomina igitur
duplicia sunt, aut substantiua, aut adiectiua itē sub-
stantiua aut propria aut appellatiua. Propria nul-
lum post se casum regunt, quem si forte regere ui-
deantur, non a nomine proprio, sed ab appellatiuo
subintellecto depēdet, ut Ajax Oilci, subaudi filius
Deiphobe Glauci, subintellige filia. Appellatiua ue-
rō genitiuum frequentius solent exposcere: qui aut
actiuus est, ut prouidentia Dei, qua prouidet: aut
passiuus, ut timor Dei, quo timetur: aut dubius, ut
amor Dei, quo homines amat, aut ab hominibus a-
matur: aut possessiuus, ut regnum Dei, quod possi-
det: aut materis, ut subacula lini, annulus auri: aut
ualoris, ut Vergilius decem argenteorum, qui decē
argenteos nummos ualet, aut alio quouis modo. Ve-
rū de huiusmodi regimine non est sermo in prae-
sentia, de quo suo loco satis fuse & copiose disputa-
tum est: sed de nominibus adiectiuis, quae ex sermo-
nis Latini proprietate genitiuum regunt, aut alium
quemuis casum. Adiectiuorum igitur duplex est par-
ticio, alia simplicem casum regunt: alia duplicem:

Quae

Que simplicem alia genitiuum, alia datiuum, alia accusatiuum, alia postremò ablatiuum. De quibus ut suo ordine agamus, res ipsa suo iure uidetur exigere.

De adiectiuis regentibus genitiuum.

Adiectiua quæ solum genitiuum regunt, quincuplicia sunt. Prima, Quæ sunt certæ cuiusdā significationis, sed illa præcipuè, quæ habitum, siue priuationem rei alicuius significant. Vt integer uitæ, sceleris purus, præceptus animi, prodigus uitæ, dubius itineris, tenax propositi, cupidus honoris: quibus tu etiam adde certus, memor, compos, rudis, particeps, parcus, inops, conscius, ambitiosus, fertilis, & alia similia, quæ ex assidua lectione facile cõstabunt. Secunda, Participia præsentis & præteriti temporis cum fiunt nomina, ut patiens laboris, negligens amicorũ, doctus Græmaticæ, expertus belli. Quæ uerò sunt futuri in, rus, aut, dus, et si transcant in nomina genitiuum non regunt: sed quæ in, rus, accusatiuum ut hæc mihi tãtũ tabellarius narrauit, non prætermissurus cætera, siquid haberet certi: quæ in, dus, datiuũ, ut puer mihi amandus, id est, dignus à me amari. Tertia, Superlatiua: ut Achilles Græcorũ fortissimus, de quorũ cõstructione dicemus suo loco. Quarta, Comparatiua partitiua, quãdo scilicet inter duos fit cõparatio, ut manuũ dextera est fortior: de qua etiã in cõparatiuis fiet mētio. Quinta, Nomina uerbali in, or, quæ formantur à posteriore supino, u, in, or, ut à doctũ doctor: & fœminina terminata in, trix, quæ formantur à masculinis, tor, in, trix ut à doctor

Liber quartus.

Actor doctrix, quæ omnia genituum postulant, ut doctrix ueritatis, cultor sapientiæ expultrix uitiorum actrix causarū. Notabis uerbalia in or. quæ masculina sunt, reperiri aliquando generis neutrius ut tempus est rerum omnium repertor. Item actionem significare, præter uector, quod tam passiuè quàm actiuè capitur. Passiuè, Cicero. 7. Philippica. Summi gubernatores in magnis tempestatibus à uectoribus admoneri solent. Actiuè, Ouidius. 1. Fastorum, Ecce rudens rauco Sileni uector asellus, Intempesti uos edidit ore sonos. Illud etiam obseruatione dignū est, terminata in, trix, quæ foeminina sunt, adiectiuorum uim assumere aliquando. Lucanus lib. 1. Tollite iampridem, uictricia tollite signa. Itē formari aliquando irregulariter, ut ab expulso expultrix, ab assessore abetrix, à tonsore tonstrix, à nutritore nutritrix, & sic de alijs idgenus.

De regentibus datiuum.

Quæ regunt datiuum, triplicia sunt. Nomina primum significantia commodum, beneuolentiam, aut animi erga alios facilitatem, cum contrarijs, ut commodus, incommodus, utilis, inutilis, beneuolus, gratus, ingratus, charus, notus, iocundus, facilis, difficilis. Item significantia æqualitatem, uel animum ad rem aliquam aptum, ut par, impar, æqualis, inæqualis, aptus, ineptus. Postremò finita in bilis, ut amabilis cunctis. Quæ formantur in uerbis primæ, tertiæ & quartæ coniugationis, à secunda persona indicatiui. S. in, bilis aut ab amas amabilis, à credis credibilis, à scis scibilis, in uerbis autem secundæ. E. in. I.

mutatur, ut à terres terribilis, à doces docibilis. Quòd si secunda illa persona non fuerit, fingēda est ut a lamentos lamentabilis: quædam tamen ex his ab ultimo supino formantur, ut contemptibilis, uisibilis sensibilis. Hæc nomina passionem significant, terribilis tamen & affabilis actionem, ut terribilis homo, affabilis uir. Duo actionem & passionem, horribilis & penetrabilis: ut horribile nemus, horribilis puer, sagitta penetrabilis, lignum penetrabile. Quæ actionē significant, exponuntur per relatiuum & præsens inãicatiui, ut terribilis homo, qui terret. Quæ passionem, uariè exponuntur: aut per relatiuum & præsens uocis passiue ut uisibilis nulli, qui à nullo uidetur. Aut per relatiuum, & uerba possum, mereor, aut nomen dignus cū infinitiuo passiuo: ut amabilis cūctis, qui potest, meretur, aut dignus est amari à cunctis.

De regentibus accusatiuum.

Nomina adiectiua dupliciter accusatiuum regere possunt, figuratè, aut citra figuram. Figuratè, quādo id quod est partis, attribuitur toti per Sinecdochen, & pars ponitur in accusatiuo, ut niger oculos, horridus barbam. Citra figuram triplicia adiectiua accusatiuum regunt. Nomina primū uerba lia in, bundus, ut populusbundus agros, uita bñdus castra hostium. Quæ exponuntur aut per uerba frequentatiua, aut per sua uerba cum aduerbio ualde, ut ludibundus id est, lusitans, uel ualde ludens, errabundus, id est, erritans. uel ualde errans. Tum nomina distantie, uel mensuræ, ut Gymnasium longum

Libert quartus

centum pedes, latum octo pedes: item puteus profundus quinquaginta ulnas. Quem casum regunt etiam sua comparatiua, & superlatiua: ut hoc gymnasium altero longius est viginti passus, item latissimū quinquaginta passus. Postremò ex elegantia & proprietate sermonis Latini adiectiua regunt accusatiuum, in his locutionibus, Ego sum Latinæ linguæ peritus, cætera ignarus, item alia id genus.

De regentibus ablatiuum.

Alia sunt quæ regunt ablatiuum aut media præpositione, aut sine ea. Triplicia regunt ablatiuū cū præpositione: nomina diuersitatis, ut alienus à uitijs diuersus à tuis moribus, alius ab humanitate. Ordinalia, & cardinalia, ut secundus à Rege, tertius à Ioanne, unus ex fratribus: item oriundus, ut oriundus ex Africa. Alia sine præpositione, ea potissimū quæ excellentiā significant, habitū siue priuationē, siue instrumentū: ut insignis, excellens: clarus, præditus, letus. Quibus adduntur cōparatiua, ut nemo est eloquentior Cicerone.

De regentibus duplicem casum.

Quædā regunt genitiuum uel datiuum. Ea sunt adiectiua similitudinis uel dissimilitudinis, ut similis seu dissimilis patris uel patri. Item adiectiua propinquitatis loci, uel sanguinis: ut proximus, affinis, cognatus, propinquus. Item contrarietatis, ut cōtrarius, inimicus, aduersus Cæsaris uel Cæsari. Alia regunt genitiuum uel ablatiuum, qualia sunt, plenitudinis seu copię cum contrarijs, ut plenus, diues, abundans, refertus, uacuus. Postremò dignus. a. um, quod

quod cum genitiuo uel ablatiua constituitur, ut dignus honoris uel honore. Postulat aliquando infinitiuum, ut dignus coli: aliquando etiam posterius supinum, ut dignus amatu.

De Ablatiua absoluto.

Multi Grammatici affirmant, ablatiuum eo solum nomine dici absolutum, quod in oratione poni possit, siue in principio, siue in medio, siue in fine, cum ab oratione sequenti prorsus dependeat, & sine ea consistere non possit. Ego tamen ita existimo, ablatiuum poni absolute nihil aliud esse: quam alium de non pendere, neque ab alia parte orationis regi. Quod si à sequenti oratione pendere uideatur, illud tantum est in sensu, ut scilicet perfectum sensum in animo audiētis ingeneret oratio, quo modo in presentia nō loquimur de regimine. Ac licet ablatiuus absolutus regimine carcat passiuus, bene tamē regimē habet actiuū, cum suū casum à tergo regat, ut me Grammaticam docente, tu plurimum in literis processisti.

Fit autē quinq; modis. Ex duobus nominibus, ut Rege Philippo pax inter Gallos & Hispanos conciliata est. Ex nomine & pronomine, ut me præceptore bonas literas didicisti. Ex nomine & participio, ut Philippo imperante summa fuit pacis & otij tranquillitas. Ex pronomine & participio, ut me legēte Resp. plurimū decoris & ornamenti suscepit. Ex participio præteriti, ut dicto de nomine, agendum est de uerbo: aut ex solo gerundio, ex quorundam sententia, ut fando aliquid.

Notabis tamen hac in parte unum, quod præci-

Liber quartus.

puum est. non posse scilicet dari locum ablatiuo absoluto, quando ablatiuus & uerbi suppositum ad eādem personam pertinent. Non enim dices, me occupato non potui ad te scribere: sed ego occupatus. Item me occupato nullum tempus ad studia relictum est, dicendum, mihi occupato. Similiter non dices, me legente profeci, sed ego legens. Caterum si ablatiuus absolutus, & uerbi suppositum ad diuersas personas pertineant, habet locum ablatiuus absolutus ut me magistro tu magnos in eloquentia fecisti processus. Item, me legente Resp. omnem effugit barbaria maculam.

Si forte quæras, Vtrum alius casus ab ablatiuo poni possit absolute? Respondeo minime id fieri posse. Si obijcias illud Sallustij in Catilina. Præterea omnes undique parricidæ, sacrilegi, cōuicti iudicijs, postremò omnes quos flagitium, egestas, conscius animus agitabat, hi Catilinæ proximi erant. Vbi omnes illi nominatiui, parricidæ, sacrilegi, ponuntur absolute. Respondeo, nominatiuos illos simul cum pronomine demonstratiuo, hi regi ab eodem uerbo, erant.

De quisque.

Disputat Nebrissensis de quibusdam dictionibus. quæ iunguntur diuersis gradibus comparationis, & de quibusdam alijs partibus indeclinabilibus Quisque à quis & que, coniunctione copulatiua ordinis postpositiui componitur: est autem nomen uniuersale. Differtq; à quisquis, & quisquam: nam quisquam particulare nomen est: quisquis postulat duas oratio-

orationes, ut quisque benefecerit, à Deo accipiet sui benefacti remunerationem: quisque unicam tantum, ut suum quisque ingenium habet.

Iungitur quisque primum omnium superlatiuo, siue in eodem casu, siue diuerso: ut optimus quisque, optimo quisque ingenio. Postponitur semper superlatiuo, nisi præcedat hæ particule, ut, ita, quàm, & tam, tunc enim præponitur superlatiuo: sit exemplum, ut quisque ditissimus est, ita maxime honoratur: quàm quisque ditissimus est, tam maxime honoratur. Caret genitiuo numeri pluralis, pro quo utimur singulari: idem enim est, optimi cuiusque animus, quod omnium bonorum animus.

Iungitur tamen aliquando quisque positiuis, uarijs modis. Primum quando iungitur nominibus quorum significatio nec crescere, nec minui potest, ut ingens quisque, singularis quisque, omnipotens quisque. Deinde quando iungitur nominibus habentibus anteis, uel, us, uocalem: ut strenuus quisque. Sallustius in Catilina. Nam strenuus quisque aut occiderat in prælio, aut grauitèr uulneratus discesserat. Quidam tamen Sallustiani codices scriptum habent strenuissimus. Item pius quisque, non piissimus: quæ uox Ciceroni barbara uisa est, à qua tamèn qui post illum secuti sunt, non abhorruerunt. Quintus Curtius lib. 8. O fidissimi, piissimiq; ciuium. Titus Liuius lib. 5. Piissimè tum apparari poterat. Præterea quando iunguntur numeralibus ordinalibus, ut primus quisque, secundus quisque. Quæ nomina cum quisque possunt uel unum ex numero præscri-

Liber quartus

pto significare, uel ultimum : ut dabo tibi ex ouibus decimam quanque, id est, unam ex decem, quam malueris: quarto quoque anno est bissextus. Vbi nemo quisquam tam lippus est, ut non uideat de eo tantum anno qui in ordine quartus est, non de uno quolibet ex quatuor intelligi. Ad hæc quando iungitur nomini, unus, ut unusquisque bonus, non unusquisque optimus: quia unus uim quandam ac naturam superlatiui obtinet, & absurdum esset in eadē oratione iungere duas dictiones superlationem significantes. Iungitur postremò his dictionibus, sui, suus, quotus: sed cum quotus interrogatiuè. Vt suum quisque emolumentum amat, sibi quisque indulget, sui quisque miseretur: quotus quisque nō superbit diuitijs? nullus, aut pauci.

Præter has formas positiuorum, inuenitur etiam quisque positiuo iunctum Cornelius Tacitus, Vt quisq; Vitellio fidus. Iustinus lib. 1. Cognitione quæque digna excerpfi. Suetonius in Othone, Inualidū quæque obuiorum in sublime iactare solitus. Tacitus iterum, Certatim ut quisque animo ignauus. Ex his intelliges, quisque elegantiùs asciscere sibi superlatiuum: qui tamen positiuo iunxerit, non ineptè loqui censebitur, si tamen id parcè fecerit.

Potest etiā iungi quisq; cōparatiuis, præcedētibus aduerbijs cōparationis, quò: eò quātò, tantò: ut quò generosior quisq; est, eò urbanior, uel quātò generosior quisq; est, tātò urbanior. Reperitur etiā sine aduerbijs cōparationis, iunctum comparatiuo, sed rarò. Vegetius, Honestiores quique milites. La-
stan

Stantius de Opificio: Placidiora quæq; animalia. Cicerō in Verrem, Quisque grauior homo atq; honestior. Seneca lib. 2. de Ira, Non uides ut maiore quàm que fortunam maior ira comitetur.

De Omnis, & Cunctus.

Omnis, totus, cunctus differunt: nam omnis numerum denotat, ut omnes homines natura scire desiderant: totus quantitatem continuam dicit, ut totum panem comedi: cunctus utriusque significationem habet, ut cunctum pisces, aut cunctos pisces deuorauit. Omnis & cunctus positiuo iunguntur, & comparatiuo: ut omnes boni, cuncti boni, omnes sapientiores, cuncti sapientiores. Verum tametsi rectius feceris, si quod docet Laurētius, omni studio fueris imitatus; non infrequenter tamen apud bonos authores inuenias, quo te tuearis, si contra quàm ipse tradit, forte fueris loquutus. Placuit consultò quamplurima Ciceronis exempla in medium proferre, in quibus omnis iungitur superlatiuo: ut omnes Grammatici intelligant, id nobis licere, quod Ciceroni Romanæ eloquentiæ parēti toties licuit. Cic. pro Cecinna, Cur si cuiquā nouo ciui potuerit adimi ciuitas, nō omnibus Patricijs, omnibus antiquissimis ciuibz possit? Idem in partitione Oratoria, Id effugiet, qui non omnia minima repetet. Idē de Oratore li. 2. Qui oēs tenuissimas particulas, atq; oīa minima māsā in os inserant. Idē in Bruto, Me⁹ autē equalis Cn. Pōpeius, uir ad oīa summa nat⁹. Pro Lucio Flacco, Ipse omnibus turpissimis iudicijs cōuictus est. Pro Rabirio, Cū de nique omnes clarissimi uiri cum Consulibus essent.

Liber quartus

Idem. 4. Epistolarum ad Lētulum. Omni gradu amplissimo dignus. **Idem ad Plancum lib. 10.** Omnibus mihi crede amplissimis honoribus abūdabis. Sed me comprimam, ne in re à Cicerone frequenter usitata firmāda, prolixus nimium alicui, aut superfluus esse uidear.

De aduerbijs finitis in Vm.

Aduerbia in um ut tantum, quantum multum, parum, modicum, paulum, aliquantum. Iunguntur primò positiuis, ut tantum doctus, quantum facetus: aliquando comparatiuis, quando sibi uicissim non respondent, nec est illa duorum contrapositio. Iuuenalis Saty. 11. Despiciam, qui scit quantum sublimior Atlas. Terentius, Eius frater aliquantulum est ad rem audior. Quintilianus libro. 12. capi. 9. At quidam si fortè susceperint negotia paulum ad dicendum tenuiora, ea conuitijs implent. Aliquādo in uno membro est aduerbium in um, in altero in o, siue contra, graduum uarietate id poscente. Verg. li. 12. O præstās animi iuuenis, quantum ipse feroci Virtute exuperas, tantò me impensius æquum est consulere. Iunguntur deinde uerbis, ut quantum potes, tantum in bonis literis labera. Item his præpositionibus ante, & post, & uerbis ab illis compositis, & à præ. ut multum ante, multum post, multum antecellis paulum posthabui tua negotia meis, multum præstat.

De aduerbijs finitis in O.

Finita in O, iunguntur tam comparatiuis, quàm superlatiuis. Cicero primo Officiorum. Quāto superiores sumus, tantò nos geramus sublimius.

Catullus

tullus Epigrammate ad Ciceronem, Tantò pessimus omnium Poeta, quantò tu optimus omnium patronus, Terentius in Eunuchò, Hic quæstus est nunc multò uberrimus. Excipiuntur paulò, & aliquàto, quæ tantum comparatiuis adherent, ne superlatio cum diminutione coniungatur: ut paulò doctior, aliquantò prudentior. Iunguntur præterea his præpositio nibus ante, post, & uerbis ab illis cõpositis & a præ ut tantò ante ego ueni, quantò tu post uenisti. Salustius, Multò præstat maleficij, quàm beneficij immemorem esse. Adherent item nominibus siue aduerbijs diuersitatem significantibus, ut quãtò alius, multò aliter, multò secus. Postremò dictionibus significantibus excessum, ut multò superat, multò excellit.

De Tam & Quàm.

Hæc duo aduerbia tam, & quàm, duplicem habent usum. Aut enim sibi inuicem respondent in oratione ita ut post tam sequatur quàm: aut ponuntur separate. Si sibi ipsis respondeant, omnibus gradibus iunguntur Positiuo, ut tam bonus, quàm doctus. Comparatiuo, uerum non ita frequenter: idq; nò tantum apud Poetas ut multi uolunt, sed apud Oratores etiam. Vergil. 7. AENEI. Tam magis illa fremēs, & tristibus effera flammis, Quàm magis effuso crude-scunt sanguine pugnae. Valerius Max. lib. 4. Posterior ætas in excolendo iure amicitia, quàm libèrius tam etiam religiosius erit operata. Cicero pro Deiotaro, Istam inquam dexteram, nò tam in bellis & in prælijs, quam in promissis & fide firmiorem. Su

Libert quartus

perlatiuo frequētius, ut tam hic est omnium optimus, quā nobilissimus. Sallustius in Iugurtha. Quā quisq; pessimē fecit, tā maxime tutus est. Si uerō ponantur separatim, & altera sine altera, iunguntur positiuo, & superlatiuo: cōparatiuo minimē. De tā cum positiuo, Cicero. 2. Philippica, Tam bonus gladiator tā citō rudem cepisti? Cum superlatiuo, Idē, In tā optima causa nō debco timere. De quā quia differēdum est latinū, idē eius tractationem in hūc eundem locum non uocabo.

De Quā.

Quā si capiatur pro quantū, iungitur positiuo, Cicero li. 7. Epistolarum ad Trebatium, Quā sint morosi, qui amant, uel ex hoc intelligi potest. Ex qua authoritate colliges, quā pro quantū solere iungi uerbo minū principali, in recto præsertim modo loquendi. & non figurato: at uerō si oratio figurata sit, hoc est, irrisiōis aut exprobrationis plena, iungitur uerbo principali, ut quā citō uenisti, quā suauis homo es. Iungitur etiā superlatiuo cum uerbis præsertim potētiae, qualia sunt, possum, ualeo, queo, licet, & si qua sunt alia: ut scribas quā optimē potes. Sed tunc, ut author est Laurentius libro primo Elegantiarum capit. 17. quā non iungitur cum superlatiuo, sed cum uerbo sic, scribas optimē quā potes. Si uerō obijcias dictū illud Terentianum in Eunuchō, Tute scis, post illa quā intimum te habeam: ubi sine uerbo potētiae, quā pro quantū iungitur superlatiuo intimum. Respondeo: intimum accipi pro positiuo, sicut proximum:

num; dicimus nanq; hic est mihi magis proximus: ita hic est mihi magis intimus. In quibus locutionibus si proximus & intimus superlatiua essent recipere non possent in consortium aduerbium magis. Postremo quàm pro quantum iungitur uerbo, ut scio quam tibi placeant mea omnia. Et ne quid necessarium prætermittamus, scito studiosè adolescens, quam pro quantum reperiri aliquando iunctum cōparatiuo, & superlatiua etiam, Cicero secundo de officijs, Sed tamen uidemus, quibus extinctis Oratoribus, quàm in paucis spes, quàm in paucioribus sit facultas. Idem pro Cornelio Balbo, Sed quàm est illud imperitissimè dictū. Cæterum horum graduum non est admodum frequens usus apud authores.

Si uerò quàm capiatur pro ualde, iungitur superlatiua & uerbo etiam principali: ut quàm doctissimus est, Sed tunc non regit casum, non enim dixeris, quàm doctissimus est omnium: quo nomine differt à longè, cum quo superlatiuus casum regit, ut tu es longè omnium, quos mihi uidere contigit, doctissimus. Si uerò obijcias Terentianum illud in Andria. Reiecit se in eum flens quàm familiariter, ubi quam pro ualde iungitur positiua. Respondeo, ibi quàm capi pro quantum, & nō pro ualde: quàm familiariter, id est, quātum familiariter: figuratè, quasi, o quātum familiariter. Nihilominus tamē scito, quàm pro ualde apud bonos authores reperiri iunctum positiua. Caesar libro quarto Gallici belli, Monuit ut mæritimæ res quàm celerem atque insabilem motum

Libert quartus

motum haberent. Idem lib. 1. bellorũ Ciuiliũ, Qui inopinantes pabulatores aggressi, quàm magnum numerum iumentorum intercipiunt. Cœlius ad Ciceronem, Habeo quàm multa.

Sunt tamen hic duo aut tria obseruatione digna: Quorum illud primum sit, loco quàm pro quantum, posse poni ipsum quantum: ut in dicto illo Cicero-niano, Quàm morosi sint, qui amant: dicere posses, quantum morosi. At uerò loco quàm pro ualde, poni nō potest ipsum ualde: non enim diceres Latine, ualde doctissimus est, pro quàm doctissimus est. Sit secundũ, quàm iungi superlatiuo plurimus, & Latine dici quàm plurimas literas abs te accepi, non quàm plures, contra complures, non complurimas.

Sit tertium, ex quàm & primum, oriri quàm primum: quæ particula à cū primum dupliciter differt, Tum quia quamprimum significat confestim siue protinus, ut quamprimum ueniam: cum primum significat ut primum siue ubi primum, ut cumprimum mare intraui, exorta tēpestas est. Tum etiam, quia quamprimum unicũ desiderat uerbum: cumprimum uerò duo, neq; aliter eius explebis naturā, ut in exemplis citatis uidere est. Quòd uerò per cūprimum solet enunciari, non minus ornatè per ut primum, ubiprimum, simul, simulac, simulatq; simulubi, simul primum, & alios dicendi modos exprimitur.

De Per, & Perquàm.

Per, quādo cum adiectiuis componitur, capitur pro ualde, & iungitur positiuo. In quo differt à quàm, nam quàm pro ualde superlatiuo iungitur, ut
quàm

quàm optimus, quàm doctissimus: per uerò iungitur positiuo, ut per bonus. per doctus. Quòd si una aut altera authoritas apud scriptores reperiatur, quæ huic nostræ præceptioni aduersetur, legem facere non debet, cum nos de ijs præcepta tradamus, quæ frequentius factitata sunt, præsertim à Marco Tulio, & Marco Fabio optimis benedicendi magistris. Hoc dixerim, quia per reperitur aliquando iunctū superlatiuo. Linius belli Macedonici lib. 10. Paucis & expeditis perdifficillimum aditū. Plinius Historicus lib. 2. capite. 54. Itaque per plurimū refert unde uenerint flumina, & quò concesserint. Cato in libro de Re rustica, Inibi Austrum caucto permaximè. Columella libro tertio capi. 20. Quum quod longè sit facilius, adhuc per paucissimis agricolis contigerit. Sed hæc rara sunt, neque ad imitationem proponenda.

Ex per & quàm, fit per quàm. Quæ uox positiuo etiam iungitur, ut per quàm doctus: quia indecès uideretur duo aduci biaz uehementiā significantia superlatiuo anteponi. Quā legem sequūtur etiam illæ particule uehementiæ sane quàm, nimis quàm, oppido quàm, in primis, cum primis, inter primos, in paucis, cum paucis, inter paucos quæ omnes positiuus iunguntur, non superlatiuus. Aliquando tamē per quàm iungitur superlatiuo. Boetius in commentarijs Logicæ breuioribus, Apud scriptores quidem Græcos per quam rarissimos. Pomponius per quam breuissimos libros dixit. Curtius lib. 4. dixit etiā, Per quam maximo posset exercitu. Sed huiusmodi exēpla tam

Liber quartus

rara sunt, ut dubitari possit, an librariorū forte culpa similis error sit cōmissus. Iungitur etiā perquā uerbo: sicut per, ut perquā uelim, perquam placet, sicut peruelim, perplacet.

De hei & uæ

Hei & uæ interiectiones sunt dolentis. & iungitur datiuo, ut hei mihi misero, uæ tibi infelici. Olim tamen accusatiuo iungebantur, hei me, uæ te: sed huius cōstructionis nullus est usus apud probos authores. Iungitur uocatiuo. Terētiū, Hei noster laudo. Aliquando uerò per uæ alicui minamur cum eodē datiuo. Martialis lib. 5. Carpere causidicus fertur mea carmina, qui sit, Nescio: si sciero, uæ tibi causidice. Aliquando aspirata in fine iungitur uocatiuo, ut uæh insane. In compositione aliquando auget, ut uægrandis: aliquādo minuit, ut uæcors, qui mali turba iūq; cordis est. Si scribatur sine diphthongo, coniunctio est disiunctiua ordinis postpositiui, de qua in præsentia non est sermo.

De Heu & O.

Heu interiectio est etiam dolentis, & aliquando ponitur absolutè: ut Heu quātis sum tempestatibus iactatus. Si uerò nō ponatur absolutè, tres regit casus. Nominatiuum, Vergil. AENEID. 6. Heu pictas, heu prisca fides. Accusatiuum, Terētiū in Andria, Heu me miserum. Et ferè cum huiusmodi pronomi-
nibus dolentis est particula: nam cum alio nomine frequentius ea utimur ad exprobrandum. Vergilius AENEIDOS. 7. Heu stirpem inuisam. Vocatiuum, Vergilius, Heu regni rerumq; oblite tuarum. Apud

Eccle

Ecclesiasticos & Plautum iungitur datiuo, Heu mihi quia incolatus meus. Geminatur aliquādo sine casu. Plautus Pseud. Heu heu, quā ego malis perdidī modis quod tibi detulī. Eheu ponitur etiā sine casu. Vergi. 2. Ecloga, Eheu quid uolui misero mihi, floribus Austrum. idem tertia, Eheu quā pingui macer est mihi taurus in aruo.

O, aut est uocantis aduerbium, aut interiectio dolentis, cōmiserantis, seu indignantis. Si sit uocantis aduerbiū, uocatiuo solum iungitur, ò Mēlibœe. Est etiā optantis, Vergil Ecloga. 6. O tātū libeat me cū tibi sordida rura, id est, utinam libeat. Si uerò sit interiectio, seruit omnibus affectibus, & iungitur tribus casibus. Nominatiuo, o ego ter felix. Accusatiuo ò me miserum. ò te infelicē. Sed si supprimatur, nō habet tantum caloris & uehementiæ, ut indignum facinus, hominem nequam & perditum, Vocatiuo, Cicero pro Flacco, O nox illa, quæ penē æternas huic urbi tenebras attulisti.

De En, & Ecce. . .

En & ecce, demonstradi sunt aduerbia. Sed en ponitur aliquādo absolutè, en magna scholasticorū multitudo in eū locū cōfluxit. Aliquādo cū nominatiuo, Ver. 1. AEn. En Priam⁹. Atq; hac particula utimur cū nominatiuo nō tātū demonstratiuè, sed expōratiuè etiā. Cice. pro Deiotaro, En crimē, en causa, cur Regem fugitiuus, dominum seruus accuset. Aliquando cum accusatiuo non tantū demonstratiuè, Vergilius, En quatuor aras. Sed exprobratiuè, Idē AEn. 12. En agros. Hen apud Comicos reperitur cum

Liber quartus

cum eisdem casibus. Nominatiuo, Plautus *Curcul.* Hentibi anus lepida. Accusatiuo, Terentius in *Andria*, Hen Dauum tibi.

Ecce ponitur etiā absolutè, & apud Poetas repētinum aliquid insperatumue significat. Vergil. *Æneid.* 2. Ecce trahebatur passis Priameia uirgo Crinibus. In sacra pagina sacramentum aliquod diuinitatis plenum importat, ecce uirgo cōcipiet. Iungitur nominatiuo. Cicero lib. 14. ad Atticum, Ecce autē Antonius accepta grandi pecunia. Accusatiuo, licet non ita frequēter. Plautus in *Mercatore*, Ecce me Acāthio, quem quæris. Terētius in *Adelphis*, Ecce me, qui id faciam uobis. Cicero pro *Cecinna*, Cum subitò ecce eum qui solet, suos solos seruos armatos fuisse dixit. Iungitur etiam datiuo tibi, ecce tibi, qui loquendi modus frequentissimus est apud Cicero-nem.

Cōponitur ecce cū pro nominibus hic & ille, eccū eccam, ellum, ellam, sed priora exponuntur per ecce & hic, posteriora per ecce & illic, eccū ecce hic eum, ellum ecce illic eum.

De comparatiuis.

Explicata nominum adiectiuorum cōstructione, & quarundam partium indeclinabilium natura, disputat Nebrissenfis de cōparatiuis & superlatiuis, quorum tractatio plurimum habet intra se utilitatis & emolumentum, ac proptercā diligentius à nobis insudandum est, ne quid in ea prætermittatur, quod ad exactam perfectamq; eorum cognitionem conducere aliquantisper uideatur. Comparatiua igitur à
compa

comparando dicta sunt quod per ea rei ad rem comparatio fieri soleat cum excessu quodam. Nam cum tres sint gradus cōparationis Positiuus, Comparatiuus, Superlatiuus. Positiuus qualitatem ipsam uel quantitatem (nam in his duobus fit omnis comparatio) simpliciter adhuc, absoluteq; , nec alio relata significat: Cōparatiuus eadē quantitātē qualitātē eue tollit, uel deprimit. Superlatiuus uerò, quantum est in se, eò usq; prouehit, ut metas figat ultra quas progredi minime liceat. Comparatiuorum igitur materiam aggredientes, ab eorū definitione auspicemur: deinde explicemus à quot partibus orationis oriuntur, mox quo pacto formantur, deinde quot modis construatur, postremò de cōparatione erit sermo.

Quid sit comparatiuum.

Comparatiuum nomen est, quod cum intellectu positiui, uel aliquo participe sensus positiui, significat magis aduerbium. Finitionis partes explicemus oportet. Quod cum intellectu positiui: id est, ultra illud quod significat nomen positiuum, significat aduerbium magis, ut fortior te, id est, magis fortis, iustior te, id est magis iustus. Vel aliquo participe sensus positiui. Intelligit quancunq; aliā orationis partem, quæ ponitur loco nominis positiui, putà uerbū, præpositionē, aduerbium, à quibus comparatiua oriri solent ut ceterior magis citra, ulterior magis ultra. Nam duplicia sunt positiua, propria & impropria: propria sunt nomina adiectiua. uel uim illorū habentia: impropria uerò, uerbum, præpositio, aduerbium, à quibus (ut paulò post dicemus) forman-

N tur

Libert quartus

tur aliquando tum comparatiua, tum superlatiua. Sed quia hæc definitio non tantum explicat quid sit nomen comparatiuū, quam quid significet, idcō eius naturam posses hac finitione exprimere. Comparatiuum est rei ad rem collatiuum: nam in hoc comparatiui natura uersatur tota, ut rem unam cum altera conferat.

Ex prioris definitionis expositione liquidō constat, traditam fuisse de comparatiuo cōparato. Nā duplex est cōparatiuus, comparatus, & absolutus. Comparatus est, qui cōparationē importat, & proprii casus syntaxi exornatur: absolutus uerō qui nullā præfert cōparationē, & omni nudatus est constructione. Comparatiuus igitur cōparatus æquipollet suo positiuo & magis: ut Cicero eloquētiior Hortensio, id est, magis eloquens, qua in re nulla est inter Grammaticos controuersia. Cæterum utrum cōparatiuus absolutus significet quantum positiuus, an minus: in hoc est grauissima inter latinitatis principes contentio. Priscianus lib. 3. ca. de cōparatiuo aßerit, Cōparatiuum absolute positum significare minus quā positiuum, cuius sententiæ adheret in litera Nebrissensis. Iāq; duabus præcipue auctoritatibus cōfirmat, quarum prior est ex 1. AEncid. Tristior & lachrymīs oculos suffusa nitētes, alloquitur Venus, id est, subtristis. Nā cū Dea esset, uera tristitia perturbari nō poterat. Posterior ex AEnci. 6. Iā senior, sed cruda deo uiridisq; senectus. Loquitur de Charōte, qui animas ad inferos trāsportabat, qui parū senex erat, cū non adulta & præceps, sed uiridis

uiridis ac ueluti incipiens illi esset senectus.

Sed ego hac in parte non possum cum Laetatio et Scaeuo etiam in ea Vergilij loca, non consentire: qui tenent comparatiuum absolutum non minus, sed tantum significare, quantum positiuum: ex uulgata Quintilianij auctoritate, Utimur uulgo comparatiuis pro absolutis, id est, positiuis. ad carmen Vergilij, Tristior et lachrymis, &c. Respondeo tristior pro tristis capiente uera Venus tristis erat, cum uideret filium Aeneam tot ac tantis tempestatibus et procellis iactari, neque editum illi in Italiam dari, in qua ex Deorum oraculis deberet principatum tenere. Quod si subtristis esset, non subderet Vergilius, et lachrymis oculos suffusa: nam parum tristis et lachrymis plena, pugnat inter se. Ad alterum, Iam senior, sed cruda Deo: ibi senior non pro parum sene, sed pro sene, aut ualde sene capitur. Et est sensus magis apertus, et gratior multo, Charon ad multam peruenerat senectutem, sed adeo uiridis erat et robusta senectus, quasi modo inciperet senescere.

Vnde oriuntur Comparatiua,

Partes autem orationis, a quibus comparatiua et superlatiua deducuntur, quatuor sunt. nomen, uerbum, praepositio, aduerbium. quas necesse est sigillatim percurrere, ne quis sibi falso persuadeat, ab omnibus in uniuersum nominibus oriri posse comparatiua et superlatiua.

Nominum alia sunt substantiua, alia adiectiua, substantiuorum alia propria, alia appellatiua. A proprijs non deducuntur comparatiua, nisi forte per iocum dixeris a Nerone Neronior, a Catone Ca-

Liber quartus

tonior. Appellatiua duplicia sunt, alia absoluta, quæ ultra principale significatum nihil aliud importat, ut homo, leo, lapis, paries, à quibus cōparatiua nō formantur, cum substantia ipsa incrementum aut diminutionem suscipere non possit. Alia quæ à Dialecticis connotatiua appellatur, quorū ea natura est, ut præter præcipuam significationem, qualitatem aliquam præse ferant, quæ minui aut augeri possit, & in qua fieri etiam possit comparatio. Ea autē sunt, diues, pauper, iuuenis, senex, adolescens, & similia, quæ diuitias, paupertatem, iuuetutē, senectutē, adolescentiam important, quibus omnibus unus altero maior aut minor esse potest, ac propterea à ab his pulchre nascuntur cōparatiua, ditior, pauperior, iunior, senior, adolescentior. De substantiuis dictum est.

Adiectiuorum duplex est forma. Nam alia sunt, quæ qualitatem aut quantitatem significant, quæ minui, aut crescere non possit, qualia sunt, summus, unicuique, ingens, omnipotens, imus, quæ ex seipsis comparatiua aut superlatiua gignere non possunt. Alia quorum significatio crescere, aut diminutionē suscipere possit, & ab his formantur comparatiua, ut à forti fortior, à grandi grandior. Excipiuntur tamen ab his nomina primum quæ ante, is, uebus, uocalem habent, qualia sunt pius, strenuus, assiduus, tenuis, quæ non formant comparatiua, Euphonia, id est, boni soni gratia. Quanquam sapissimè apud bonos auctores inueniuntur ab huiusmodi adiectiuis comparatiua, usu enim & consuetudine effectum est, ut sonus ille eruditae aures non offendant. Cicero Rhetorico

ricorum lib. 2. Sed illæ tenuiùs, & acutiùs, & subti-
liùs tractantur. Idem in Bruto, Assiduißimè autẽ me-
cum fuit Dyionfius. Suetonius in Galba, Assiduißimi-
us. Plinius Iunior lib. 7. Epistolarum, Exiguißima le-
gata. Plinius Senior lib. 18. Milites strenuißimi ex
agricolis gignuntur: & alia innumera. Excipiuntur
item nomina omnia numeralia cuiuscunque ordinis
sint, quæ comparatiua nõ formant, qualia sunt pri-
mus, secundus, duplus, triplus, bini, terni. Excipiun-
tur præterea pronomina omnia in propria natura
capta, à quibus non promanant comparatiua. Dixi
si in propria natura capiantur, nam ipse pro simi-
lis format ipsißimus, id est, simillimus. Excipiuntur
deinde signa omnia uniuersalia, & particularia, ut
omnis, cunctus, aliquis, quidã. Item possessiua, ut pa-
ternus, maternus, Vergilianus. Postremò significan-
tia patriam, ut Complutensis, Burgensis, Corduben-
sis: & alia, de quibus certa regula tradi nõ potest:
à quibus omnibus nec comparatiua nascuntur, nec
superlatiua. Solent tamen in multis eorum suppleri
cõparatiua per magis & positiuũ: superlatiua per
maximè & suum etiã positiuũ: ut magis strenuus,
pro strenuior, maximè strenuus, pro strenuißimus.

Iuxta multorum sententiam, à duobus uerbis pro-
deunt comparatiua & superlatiua: à detero dete-
rior, à potior potissimus. Sed ego ita existimo dete-
rior non à detero, sed à deter antiquo positiuo, sed
obsoletus, nasci: & potissimus non à uerbo potior,
sed à nomine potis & e, derivari.

A præpositione proficiuntur comparatiua. ut

N 3 à pro

Liber quartus

à prope propior. Item ab aduerbijs, ut à pridem prior: à sæpe, sæpius, sapissimè.

Quæres, Vtrum à participijs formentur comparatiua: Respondeo puichrè satis formari posse, non quatenus participia sunt, sed quatenus nomina, idq; tantum contingit in participijs presentis, & præteriti, ut ab amans amantior: à doctus doctior.

Quo pacto formentur.

Formatio est nouæ uocis noua quædam compositio. Est autem quantum attinet ad præsentem materiam duplex: regularis, & irregularis. Regularis est, quando prima syllaba positiui seruetur in comparatiuo & superlatiuo. Irregularis uerò, quando eadem prima syllaba non seruetur: agamus de regulari. Comparatiua regulariter formantur à positiuis primæ & secundæ declinationis, à genitiuo singulari masculini generis ad lita, or: ut albi albior. A quo eodem genitiuo formantur superlatiua addita, S, & simus: ut albi albisimus. A positiuis uerò tertie declinationis à datiuo singulari addita, or, ut à forti fortior: superlatiua uerò à genitiuo singulari ad lita, simus, tantum, ut fortis fortissimus.

De formatione irregulari. Excipiuntur sexcuplicia nomina, à quibus oriuntur comparatiua & superlatiua, nō seruata regula formationis Prima, Adiectiua in ficus composita à facio, ut magnificus, beneficus: à quibus non formantur comparatiua, sed à participijs magnificens, beneficens, quæ in usu non sunt. Secunda, Adiectiua in dicus composita à uerbo dico, ut benedicus, maledicus: à quibus non
dedu-

deducuntur comparatiua, sed à participijs benedicens, maledicens. Tertia, Adiectiua in, olus, composita à uerbo uolo, ut beneuolus, malciuolus: à quibus cōparatiua originem non trahunt, sed à participijs beneuolens, malciuolens. Quarta, Adiectiua à uerbo loquor composita, ut magniloquus, grandiloquus, uaniloquus: à quibus comparatiua non profiunt, sed à participijs magniloquens, grandiloquens, uaniloquens. Quinta, Adiectiua finita in, er, à quorum nominatio formantur superlatiua in, rrimus, ut à miser miserrimus, à tener tennerrimus: quorum proportionem sequuntur uetus ueterrimus, maturus maturrimus. Sexta, Adiectiua in, lis, quæ per hanc dictionem fagus intelliguntur: quæ comparatiua formant secundum regulam, superlatiua præter regulam, à nominatio, is, in, limus: ea autem sunt facilis agilis, gracilis, humilis, similis. Ex hac formatione liquidò omnibus constabit, triplicia esse comparatiua: uoce tantum, ut nouissimus: significatione tantum, ut melior, peior: uoce & significatione simul, ut albior, fortior.

Quot modis construuntur.

Gradus cōparatiuus quadrupliciter cōsiderari solit. Adiectiue, ut doctiores uiri ita sentiunt: & ita nulli regit post se casum, sed cū substantiui cōcordat in genere, numero, & casu. Positiue, quādo sui positiui casum regit, ut doctior pilæ, quā literarū, tūc etiā casus regit ex ui cōparationis, ut aptior te bello. Partitiuū, quādo sit in duo cōparatio, & tūc genitiuū regit ut manuū dextra fortior, tūc etiā ablatiuū regit

Liber quartus

ex ui comparationis, ut manuum dextra fortior sinistra. Sunt autem tria necessaria, ut comparatiuus genitiuum regat ex ui partitionis. Vt comparatio fiat inter duos: unde inepte satis diceretur, fortior digitorum est pollex. Vt sit conuenientia inter comparatiuum & genitiuum in genere, unde barbarè diceretur, maior horum charitas sed maxima. Vt cōparatio fiat inter res eiusdem generis & naturæ: unde agrestis planè & rusticus esset, qui sic loqueretur, pedum manus dextera est fortior. Postremò capitur in propria ui & natura, & tunc ex ui comparationis uarios regit casus.

Primum omnium construitur cum ablatiuo, siue singulari, si fiat ad unum comparatio, siue plurali, si fiat ad plures: doctior te, eloquētior cæteris Orationib⁹. Cōstruitur præterea cū duob⁹ ablatiuis, altero ex ui excessus, ut sum longior te quatuor digitis.

Deinde cum casu quē particula quam pro ratione uerbi subintellecti cepulat, ut Plato eloquentior quàm Demosthenes. Aliquando loco quàm ponuntur ac, atq;: ut lōgius oratione sum progressus, ac, siue atque mihi constitucram. Interdum post quam sequuntur illæ particulae, pro, qui, ut. Exēplis confirmamus. Maiorē geris pileum, quàm pro magnitudine capitis: hic adolescētior est quàm qui possit Rēpū. gubernare hic imbecillior est quàm ut tā granē prouinciā humeris possit sustinere. Notabis quod est hac in parte præcipuum, coniunctionē scilicet quam exigere sua natura, ut casus sequens similis sit precedenti, quod intelligendum est respectu eiusdē uerbi:

at iterò

at uerò si sequatur cum quam uerbum substantiuū, sequetur nominatiuus. Aliàs præcedente altero nominatiuo, ut melior dux Scipio, quam fuit Annibal. Aliàs præcedente genitiuo Gellius libro 10. Marci Varronis quam fuit Claudius, doctioris. Aliàs præcedente datiuo. Cicero in Verrem. Homini gratior, quam C. n. Calidius est. Aliàs præcedente accusatiuo. Plaut in Curc. Mulierem peiorē quam hæc est, non audiui. Aliàs præcedente ablatiuo: ut uiduatius est muliere peiore, quam ulla meretrix unquam fuerit.

Postremò cum accusatiuo medijs præpositionibus, Inter, Ante, Super, ut inter omnes tyrānos crudelior Nero. Variato per alias præpositiones. Item etiam cum ablatiuo medijs præpositionibus, E, Ex, De, ut est a tribus hic pedibus uelocior: poterit hæc oratio per alias præpositiones uariari.

Hæ sunt germanæ constructiones comparatiuorum, quibus tamen optimi authores abutuntur, quæ admodum et positiuis, sed positiuis bifariam. Alias cum uicem gerunt comparatiui: quod genus Plautinum illud in Rudente, Tacita bona est mulier semper, quā loquens: bona, id est, melior. Alias cum uim tenent superlatiui: quale Plinianum illud libro decimo sexto, Palma arborum ualida, in diuersum enim curuatur. Id autem perinde est, quod palma arborum ualidissima. Comparatiuis uerò trifariam abutuntur. Constructione, quando construuntur cū genitiuo ex uicem comparisonis. Plinius libro septimo, cap 30. Omnium triumphorum lauream maiorem

Liber quartus.

adepte. Curtius libro quinto, In oculis duo maiora omnium nauigia submersa sunt. Formatione, quando à substantiuis, aut pronominibus formantur. Significatione, cum rem positiuis contrariam significat, ut mare Ponticum dulcius est, quàm cætera maria: id est, minùs amarum.

Sed quæritur, priusquàm ulteriùs progrediamur. Vtrum semper comparatiuis construatur cum ablatiuo? Respondeo quinque modis priuari huius casus constructione. Primò, quando nomen caret ablatiuo: ut hic ager uberior est, quàm tua rura, non dices ruribus. Secundò, quando fit comparatio inter duo nomina positiua, siue comparatiua: ut sermo facetus magis, quàm utilis, aut sermo facetior quàm utilior. Tertiò, quando fit comparatio inter duo uerba, ut ego uelociùs lego, quàm scribo. Quartò, quando capitur partitiuè, ut oculorum dexter perspicacior. Quintò, quando dictio à qua fit exceptio, ponitur in nominatiuo: ut Priscianus doctior fuit quàm cæteri Grammatici, præterquàm Laurentius: non dices Laurentio, quia præterquàm postulat casum sequentem præcedenti similem.

Quæritur etiam, Vtrum ablatiuus qui regitur ex ui comparisonis, exponi semper possit per quàm? Respondeo, id septem modis fieri non posse. Primò, quando ablatiuus caret nominatiuo: ut uerberare crudelior carnifex: non dices, quàm uerber. Secundò, quando ablatiuus est nominis relatiui: quoniam iustior alter, non dices quàm qui. Tertiò, quando ablatiuus est dictionis negatiuæ: ut nemine tu es fortior:

Idior: non dices quàm nemo, quia negatio præcedere debet, non sequi. **Quartò,** quando ablativus est horum nominum opinione fide spe, solito, æquo, iusto, dicto: fit enim tunc resolutio per uerba, doctior opinione, id est, quàm opinabar. uelocius spe mea, quàm sperabam: doctior solito et æquo, quàm solebam, aut æquum erat: dicto uelocius uenit, quàm dixit. **Quintò,** quando comparatio est partitiua, ut manu dextera est fortior. **Sextò,** quando dicto à qua fit exceptio, ponitur in ablatiuo: ut Diomedes fortior Trojanis præterquàm Hectore: nō dices magis fortis quàm Troiani, præterquàm Hectore, sed Hectore. **Septimò,** quando ablativus significat actionē, et exponi deberet per genitiuum passiuum: ut expositiui arma militis te fortioris: non dices, arma militis magis fortis quàm tui, sed quàm tu sis.

De Comparatione.

Hac in parte explicabimus quidnam sit comparatio, quot ad propriam et perfectam comparationē necessaria sint, quotuplex sit comparatio, postremo quot modis fieri soleat omnis comparatio.

Quid sit comparatio.

Comparatio est rei ad rem collatio cum excessu: ut differat à similitudine, nam quæ æquat, similitudo est potius quàm comparatio. Cōtingit tamē rem similem cū simili cōparari, ut Plato fuit doctior Aristotele. Itē cū dissimili. ut Deus est melior damone. Fit etiam comparatio maioris ad minorem, ut Gigantes fuerunt Pygmaeis fortiores. Minoris ad maiorem,

/ ut

Liber quartus.

ut Pygmaei fuerunt Gigantibus minores. Quae membra solent alij Grammatici in definitione comparationis includere, atq; ita comparationem definiunt. Comparatio est rerum similium, aut dissimilium, maiorum ad minora, minorum ad maiora collatio. Quae definitio in nullo alio discrepat à priore quam quòd per partes explicat, quae latent in priore.

Quot requirantur ad perfectam comparationem.

Sunt autem necessaria quinq; ad bonam & perfectam comparationem, res comparata, res cui comparetur, accidens in quo fiat comparatio, & quòd uterq; terminus sit accidentis particeps, item quòd alter sit magis particeps accidentis: quia omnis cõparatio id agit, ut alterum præferat. Vt Demosthenes eloquentior AEschine. Demosthenes est res cõparata, AEschines cui comparatur: eloquentia, qualitas in qua fit comparatio: & uterq; est eloquentiae particeps, uerum Demosthenes magis.

Quotuplex sit comparatio.

Est autem quadruplex comparatio, propria, impropria, abusua, hyperbolica. Propria est, in qua res comparata, & cui comparatur, sunt eiusdem qualitatis particeps: ut Hercules fortior leone. Impropria, in qua alter terminus qualitatis positiui particeps est, alter uerò non: ut cygnus albior coruo. Abusua, in qua neuter terminus est qualitatis particeps: ut coruus est albior Aethiope. Hyperbolica, in qua omnes ueritatis lineas transilimus: ut niue cãdidior. Solent autem huiusmodi comparationes hyper

perbolice fieri per genus neutrum, quod nescio quid plenius sonat quam masculinum, ut nihil est te literatius, nihil est illo prudentius, nihil est isto inhumanius.

Quot modis fiat comparatio.

Fit autem omnis cōparatio præcipuè modis quinque. Primò ad unum sui generis uel diuersi, & utè dum est comparatiuo ut tu es cōtubernali doctior, item uelocior ceruo. Secundò, ab uno ad alterum per genitiuum utrunq; significantem, & tunc utimur etiā comparatiuo genitiuum exigenti, ut manu dextera est fortior. Tertiò, ab uno ad plures, & à pluribus ad plures diuersi generis, & tunc etiam locus est cōparatiuo, ut Achilles fuit fortior Troianis, itē Græci fuerunt Troianis fortiores. Quartò à pluribus ad unum per comparatiuum, ut nos sumus te doctiores. Quintò, ad plures eiusdem generis, & tunc utimur superlatiuis, ut Achilles fortissimus Græcorum, quamquam & similis comparatio fieri potest per cōparatiuum cū relatiuis diuersitatis, ut Achilles fuit fortior exteris Græcis. Præter hæc potest etiam fieri comparatio ad se ipsum, ut sum solito eloquentior, & ab una qualitate ad aliam ut sum magis industrius, quàm fortis, aut ab uno gradu ad aliū, ut loquacior quàm eloquentior.

Sed quæres, quenam dicantur esse eiusdem generis, aut diuersi? Respondeo, illa esse eiusdē generis, quibus unum nomen commune est, aut in quibus res comparata includitur in genitiuo siue ablatiuis comparationis. Vt Plato Philosophorum eloquentissi-

Liber quartus

mus : nomen Philosophi tam Platoni, quàm cæteris Philosophis cōmune est, item Plato in genitiuo Philosophorum inclusus est. Illa uerò sunt diuersi generis, quæ unum nomen commune non habent, & in quibus res comparata non est inclusa in genitiuo, siue ablatiuo comparationis: ut Achilles fortior Troianis, nam Troianorum nomen non est cōmune Achilli, neque Achilles in Troianis inclusus est.

De Superlatiuis.

In hac materia tria tantùm explicabuntur, quid sit nomen superlatiuum, quot modis construatur, & quæ differentia sit inter superlatiuum & comparatiuum. Nomen superlatiuum est, quod ad plures sui generis comparatum omnibus antefertur, uel per se prolatum significat quantum positiuum cum ualde. Examinemus huius finitionis partes. Quod ad plures sui generis comparatum. Nam per superlatiuum necessariò fieri debet comparatio ad plures sui generis: ut Achilles Græcorum fortissimus: nomen enim Græcorum commune est Achilli, & Græcis omnibus, item Achilles in genitiuo Græcorum cōprehensus est.

Si obijcias Vergilianum illud, Ingredere ò Teucrium atq; Italum fortissime ductor: ubi uidetur Vergilius comparationem fecisse inter res diuersi generis, cùm loquatur de Aenea Troiano. Respondeo genitiuos illos, Teucrium, & Italum, regi non à superlatiuo, sed à nomine uerbali ductor. Si iterum obijcias illud ex. 3. AENEID. de Celenò harpyia, Furiarum ego maxima pando. Item illud ex Sexto AENEID. de fa

me, Furiarū maxima iuxta accubat, ubi Celenon,
& famē furias uocat. Respondeo, Celenō & famem
fuisse quadammodo furias, cūm harpyiamore furiarū
omnia pollueret, atq; prophanaret, fames uerò infu-
rias homines agat. Si postremò obijcias illud Ma-
crobij in Saturnalibus, Age Serui omniū nō modò a
dolescentiū, qui tibi æquæui sunt, sed & senū quoq;
doctissime: ubi Seruiū adolefcētibus, & senibus cō-
parat. Respondeo non oportere, si genitiuus rectus
ex ui superlationis per suas partes explicetur, ut
partes illæ rei excedētī conueniāt, sed satis esse geni-
tiuū superlationis illi cōuenire. Quod in præfenti
authoritate cōtingit, nā Seruius sub genitiuo illo ge-
nerali omniū clausus est, nec necesse est, ut cōueniat
reliquis partibus, per quas genitiuus ille explicatur
Quod in hoc etiā exēplo licebit intueri, Homerus o-
mniū Poetarū doctissimus, tam Græcorum quā
Latinorum, quam comparationem nullus sanæ mē-
tis reprehēdet. Omnibus antefertur, nam cūm tres
sint gradus comparationis, positiuus, comparati-
uus, superlatiuus, non dubium quin superlatiuus
omnibus superponatur. Hoc intellige duabus legi-
bus seruatis. Estō prior, Dummodo comparatiuus
non postponatur superlatiuo, nam tunc compara-
tiuus plus significat, ut Aristoteles est doctissimus,
sed Plato doctior. Estō posterior. Dummodo no-
men superlatiuum à comparatiuo non regatur, ut
Plato fuit doctior Aristotele doctissimo, tunc e-
nim comparatiuus plus significat, quā super-
latiuus. Vel absolutè prolatum, Nam cūm super
lati

Liber quartus

latius capitur absolute, equipollet positivo & ualde: ut Cicero eloquentissimus, id est, ualde eloquens. Ceterum si capiatur comparate, equiualeat positivo maxime, & ex ut Achilles Græcorum fortissimus, id est, maxime fortis ex Græcis.

Quot modis construatur superlatiuus.

Superlatiuus quincupliciter consideratur. Absolute, ubi nullū regit casum, ut doctissimi uiri sic sentiunt. Positiue cum casum sui positini regit, ut Græmaticæ peritissimus Priscianus. Partitiue ut digitorū medius est longissimus. Vt autem superlatio partitiua sit, tria requiruntur, Vt comparatio fiat inter plura duobus, Vt fiat inter res eiusdem generis & naturæ, Vt sit conuenientia inter superlatiuum & genitiuum in genere: aliquando tamen huiusmodi concordia non seruatur, ut animalium uelocissimus lepus. Substantiue, quando ponitur in neutra terminatione: & tunc ex ui superlationis casum nō regit, sed genitiuum ex ui possessionis, ut frigidissimum hominis est cerebrum. Postremo in propria superlationis natura, & tūc tripliciter construitur. Cum genitiuo plurali sine relatiuo diuersitatis, ut Marcus Varro Romanorum doctissimus. Aut singulari, si nomen sit collectiuum, ut fortissimus gentis Danaum. Est autem nomen collectiuum, quod in singulari multitudinem aut plurium collectionem significat, qualia sunt, concio, turba, gens, populus, plebs, caterua, & similia. Huic genitiuo non licet addere pronomen suus: nam ex sententia Laurentij non dicitur Latine, Hæc est fortissima suarum sororum

rum, cūm hæc non sit sua soror, sed locutio fieri debet sine pronomine suus. Præterea construitur cū accusatiuo medijs præpositionibus, Inter, Ante, Super, ut Cicero inter omnes Oratores Romanos eloquētissimus. Hæc eadem oratio per alias præpositiones poterit uariari. Deinde cum ablatiuo medijs præpositionibus, E. De, Ex, ut, ex Græcis fortissimus Achilles. Poteſt etiam habere ablatiuū ex ui excessus, ut Achilles Græcorum fortissimus quadruplo.

Hæ sunt germanæ cōstructiones superlatiuorum quibus optimi authores quadrifariam sunt abusi. Vel cūm positiuorum formam induunt: quale illud Apuleianum de Deo Socratis, Nullū animal in terris homine postremius. Vel cūm ex dictionibus comparando minimè conuenientibus proficiſcuntur, ut ipsissimus, patruissimus, Plautinissimus. Vel cūm minus significant à suo comparatiuo, ut uiro fortissimo fortior sum. Vel cūm ad augendam propriā significationē aliquid extrinsecus aff. mūt, id quod haud sine maximo fieri uitio poteſt, proterea quod superlatiua suapte natura, cūm ultimum gradum significant, ultra quem progredi minimè liceat, nihil est, quod particulas illas intensiuas adiungamus. Cicero lib. 2. de Finibus, Id apprimè rectissimè dicitur, Columella lib. 9. Apis si seuior, maximè peſſima est.

Differentia comparatiui à superlatiuo.

Comparatiuus & superlatiuus sex modis differunt

Liber quartus

runt, terminatione, significatione, constructione, resolutione, modo comparandi, cōuersione. **TERMINATIONE**, Nā cōparatiuus terminatur in, Or & in, us: ut doctior & doctius. Superlatiuus uerò in simus, trimus, limus, ximus, tremus, & sic de alijs **SIGNIFICATIONE**. Nā superlatiuus plus significat quàm cōparatiuus, cū ea sit natura superlatiui, ut eò usq; ascendat, ut nullus progressioni locus fiat reliquus: comparatiuus uerò infra metas cōsistat. **CONSTRUCTIONE** Nā comparatiuus cum ablatiuo cōstruitur, superlatiuus uerò cum genitiuo: in reliquis constructionibus conueniunt: **RESOLUTIONE**, Nam si comparatiuus sit comparatus, resoluitur per positiuum & magis, ut doctior te, id est, magis doctus. Si sit absolutus, per positiuum tantum, ut doctior, id est, doctus. Excipitur senior, quod resoluitur per ualde & senex. Superlatiuus uerò comparatus per positiuum, maxime, & ex: ut eloquentissimus Oratorum, id est, maximè eloquens ex Oratoribus. Absolutus uerò per positiuum & ualde ut eloquentissimus, id est, ualde eloquens. **MODO COMPARANDI**, Nam per comparatiuum fit comparatio ad unum sui generis uel diuersi, & ad plures diuersi generis uel eiusdem, cum relatiuo tamen diuersitatis, per superlatiuum uerò tantum ad plures sui generis. **CONVERSIONE**, Nā omnis oratio quæ fit per superlatiuum, conueri potest per comparatiuum cum relatiuo diuersitatis: ut eloquentissimus Oratorum, eloquentior cæteris Oratoribus. At uerò
quæ

quæ sit per comparatiuum, conuerti non potest per superlatiuum: nam cùm sit comparatio ad unum siue sui generis, siue diuersi, item ad plures diuersi generis, oratio fieri non potest per superlatiuum.

De diminutiuis.

Diminutiuà à diminuendo dicta sunt, quòd sui principalis significationem attenuare siue minuire uideantur. Circa quæ quatuor potissimùm explicabo, quid sit nomen diminutiuum, quotuplex sit, quot de causis inuentum, postremò de diminutiuorum terminationibus differam.

Quid sit.

Nomen diminutiuum est, Quod sui principalis diminutionem significat absolutè. Per principale, intellige dictionem primitiuam à qua formatur, ut à soror, sororcula, à frater fraterculus. Dicitur absolutè, ad comparatiuorum differentiam: quia comparatiua aliquando minuunt uim primitiui, sed non absolutè, sed comparate, ut maiusculus, grandiusculus, meliusculus, plusculum.

Quotuplex sit.

Nomen diminutiuum duplex est, qualitatis, & quãtitatis. QUALITATIS, Quod qualitatem tantum minuit, ut delicatulus, candidulus, putidulus, & reliqua, quæ ab adiectiuis formantur. QUANTITATIS, Quod diminutionem facit quãtitatis, ut à liber libellus, à soror sororcula, ab ense ensicula, et quæ formantur à substantiuis. Distribuitur ad huc diminutiuum in proprium, & improprium. Ad proprium

Liber quartus

Et perfectū diminutiū tria necessaria sunt. Quod
sui principalis significationē cū diminutione seruet,
Quod formam, Quod genus Quod si significationē
seruauerit cum diminutione, non tamen genus, dimi
nutium erit, improprium tamen, ut puluisculum
à puluere, bacillum à baculo, conuenticulū à conuen
tu, terebellum à terebra, epistolū ab epistola. Quæ
uerò genus et formam seruant non tamen suorum
primitiuorum significatū cum imminutione, ea nec
propria, nec impropria diminutiua censenda sunt,
qualia sunt, auunculus, musculus, pediculus, acicula,
lenticula, et alia id genus, quæ omnia à suis primiti
uis in significatione degenerant.

Quot de causis inuentum.

Fuit autem diminutium quatuor de causis inuē
tum. NECESSITATIS, ut regulus, nō enim
est aliud nomen, quo cum magistratum explicare
possimus. ADVLATIONIS SIVE BLAN
DIMENTI, ut corculum, animula filiulus CON
TEMPTVS, ut homuncio, argutulus, nasutulus,
meretricula. EXTENVATIONIS, ut ingenio
lum, opella, munusculum.

De diminutiuorum terminationibus.

Diminutiua non habent certam rationē qua for
mari possint. exeunt tamen in uarias terminationes
quæ ad octo reducuntur.

In ulus, quæ partim substantiua sunt, partim ad
iectiua. Quæ substantiua sunt, partim sunt masculi
na, ut fraterculus, pisciculus uermiculus, partim fœ
minina, ut sororecula, uirguncula, securicula, partim

non

neutra, ut munusculum, corpusculum. Adiectiua ut anniculus uernaculus, ridiculus.

In, ellus, quæ formantur à nominibus secundæ declinationis siue substantiuus siue adiectiuus finitis in, er de substantiuus, ut à culter cultellus, à liber libellus, à puer puellus. de adiectiuus, ut a tener tenellus, à miser miscellus, à sacer sacellus.

In, illus, quatuor sunt substantiua ex sententia Laurentij duo masculina, palus, paxillus, talus taxillus duo foeminina, mala maxilla, ala axilla. His tu a Ide pugillus Sunt etiam adiectiua, ut à tantus tantillus, a paruus pusillus.

In, aster, diminutiua propriè non sunt, quia non diminutionem, sed imitationem potiùs significant, ut Philosophaster, qui Philosophum imitatur: Antonia ster, qui Antonium. Excipiuntur tria, quæ uera diminutiua sunt, surdaster, qui surdulis auribus est, recaluafter qui fronte caluus est, non toto capite, quasi recaluatulus: palliastrum rude ac uile pallium, qua dictione usus est Apuleius, Ecce Socratem cõtubernalem meum conspicio, sedebat scissili palliastro semiamictus.

In, io, ut à sene senecio, ab homine homuncio, à quo etiam nascuntur tria illa, homulus, homunculus, homululus neque id mirum, cum ab uno diminutiuo formari possint & plura alia, ut à parum paulum, à paulum paululum, à paululum pauxillum.

In, leus ut equus, equuleus. In olus, ut à Sergio Serg olus, à corona corolla, à pallio palliolum. In, iscus, ut à pan paniscus à Syro Syrisicus: sed hæc for

Liber quartus

ma est à nominibus Græcis.

De Relatiuis.

Suo ordine post diminutiva sequuntur relatiua, quæ à referendo, hoc est representando nomen acceperunt, quod rem antecedentem nobis representare soleant. De quibus primo loco explicabimus quidnam sint, mox ea in suas formas partiemur, deinde tam de relatiuis substantiæ, quam accidentis singulatim agemus.

Quid sit relatiuum.

Relatiuum est signum rei antecedentis representatiuum. Hoc est, quod rem ante dictam nostro representat intellectui, & ad præsentem eius memoriam nostros animos reuocat. Vnde colliges, relatiuum a re antecedenti pendere prorsus: nam quemadmodum imago in speculo ab eo pendet, cuius imago est, ita relatiuum à re quæ antecessit in oratione. Est autem illud potissimum relatiui munus, ut rem præteritam renouet, & quibusdam quasi nodis & articulis orationem sine fastidio constituat: ne si eadem nomina repetendo inculcaremus, oratio prorsus inconcinna atque inuenusta redderetur.

Quotuplex sit.

Est autem duplex relatiuum, substantiæ & accidentis: relatiuo accidentis in posteriorem locum reiecto, primum agamus de substantiæ relatiuo. Est igitur relatiuum substantiæ, quod antecedens representat substantiuum, ut Petrus disputat, qui loquitur: relatiuum qui, Petrum refert. Hec autem in du is

adhu c

adhuc formas distribuitur, in relatiuum scilicet substantiæ identitatis siue similitudinis, & diuersitatis. Relatiuum substantiæ similitudinis est, quod antecedens repræsentat substantiuum, & pro eodem in oratione accipitur. Vt in superiori exemplo, Petrus disputat, qui loquitur: qui relatiuum est substantiæ identitatis: primum, quia reddit antecedens substantiuum: deinde, quia pro eodem, quod refert, accipitur. Huius autem generis septem sunt, qui quæ quod, sui, suus, ipse, ille, is, idem. Relatiuum substantiæ diuersitatis est, quod rem diuersam ab antecedenti significat, non genere, aut specie, sed numero, ut uoluo Vergilium, & alios poetas: quo exemplo significo Vergilium Poetam esse, sed diuersum à reliquis Poetis numero tantum. Huius generis quatuor tantum sunt, alius, alter, reliquus, cætera, cæterum. Relatiuum accidentis est, quod refert antecedens adiectiuum, ut ego sum humanus, qualis fuit pater. Huius generis sunt undecim, qualis, quantus, quot, quotus, quotennis, quotennarius, quoteni, quotuplus, quotuplex, cuius, cujus. Disputemus igitur primum de relatiuis substantiæ similitudinis, deinde de relatiuis substantiæ diuersitatis, postremò de relatiuis accidentis.

De relatiuis substantiæ
similitudinis.

Inter hæc relatiua primū locum tenet quis: quod irregulare est, cum certæ cuiusdam non sit declinationis. Sortitur autem in recto quinque uoces;

O 4 quis,

Liber quartus.

quis, qui, quæ, quod, quid : de quibus pauca quædam quo propositæ sunt ordine dicemus. Quis, masculini est generis, olim tamen fœminini etiam erat pro, quæ. Plautus in Aulularia, Dic mihi si audes, quis ea est, quam uis ducere uxorem? Capitur interrogatiue, & infinite, nunquam relative. Cicero de Amicitia, Quis clarior in Græcia Themistocle? quis potentior? Plinius Iunior, Tum mihi nescio quis in aurem insusurravit. Capitur etiã admiratiuè. Vergilius. 4. AENEID. Quis nouus hic nostris successit sedibus hospes? Præter hæc capitur pro qualis: tum in oratione interrogatiua, ut dic mihi quis tibi uideor? id est, qualis. Tum in oratione infinita, ut nescio quis tibi uidear, id est, qualis. Differt ab uter, nam uter de duobus dicitur, & comparatiuo iungitur: quis de pluribus, & adheret superlatiuo. Quod Quintilianus libro septimo hisce uerbis docet, Ex duobus uter dignior, ex pluribus quis dignissimus. Differt etiam à quis, quando est uox datiuī siue ablatiuī pluralis, nam in nominatiuo uox illa breuis est, in datiuo longa: item in nominatiuo nunquã relative capitur, in datiuo nihil obstat quominus capiatur relative. Vt da operã uirtutibus, quis inest plurimum lucis & ornamenti.

Qui, capitur relative: ut uideo hominem, qui mihi fuit semper singulare perfugium. Interrogatiuè, Teren. in Phor. Nã qui erit rumor populi si id feceris? Infinite, nescio qui sis. Capitur pro qualis, Cicero. in Antoniũ, Qui uir & quantus fuisses, id est, qualis. Efficitur aliquando aduerbium pro unde aut quomodo

quomodo. Terentius in Andria, Qui scis, id est unde. Horatius in Sermonibus, Qui sit Mecœnas, id est quomodo. Est aliquando ablatiuus omnis generis, Cicero in Familiaribus, Nemo est omnium, qui cum potius mihi, quam tecum communicandum putem. Vergil. lib. 11. de Camilla, Qui cum partiri curas, id est, cum qua.

Quæ, capitur relatiuè: ut mulierem uideo, quæ est honesto uultu, & facie liberali. Interrogatiuè, quæ mulier est hæc? Infinite, nescio quæ mulier illa sit. Capitur pro quantus, quæ humanitas in eo elucet, id est, quanta. Idq; solet contingere non tantum in recto, sed in genitiuo, ut cuius humanitatis, id est, quanta. Item in ablatiuo, ut qua humanitate, id est quanta.

Quod tripliciter capitur. Relatiuè, ut consilium quod cepisti, non parum attulit tibi utilitatis. Interrogatiuè, quod consiliū cepisti? Infinite, nescio quod consilium capiam. Differt à quid dupliciter. Tum quia quod, est adiectiuum: quid uerò substantiuum, atq; ita genitiuum regit, ut quid consilij capiā prorsus ignoro. Tum etiam, quia quid nunquam capitur relatiuè, sed aut interrogatiuè, ut quid faciam? aut infinite, ut nescio quid faciam. Fit etiam aduerbiū pro cur, ut quid taces? id est, cur. Quæadmodū & quod, si in compendium redigatur, aut uirgula quadam supernotetur, efficitur coniunctio. aut declaratiua cū subiunctiuo, ut opinor quod uirtutis studium sequaris: aut causalis cum indicatiuo, aut subiunctiuo, ut gaudeo quod scribis, aut scribas.

Liber quartus

Quæ hæftenus diximus, puerilia sunt, si cum ijs
quæ supersunt dicenda comparentur, quæ & multò
utiliora, & gratiora uestris animis erunt. Triplicē
scilicet esse in nomine relatiuo referendi rationem.
Aut enim refert certum aliquod antecedens, nomen
uidelicet aut pronomen: & tunc cum eo in genere
& numero ita conuenit, ut idem prorsus in utroq;
appareat & genus, & numerus, ceu dominus qui,
uirtus quæ, mancipium quod: cuiusmodi exemplorū
referta sunt omnia. Aut non unū aliquod uel nomē,
uel pronomen, sed totam aliquam clausulam antece-
dentem refert, & tunc in neutro genere ponitur re-
latiuū, quoniam substantiuum est, semperq; resolu-
tur per hoc nomen res. Cice. ad Lentulū, uidebatur
enim reconciliata nobis uoluntas Senatus esse, quod
tum dicendo, tum singulis appellandis perspexeram:
quod, id est, quā rem. Idem prorsus iudicium est, cum
plures clausulas refert. Plinius Iunior lib. 1. Episto-
larū. Est Aciliano facies liberalis, multo sanguine,
multo rubore suffusa, est ingenua totius corporis
pulchritudo, & quidam Senatorius decor, quæ ego
nequaquam arbitror negligenda: quæ, id est, quas
res. Tertius postremò referendi modus est interpre-
tatiuus, cum suum antecedens exponit: in quo rela-
tiuū alicui nomini subsequenti iunctū sit necesse est,
quicum & genere & numero & casu semper con-
ueniat. Cicero ad Atticum lib. 5. Inde ad Amanū con-
tendi, qui mons erat hostium plenus sempiterno-
rum. Idem ad Lentulum, Aulus Trebonius confidit
his meis literis se apud te gratiosum fore, quæ spes
ne cum

ne eum fallat, uehementer te rogo. De concordia siue discordia relatiui cum antecedenti, nihil loquimur presenti loco, quoniam peculiari tractatu de ea re copiosius erit sermo.

De Reciprocatione sui, & suus.

Quoniam sui & suus (quorum alterum primitiuum est, alterum deriuatiuum) pronomina sunt reciproca, ideò locus hic uidetur postulare, ut pauca quædam de reciprocatione dicamus: quoniam uideo uiros nò uulgariter eruditos nimium hac in parte fuisse hallucinatos. Est igitur reciprocatio, eius quod exierat, in seipsum receptio. Quæ fieri solet, cum his duobus pronominiibus sui, & suus utimur: ut unusquisq; amat se, unusquisq; res suas amat. Dicta est reciprocatio, quia sicut reciprocatur spiritus, cum recipitur, & unda uicissim alluens littus, & Euripus ad pristinum subinde cursum rediens, reciprocus est: ita hæc pronomina, ad id unde prodierant, reuocantur.

Quotuplex sit Reciprocatio.

Tres sunt formæ reciprocationis, iuxta sententiam Prisciani. Prima, quæ proprio uocabulo reciprocatio appellatur, Quando pronomén primitiuum sui in seipsum reflectitur, ut unusquisque amat se. Secunda, quæ transitio dicitur, Quando fit transitus à possessore in possessionem, ut unusquisque amat res suas. Tertia retransitio, Quando accedente altero uerbo, à possessore in aliam personam fit transitus, & ab illa ad possessorem, si utamur primitiuo: aut ad possessionem, si deriuatiuo.

Sic

Liber quartus

Sit prioris exemplum, instigat me ille, ut sui potiar: hic fit transitus a possessore in aliam personam, & ab ea ad eundem possessorem, quia utimur primitiuo. Sit posterioris exemplum, rogat me ille, ut suus seruus mihi ministret hic factus est transitus a possessore in alteram personam, & deinde ad seruam rem possessam, quia utimur deriuatiuo.

Quando utendum sit reciproco, quando non.

His præmissis, doceamus iam quando utendum sit reciproco, quando non. nam hac una in re est tota argumenti suscepti difficultas. Distinguemus oportet, nam aut relatiuum poni debet in simplici aliqua oratione aut in duabus. Si in simplici, aut in ea est unicum tantum appositum, aut plura. Si unicum, & ad suppositum referatur, reciproci usus necessarius est: ut Cato amat se, se ad Catonem refertur, ac propterea reciproco utimur. Si fuerint plura apposita aut relatiuum refertur ad suppositum, aut ad alterum ex duobus appositis. Si ad suppositum, siue intercedat coniunctio, siue non, utemur perpetuò reciproco. De cōiunctione media sit exemplum, mater tenerimè amat filios & filias suas: nō eius, aut ipsius. De sublata coniunctione sit exemplum, tuctur hominem Deus propter bonitatem suam, non eius, aut ipsius. Si uerò referatur ad alterum ex duobus appositis & interueniat coniunctio, nunquam utemur reciproco, nisi intercesserit nomen adiectiuum, aut participium, ut cepi leonem, & eius catulos, non suos. Dixi nisi intercesserit nomen adiectiuum, aut participium quia si fortè interuenerit, tunc utemur reciproco,

reciproco. ut accepti ab eo epistolam, ceu obsidem sui erga me amoris. Item Christicola accepimus à Deo immensa beneficia et filium ad suam imaginem genitum. Si uerò referatur ad alterum oppositum, & non intercedat coniunctio, tunc utemur reciproco, uel non, sine discrimine. Vt amo Deum propter suam bonitatem, uel eius: cepi columbam cum pullis suis, uel eius. Patitur etiam suam exceptionem, quando interuenit pronomen demonstratiuum, aut nomē adiectiuum, aut participium, tunc enim utuntur Latini reciproco. De pronomine, ut si uiso amico dixeris, Reduca illum in domum suam, non eius, aut ipsius. De adiectiuo, uidi columbā tristem in periculo pulloꝝ suorum. De participio, uideo agricolam ferentem agrum suum.

Si in oratione fuerit præpositio Inter, & nominatiuus uel accusatiuus præcesserit utemur semper reciproco. Vt Grammatici quindenis diebus in frequenti Theatro certant inter se. Item, uideo Grammaticos inter se certare. Cum uerò antecedit genitiuus, datiuus uel ablatiuus, per pronomen ipse potius loquimur. De genitiuo, Cicero primo Officiorum, Latissimè patet ea ratio, qua societas hominū inter ipsos continetur. De datiuo, Idem paulò post, Latissimè patens hominibus inter ipsos societas hæc est. De ablatiuo, Quintilianus lib. 10. In magnis quoque authoribus incidunt aliqua uitiosa. & à doctis etiam inter ipsos mutuò reprehensa. Aliquando authores per pronomen sui, locuti sunt, Terent. in Adelphis, Vetus uerbum est, communia esse amicorū
inter

Liber quartus.

inter se omnia, Cicero. i. Officiorum, Multa sunt
cuius inter se communia.

Si uerò duæ sint orationes, & appositum poste-
rioris referatur ad suppositum prioris, utemur sem-
per reciproco: ut amicus importunis precibus po-
stulauit, ut ad se irem, non ad ipsum. Cæterum si re-
feratur ad appositum, non utemur reciproco: ut ami-
cus in fidē meā filiā tradidit, ut eā marito collocare,
non se. Hæc satis sint de reciprocatione. Illud tamē
non te fugiat, pronomē suus aliquando capi pro pro-
prio, & tunc reciprocum non esse: & propterea
licere sic loqui, sua est illius natura, suum est illius
ingenium, suus seruus est illi turpiter conuiciatus,
sua quæq; capit uoluptas. Quomodo loqui non lice-
ret, si reciprocè caperetur, nunquam enim recipro-
cum pronomen antecedenti adheret. Quo circa qui
sic loqueretur, suū filium pater suus amat, suū ser-
uum dominus suus loris cedit, ineptè satis & barba-
rè loqueretur: sed sine reciproco in principio, filiū
pater suus amat, seruū dominus suus loris cedit.

Ipsc.

Ipsc pronomen est, quod ad omnes personas re-
fertur: ipse feci, ipse fecisti, ipse fecit. Vnde prono-
minibus omnium personarū iungi solet, ego ipse, tu
ipse, ille ipse, idem ipse, hic ipse. Præterea Empha-
sim habet, id est, expressionem alicuius rei latentis.
Teren. in Adelphis, Ipsa si cupiat salus, seruare
prorsus non potest hanc familiam. Capitur relatiuè,
Idē eadem Comœdia, Iste tuus, ipse sentiet poste-
rius. Interrogatiuè, est ne ipse, qui fecit? Infinitè,
nescio

nescio an ipse fuerit. Itē demonstratiuē, ipse est de quo erat sermo. Ille.

Ille, capitur relatiuē: nūtius rem affirmavit, & ille plane mētitus est. Interrogatiuē, estne ille? In finitē, ignoro an ille fuerit huius author facinoris Demonstratiuē: ille est tāti mali seminariū. Habet etiā Emphasim, ut diuinus ille Plato, Architas ille Taretinus. Differt ab hic, nā si diuersa referāt antecēdētia, hic rē magis propinquā refert, ille magis remotā: ut Plato & Homerus sapientissimi fuerūt, hic in poesi, ille uerō in Philosophia. Interdū tamen excellentissimi illi Latinitatis procures his pro nomini bus cōtrario modo usi sunt, ita ut hic, ad id quod priori loco positū est, referatur: ille, ad id quod posteriorē tenet locū. Titus Liuius lib. 30. Melior tutiorq; est certa pax, quā sperata uictoria, hęc in tua, illa in Deorū manu est: hęc ad pacē refertur, illa ad uictoriā. Plini⁹ Iunior lib. 1. Epistolarū, Alius excessisse materiā, alius dicitur non implexisse, sed ille imbecillitate, hic uiribus peccat, hic refertur ad prius periodi membrum, ille ad posterius.

Is, Idem.

Is & idem relatiua etiam sunt, quemadmodum superiora: ut accepit per hereditatem grandem pecunia summam, & eam siue eandem paucis diebus dilapidauit. Differunt inter se, teste Laurentio lib. 2. Elegantiarum. cap. 5. Nā is desiderat coniunctionē, ut quācunq; in sedem migrat apum Rex, in eam & apes ipsae comitantur. Idem habet in se uim quandam copulandi, ac proterea non indiget coniunctio

Liber quartus

iunctione, ut in proposito exemplo, quancunq; in se dem migrat apum Rex, in eandem apes ipsæ comitantur.

De Relatiuis substantiæ diuersitatis.

Relatiua substantiæ diuersitatis quatuor sunt, alius, alter, reliquus, cætera cæterum: quibus additur à quibusdam residuus. Horum ea est natura, ut genere, numero, & casu cum subsequente semper cōueniant, pro quo accipiuntur: deinde ut antecedens referant eiusdem generis, uel speciei cum subsequēte illudq; sub se comprehendant necesse est. Vt expertes rationis equi, boues, & reliquæ pecudes: ubi equi & boues inter pecudes referuntur. At uerò si sic loquereris, expertes rationis equi, boues, & reliquæ aues: falsa esset oratio, cū equi, & boues inter aues non referantur. In his enim relatiuis diuersitatis, præter orationis congruitatem, necessaria etiam ueritas est.

Alter, Alius.

Alter & alius differunt. Nam alter ad unum de duobus refertur, ut amisit alterum oculum: alius ad unū de pluribus, ut milites interfecti sunt, alius sagitta, alius ense, alius hasta. Aliquādo geminatur alter in diuerso casu, ut alter alterū contēnit, alter alterū accusat: nō ambo ambos cōtēnunt, aut accusant. Ali⁹ capitur etiā pro diuersus, ut alia est facies mea alia est facies tua, id est, diuersa. Vnde nascuntur & uerbia illa, aliās, aliter, aliōqui, aliā, aliō.

Reliquus.

Reliquus, præter uulgatam significationem capitur

tur pro superest, siue relinquo. Vt quando tam ar-
cta familiaritate coniuncti sumus, reliquum est, ut
officijs certemus inter nos: id est, superest. Itē spem
reliquam nullam uideo salutis, id est, relictam: nihil
reliqui fecit fortuna, id est, nihil reliquit.

Cætera, Cæterum.

Cæter in masculina terminatione, aut cæterus
nō reperitur: quanuis Marcus Cato in Re rustica
dixerit cæterus ornatus. Infœminina tamen & neu-
tra huius uocis frequēs usus est apud authores: in
de cæterum, cæterò, de cætero, cæterò qui, aduersan-
tes particule. Cicero ad Atticū lib. 14. O loca cate-
rò qui ualde expetenda, interpellantium autē multi-
tudine penè fugiēda. Itē lib. 1. de natura Deorū, Nō
enim Poeta suauis, uerū etiam cætero qui doctus sa-
piēsque traditur. Reliquæ particule uulgatissimæ sunt

De relatiuis accidentis.

Vndecim diximus esse relatiua accidētis quæ an-
tecedens habent adiectiuum: inter quæ primas tenet
qualis, quod tripliciter sumitur. Relatiuè, ut talis
populus, qualis princeps. Interrogatiuè, ut qualis
est istorum oratio? Infinite, ut nescio quali utar ui-
ctu ad salutem. Habet antecedentia, talis: & nomi-
na adiectiua qualitatē significantia, qualia sunt, bo-
nus, malus, sapiens, ignorans, candidus, niger, cle-
mens, pius, humanus, & similia: ut hic est humanus,
quales parentes eius fuerunt. Per hæc eadē nomi-
na respondemus ad interrogationem factam per
qualis, ut qualis esse debet probi hominis oratio? ue-
recunda, honesta, pudica. Geminatur aliquādo qua

P lis qua

Libert quartus

lis qualis, pro qualiscunque: ut qualis qualis sum, in tuo ære totus sum. Capitur pro quātus Macrobius li. i. Saturnaliorum, Parvulus. quale Aegyptij proferunt. Hinc deducitur adverbium qualiter quod tribus etiam modis usurpatur: & huius antecedentia sunt, taliter, & adverbia qualitatem significantia, ut bene, male, doctè, sapienter, urbanè, per quæ etiā ad huius adverbij interrogationem responsemus. ut qualiter uales? malè.

Quantus

Tripliciter sumitur quantus. Relatiuè, ut tantus est pater tuus, quantus Pygmæus. Interrogatiuè quātus est pater tuus? Infinitè, nescio quantus sit pater tuus. Habet antecedentia, tantus, & adiectiua quantitatem significantia, qualia sunt, magnus, parvus, brevis, longus, latus, angustus, grandis & similia: ut lōga est oratio mea, quanta tua. Per hæc eadē nomina respondemus ad huius nominis interrogationē, ut quanta est domus tua? magna, aut parua. Solet geminari quantus quantus, pro quātuscunq; ut quātus quātus es, nihil nisi sapientia es. Capitur pro quot. Claudianus de raptu Proserpinæ lib. 2. Quātes truculentior auster decutit arboribus frondes, id est, quot frondes, siue folia.

Quot.

Quot numerum tantum habet pluralem, & est indeclinabile, referturq; ad numerum. Capitur Relatiuè, ut habeo decem fratres, quot tu non habes. Interrogatiuè, ut quot habitatores incolunt domum hanc? Infinitè, nescio quot habitatores incolunt. Ha-

bet

Habet antecedentia, tot: & nomina numeralia cardinalia, qualia sunt, unus, duo, tres, quatuor, uiginti, centum, mille, & similia, ut tercentum millia militum desiderata sunt in prælio, quot nunquam occubuisse dicuntur. Per hæc eadem nomina respondemus ad huius interrogationem, ut quot milites perierunt in prælio? Vnus tantum, duo, aut tres, & sic de reliquis. Geminatur quotquot pro quocumque, ut gratum me his omnibus præstabo, quotquot me affecerint beneficio. Hinc proficiscitur aduerbiū quoties, quod tribus etiam modis capitur. Habet antecedentia toties, & aduerbia numeralia à numeralibus cardinalibus deriuata, semel, bis, ter, quater, quinquies, uicies: ut uicies sedi in sella theatroali dicturus, quoties nemo alius. Per hæc eadem aduerbia respondemus ad huius aduerbiij interrogationem, ut quoties orationem in Theatro Complutensi habuisti? uicies.

Quotus.

Quotus relatiuè capitur, ut Rector sedet primus in Theatro, quotus nemo alius. Interrogatiuè, ut quotus sedes in mensa? Infinitè, ut nescio quotus sedi in conuiuium. Habet antecedentia nomina numeralia ordinem significantia, qualia sunt primus, secundus, tertius, uigesimus, tricesimus: ut sedeo primus in Ecclesia, quotus tu non sedes. Per hæc eadem nomina respondebimus, quoties per quotus fuerimus interrogati: ut quotus sedet Cancellarius in Theatro? secundus post Rectorem. Capitur pro quot, habetque eius redditua, ut quotus uis cœnare? id est, quot? tres aut quatuor.

Liber quartus

Hoc idem nomen iunctum cum quisq; numerum de notat. & capitur interrogatiue, respondemusq; per hæc nomina, nullus, paucus, rarus, ut quotusquisq; inuenietur tanta uirtute uir? nullus, aut pauci.

Quotennis,

Sumitur quotēnis Relatiue, ut triennis est fraterculus meus, quotennis tuus non est. Interrogatiue, quotennis est frater tuus? infinite, nescio quotennis sit frater tuus. Quarit de numero annorum, habetq; pro antecedentibus adiectiua annorum in ennis, qualia sunt biennis, triennis, quadriennis, uicennis, tricennis, ut pater meus tricennis est, quotennis tuus non est. Numeralia cardinalia cum genitiuo annorum, ut pater meus est triginta annorum, quotennis tuus non est. Item adiectiua in imus, ut bimus, trimus, quadrimus, siue bimulus, trimulus, quadrimulus, ut hic puer est quadrimus siue quadrimulus, quotēnis sororcula mea nō est. Per hæc eadē nomina responsum dabimus, quoties quis per hoc nomen interrogauerit, ut quotēnis est soror tua? Biennis, duorum annorum, bima siue bimula.

Quotennarius.

Eisdem modis usurpatur quotēnarius quibus & quotennis. Habet antecedentia numeralia finita in, arius, qualia sunt, uicennarius, tricennarius, quinquagenarius, sexagenarius, centenarius, quæ significat multiplicationem earum rerum quæ non nominantur, ut lapis cētenarius, nō quod sit cētuplus, sed cētum librarū, sic homo cētenarius, nō quod sit cētum geminus, sed cētū annorū. Probemus igitur exēplis
quo

quotennarius ea numeralia in, arius, referre: ut *annus meus centenarius est, quotennarius tuus nō est.* Per hæc eadem nomina respondemus ad quotennarij interrogationem, ut *quotennarius est annus tuus? nonagenarius.*

Quoteni.

Quoteni uox est inuentu rara, ea tamen usus est Cicero ad Atticum lib. 12. Nescio quotenorum iugerum. Item Columella lib. 6 Quotena semina iugerum. Capitur Relatiuē, ut *Monachi ambulant bini, quoteni non presbyteri.* Interrogatiuē, ut *quoteni ambulant Monachi? Infinitē nescio quoteni ambulent Monachi.* Refert numeralia distributiuā, qualia sunt *bini, terni, quaterni, deni, per quæ nomina respondebimus ad quoteni interrogationem: ut quoteni ambulant fratres? bini: quotenas literas accepisti? ternas.*

Quotuplus.

Capitur quotuplus relatiuē, ut *habeo duplam portionem, quotupla tibi non obtigit.* Interrogatiuē, *quotuplam es sortitus portionē? Infinitē, nescio quotuplam fueris portionē sortitus.* Refert numeralia multiplicatiua finita in, plus, quæ significant multiplicationem earum rerum quæ nominantur: qualia sunt, *duplus, triplus, quadruplus, centuplus.* Per hæc eadem nomina respondemus ad quotupli-interrogationem: ut *quotuplum accipiet, qui egenti bus suas facultates distribuerit? centuplum:*

Quotuplex.

Eisdem modis capitur quotuplex, quibus quotuplus.

Liber quartus

plus Quærit de diuersitate, refert adiecliuâ finita implex, deducta à nominibus numeralibus, qualia sunt, duplex, triplex, quadruplex, quincuplex, sexcuplex, quæ significant diuersitatem partium siue materia: ut habeo uestem duplicem, quotuplicem tu non habes. Per hæc eadem nomina respondemus ad interrogationem quotuplicis, ut quotuplices sunt orationis partes? octuplices. Inde quotupliciter, cui respondent aduerbia illa, dupliciter, tripliciter, quadrupliciter.

Cuius

Hoc nomen cuius, anomalum est, cum tantum reperiatur in nominatiuo, accusatiuo, ablatiue. singulis, & in accusatiuo plurali. Nascitur à genitiuo cuius, & eius significationem habet in omnibus casibus. Capitur Relatiue, ut hoc prædium est paternum cuius est? & pecus. Interrogatiue, cuius est pecus? Infinite, nescio cuius sit pecus. Habet antecedentia nomina siue pronomina possessiua, ut hoc pecus est meum, siue paternum, cuius domus non est. Item substantiua siue propria, siue appellatiua in genitiuo posita: ut hoc prius est Petri, siue patris, cuius non est domus. Per hæc eadem nomina siue pronomina respondebimus ad cuius nominis interrogationem, ut cuius est pecus? meum, paternum, patris, Petri.

Cuias.

Nascitur etiam cuias à genitiuo cuius, inflectebatur olim cuiatis & cuiate. Capitur Relatiue, ut ego Tolitanus sum, cuias tu non es. Interrogatiue cuias es? Infinite, nescio cuias sis. Refert nostras, uestras:

stras: & nomina gentilitia patriam, nationem, seu professionem significantia, per quæ ad cuius interrogationem respondemus: ut cuius es? patria Toletanus, natione Hispanus, professione Grammaticus.

Actum est de relatiuis accidentis, quæ dicuntur identitatis siue similitudinis, quia rem antecedenti similem significant. Ac proterea eorum loco ponere possumus aduerbia similitudinis: item has duas particulas eiusmodi, istiusmodi. Vt Orator est facundus sicut Cicero: eiusmodi, siue istiusmodi est Cicero. Sunt & alia diuersitatis quæ re diuersam ab antecedenti important. Sunt autem duo, alteriusmodi, aliusmodi: ut pater honestatis est studiosus, aliusmodi est filius: mater uerecunda est alteriusmodi est filia.

De Patronymicis.

Post relatiua occurrunt patronymica: quæ à patre patròs, quod patrem significat, & ónoma, quod nomen, deducuntur: quia propriè à nominibus patrum trahuntur. Explicemus breuiter, quidnam sit patronymicum, quot sortiatur terminationes, quo pacto formetur.

Quid sit Patronymicum.

Patronymicum nomen est, quod à patre deriuatum significat filium uel filiam, nepotem uel neptem, uel aliquem ex posteris. Dixi, quod à patre deriuatum: quia frequentius à nominibus patrū promanat, ut à Priamo Priamides Hector filius Priami. Aliquando ab auis paternis, ut AEacides, Achilles, nepos AEaci fuit enim AEacus pater Pelei patris Achillis. Aliquando ab auis maternis, ut Atlantiades, Mercurius

Libert quartus.

nepos Atlantis: Maia enim Mercurij mater Atlantis fuit filia. Aliquando à matre, ut Iliades, Romulus filius Iliæ. Interdū à filijs, ut Meleagris, Althea mater Meleagri. Interdum à fratribus. ut Phaëton tiades, sorores Phaëtonis. Postremò à regibus sine urbium conditoribus, ut Cecropides, Athenienses à Cecrope Rege: Romulidæ, Romani à Romulo primo urbis Romæ fundatore.

Quot terminationes sortiatur.

Patronymica à nominibus tantum Græcis formantur, neque enim à Latinis proficisci solent, nisi Poëta metricis legibus adaucti ea cogantur formare: nam eorum usus nullus est apud Oratores. Habent quatuor terminationes, quas à Græcis Latini mutuati sunt. Des, ut Priamides, Aeneades, quæ masculina sunt, & primæ declinationis. As, ut Ilias, Pelias. Is, ut OEolis, Theseis, quæ fœminina sunt, & tertiæ declinationis. Sunt alia in Ne, ut Nerine, Adrastine, quæ etiam fœminina sunt, & per primam declinationem inflectuntur ut Penelope.

Quo pacto formetur.

Nomina patronymica à nominibus primæ declinationis formantur à genitiuo, & finali mutata in, des: ut ab AEnex, Aeneades. A nominibus secundæ, si genitiuus finiatur in, i, simplici, formantur ab eodẽ addita, des: ut ab AEaci AEacides. Si in, ij, duplici, posteriori uertitur in, a, & additur deinde, des: ut à Menecij, Meneciades. Si in, ei, cõtractum, ab eodẽ, addita des: ut Peleus Pelei uel Pelei, Peleides. Si à nominibus tertiæ, à datiuo, addita, des: ut à Nestori Nestorides.

De ad

De aduerbijs Localibus.

Postremum locum occuparūt aduerbia localia, quæ ideò localia dicta sunt, quòd locum significant, in omniq; locorum differentia explicanda tota eorum uersetur natura, Exponamus igitur quidnam sit aduerbium locale, deinde omnes eius differentias percurramus.

Quid sit aduerbium Locale.

Aduerbium locale est, Quod aliquam loci differentiam importat. Sunt autem sex aduerbia locorum interrogatiua, quibus omnem loci differentiam interrogando comprehendimus, ubi, quo, unde quā, quorsum, quousque. Si de loco in quo quærendum sit, utimur aduerbio, ubi, siue ab eo composito, ubinam: ut ubi siue ubinam est Antonius? Si uerò de loco ad quē utimur quò, ut quò p̄ficisceris? Si autē de loco à quo, huic muneri præstando deseruiet, unde, ut unde uenis? Si de loco per quem, id præstabit aduerbium, quā, ut, quā iturus es? Si de loco quem uersus, id supplebit, quorsum, ut quorsum tendis? Si de loco quem usque, id efficiet quousque, ut quousque iturus es? Has duas postremas locorum differentias Nebrissensis numerauit inter aduerbia significantia locum ad quē. De singulis igitur aduerbijs, eo ordine, quo proposita sunt, differamus.

De Vbi, siue Ubinam.

Vbi & ubinam quærunt de loco in quo, & capiuntur tribus modis. Relatiuè, ut ego totam Italiam peragraui, ubi tu nunquam pedem posuisti. Interrogatiuè, ut ubinam fecisti Latinitatis tyrocinium? In

Liber quartus

sine uideamus, nos tamen de usu, non de abusu loquimur. Cicero ad atticum lib. 16. Malo cum timore domi esse, quam sine timore Athenis tuis. Liuius lib. 29. Scipio Syracusas nondum tranquillas uenit. Idē Cicero in Philippicis, profectus ad mutinam est. Idē in familiaribus. Cum ab Athenis proficisci in animo haberem: & alia sexcenta sunt exempla, quæ breuitatis causa prætermitto. Si uerò per aduerbia uelis respondere, uteris his, hic, isthic, illic, sicubi, necubi, alicubi, & similibus.

De Quò.

Quò querit de loco ad quem. Capitur relatiuè, ut nullus est orbis angulus tam reconditus, quò huius fama non peruenerit. Interrogatiuè, quò proficisceris? Infinite, quò proficiscaris nescio. Ad interrogationem per quò, aut respondemus per nomina, aut per aduerbia: si per nomina, aut propria, aut appellatiua. Si propria sint, cuiuscunque fuerint declinationis & numeri, ponuntur in accusatiuo absq; præpositione: ut si quis roget: quò proficisceris? Respōdebis, Complutum, Salmanticam, Romam, Burgos, Athenas. Si sint uirorum propria, locantur in accusatiuo cum, ad, ut ad Petrum, ad Ioannem.

Si sint appellatiua, aut propria regionum siue prouinciarum, ponuntur in accusatiuo cum præpositione, In, uel, Ad ut ad ciuitatem, ad agrum, in syluam, in Galliam. Excipiuntur duo appellatiua, rus, & domus: quæ normam priorum sequuntur, & in accusatiuo collocantur sine præpositione: ut eorū, domum. Nec te perturbet, si uideris aliquando præposi-

præpositiones appositae esse nominibus proprijs, ut in eo Ciceronis in Verrinis, Hodie Verres ad Messanam uenturus erat. Item in illo Cæsaris in. 6. de bello Gallico, Cōsiliū in Lutetiam Parisiorum transfert. Nos enim de his præcepta tradimus, quæ sunt ab authoribus frequentius usitata, Si uerò respondeas per aduerbia, respōdebis per ea quæ significant locum ad quem, qualia sunt, Huc, isthuc, illuc, si quò, nequò.

De Vnde.

Vnde significat locū à quo, Capitur Relatiuè, ut ab urbe ueni tribus horis, unde tu eodem temporis spatio nunquam uenire potuisti. Interrogatiuè, unde uenis? Infinite, nescio unde uenias. Ad interrogationem per unde, aut respondemus per nomina, aut per aduerbia, si per nomina, aut propria, aut appellatiua. Si sint propria, ponuntur in ablatiuo sine præpositione, cuiuscunque fuerint declinationis, et numeri, ut unde uenis? Toletō, Salmatica, Burgis, Parisijs. Quòd si sint propria uirorum, ponuntur in ablatiuo cum, à, ut unde uenis? à Petro, id est, à domo Petri.

Si uerò respondeamus per appellatiua, aut propria prouinciarum, ea ponemus in ablatiuo, interiectis his præpositionibus, à, ab, è, ex, de. Ut à Tyberi, ab Olympo, e prædio, ex Italia, de urbe. Excipiuntur duo appellatiua, rus, domus, quæ in ablatiuo sine præpositione ponuntur more priorum, ut rure, domo. Si per aduerbia respondere placeat, respondebis per ea quæ significant locū à quo, qualia sunt, hinc,

Liber quartus

*hinc, isthinc, illinc, alicunde, necunde, sicundè, & si
milia.*

De Quà.

Qui querit de loco per quem. Capitur Relatiuè
ut ego hac profectus sum, quà tu nō. Interrogatiuè,
quà iturus es? In finite, nescio quā sis iturus. Ad inter
rogationē per quā, aut respōdemus per nomina, aut
per aduerbia: si per nomina, ut per propria, aut
per appellatiua. Si per propria, cuiuscunq; sint de
clinationis & numeris loquemur per ablatiuum, ut
Roma, Toletō, Burgis, Parisijs. Si per appellati
ua, aut propria prouinciarum, per accusatiuum, cū
Per: ut per forum, per Galliā, per Germaniam.
Excipiuntur rus, domus, quæ in ablatiuo ponūtur
more priorū. Si per aduerbia per ea respōdebis
quæ significant locum per quem, qualia sunt, hac,
isthac, illac, siquā, nequā, rectā.

De Quorsum.

Quorsum querit de loco, quem uersus. Capitur
Relatiuè, ut tendo Complutum uersus, quorsum tu
non tendis. Interrogatiuè, quorsum tendis? In finite
ignoro quorsum tua uerba tendant. Ad interroga
tionem per quorsum, aut respondemus per nomi
na, aut per aduerbia. Si per nomina, siue propria si
ue appellatiua sint, per accusatiuum cum uersus re
spondebimus. Ut quorsum tendis? Megaram uersus
Italiam uersus. Item cum præpositione, Ad, in prin
cipio: ad Cordubam uersus, ad Germaniā uersus.
Si per aduerbia, per ea quæ finiuntur in orsum re
spondebis: qualia sunt, horsum, istorsum, illorsum, si

nistrorsum, dextrorsum, sursum, deorsum & similia.
De Quousque.

Quousq; querit de loco quem usq; Capitur Relatiue, ut iter feci Toletum usque, quousque tu nō fecisti. Interrogatiue, quousque iter fecisti? Infinitē, nescio quousque iter feceris. Ad interrogationē per quousque, aut respōdemus per nomina, aut per aduerbia. Si per nomina siue appellatiua, siue propria, loquemur per accusatiuum cum præpositione usque: quæ semper postponitur, quemadmodum & uersas, ut quousque iter fecisti: Italiam usque, Romanam usque. Item per usque & ad usque ad Numantiam, usque ad Cumas. Si per aduerbia, per ea quæ terminantur in, usque, responsum dabimus, qualia sunt, hucusque, isthucusque, illucusque, & hætenus. Atque de aduerbijs localibus hæc quidem satis. Si in his in quartum Nebriffensis commentarijs quid præcepimus, quod ex studiosæ iuuentutis usu esse possit in Deum optimum maximum, ceu in bonorū omnium fontem referatur. Si uerò inter dictandum, uerbum aliquod temerè excidit, in quo aliqua falsitatis species eluceat, nobis adscribatur: qui cum homines simus, non possumus humane ignorationis legibus non esse subiecti.

FINIS.



113

TRACTATVS

DE CONCORDANTIA, RE
gimine, & figuris cōstructionis. Cōposi
tus à magistro Alſonso Torres Tur
riculano, amplissimi diui Isidori
collegi patrono, & eloquētiae
professore in Academia
Complutensi.



COMPLVTI.

¶ Apud Ioānem à Villanoua. Anno 1569.

EL licenciado Lopez de Salas, juez y Vica-
rio general en la corte de Alcalá y Arçobis-
pado de Toledo. &c. Por la presente doy
licencia para imprimir este libro porque consta
estar visto y examinado. Fecha en Alcalá a dos
de Septiembre de 1569. Años.

El Licenciado Lopez
de Salas.

Christoual dela
Flor notario.

TRACTATUS

de Concordantia.



PRINCIPIO COM-
mentariorum diximus duo
accidere syntaxi siue con-
structioni, concordantiam,
& regimē, de quibus nos
peculiari tractatu disputa-
tionem suscepturos pro-
misimus. Nunc igitur fidē
nostram liberemus necesse
est, ne quis nos in promissi uiolati crimen iure uo-
care possit. Primum igitur agemus de concordan-
tia, deinde de regimine.

Quid sit & quotuplex concordantia.

Concordantiam à concordando dictam esse, tam
est omnibus in confesso, ut nullas in re tam facili du-
bitare possit. Nam quemadmodum qui unius cordis
& mentis sunt, eisdem uoluntatum affectionibus in-
ter se consentiunt: ita partes orationis quando in-
ter se aptè copulantur, sibiq; ipsis uicissim in gene-
re, numero, casu, aut persona resspōdent, concordare
dicuntur: sin minus, discordare. Est igitur cōcor-
dantia, Debita partium orationis cōuenientia in ge-
nere, numero, casu, uel persona. Ex qua definitione
colligitur triplex concordantia, quæ nō tantum ser-
monis Latini propria uerū omnibus linguis etiā
communis, & quodammodo naturalis est: contra

Tractatus

quam si quis peccauerit, non tantum indoctus, sed
planè barbarus habeatur. Prima est nominatiui &
uerbi in duobus tantum accidentibus; numero scilicet
& persona. Hoc est, quòd nominatiuus & uer-
bum debent esse eiusdem numeri & personæ ut e-
go dispu^{to}, tu garris, ille obmutescit. Secunda est ad
iectiui & substantiui in tribus accidentibus, gene-
re, numero, casu. Hoc est, quòd utrunque sit eiusdem
generis, numeri, & casus: ut uir probus, femina ho-
nesta templum sacrum. Tertia est relatiui & ante-
cedentis, in tribus etiam accidentibus, genere, nume-
ro, & persona. Hoc est, quòd ambò sint eiusdem ge-
neris, numeri, & personæ, ut ego inuentutem eru-
dio, qui Latinitatis præcepta publicè trado. Tu eua-
des doctus, qui perpetuò studes. Ille graue scelus cõ-
mittit, qui alieno detrahit horori. Nā licet relatiuū
per se nullius sit personæ, cum primū antecedenti
iungitur, antecedentis personam capit.

De discordantia uerbi à nominatiuo.

Egimus de tribus concordantiæ præceptis, reli-
quum est, ut differamus de eorundem disconuenien-
tia. Ac primū percurramus modos, quibus uerbum
à nominatiuo discordare solet. Notabis tamen prius
in oratione non figurata perpetuam esse uerbi cum
nominatiuo conformationem in numero, & perso-
na. Caterū si oratio figurata sit, aliquādo numeri,
aliquando psonæ seiunctione inter se dissident: idq;
potissimū quinq; de causis cõtingere uidemus. Pri-
ma per Enocationē figuram, ut ego Al^{fon}sus lego:

ubi

ubi uerbum lego primæ personæ, discordat à nominatiuo *Alfonsus*, qui est tertiæ personæ Excusatur tamen hæc improprietas quoniam persona euocans reducit à se personam euocatam ac uerbum in oratione nobiliori respondere debet prima nanque persona nobilior est secundâ, secundâ tertiâ.

Secunda per Prolepsin, ut scholastici student, hic *Grammaticæ*, ille uerò *Dialecticæ*: ubi hic & ille nominatiui singulares discordant à uerbo plurali student Excusatur tamen id uitiij, quoniam uerbum expressè conuenit cum toto, subintellectè cum partibus.

Tertia per Syllepsin, ut ego & tu diligenter studemus in qua oratione uerbum plurale discordat à nominatiuis singularibus, discrepat etiam in persona, à tu, pronomine secundæ personæ Est tamen excusabilis oratio, quia prima persona concipit secundam, & quia duo singularia uni equipollent plurali.

Quarta per Zeugma, ut ego & tu scribis: ubi scribis cum ego non conuenit in persona. Excusari tamen oratio potest, quoniam uerbum in Zeugmate conuenit cum propinquiore supposito expresse, subintellectè tamen cum remotiori.

Quinta per Synthesin, ut pars in fr̃sta secant, uterq; graues inimicitias exercent, aperite aliquis: ubi uerbum disconuenit prorsus à nominatiuo. Excusantur tamen huiusmodi orationes, quia uerbum nō cū uocâ, sed cū significatū cōcordat. Habēt enim illud peculiare nomina collectiua, distributiua, parti-

cularia, ut in singulari numero multorum significet collectionem.

De adiectiui à substantiuo discordia in genere. Adiectiuum & substantiuū (ut in secunda concordantia explicuimus) in tribus conueniunt, genere, numero, & casu. Quod de reliquis adiectiuorum formis, præter quàm de partitiuis intelligendum est. Partitiua enim cum substantiuo concordare non solent, sed elegantius illud regere in genitiuo: ut aliquis scholasticorum, una sororum. Item intelligi debet, dummodo substantiuum & adiectiuum ab eodem uerbo regantur, nam si à diuersis regi contingat, in casu minime conuenient. Vt in eo Horatii in Epodo ode secunda. Quis non malarum, quas amor curas habet, hæc inter obliuiscitur? Vbi malarum est in genitiuo, curas in accusatiuo: quia malarum regitur à uerbo obliuiscitur, curas à uerbo habet. Illud postremo aduerbes, nomen adiectiuum inter duo substantiua diuersi generis cum sequenti concordare: ut femina imperiozum animal. Quòd si duobus substantiuis postponatur, cum propinquiore conueniet, ut femina animal imperiosum. Quod etiam hoc exemplo manifestum fiet, Philosophia suauissimum animorum pabulum, uel philosophia pabulum animorum suauissimū. Si uerò participium uerbi reciproci, aut uocatiui, in medio duorum substantiuorum collocetur: cum antecedenti, non cum sequenti conueniet, ut Cicero dictus Romana musa. Si ambobus postponatur, cum alterutro conformabitur. Cum priori, Iustinus, Semiramis sexum mētita puer credita est. Cum posteriore,

riori, *Liuius lib. 1. Decadis primæ, Gens uniuerſa Veneti appellati.* Explicato igitur in hūc modum ſecundæ concordantiæ intellectū adiectiuum à ſubſtantiuo ſeptem modis in genere diſiungi ſolet. Primò per ſyntheſin, aut quando adiectiuum ad ſignificatum ſubſtantiuū, non ad uocem refertur: ut *pars arduus, magna pars uulnerati.* Aut quando ad uocem, non ad ſignificatum, ut *Petrus diſyllabum.* Aut quādo adiectiuum non cum abſtracto, ſed cum concreto concordat. *Terentius in Eunuchis. Quin etiam inſuper ſcelus poſtquam ludificatus eſt: ubi ſcelus pro ſcelerato capitur, cum quo ludificatus concordat.*

Secundò, quando adiectiuum ſubſtantiuū ponitur in neutra terminatione, ut *trifte lupus ſtabulis, dulce ſatis humor.* Et tunc adiectiuum aut exponitur per res, ut *reſ triſtis, aut dulcis:* aut per pars, ut *in finē hominis pes, id eſt, infima pars hominis:* aut per abſtractum, ut *obſeruantiffimus æqui, id eſt, æquitatis.*

Tertiò per Syllepſin, ut *maritus & uxor caſti,* tunc enim maſculinum genus ſcemininum concipit.

Quartò, cauſa diſtinguendi ſexus, ut *anſer focta elephantus grauida.* Niſi uelis dicere, quod ratione generis promiſcui, ſub genere maſculino ſint utriuſque ſexus.

Quintò, quando ſub uoce minùs comuni intelligitur magis communis, ut *præneste ſub ipſa: pro-nomen ipſa non conuenit cum Præneste, quod eſt generis neutrius, ſed cum ablatiuo urbe commu-*

iori.

Sextò, quando sub uoce communiore, minùs communis intelligitur. Ouid. 13. Metam Hoc pecus omne meum est, multæ quoque uallibus errant: intelligitur oues, quæ uox non tam communis est quàm pecus.

Septimò antiquorum authoritate. Ennius, aëre fulua excusatur, quia olim aer generis erat ambiguus, nunc uerò in genere masculino tantum usurpatur.

De discordantia Adiectiui in numero.

Discordat etiam adiectiuum a substantiuo in numero, quatuor modis. Primò, per interposita participia, absenti & præsentis. Terentius in Eunuchis, Nescio quid profectò absente nobis turbatum est domi. Nauius, uolumus dono dare præsentis omnibus. In quibus authoritatibus adiectiua absente & præsentis, discordant à nobis in numero. Habet tamē hoc uitium suam excusationem, ex sententia Donati in eum locum Terentianum: aut quia præsentis & absente olim præpositiones ablatiui fuerunt, sicut clā: aut quia fuerunt monoptota inflexionis, & pro omni casu una eademq; terminatione fungebantur.

Secundò, per Synthefin: aut quando utimur nomine collectiuo, ut pars in carcerem acti, pars bestiis obiecti, aut distributiuo, ut utraque formosæ.

Tertiò, per Syllepsin, quando scilicet pluralis numerus singularem concipit, ut ego & tu fluitas.
dio-

diosi.

Quartò per prolepsin, ut digiti suos quisque articulos habent: excusatur, quia uerbum attribuitur toti expresse: deinde partibus per supplementum.

De discordantia adiectiui in casu.

Postremò discordat adiectiuum a substantiuo in casu quinque modis. Primò cum pronomi- bus possessiuis, ut Cice. ad Atticum, Solius enim meum peccatum corrigi non potest. Ex tuo ipsius animo coniecturam facito. Mea unius opera Resp., in pristinum nitorè restituta est. Excusantur huiusmodi locutiones, quia unius, ipsius, solius, non ad pronomina possessiua, sed ad genitiuos antiquos, mis, tis, sis, referuntur, qui iam ex usu recesserunt, & in eorū locū possessiua pronomina substituta sunt.

Secundò, ob peculiarem uerborum accusandi cōstructionem, ut accusas ne hunc furti, an sacrilegij, an de utroque?

Tertiò, propter tacitum regimen: ut expedie uobis esse honestas.

Quartò, cum adiectiuum efficitur substantiuum in neutra terminatione, tūc enim adiectiuum substantiuum regit in genitiuo: ut plurimū negotij, aliquid mali siue infortuniij.

Quintò, per Antiptōsin, cū scilicet casus pro casu ponitur: ut, Urbem quam statuo, uestra est.

De discordantia relatiui ab an-

tecedenti.

Qs

Re-

Tractatus.

Relatiuum & antecedens (ut in tertia concordantia aperuimus) in tribus conueniunt, genere, numero, & persona. Quod de relatiuis substantiis identitatis siue similitudinis intelligi debet, qualia sunt, qui, sui, ille, ipse, is, idem. Nā relatiua substantiæ diuersitatis, cuius generis sunt, alius, alter, reliquus, cetera: itē relatiua accidentis, cuius formæ sunt, qualis, quantus, quotus, quot, quotuplus, quotuplex, & similia, non cum antecedenti, sed cum sequenti concordant. Vt uideo Laurum & cæteras arbores mater tua tanta est, quantus est gigas. Horatius tamen in Epodo, relatiuum accidentis ad antecedens retulit, Sed incitat me pectus, & mammæ putres: equina quales ubera. Verū hæc autoritas intelligenda potius est, quam usurpanda: nos enim nō quales, sed qualia diceremus. Quod de relatiuis diuersitatis, & accidentis tradidimus: intelligendum etiam est de relatiuo reciproco suus, quod non cum antecedenti sed cum sequenti conuenit: ut mater tenerrimè amat filios suos. Notabis præterea, præceptum hoc concordantiæ relatiui & antecedentis, intelligi debere, dū modò post antecedens sequatur relatiuum: nam si præcesserit, conuenit etiam in casu cum antecedenti, ut quas ad me dedisti literas, perelegantes erant. Cuius ratio est, quia tunc relatiuum & antecedens ab eodem uerbo reguntur. Id autē non tantū per accusatiuum, ut in exemplo proposito uidere est, sed per reliquos casus fieri potest. De nominatiuo sit exemplum. Quæ literæ mihi traditæ sunt, elegantia plena erāt. De genitiuo, Cuius misereor pauperis, probus

probus est. De datiuo: Cui operam das disciplinæ, nō parum adferet lucri. De ablatiuo Quo utor præceptore uaria literatura præditus est.

Postremò aduertes relatiuum, qui, si ponatur inter duo nomina appellatiua, ad utrunq; referri posset: ut est animal rationis particeps, quod appellatur homo, uel qui appellatur homo. Sed si eorum alterum sit proprium, ad illud relatiuum referri debet. Sallustius in Catilina. Est locus in carcere: quod Tullianum appellatur. Aliquando tamen cum appellatiuo concordat. Lilius, Herculi sacrificium fecit in eo loco, quem Pyram appellant. In Appositione figura, siue cum appellatiuo, siue cum proprio conuenire potest. Suetonius in Iulio cap. 31. Cōsecutusq; cohortes ad Rubiconem flumē, qui prouincia eius finis erat: dicere posset, quod.

De discordantia Relatiui ab antecedente in genere.

His igitur prægustatis, relatiuum ab antecedenti quinq; modis genere dissidet. Primò, per Synthesin. Aut quando refert significationem, non uocem: ut O uirè digna hastia, per quem fracta sunt tartara: ubi hostia capitur pro Christo, ad quem relatiuum refertur. Aut quando uocē, non significationē refert: ut præterquam ego, quod est prima. Aut quando substantiuū capitur pro adiectiuo. Terentius Vbi est scelus qui me perdidit, id est, sceleratus.

Secundò quando refert totam orationem. Terentius, Qui habet saltem quod in te est.

tertiò, causa distinguendi sexus, ut anser, quæ
in-

incubat ouis: ubi anser capitur pro foemina, nō pro mare.

Quartò gratia supplementi: ut habitas Prænesti, quæ alto loco sita est. intelligitur urbs.

Quintò antiquorum autoritate Plautus in *Aulularia*. Quis ea est, quam vis ducere uxorem? Excusatur, quia quis olim fuit tam masculini, quam foemini generis.

De discordantia Relatiui in numero.

Præterea discordat relatiuum ab antecedenti in numero, quatuor modis. Primò, per *Synthesin*. Aut quando refertur ad significationem, & non uocē. Terēt. in *Andria*, Omnes laudare fortunas meas qui gnātū habere tali ingenio præditum: ubi meas pro mis capitur, ad quem refertur relatiuum.

Aut quādo antecessor est collectiuū: ut, Hic populus labijs me honorat, cor autē corū longè est à me.

Secundò, per *Syllepsin*, quando relatiuum est in genere neutro, & concipit substantiua res inanimæ significantia. Vt, Virga tua, & baculus tuus, ipsa me consolata sunt.

Tertiò, quando fit substantiuum in neutra terminatione. Sallustius in *Catilina*. Repudiabat seruitia cuius ad eum magna copia uenerat. Cuius procuius rei, dixit: aliqui codices habent quorum.

Quartò gratia supplementi. Terentius in *Eunuchus*, Eunuchum dixti, uelle te: quia his solæ utuntur reginæ: intelligitur delitijs.

De concordantia Relatiui in persona.

Discrepat postremò relatiuū ab antecedenti in per

persona. Viuite felices, quibus est fortuna perfecta iam sua: dicere debuisset, uestra. Itē in Cātico triū puerorū, Benedicite aquæ omnes, quæ super cælos sunt. Domino: dicere debuisset, quæ super cælos estis. Vtrobique enim tertia persona prosecūda posita est.

Præter has concordantias, ponitur etiam inter querentem & respondentem concordantia in casu: ut quot annos dedisti operam Theologiæ? quatuor annos. Est etiam concordantia in casu, in coniunctionibus copulatiuis, ut Petrus & Iannes. Illud enim proprium est coniunctionibus copulatiuis, ut casus similes copulent. Hæc de concordantia, nunc ad regiminis disputationem accedamus.

TRACTATUS DE regimine,

Actum est de priore Syntaxeos accidenti, reliquum est, agamus de posteriore, Hec est de regimine, quod à regendo nomē accepit. Nam quē admodū in ciuitatibus uidemus alios principes esse, & rerum publicarum regere gubernacula, alios inferioris notæ homines, & procerum imperio subiectos: ita in oratione alie partes regere dicuntur, alia uerò regi. Complectamur igitur quatuor articulis totam regiminis materiam, Quidnam sit regimen, quotuplex sit, quæ partes orationis regāt, quæ uerò regantur, postremo loco erit de singulis casibus disputatio.

Quid

Tractatus.

Quid sit Regimen?

Regimen uarie a uarijs Grammaticis definitur. Alij in hunc modum finiunt. Regimen est, dictionē unam appendicem esse alterius, ut ibi ordine cōstructionis aliquid significet. Alij sic: Regimen est dictio nem dictioni imperare, ut sit in tali loco, hoc est, in hoc aut illo casu, hoc aut illo modo siue tēpore. Verū neutra definitio mihi placet, quia ex utraque sequeretur omnes partes orationis regere simul et regi, quia aliæ ab alijs dependēt in oratione, aliæq; alijs imperant, præter coniunctionem, quæ ab alijs partibus orationis non dependet. Quare tradamus tertiam definitionē, quæ mihi multò magis arridet. Regimē est certi casus exigentia, de casus natura nihil amittētis. Quæ definitio duas habet partes. Prior est, certi casus exigentia: hoc est, proprietates quedā, quæ uerbum actiuum accusatiuum regit, & reliqua genera uerborū reliquos casus. Posterior est, de casus natura nihil amittētis: hoc adiectū est propter casus aduerbijs liter positos, qui ferè totam naturam casus & nominis amittunt, cum neq; adiectiuus, neque præpositiones in consortiū amittant. Nō enim dicimus, eo Roman pulchram, aut eo in Romā: quāuis authores sic fuerint aliquando locuti, ut in a uerbis localibus manifestò satis cōmonstrauimus. Ouidius in Phyllide, Atq; aliquis doctus iam nunc eat, inquit, Athenas.

Quotuplex sit.

Regimen triplex est, actiuum, passiuum commune. Actiuum est dictio regens, ut in hac oratione, uol

uit semper libros: uoluit, regimen habet actiuum, quia regit accusatiuum Passiuum est dicto recta: in eadem oratione libros regimen habet passiuū, quia regitur a uerbo uoluit. Commune, est dictio quæ regit & regitur simul. ut in hac, uoluit semper libros Ciceronis: libros commune habet regimen, quia regitur à uerbo uoluit, & regit genitiuum Ciceronis Hic agitur de regimine passiuo, nam actiuum & commune in libro Quarto proprium habent locum.

Quæ parte orationis regant, quæ regantur.

Sed iam uertamus in quaestionem necesse est, quæ partes orationis regant, quæ uerò regantur. Quæstio duo habet membra, alterum quæ partes orationis regant: alterum quæ regantur. Prius duplicem intellectum habere potest Alter est, ut sic generaliter & confusè quæras. Quæ partes orationis regant: ita ut non te sollicitet ea cura, utrū regantur, an nō. Et sic nulla est pars orationis, quæ non regat, præter Coniunctionem. Id exēplis puerilibus illustremus: de nomine, liber Petri, de pronomine, id etatis, de uerbo, amo Deum, de participio, amans Deum, de præpositione, in umbra, de aduerbio, nusquam gentium, de interiectione, heu mihi. Dixi præter coniunctionem, quia coniunctio nullum regit casum, neque aliūde regitur, sed est ueluti nodus quidam & uinculum orationis, cum illud sit eius in oratione munus, ut partes partibus connectat & copulet. Si obicias nobis Vergilianū illud ex sexto AEnēid. Quæ regio Anchisen? quis habet

Tractatus

habet locus? Illius ergo uenimus. Vbi ergo illatiuā cōiunctio genitiuū, illius, regit. Respondedo, ibi ergo coniunctionē non esse, sed uices nominis gerere: capitur enim pro causa, atq; ita genitiuū regit, non quatenus coniunctio, sed quatenus nomē est. Si obijcias adhuc, in hac locutione. Odit tū literas, tū uirtutē, coniunctionē, tū secundo loco positā regere accusatum uirtutē. Respondedo cōiunctionē, tū nō regere cum accusatum, sed casum præcedēti similem copulare: non est enim munus cōiunctionis regere, sed copulare. Verū potest esse alter sensus questionis, *Quæ partes orationis regant tantū*; ita ut ab aliis non regantur. Et sic quatuor partes orationis regāt tantū uerbū, aduerbiū, præpositio, interiectio: ut superioribus exemplis patēre potest. Verbū enim cū sit totius orationis forma, totius etiā orationis partes moderatur, ita ut earum nulla imperium supra uerbū exercere possit: est enim proprium formæ imperare, materiæ uerò imperari. Hanc uerbi naturam sequuntur reliquæ tres partes, quibus proprium est ita regere, ut aliunde non regantur.

Alterum membrum erat, *quæ partes orationis regantur*. Hoc etiam duos intellectus habere potest. Alter est, *Quæ partes orationis regantur tantū*, ita, ut non regant; & sic nulla est. Non dubium tamen, quin pars aliqua regi possit in oratione, ita ut non regat aliu, potest tamen regere. Alter uerò sensus est, *Quæ partes orationis regantur*, ita tamen ut simul regant. Et sic tres sunt partes oratio

orationis, nomen, pronomen, participiū. De nomine sit exemplum, furatus sum supellectilem vicini: hic supellectilem regitur à uerbo furatur, & regit genitiuum vicini. De pronomine, id ætatis est: id regitur ab est & ætatis à pronomine id. De participio, diligo amantem Deum, amantem regitur à uerbo diligo, & regit accusatiuum Deum. Explicata est à me quæstio perspicue satis, quæ à quibusdam præceptoribus inuoluit nimium & obscure traditur. Quæ tamen aliter sic absoluetur. Ex partibus orationis sola coniunctio nec regit nec regitur: ceteræ indeclinabiles regunt, & non reguntur. Ex partibus uerò declinabilibus, solum uerbū regit & non regitur: & solum ex omnibus regit utrinque, & ex parte anteriori quam ex parte posteriori. Reliquæ uerò declinabiles, regunt & regantur: à uerbo reguntur utrinque, à reliquis à parte posteriori.

De regimine nominatiui.

Actum est de regimine in communi, restat ut ad singulos casus descendat nostra disputatio: & primum differamus de nominatiui regimine. Qui à Grammaticis & primus casus dictus est, quòd inter ceteros casus primū teneat locum: & nominatiuus quòd sit prima uox, qua rem aliquam nominamus: & rectus, quòd à nullo cadat, cum ceteri casus obliqui nuncupentur: cum à recto seu à capite quodam communi cadant. Excipio uocatiuum, qui rectus etiam appellari solet, aut quòd nominatiuo plerūque similis esse soleat, aut quia à uerbo nunquam dependet, ut communis est Grammaticorum sententia. ue

rūm quatenus unum caput cum reliquis obliquis respicit, obliquus etiam appellabitur. Hæc de appellatione. Nunc differamus quid nam sit nominatiuus, & quotuplex, & (quod magis præcipuum est) à quot partibus orationis regatur.

Quid sit Nominatiuus.

Nominatiuus est primus casus, qui rem nominat absolute, citraque omnem circumstantiam, à quo ceteri dependent casus. Primus casus: respectu aliorum, quibus secundus, aut tertius, aut quartus, aut quintus à primo locus fortuna quadam contigit. Qui rem nominat. Quod per eum rem nominare soleamus, nam per ceteros casus non fit rerum nominatio: sed in his aut qui rem aliquam possidet, aut cui conferitur beneficium, aut quem criminis alicuius accusamus, aut quem uocibus compellamus, aut à quo aliquid auferimus, aut rerum gerendarum instrumenta collocantur. A quo ceteri dependent casus. Nam omnes casus à nominatiuo sui generis ducunt originem: si enim nominatiuus nunquam fuisset, nec reliqui casus essent, quorum tota substantia à nominatiuo dependet. Exceptis tamen defectiuis, ut tibi & sui.

Quotuplex sit.

Est autem nominatiuus triplex, agentis, patientis, reciproci. Agentis est, à quo exit actio uerbi. Hunc uero regunt omnia uerba actiua, neutra, deponentia, communia actionem significantia, ut ego amo, tu rides, ille loquitur, & criminatur te. Omnis ergo nominatiuus, siue ille sit rei siue personæ

sonæ, si antecesserit uerbum actiue significationis, dicetur agentis. Patientis est, in quem migrat actio uerbi. Hunc regunt omnia uerba passiua, neutra, deponentia communia passionem significantia: ut Deus amatur, discipulus uapulatur, tu ortus es ab honestissima familia, ille ab amico sibi charissimo criminatur. Omnis igitur nominatiuus siue rei siue per sonæ, si antecesserit uerbum passiue significationis, dicetur patientis. Reciprocus est, qui à uerbis regitur reciprocis. Hunc regunt quadruplicia uerba, Substantiua primum uel quasi substantiua, ut Deus est summum bonum, extat incorruptus. Vocatiua uel quasi uocatiua deinde, ut ego uocor. siue agnoscitur Alfonso. Tertiò reciproca, ut habeor doctus. Postremò uerba gestus siue quæ significat modum rei, ut studeo pronus, dormis supinus, incedis rectus.

A quot partibus orationis regatur

Nominatiuus

Regitur nominatiuus à tribus partibus orationis, uerbo, aduerbio, interiectione: de his suo ordine differamus. A uerbo regitur nominatiuus dupliciter, tum à fronte, ut Deus regnat: tum à tergo, ut sum homo. A reliquis partibus orationis, quæ nominatiuum regunt, regitur tantum à tergo, hoc enim privilegium soli uerbo concessum est, ut ante se casum regat, quod reliquis partibus orationis negatum est prorsus. Verum nominatiuus qui à fronte regitur, dicitur suppositus, qui à tergo, appositus. Præterea nominatiuus qui à fronte regitur (quæ suppositum appellamus) à uerbo regi solet duplici

Tractatus.

ter, explicitè scilicet & implicitè. Explicitè regitur quando in oratione exprimitur, ut ego amo, implicitè quando nō exprimitur in oratione, ut amo, subaudi ego. Hoc autem contingere solet quinque modis. Primò in uerbis primæ & secundæ personæ utriusq; numeri: nam in his prima & secunda persona sermō non explicantur, nisi discretionis aut emphasis gratia. Discretionis, ut nos accusauimus, uos damnastis. Est autem hic discretio, quando unius aut plurimum è multis fit exceptio, quos uel dicti, uel facti reos notamus. Emphasis, ut tu audes ista loqui? ubi tñ, amplioris significantiæ, & effectus latentis causa additur. Est autem Emphasis figura altiorē præbens intellectum, quàm uerba per seipsa declarant: quæ in pronomiibus potissimum dominatur. Secundò, in uerbis linguæ seu locutionis: ut ita ferunt, aiunt, dicunt, intellige homines. Tertiò, in uerbis naturæ, ut pluit, ningit, Deus scilicet uel natura. Hæc autem naturæ uerba, à Grammaticis exceptæ actionis appellantur: quòd eorū actio soli Deo aut naturæ conueniat. Quod licet uerum certumq; sit, possunt tamen per translationem & similitudinem quandam ad homines etiam referri: ut si dux aliquis aut imperator dicatur in hostes fulminare, aut orator in concione tonare. Aut re uera proprie per negationem siue affectum, ut ego non pluo, si ego ningerem, utinam tu plueres, & similia. Quartò in uerbis quæ quibusdam animalibus proprie tribuuntur: ut latrat, grunnit, mugit, rugit, coaxat, intellige: canis, porcus, bos, leo, rana. Quin

to, in uerbis tertiae personae utriusque numeri ab oratione praecedenti dependentibus, ut scholastici inter se de literis disputant, & de honore augendo contendunt, idem enim nominatiuus qui reddit suppositum priori uerbo, reddit etiam & posteriori.

Obseruabis, non tantum nominatiuum reddere suppositum uerbo, sed aliquid etiam loco nominatiui, id autem contingit sex modis. Primo, quando infinitiuus solus sine ulla constructione reddit uerbo suppositum, ut mentiri non est meum. Secundo, quando ponitur infinitiuus cum aliquo à tergo, ut furari alienam pecuniam turpissimum est. Tercio, cum utrinque infinitiuum circumstat casus, ut me surripere rem sacram de templo, sacrilegium est. Quarto, quando integra oratio reddit uerbo suppositum, ut dolet mihi quod res non cesserint tibi ex sententia. Quinto, si aduerbium ponatur loco nominatiui, ut satis pecuniae est mihi. Sexto, quando dictio technice, id est quadam arte & materialiter pro uoce tantum, ponitur in oratione. Tunc enim iuxta quorundam sententiam, in locum nominatiui succedit, ut amo est uerbum.

Regitur secundo nominatiuus (ut nonnulli falso opinantur) à participio: uerum non ab omni, sed ab ijs tantum participijs, quae descendunt à quatuor generibus uerborum. A substantiuis scilicet uel quasi substantiuis ut existens incorruptus. A uocatiuis, ut uocatus Alfonsus, Reciprocis, ut Demosthenes habitus facundissimus. Verbis gestus, ut studens pronus, iacens supinus. Sed re uera, sicut adiectiua cum

Tractatus.

Substantiuis reguntur à uerbo expresso uel subintellecto, sic nominatiuus cum suo participio regitur à uerbo, aduerbio, & interiectione: iacens enim supinus, aut dormit aut uigilat.

Regitur terciò nominatiuus ab aduerbio. Sed in aduerbiorum ordine duo precipue sunt, quæ nominatiuum regunt, en, & ecce: aliquando demonstratiue, ut en Priamus, ecce status noster: aliquando per exprobrationem quandam, ut en erimè propter quod accusor, ecce crimen de quo ab aduersarijs notor. Regunt etiam hæc aduerbia accusatiuum. sed de huiusmodi constructione agemus, cū de accusatiui regimine differamus. His aduerbijs accedit particula Comica, hem, quæ nominatiuum etiā regit. Plautus in Curcul. Hem tibi anus lepida. Regitur quarto nominatiuus ab interiectione: sunt autem tres interiectiones, quæ nominatiuum regunt, quarto exclamatis funguntur officio. O, heu, proh: ut ô uir fortis atq; amicus, heu pietas, proh iupiter. De alijs casibus quos regere solent, dicemus in regimine sequentium casuum.

De regimine Genitiui.

Post nominatiuum sequitur Genitiuus: qui à gignēdo dictus est. quia quantum spectat ad formationem ceteros obliquos ex se gignit, ac propterea gignēdi casus appellatur. Dictus est etiam (auihore Prisciano) casus patrius, quia ceterorum casuum pater & genitor est. Præterea possessiuus, quia possessionem demonstrat, ut Pallium Petri. Priscis etiā interrogandi casus dicebatur, quia solemus per genitē

nitium interrogare, ut cuius est pec⁹? Hæc satis de appellationis diuersitate: explicemus modò eodem quo in superioribus ordine, quid sit, & quotuplex genitiuus, & à quot partibus orationis regatur.

Quid sit Genitiuus.

Genitiuus, est prim⁹ casus qui à nominatiuo cadit à quo ceteri obliqui gignuntur, & rē significat, ut cuius sit quippiā. Tres partes finitionis discutiam⁹. Prima est, prim⁹ casus qui à nominatiuo cadit. Nam proprie casus appellatio primū cōuenit genitiuo: nominatiuus enim (ut author est Priscianus lib. 5. cap. de casu) p̄ Catachresin. siue abusionem dictus est casus, q̄ ab ipso nascatur oēs ali; casus: aut (ut idem uult) quia cadens à sua terminatione in alias, facit obliquos casus. Secunda est, A quo ceteri obliqui gignūtur. Hoc intellige quantum ad formationem: nam si extremam uocalem genitiui in alias atq; alias uocales commutes, efficies reliquos obliquos. Tertia est. Et rem significat, ut cuius sit quippiam. Hoc adiectum est, quia in genitiuo poni solet rei alicuius possessor, ac propterea potest in possessiua subinde uerti: ut filius heri, herilis filius: ensis Euandri, Euandrius ensis.

Quotuplex sit.

Est autem multiplex genitiuus, Actionis, passionis, ambiguitatis, possessionis, materia, loci, partitionis, excessus, p̄sonæ. Actionis est, p̄ quem alterum actiue declaratur: ut prouidentia Dei, bonitas Dei, qua Deus prouidet, & benigne agit, non ipsi prouidetur, & benignè fit. Passionis, per quē alterum passiue declaratur, ut timor Dei, cultus Dei, quo Deus time-

Tractatus

tur & colitur, nō timet, nec colit. Ambiguitatis per quē alterū in utranq; partē actiua & passiua expo- ni potest, nec in una tantū, ut amor Dei, charitas pa- tris, sufficio uxoris, in his enim intell. ctus aperius atque unus non est, sed ambiguus & anceps, dubiū est enim de utro loquaris, an de amore quē Deus in nos habet, an de eo quē nos in eū, de charitate pa- tris in filios, an filiorū in patrem, de sufficione mari- tali, an de uxoria. Possessionis, per quē alterū pos- sideri significatur: ut regnū Dei, quod Deus possi- det. Materiae per quē significatur materia, ex qua aliquid fit: ut subucula lini, id est cōfecta ex lino: an- nulus auri, id est ex auro cōfectus. Loci, per quē lo- cus significatur, in quo aliquid fit: ut studeo Cōplu- ti. Partitionis, per quē partitio rerū quādā significa- tur: ut manuū dextera est fortior. Excessus, qui a no- mine superlatiuo regitur, cū excessu quodā: ut Achi- les fortissimus Gracorū. Personae, per quē importa- tur pars corporis, aut persona: ut mei nihil attingit id est, nullam mei corporis aut personae partem.

A quo partibus orationis regatur Genitiuus.

Regitur genitiuus à sex partibus orationis nomi- ne, pnomine, uerbo, participio, praepositione, aduer- bio. Nulla itaque pars orationis est, quae genitiuū non regat, praeter interiectionem & coniunctionē. Percurramus singulas partes sigillatim. Regitur primum genitiuus à Nomine: uerū ex nominibus quaedam sunt substantiua, quaedam adiectiua: sul stā- tiuorū rursus alia propria, alia appellatiua. Com- plectamur igitur constructionem substantiuorū dua-
bus

bus regulis. Sit prior, Omnia nomina substantiua propria regere genitiuum non possunt, nisi intelligatur appellatiuum. Vt Hectoris Andromache, scilicet uxor, Deiphobe Glauci, scilicet filia: Itaque in his genitiuus non regitur à nomine proprio, sed ab appellatiuo subintellecto. Sit posterior regula Omnia nomina substantiua appellatiua, regere possunt alterum substantiuum in genitiuo, si pro rebus diuersis accipiantur, & nulla intercedat coniunctio. Dixi si pro rebus diuersis accipiantur: nam si capiantur pro re eadem, ambo erunt in eodem casu, ut urbs Roma. Dixi, & nulla intercedat coniunctio: nā si forte interceperit, duo illa nomina in eodē casu per coniunctionem copulabuntur, ut patera & aurum: si à medio tolleretur coniunctio, diceres, patera auri. Hinc colliges, nomina substantiua ex ui possessionis regere genitiuum, ut ager Petri. Totum regere suam partem in genitiuo, ut homo duri capitis. Subiectum etiam regere suam proprietatem in genitiuo, ut uir singularis eloquentiæ, & contra ut eloquentia Ciceronis. Præterea quæ significant mensuram, numerum, relationem siue respectum ad aliud, ut cyathus uini, mille nummum, filius Ciceronis, mater Platonis. Postremo uerbalia non tantum in tor, aut in trix terminata, sed in uniuersum cuiuscunque generis sint, si à uerbis transitiuis descendunt, genitiuum regent: ut cultor siue cultrix iustitiæ, bibax uini, cupidus laudis, auarus pecuniæ, studiosus tui. De quibus satis multa Ioannes Deysterius in Syntaxi.

Tractatus

Absoluimus substantiua, tam propria quàm appellatiua, aggrediamur adiectiua. Hæc regunt etiam genitium uerùm nō omnia. Sed ea præcipuè quæ partitionem significant, ut aliquis uestrum: quæ numerum, ut unus uestrum: quæ negationem, ut nullus uestrum: quæ copiam siue inopiam, ut diues agrorum, plenus rimarum, uacuus cerebri, inops consilij: quæ propinquitatem siue similitudinem, ut propinquus siue affinis, siue similis Cæsaris: quæ superlationem, ut sapientissimus philosophorum. Ultimò quæ formam quādam & imaginem habent participiorum, ut doctus pille, peritus belli, sitiens auri: & quæ in neutra terminatione substantiuè ponuntur, ut quantum habebis pecuniæ, tantumdem habebis fidei. Verùm hæc pro sua infirmitate in certam regulam reduci non possunt: de his etiam consules commentaria nostra in Quartum Nèbrissensis, ubi hunc locum quæ potuimus breuitate, & methodo perstrinximus.

Secunda orationis pars quæ genitium regit, est pronomen. Regitur autem genitiuus ex ui partitionis, ut illa fœminarum, ille scholasticorum. Tamen illud est obseruatione dignum, pronomina hæc primitiua in masculina & fœminina terminatione, regere genitium eiusdem generis, ut in proximis exemplis patuit, in neutra uerò, eiusdem siue diuersi: eiusdem, ut id negotij, id operis, illud mali: diuersi, ut id pecuniæ, id ætatis.

Tertia pars quæ genitium regit, est uerbum. Sunt autem præter uerbum substantiuum, quadruplicia uerba, quæ genitium regunt, actiua, neutra, de-

po-

ponentia, & impersonalia. Verbum substantiuum
quinque modis genitiuum regit. Aut ex ui possessio
nis, ut pecus est Melibœi. Aut ex ui æstimationis, ut
tanti eris alij, quanti tibi fueris. Aut ex ui loci, ut
sum Compluti. Aut ex ui laudis uel uituperationis,
ut uir est singularis eloquentiæ, singularis barba-
riæ. Aut denique quando significat ad aliquid perti-
nere, ut regum est tueri leges, prudentis est multa
dissimulare. Verba actiua quæ in secunda classe re-
ponuntur, genitiuum regunt sunt autem ea proprie
quincuplicia. Implendi, ut animum impleuit religio
nis Accusandi, ut accusauit fratrem parricidij. Dam-
nandi, ut condemnatus est peculatus. Emendi, emi plu-
ris solito. AEstimandi parui ducitur probitas, pluri-
mi fit pecunia. His iungunt quidam laudandi &
Admonendi uerba, ut laudauit me rei præclare ges-
te, admonuit me errati. Verba neutra primi ordi-
nis genitiuum regunt, sunt autem ea Carendi siue in-
digendi, ut careo pecuniarum, egeo salutis, Abandan-
di, ut abundo diuitiarum, Satagendi, ut satagit rerum
suarum. His adiungunt alij hoc uerbum Memini, ut
faciam ut perpetuò huius diei memineris. Deponen-
tia primæ speciei genitiuum exigunt, ea uerò sunt
quæ miserationem important, ut miserere laborum,
quæ Recordationem siue obliuionem, ut recorda-
bor perpetuò iniuriæ, tuorum ne obliuiscare. His
accedunt ex quorundam sententia Potior & Domi-
nor, ut potitus rerum, Deus omnium dominatur,
quanuis utrobique subintelligitur imperio. Commu-
nia genitiuum non regunt, præter criminor, quod
cum

Tractatus

eum accusandi uerbis connumeratur, ut me auaritia criminatus est. Impersonalia primæ & quintæ speciei genitiuum regunt, qualia sunt, interest, refert, pœnitet: ut non tam interest regis, quàm totius Imperii. Refert omnium animaduerti in malos: pœnitet me uitæ malè antea. De his omnibus uerborum generibus, confugito ad commentaria nostra in quartum Nebrissenfis, ubi fusè satis & copiosè eam materiam persecuti sumus.

Quarta pars quæ genitiuum regit, est participiū. Nam cum ea sit natura participiorum, ut constructio nem sequantur uerborum à quibus deriuantur, in uersum ea participia genitiuum regent, quæ deriuantur à uerbis regentibus genitiuum, ut repletus uini & furoris, accusatus parricidij, idem sit de alijs iudicium ne in re clara plus iusto immoremur. Præterea omnia participia quæ transeunt in naturam nominum, genitiuū postulant: ut amans uirtutis, cupientior famæ quàm auri.

Quinta orationis pars quæ genitiuum regit, est præpositio. Ex numero uerò præpositionum tres reperiuntur quæ genitiuum exigunt: Pridie, ut pridie illius diei: Postridie, ut postridie caleñ. Tenus, ut Baiarum tenus, oculorum tenus. Solet autem regere genitiuum tenus, aut quando iungitur nominibus pluraliter tantum declinatis, aut res geminas significatib⁹, ut in proximis exemplis uel tyrunculis etiam potest innotescere.

Sexta pars quæ genitiuum regere potest, est Aduerbium: sed in aduerbiorum serie quincuplicia sunt quæ genitiuum regunt. Temporis, ut tunc temporis.

Loci

Loci, ut nusquam gentium, ubi terrarum, Superlati-
onis, ut pessimè omnium dixit, qui omnium optimè
fecit. Quæ descendunt à nominibus regentibus geni-
tium, ut similiter præceptoris. Quæ abundantiam
significant, quorum ea est natura, ut uice nominum
poni uideantur: ut satis pecuniæ, abunde uini, affa-
tim lignorum. Quanquam tunc temporis, & simili-
ter præceptoris, optimorum authorum exemplo ca-
rent.

De regimine datiuu.

In ordine casuum, tertio loco succedit Dativus:
qui à dando nomen accepit, quia in eo casu poni so-
let is, cui aliquid damus. Dictus est etiam acquisiti-
uus, quia in eo ponitur persona acquirens aliquid:
& commendatitiuus, quia per eum cōmendamus: sed
usu cōmuniori datiuus est appellatus. Discutiamus
igitur, ne à nostro more recedamus, quidnam sit, &
quotuplex datiuus, & à quot partibus orationis re-
gatur.

Quid sit Dativus.

Datiuus est tertius à nominatiuo casus, in quo po-
nitur persona, cui quippiam attribuimus. Hæc fini-
tio adeò perspicua est, ut nulla indigeat expositione
Illud tamen annotasse non pigebit, sub datiuu uoce
ueteres illos casum octauum comprehendisse: quem
tum incidere uolebant, cū quod alias per accusati-
uum cum præpositione usurpabant, per hunc casum
proferebant: ut it clamor cælo, id est in cælum: su-
beunt muro, pro ad murum.

Quotuplex sit.

Quin

Tractatus. II

Quincuplex est datiuus, actiuus, passiuus, acquisitiuus, possessiuus, localis. Actiuus à quo manat actio uerbi, ut Deus amatur mihi. Passiuus in quē migrat uerbi actio, ut seruiō Deo. Acquisitiuus qui aliquid acquirit, ut dot tibi librum. Possessiuus qui possessio nem importat, ut est mihi fertilissimus ager. Localis qui locum, ut sum Burgis.

A quot partibus orationis regatur.

Regitur à sex partibus orationis, nomine, pronomine, uerbo, participio, aduerbio, interiectione. Omnes itaque partes orationis datiuū regūt præter præpositionem & coniunctionem. Nomen duplex est, substantiuum & adiectiuum. Pro substantiuo sit regula. Omne nomen substantiuum potest regere aliud substantiuum in datiuo, intercedente uerbo substantiuo: ut est mihi multa pecunia, est mihi nō poenitēdus magister, Deo sit honor & gloria. Quæ orationes per uerbum habeo exponi solēt facta casuum mutatione: datiuus enī mutatur in nominatiuum, nominatiuus in accusatiuum. Conuerteres igitur superiores orationes per uerbum habeo in hūc modum, Ego, habeo multam pecuniam, Ego habeo non poenitendum magistrum, Deus habeat honorē & gloriā. Orationes tamen quæ per uerbum substantiuum fiunt, multò sunt pulchriores, quàm quæ per uerbum habeo. De adiectiuis certa regula tradi non potest: uerū adiectiua in bilis terminata, & participia in dus, datiuo gaudent: ut flebilis, formidabilis omnibus, flendus, formidandus omnibus. Præterea quæ commodum aut incommodum significant,

cant, aut relationem ad aliquid, datium exigat. Ut rem mihi permolestam, mihi iucundam, tibi perniciosam, mihi salutare consulis: aptus, accommodus, idoneus, utilis inutilis bello: siue ad bellum natus glorie & ad gloriam. Rursus quæ amicitiam uel similitatem significant: ut amicus omnibus inimicus nemini, contrarius omnibus, aduersus neminem. Ex pronominibus, tantum idem, datium regit, ut Deus idem omnibus, idem huic aut cum hoc. Horatius in fine artis Poëticæ Inuitum qui seruat, idem facit occidendi. Sensus est, qui seruat cupientem mori, idem facit ac si occideret, nam uita ei pro morte est. Omnia uerba regere possunt datium ex uicini damni aut commodi, cum similis datiuus sit omnibus uerborum generibus communis. Verum si speciatim rem tractari placeat, quincuplicia uerba datium regunt. Actiua tertij ordinis, ut dedi tibi literas: hæc eadem duos datiuos aliquando regunt, ut dare rem alicui uitio siue laudi: eiusdem naturæ sunt, uerto, daco, adseribo. Passiua loco personæ agentis, ut Deus amatur mihi, quam constructionem habent etiam communia in significatione passiua, ut criminari mihi, id est à me. Neutra secundæ classis, ut consule tuis rebus. Deponentia eiusdem classis, ut medebor tuo dolori. Impersonalia item eiusdem, ut expedit mihi. Participia omnia quæ descendunt à uerbis regentibus datium, regunt etiam datium, ut seruiens Deo, iussis obtemperans. Aduerbia omnia quæ formantur aut à nominibus, aut à participijs regentibus datium, regunt etiam datium. A nominibus, ut canis simili
ter

Tractatus.

ter huic, uiuit sibi inutiliter. A participijs, ut conuenienter naturæ uiuere, id est, ex dimenso & præscripto naturæ.

Quatuor interiectiones datiuum regunt. Hei dolentis, ut hei mihi, Heu dolentis etiā: heu mihi, quia incolatus meus prolongatus est: idq; apud regium Prophetam tantum. Laurentius contendit legendū esse hei, quia heu accusatiuum, nunquam datiuum regit. Væ comminantis, ut uæ tibi. Ah dolentis cum aspiratione in fine, ut ah tibi. Hæc autem particula Comica tantum est, aut aliorum Poëtarum, nullus est enim eius apud Oratores usus.

De Regimine accusatiui.

Quartū locum tenet accusatiuus, qui ab usu accusandi frequentiori accusatiuus dictus est, quod in eo personam siue rem quam accusamus ponere soleamus: qua ratione & incusatiuus etiam dicitur, & causatiuus, quia aliquid in causa fieri ostendit: Hæc de uocis uarietate. Examinemus modo quid sit accusatiuus, & quotuplex, & a quot partibus orationis regatur.

Quid sit Accusatiuus.

Accusatiuus est qui rem significat tum infinitis uerborum à priori, tum actiuorum transitioni accommodatam. Duas partes complectitur finitio. Prior est, Tum infinitis uerborū à priori: quia infinitiuus à frōte regit accusatiuū, ut me seruire Deo optimū est. Posterior est, Tum actiuorū trāsitioni accommodatā, quia uerba actiua, quæ trāsitiua nūcupantur, accusatiuum regere solēt, qui ab ipsis ex ui

regitur transitionis.

Quotuplex sit.

Accusatiuus quincuplex est, actionis, passionis, tēporis, loci, distantie. Actionis à quo prodit uerbi actio, ut Cicero per uiros Reip. studiosos restitutus est in patriam: accusatiuus uiros, actiuus est, quia ab eo exit restitutionis actio. Passionis in quē transit uerbi actio, ut amo Deum. Temporis qui tēpus ut tres annos studui Grammaticæ. Loci qui locum, ut recipio me domum. Distantiæ qui distantiam significat, ut circiter duo millia passuum ab urbe distat.

A quot partibus orationis regatur.

Regitur accusatiuus à sex partibus orationis, nomine, uerbo, participio, præpositione, aduerbio, interiectione. Itaque omnes orationis partes regunt accusatiuum, præter pronomen & coniunctionem. Cum duplicia sint nomina, substantiua & adiectiua, substantiua accusatiuum non regunt: adiectiua quadrifariam. Aut per Synecdôchen, ut niger oculos, horridus barbam: aut si in bunlus terminetur, & descendat à uerbis regentibus accusatiuum, ut populabundus agros, aut si certum magnitudinis modum significant, qualia sunt, longus, latus, altus, crassus, ut turris alta trecentos pedes, liber crassus tres digitos: aut per Antiptôsin, ut non sum id nescius, pro eius rei. Pro uerbo statuatur regula generalis: Nullum scilicet esse uerbum, quod non cum accusatiuo cōstrui possit, si accusatiuus ille tempus, aut distantiam, aut mēsuram significet. Hoc uel pue

ris alphabetarijs notissimum est. Sed ad specialia
uerborum genera descendamus. Verba actiua uni-
uersa cuiuscunque sint classis, suapte natura re-
gunt accusatiuum significantem id quod patitur.
Quæ uerò sunt quarta, præter accusatiuum omni-
bus uerbis actiuis communem, regunt etiam alte-
rum: sunt autem in ea specie conclusa quinque uer-
borum genera, quæ duos accusatiuos regunt. Do-
cendi, ut doceo te. Grammatica: cradi, ut miser orat.
principes uenia: uestiendi siue calciadi, ut induam te
diploidem, calciabo te soleas: admonendi, ut admo-
nui te utilia: celandi, ut nunquam te consilium meum
celabo. Verba passiuia quatuor modis regunt ac-
cusatiuum. Primò, per Synecdochen, expleri me-
tem nequit. Secundò, per transumptionem, quando
scilicet uerbum passiuum pro actiuo ponitur: ut
purgor bilem, id est purgatione expello bilem.
Tertiò, per compositionem, quando scilicet com-
ponuntur cum præpositione, quæ sua natura re-
git accusatiuum: ut transuectus fluxum, id est,
uectus trans fluxum. Quartò per derivationem,
quando deriuantur à uerbo actiuo quarti ordinis,
ut doceor Grammaticam. Verba neutra quatuor
modis accusatiuum regunt. Primò per Synecdo-
chen, ut tremitt artus. Secundò, per transumptio-
nem: ut Corydon ardebat Alexim, id est, arden-
ter amabat: depereo uirginem, id est deperdit a-
mo. Tertiò per compositionem, ut adeo periculum,
obeo mortem. Quartò, quando accusatiuus signifi-
cat rem uerbi, ut uiuo uitam. Deponetia tertiæ for-

inæ regunt accusatiuum, ut loqueris mendacium.
 His accedunt communia in significatione actiua, ut
 amplector te. Impersonalia tertiæ & quintæ
 speciei accusatiuum postulant, ut decet te, pudet me
 peccati. Non autem impersonalia quartæ, ut quidā
 uolunt: nam cum dicitur, incipit me tædere, accusa-
 tiuus non à uerbo incipit, sed ab infinitiuo tædere re-
 gitur. Participia deriuata à uerbis regentibus accu-
 satiuum, regunt etiā accusatiuum, ut amās Deū. Pre-
 terea per figurā Synecdochē ut oculos suffusa niten-
 tes, id est, habens oculos suffusos. Præpositio regit
 etiā accusatiuum: sunt autē numero triginta qua-
 tuor præpositiones, quæ accusatiui constructionem
 postulant, de quibus consule Nebrissensem in pri-
 mis puerorū præexercitamentis. Præter has sunt
 alie quinque, quæ accusatiuum regunt, uel ablatiuū,
 in, sub, super, subter, subtus. Aduerbia triplicia ac-
 cusatiuum regunt. Demonstratiua primū, en & ec-
 ce. Deinde quæ formantur à præpositionibus, quæ
 regunt accusatiuum, ut proximè castra, propius ur-
 bē, descendunt enim à prope. Posserem quæ descen-
 dunt à nominibus regentibus accusatiuum, ut gymna-
 sium extēditur late uiginti passus Idem iudicato de
 ijs, quæ lōgitudinē sine profunditatem significant:
 quauis hi accusatiui à uerbis potius, quā ab ad-
 uerbijs regi dicentur. Quatuor interiectiones accu-
 satiuum regunt: Heu dolentis, heu me miserum: O
 exclamantis, ô inanes hominum cogitationes. Proh
 exclamantis etiā, proh Deū atq; hominum fidē:
 Cedō pro dā, ut cedō manum.

Tractatus

De regimine Vocatiui.

Post accusatiuum sortitus est locum Vocatiuus cui à uocando impositum nomen est, quia in eo casu ponitur persona quam uocamus. Hic idem casus dictus est saluatorius, quia pereū salutamus, et rectus aut quia recto plerūq; similis esse solet, aut quia à uerbo nō dependet, ut nō multò post aperte demonstrabimus. Præcipiamus iā quidnā sit uocatiuus, & quotuplex, & à quot partibus orationis regatur.

Quid sit vocatiuus.

Vocatiuus est, qui uocandis appellandisq; personis est accommodus. Eò spectat tota definitio, ut eū esse præcipuum uocatiui usum intelligas, ut per eum uocemus.

Quotuplex sit:

Est autē multiplex uocatiuus. Admirationis, ut ô fortunati. Deprecationis, ut tu mihi diua faue. Salutationis, ut aue inuictissime Cæsar. Execrationis, utô scelus. Vocationis, ut accede huc Petre.

A quot partibus orationis regatur.

Vocatiuus à duabus tantum partibus orationis regitur, aduerbio, & interiectione. Aduerbia duo sunt quæ uocatiuum regunt, ô, & heus, ut ô formosissime puer, heus adolescens optime. Interiectiones septem sunt quæ uocatiuum regunt, O exclamantis ut ô Dij immortales. Heu lugentis, ut heu calamitosa fortuna: Proh exclamantis, ut proh Iupiter: Vah exclamantis etiam, ut uah consilium callidum, Euge exultantis, ut euge serue. Hui deridentis, ut hui mulier lepida: Mi blandientis, ut mi puer formosule,
nisi

nisi subintelligatur, ô, cum mi sit pronomen.

Quæstio de Vocatiuo.

Sed iam hac in parte agitur quæstio: quæ diu multumq; Grammaticos misere torfit, An uocatiuus regatur à uerbo secundæ personæ imperatiui modi. Ac primò Nebrissenfis uir seculorum omnium memoria dignissimus, Priscianum secutus, tenuit uocatiuum semper regi à uerbo secundæ personæ imperatiui modi, atq; illi reddere suppositum. Quòd si aliquando uideatur poni absolute, adhuc affirmat uerbum excitans attentionem intelligendum esse.

Apparet autem absolute poni, cum oratio ex recta fit obliqua, hoc est, quando ex secunda persona ad quam loquimur, fit transitus ad tertiam, de qua loquimur. Vt si dicas, O Cæsar, legat Pompeius: asserit subaudienda esse huiusmodi uerba, audi, ausculta, intende, & his similia, à quibus uocatiuus Cæsar, qui uidebatur poni absolute, regatur. Ego tamen (salua tanti uiri reuerentia) cum uulgo Grammaticorum teneo, uocatiuum nunquam regi à uerbo secundæ personæ imperatiui modi sed ab aduerbio, ô, subintellecto. Ea est enim natura uocatiui, ut attentionem aduertentiamq; excitet: quod cum effecerit, officio suo defunctus est. Itaq; etiam sensus in familiari uulgariq; sermone, uicem obtinet, neque ullo uerbo indiget, ut suam naturam explere possit neq; cum oratio ex recta fit obliqua, necesse est uerbum attentionis subintelligi, sed regitur uocatiuus ab aduerbio, ô. Rogabis, quo pacto regantur partes in hac oratione, Petre stude, & similibus,

Tractatus

Respondeo uocatiuum Petre, regi ab aduerbio, &.
Iubinite & : deinde subintelligi nominatiuum, te,
qui reddit suppositum uerbo. Huic ego semper sen-
tentia constanter adhaesi, quæ si forte displicuerit,
eam paratus sum deferere, postquam mihi certius
aut uerius classicus uir persuaserit præceptum. Eo
enim ingenio natus sum, ut uehementer cupiam uel
à rudibus imperitijsq; tyronibus ueritatem perdis-
cere, nedum a classicis nominisq; celebritate conspi-
cuis.

De regimine Ablatiui.

Post uocatiuum ordine succedit Ablatiuus, qui
ab auferendo sic est appellatus, quia in eo ponitur
is à quo aliquid auferimus. Hic & Sextus, & Lati-
nus, & Comparatiuus dicitur. Sextus quidem, quod
in ordine casuum sextum usurparit locum: Latinus,
per excellentiam, quia Latine lingue proprius est,
nam Greci ablatiuum non habent. cuius uim per ge-
nitium explicant, Comparatiuus, quia à compara-
tione ex ui comparationis regi solet, ut ex fratribus
maior. Iam eodem quod solet, deuoluatur oratio no-
stra: & apertam omnibus faciamus quidnam sit,
& quotuplex ablatiuus, & à quot partibus regan-
tur.

Quid sit Ablatiuus.

Ablatiuus est qui aliquid significat, tanquam in
quo, cum quo, uel abs quo. In quo, quando significa-
mus aliquid in loco fieri, ut in foro saltat. Cū quo,
quando comitem significamus, ut cœnaui lautè cum
contubernali. Abs quo, quando separationem signi-

fica

ficare uolumus, ut amoue à facie manum.

Quotuplex sit.

Sexcuplex est Ablatiuus, actionis, passionis, temporis, loci, distantie, excessus. Actionis, à quo uerbi actio proficiscitur, ut Deus amatur à me. Passionis in quem migrat uerbi actio, ut uitor diuitijs. Temporis, qui tempus importat, ut tribus annis eloquentie studui. Loci, qui locum, ut in gymnasio doceo. Distantie, qui distantiam, ut distat tribus passuum millibus. Excessus, ut tribus digitis te excedo.

A quot partibus orationis regatur.

Regitur ablatiuus à sex partibus orationis, nomine, pronomine, uerbo, participio, prepositione, aduerbio. Dux tantum constructione ablatiui orbatæ sunt, interiectio & coniunctio. Nominum alia sunt substantiua, alia adiectiua. Substantiua triplicia ablatiuum regunt. Aut quæ significant totum, hæc enim regunt partem in ablatiuo, non tamen sine adiectiuo, ut uir dura ceruice: aut quæ subiectum, hæc enim regere solent proprietatem in ablatiuo, ut uir incredibili eloquentia: aut quæ dignitatem, ut Carolus quintus diuino beneficio Imperator. Adiectiua etiam ablatiuum regunt: aut comparata, ut doctior te: aut quæ copiam siue uacuitatem significant, ut diues agris, onustus diuitijs, uacuuus curis: aut si ablatiuus causam efficientem preferat, ut pallidus morte, tardus senio. Postremo quæ concreta dicuntur, regere solent abstracta in ablatiuo, ut humanus humanitate quadam naturali. His omnibus

Tractatus.

accedit nomen opus, quod ablatiuum desiderat, ut ad rem expediendam opus est Oedipo. Ex pronomi-
nibus, Idem, regere solet ablatiuum interueniente
præpositione, ut idem cum hoc.

Pro uerbo statuatur generalis quædam regula:
Nullum scilicet esse uerbum, quod non cum ablatiuo
construi possit, si ablatiuus ille tempus, aut spatium
loci, aut mensuram significet. Vt cômoratus est apud
nos tribus horis, abest à continenti quingentis pas-
sum millibus, puteus tribus ulnis profundus. Sed
speciatim rem tractemus. Omnia uerba actiua secun-
dæ, quintæ, & sextæ speciei ablatiuum regunt, ut im-
pleo stomachum cibo afficio te honore, abstineo me
ab iniurijs. Passiua etiam loco personæ agentis, ut
Deus colitur à me. His accedunt Communia signi-
ficationis passiuæ, ut tu amplecteris à me. Itē Neu-
tra primæ, tertiæ, quartæ, & quintæ classis: ut ca-
reo pecunijs, fluo febris, discipulus cessator uapulat
à magistro, uiuo in urbe Kursus deponentia quar-
tæ, & quintæ formæ: ut uescor carnibus, ortus à cla-
rissimis maioribus. Tandem Impersonalia primæ
speciei cum his ablatiuis, mea, tua, sua, nostra uestra
cuius: ut mea interest, tua, refert. Participia omnia
quæ descendunt à uerbis regentibus ablatiuum, abla-
tiuum etiam exigunt: ut carens pecunijs, astuans fe-
bris Præpositiones numero quindecim regunt ablati-
uum, quinque ablatiuum & accusatiuum: de quibus
uide Primum Nebrissensis.

Aduerbia Comparatiua regunt ablatiuum ut ue-
locius te curro, præter eà quæ formantur à nominibus
siue

siue participijs regentibus ablatiuum, ut abundanter diuitijs.

De ablatiuo Absoluto.

Quia tamen ablatiuus poni solet aliquando absolute in oratione, ideò de ablatiuo absoluto pauca nobis dicenda sunt. Quare scilicet dicatur absolutus quid sit, & quot modis fiat.

Quare ablatiuus dicatur Absolutus.

Circa primum, non possum patienter sustinere, cum audio annosos quosdam professores, quiq; omnes ætatis suæ gradus in tradendis præceptis contruere, audere publicè in gymnasijs præcipere ablatiuum dici absolutum, eo solùm nomine, quia pòt poni in principio uel in fine orationis. Vt, rege Ferdinando Munda in ditione Christianorū uenit. Hic rege Ferdinando, absolut⁹ ablatiuus est, quia ex orationis principio reici potest in finem, in hunc modū. Munda in ditionem Christianorum uenit rege Ferdinando. O rē ridiculā, & omnium conuitijs, contumelijs sibilis excipiendam. Digni profectò esset huiusmodi præceptores: qui manibus à tergo illigatis, pueris, quorum animos male instituunt, cadendi uirgis ad plagas usq; traderentur, ut sui erroris & stultitiæ meritas pœnas darēt: aut in pistrinum detruderētur ut ibi pro cōmisso peccato perpetuò molerent. Ego tamen ita existimo, ablatiuum dici absolutum, quia aliunde non dependet, neq; ab alia parte orationis regitur. Nam cum singuli casus ab aliis partibus orationis regantur, ablatiuus absolutus ab omni absoluitur regimine passiuo, cum à nulla parte oratio

nis regatur, habet tamē regimen actiuum, cū suū
à tergo casum regat, ut præceptore lectionis no-
dos explicante tu interim stertebas. Dices ablati-
uum absolutum pendere à sequenti oratione, ut in
hac, sole lucente dies est: ac propterea non dici ab-
solutum, quod aliunde non pendeat; cū à sequenti
oratione pendeat totus. Fateor pendere in sensu, ut
scilicet perfectum sensum in audientis animo ingene-
ret oratio, neque quicquam amplius desideret: non
tamen in regimine, cū à nulla parte ablatius
ille absolutus regatur. Hæc est sententia nostra,
quam cū ex grauissimorum Grammaticorum tra-
ditione certam ueramq; esse mihi iam inde à puero
persuaserim, denuncio professoribus, qui ex delectu
nostro in hoc amplissimo diui Ihsidori collegio (cui
ego moderando præfectus sum) Grammaticam pro-
fitentur, ne aliter, nec publicè nec priuatim præci-
pere audeant, nisi uelint indignationem nostram, et
publicam incurere castigationem.

Quid sit ablatius Absolutus.

Hinc colliges finitionem ablatiui absoluti, quæ ti-
lis est. Ablatius absolutus est, qui aliunde in regimi-
ne non dependet, postulat tamen orationem post se,
ut perfectum efficiat sensum. Ex his quæ à me præ-
cepta sunt, manifesta est finitionis explicatio.

Quot modis fiat.

Ablatius absolutus fit quinque modis. Primò, ex
duobus nominibus, ut rege Philippo pacis leges acce-
pit Gallia. Secūdo, ex nomine et pronomine, ut me
præceptore relegata est omnis barbaria. Tertiò, ex

nomi

nomine & participio, ut Philippo imperante totus tremuit orbis. Quartò, ex pronomine & participio, ut me legente plurimùm uiguit eloquētia. Quin-
tò, ex participio præteriti, ut dicto de nomine, sermo de uerbo instituitur. Et (iuxta quorundam sententiam) ex solo gerundio, ut cantando rumpitur anguis. Hoc tamen est falsum, ut si dicas, ego legendo triui etatem, ubi legendo ablatiuus absolutus esse nō potest, sed gerundium ablatiui. Resoluitur per has particulas, cū quia, quādo, dum. Vt me dormiente tu bibeas, id est, cū aut dum ego dormire: te impulsore feci, id est, quia tu impellebas: te imperatore hæc fiebant, id est, quando tu imperabas.

Quando sit locus ablatiuo absoluto,
quando non.

Notabis tamen hæc in parte unum, quod in primis necessarium est, Nullum patere locum ablatiuo absoluto, quando ablatiuus & uerbi suppositum ad eādem personam pertinent Non enim dices, me negotijs plurimis implicato, non poui ad te rescribere, sed ego negotijs plurimis implicatus: nec te multa ad discende senescis, sed tu multa addiscens. Verū si ablatiuus absolutus & uerbi suppositum ad diuersas, personas pertineant, tunc locus erit ablatiuo absoluto: ut me magistro tu plurimùm profecisti, te præceptore magna honoris & dignitatis accessio facta est Resp.

De regimine effectiui.

Septimum locum sibi uendicauit Effectiuus, ob eamq; rem septimus casus est dictus: & effectiuus,
quia

quia in eo ponitur rei efficienda instrumentum: ac propterea etiam appellatus est casus instrumentalis. In hoc casu tria nobis præcipienda sunt, quid sit effectiuus, à quot partibus regatur, & quando ablatiuo, quando effectiuo utendum sit.

Quid sit effectiuus

Effectiuus est septimus à nominatiuo casus in quo rei gerende instrumentum collocatur: ut percussi illum gladio, instrumentum enim percussionis gladius est.

A quot partibus regatur Effectiuus.

Regitur effectiuus ab omnibus uerborum generibus: nam cum sit casus communis, nullum est genus uerbi, cui negari possit effectiuus. Et quia hoc est in Grammaticorum gymnasijs sæpissimè proclamatum, ideo superuacaneum erit subiectis exemplis firmare.

De usu ablatiui & Effectiui.

Quia effectiuus similis semper est ablatiuo, propterea Priscianus negauit effectiuum casibus addendum esse: deceptus tamen est, quia licet conueniant uocis similitudine, duplex est inter utrunque differentia. Prior est, quia effectiuus instrumentum significat, ablatiuus separationem. Posterior, quia effectiuus nunquam recipit præpositionem, non enim dices, impulsi te cum pugno sed pugno: ablatiuus uero similem recipit præpositionem. Latine enim dicitur & citra Solæcis mi notā, cœnauit cum patre, perfectus sum cum fratre. Ex appositis exemplis intelliges, quando ablatiuo, quando effectiuo utendum sit. Nam si in oratione denotetur instrumentum, uteris effectiuo, ut deleuit epistolam

tam lachrymis, non cum lachrymis, instrumentum enim delendi lachrymæ fuerunt. Abstersit sordes aqua, non cum aqua: instrumentum nanque abstergendi aqua fuit. Si uerò denotetur concomitantia, ut æris ablatiuo, ut dormiui cum conturbernali in eodem cōtubernio. Item in illis, acceptus sum cum honore, magna cum beneuolentia scripsit, cum mira affabilitate me allocutus est, non enim hi ablatiui instrumentum significant, sed comitem. Siquidem acceperunt me homines instrumento corporis, non honoris, sed honore comite. Scripsit ministerio manus, non beneuolentiæ, sed socia beneuolentia. Allocutus est lingua operatrice non affabilitate, sed presenti affabilitate. Ita tradit Laurētius lib. 2. cap. 6. cōtra quosdam, qui aliter præcipere ausi sunt. Hæc satis de regimine, nunc ad figuras constructionis gradum faciamus.

TRACTATVS DE FIGVRIS constructionis.

DE Figuris cōstructionis tractaturi, illud in primis necesse est generatim præcipiamus, unde figura dicta sit, quid sit, & quo duplex, ut deinde ad singulas figuræ species descēdamus. Figura à fingēdo dicta est, quod orationi nouā quandam formam & speciē fingat ac tribuat longè à propria & naturali alienam. Sumpta est (ni fallor) translatio à mulieribus, quæ cum deformes sunt, solent cerussa, fuco, & nouis quibusdam

dam superinductis medicaminibus faciem ementiri,
ut circumspectantibus formosæ appareant. Sic etiam
et figura orationem solet et pulchriorem multò
quàm erat, et uenustiore effecere.

Quod sit Figura.

Figura auctore Quintiliano lib. 9. cap. 1.) est
conformatio quadam orationis, remota à communi
et primum se offerente ratione. Id est, est habitus
quidam et gestus orationis, à communi et primum
se se offerente ratione dicendi remotus et immuta-
tus. Non quòd uulgus nunquam istis Rhetoricis or-
namentis utatur sed quòd huiusmodi lumina in ho-
minum imperitorum populari sermone rariùs eni-
teant. Verùm hæc finitio à Quintiliano tradita, pro-
priùs multò conuenit figuris uerborum et senten-
tiarum, quàm constructionis, ob eamq; rem paulò
inferius eodem capite aliter finit figuram. Figura
est arte aliqua nouata forma dicendi, quæ circa Grä-
maticas constructiones uersatur. Hæc finitio pro-
priè quadrat figuræ constructionis. Nam est loquē-
di forma nouata, id est, à naturali et consueto ser-
mone mutata, ac proinde uitiosa, nisi arte aliqua
aut ratione excusetur. Et circa grammaticas con-
structiones uersatur: id est in contextu partium o-
rationis. Posses etiam sic finire: Figura est uitium
cum ratione, necessitatis ornatusue gratia permis-
sum.

Quotuplex sit figura.

Generali quadam partitione, distribuuntur figu-
re in figuras uerborum et sententiarum. Quæ sen-
ten

tentiarum sunt, uersantur circa animi sensus & cogitatus, & de his non est præsens negotium, cum ad Rhetores tantum spectent. Quæ uerò uerborum sunt rursus distribuuntur in figuras dictionis, elocutionis, constructionis. Figura dictionis est, quæ in una tantum sit dictione, ut audacter pro audaciter, dominarier pro dominari. Elocutionis, quæ circa loquendi modum aliquem uersatur, ut epotes cados, id est epota uina: efficitur enim Metonymia, cum continens pro re contenta ponatur. Constructionis, quæ circa constructiones & leges Grammaticas uersatur, de qua modò sermo est. Nam reliqua figurarum genera non est propositi nostri in præsentia tractare, quæ longum & prolixum opus ad sui ipsarum translationem desiderant. Figure igitur constructionis octo sunt. Euocatio, Appositio, Prolepsis, Syllepsis, Zeugma, Antiptosis, Synthesis, Synecdoche, quæ singulatim nobis explicandæ sunt.

De Euocatione.

Euocatio, ab euocando dicta est: quia per ipsam tertia persona ad primam uel secundam extrâ uocatur. De qua quatuor nobis explicandæ sunt quid sit euocatio, quot ad euocationem requirantur, quotuplex sit, & utrùm in euocatione persona euocans & euocata perpetuò eiusdem numeri esse debeant.

Quid sit euocatio.

Euocatio est, immediata siue continua tertiæ personæ ad primam uel secundam reductio: ut ego Virgilius scribo, tu Cicero oras. In priore exëplo, tertia persona reducitur ad primam: in posteriore terti-

Tractatus.

tia ad secundam: Dixi, immediata siue continua reductio: quia inter personam euocantem, quæ est prima uel secunda, & euocatam quæ est tertia, non debet intercedere cōiunctio: & huius ratio est, quia euocans & euocatam debent ad eandem rem pertinere, & coniunctio non nisi diuersa coniungere solet. Inter personas tamen euocatas bene interuenire posset coniunctio, si duæ tertiæ personæ uni primæ aut secundæ connecterentur: ut ego pauper & in lectus perpetuo labore uictum quærito, tu diues & potens ostiatim totum oppidum compilasti. Ex finitione colliges, euocationem fieri non posse in nomine relatiuo, Quis, nec in pronomine Ipse. Nam relatiuum per se nullius est personæ, atque ita eius personæ esse solet, cuius est antecedens: pronomen uerò Ipse, eius est personæ, cuius est suppositum cui adheret, ut ego ipse, tu ipse, ille ipse. Fit igitur ut euocatio non possit per similes partes fieri, cum tertia persona ad primam uel secundam per eas reduci non possit. Neque te perturbent subiecta exempla, quæ semper apposita fuerunt in nominatiuo nam & per reliquos casus, præter genitiuum, fieri potest euocatio Per datiuum, mihi Alfonso conuenit per accusatiuum, me Alfonso decet: per uocatiuum, uos discipuli attēdite: per ablatiuum te Petro usus sum familiariter. Per genitiuum minimè, quia hi genitiui, mei, tui, passionē significant, neq; in suū consortium admittere possunt nomina substantiua. Neque enim Latine dicitur, mei Alfonsi refert, sed mea qui sum Alfonsus: ut in impersonalibus copiose est

est à me disputatū. Nisi pluraliter dixeris nostrū utique Romanorum Consulū est hoc aut illud facere.

Quot in euocatione requirantur.

Sunt autē in euocatione necessaria quatuor: persona euocans, quæ semper est prima uel secunda: euocata, quæ semper est tertia: uerbum conueniens cum persona euocante, tanquam cum nobiliori, atq; ita semper uel primæ uel secundæ personæ esse debet: postremò absentia coniunctionis. His tu posses quintam legem addere, ut euocans & euocata eandem rem significant. Vnde in prima & secunda persona fieri euocatio non potest, cum semper ad diuersa pertineant.

Quotuplex sit euocatio.

Duplex est euocatio, explicita & implicita. Explicita est quando tam persona euocans, quàm euocata exprimuntur, ut ego Alfonsus scribo. Implicita ubi euocata exprimitur, euocans uerò subintelligitur, ut Alfonsus scribo. Hoc autem accidere solet, aut in nominibus substantiuis proprijs, ut Calliopius recensui: aut appellatiuis, ut magister ludo. Item in adiectiuis omnis generis, aut uniuersalibus ut omnes ducimur laudis & gloriæ cupiditate: aut distributiuis, ut uterque læsi sumus: præterea in participijs, ut animo suspensi ad te legatum misimus.

Vtrum euocans & euocata eiusdem perpetuò sint numeri.

Persona euocans & euocata plerunque eiusdem

T nu-

Tractatus de Figuris.

numeri esse solent, ut in omnibus exemplis apposis
videre licet. Contingit tamen quatuor modis diuer
forum esse numerorum. Primò quādo idem de se, aut
dignitatis aut emphasis gratia, pluraliter loquitur:
ut nos Philippus Hispaniarum rex imperamus. Se
cundò, cū euocata carent numero singulari ut ego
tua delicia iaceo lecto affixus. Tertiò, cū est no
men collectivum, ut nos populus ab uno homuncio
ne offendimur. Quartò, cū est nomen distributivū,
ut nos uterque lethaliter vulnerati sumus. Illud in
fine notabis, hoc vitij in euocatione esse, quòd verbū
non convenit cum nominativo in persona: nam cū
dico, ego Alfonsus scribo, verbum scribo est primæ
personæ, Alfonsus uerò tertiæ. Excusatur tamen hæc
improprietas, quoniam verbum semper digniori res
pondere debet: prima nanque persona ordine natu
ræ dignior est secundâ, & secundâ tertiâ.

De appositione.

Appositio ab apponendo dicta, quòd in ea unum
substantivum iuxta alterum apponatur, ut urbs Ro
ma. De qua tria nobis edisserenda sunt, Quid sit
appositio, quot requirantur in appositione, quot de
causis fiat.

Quid sit appositio.

Appositio est duorum substantivorum, eiusdē ca
sus, & numeri, quorum alterum declarat alterum,
immediata coniunctio. Hæc definitionem curiosius
explicemus, nam fermè pleraque quæ de appositio
ne præcipiuntur, in ea conclusa sunt. Est immediata
coniunctio. Quia inter apponens & appositum nō
debet

debēt intercedere coniunctio, nam apponens & appositum debent ad eandem rem pertinere, & sic non potest media esse coniunctio, quæ suâ naturâ solet res diuersas coniungere. Nam ineptè & barbarè diceretur, urbs & Roma, fluius & Rhenus posset tamē inter apposita interuenire, ut Maria mater & uirgo. Sed rogabis, quare apponens & appositum debeant eandem rem significare? Respondeo, quia si significarent diuersa, in eodem casu esse non possent, sed in diuerso, ut ars Antonij, liber Ciceronis. Sed contrā, in hac locutione & similibus, amī si filium meæ senectutis baculum, non significatur res eadem, sed diuersa filius enim & baculus diuersissima sunt. Respondeo licet diuersæ sint, si eorum naturā penitiùs contemblemur, per translationem tamen quandam & similitudinem ad eandem rem pertinere, nam quemadmodum tardi & imbecilles senum gressus baculo innituntur, sic etiam patris senectus in filiis, ceu in baculo, sustentatur. Duorum substantiuorum. Quia merè adiectiuorum immediata coniunctio non est Latina, ut doctus bonus, honestus uerecundus. Præterea duorum, & alii quando etiam trium, ut Marcus Tullius Cicero: uerū id non tam frequens est. Eiusdem casus. Quia substantiua in appositione ferè sunt eiusdem casus: à magnis tamen authoribus in diuersis interim casibus ponuntur, perinde quasi ad diuersa pertinerent, ut urbs Patauī apud Virgilium, & urbs Antiochiæ apud Ciceronem. Illud non eget admonitione, posse appositionem fieri per omnes casus: ab

Treatatus de figuris.

exēplis tamen supersedemus, quia uel in fantissimis scholasticis appositionem per omnes casus uariare facilimum fuerit. Et numeri. Nam substantiua eiusdem etiam numeri esse debent, nam non dicimus, flumina Rhenus, urbes Roma. Interdum tamen diuersorum numerorum esse possunt, aut quando alterū substantiuorum caret numero singulari, ut urbs Athenæ: aut est nomen collectivum, ut in eo Ouidij in Heroicis, In me turba ruunt luxuriosa, proci. Itē in eo Vergilij. 4. Georgico. Ignauum fucos pecus à præsepibus arcent. Aut quando apponēs est copulatum, ut Petrus & Ioannes scholastici studiosi. Hoc euenit, quia collectivum & copulatum singularia æquipollent pluralibus. Rogabis, quando duo substantiua in appositione eiusdem casus & numeri esse debent, an debeant etiam esse eiusdem generis? Respondeo minimè requiri, nam & diuersi generis esse possunt, ut canicula signum feruentissimū Alexis deliciæ, proci turba, fuci pecus, flumen Rhenus. Quorum alterum declarat alterum. Nam in appositione sequens substantiuum ferè præcedens declarat ut fratres gemini. Nam (authore Quintilianolib. 9. cap. 4.) si gemini dicam, fratres addere superuacuum fuerit, quod tamen classici authores interim fecerunt, dicentes gemini fratres, Roma urbs, Rhenus flumen, homo animal.

Quot requirantur in appositione.

Tria necessaria sunt in appositione. Dictio apponēs, quæ & exposita & declarata nūcupatur, &

magis communis : per quam prius nomen substanti-
uum intellige. Dictio appposita, quæ & exponens &
declarans & minùs communis appellatur, per quã
posterius substantium intelligitur. Id faciliùs per-
cipies subiecto exemplo, flumen Rhenus. In hac ap-
positione, flumen, dictio est apponens, exposita, &
magis communis, quia & exponitur per dictionem
Rhenus, & plura complectitur quàm Rhenus. At
uerò Rhenus est dictio appposita, declarans, & mi-
nùs communis: quia & apponitur priori substanti-
uò, ipsumq; declarat, & pauciora fluuiorum gene-
ra complectitur quàm flumen, cùm unum tantum
Rhenum significet. Vltimò absentia coniunctionis
necessaria est, ut principio monuimus, quãdo finitio
nem explicabamus.

Quot de causis fiat appositio.

Fit autem appositio tribus de causis. Restrigen-
dæ generalitatis gratia, ut arbor Laurus, fluuius
Rhenus. Item remouendæ æquiocationis causa, ut
leo signum cœleste ardet, lupum piscem non uidit Ita-
lia. Postremò ad proprietatē attribuendam, ut Phi-
lippus uir incredibili uirtute, Carolus homo singula-
ri fortitudine. Sed fortè rogabis, si post duo substā-
tiua sequatur adiectiuum, utri substantiuorum con-
formabitur adiectiuum? Respondeo, frequentius cō-
formari cum dictione appposita, ut Athenæ urbs o-
lim pulcherrima, fucus pecus ignauum, Leo signum
cœleste, Tagus flumen rapidissimum. Quòd si for-
tè à bonis authoribus aliter aliquando usurpatum
uideas, ne mirère, cùm penes eos sit Latine loquen-

Tractatus de figuris.

di norma, & possint id sibi authoritatis assumere.]

Postremò illud notabis, uitium siue improprieta-
tem in appositione in hoc consistere, quia duo substā-
tiua siue coniunctione in eodē casu esse non possunt
in oratione. Excusatur tamē, tum quia duo illa sub-
stantiua ad eādem rem pertinent: tum etiam quia al-
terum, hoc est dictio apposita, uices gerit adiectiui,
sic enim iungitur apponenti quasi adiectiuum, quod
aliquid in substantiuo determinat & exponit, ut ur-
bs Toletum, id est Toletana, urbs Roma, id est,
Romana, urbs Athenae, id est, Atheniensis.

De Prolepsis.

Prolepsis Græca uox est, quæ Latine uertitur præ-
sumptio, siue præceptio, quòd in ea totū ueluti præ-
sumatur, deinde partes à toto deductæ sequantur. De
qua tria nobis disputanda sunt, Quid sit prolepsis,
quot in ea requirantur, quotuplex sit.

Quid sit Prolepsis.

Prolepsis est, attributio proprietatis toti in suas
partes diuiso. Hoc est, quando proprietas (siue ea
uerbum sit, siue nomen adiectiuum) attribuitur to-
ti, quod deinde in suas partes distribuitur: ut Aui-
la uolauerūt, hæc ab ortu solis, illa uerò ab occasu.
Hic proprietas, uolauerūt, attribuitur toti, quod est
auiæ, deinde totū diuiditur in suas partes, quibus
subintellectè attribuitur proprietas. Nam ea est na-
tura proprietatis in prolepsi, ut expressè cōueniat
cū toto, subintellectè cū partibus. Donatus & Dio

medes aliter finiūt. Prolepsis est praesumptio rerum ordine seculari. Id est, quando aliquid in genere praesumitur, quod per partes postea explicatur. Adducunt in exemplum Vergilianū illud ex. 12. AENEID. Interea reges procedunt castris, ingenti mole Latinus, deinde Turnus, mox AENEAS, postremo Aescanius. Hec finitio licet uerbis diuersa sit à priori, re tamen ipsa eadem est cum priori.

Quot requirantur in Prolepsi.

Quinque necessaria sunt in prolepsi. Totū, hoc autem esse potest aut dictio pluralis numeri, ut homines uiuunt, alius in seruitute, alius in libertate: aut nomen collectivum, ut pars Rempub. gubernabant, alij armis, alij consilijs: aut copulatum, ut Petrus & Ioannes turpiter uitam traducunt, alter in auaritia, alter in prodigalitate. Hic obiter aduerteres, totū debere esse plurale, & nominatiui casus, nam si ponatur in genitiuo, non prolepsi sproprie, sed partitio erit, cum proprietates non conueniant cū toto: ut humani generis, pars corpus excolit, pars animum. Deinde requiruntur partes, hę autem debent contineri sub toto, id est, debent esse eiusdē speciei cum toto: nam si sint diuersę, non erit prolepsis, ut aquilę uolauerunt, coruus ab oriente, columba ab occidente. Præterea distributio partium, id est, quod partes exprimantur: nam si subicerentur, non esset propria & germana prolepsis. Tū proprietas, quę aut uerbum, aut nomē adiectiuum, aut participium esse potest. De uerbo sit exemplū. me tuunt ambo, hic dominum, ille magistrum: de nomi-

Tractatus de figuris.

ne, periti sunt, hic pilæ, ille alex: de participio, instructi sunt, hic in Grammatica, ille in Rhetorica. Postremò requiritur ordo, nā totum debet semper procedere, deinde partes subsequi.

Quotuplex sit prolepsis

Duplex est prolepsis, explicita & implicita. Explicita est, in qua illæ quinque leges necessario requiritæ reperiuntur. Implicita uerò, cui aliqua deest conditio. Fit autē implicita tribus modis. Primò, quādo intelligitur totum, ut studemus, tu Grammaticæ ego Philosophiæ: hic intelligitur totum, nos, in studemus. Secundò, quando intelliguntur partes, ut homines inuident, alter alteri: hic deest altera partium, & alter alteri. Tertiò, quando nec totum, nec partes exprimuntur, ut curemus æquā uterq; partem: hic totum, nos. subintelligitur, & partes alter & alter includuntur in distributino uterq;

Varia prolepsis genera.

Præter hæc, est & aliud prolepsis genus, cum id quod posterius accidit: ante tēpus describitur. Quale est illud Vergilij, Lauinaq; uenit littora: Lauiniū enim nōdum erat, cum in Italiam uenit Aeneas. Et apud Sallustiū Montem Sacrum & Auentinum in sedit: qui mōs ob hoc quòd illum plebs infederat, postea Sacer dictus est. Est & aliud genus prolepseos, cum id quod in aduersarij aut iudicis opinione esse aut fore arbitramur cōtrariū nobis præoccupamus dicere, & cū ratione dissoluere. Hac forma prolepsis utūtur rhetores in exordijs potissimū: sed nos ab huiusmodi generibus prolepsis supsedemus, quia
non ad

non ad Grāmaticos sed ad Rhetores spectāt, neq; inter figuras constructionis, sed elocutionis, aut sententiarum numerantur.

Vltimò obseruabis, uitiū esse in prolepsi in hoc quia proprietas non conuenit cum partibus. Sed excusatur, quia conuenit expresse cum toto, quod est suis partibus nobilius, subintellectè uerò cum partibus. Præterea etiam excusari potest summorum uirorū autoritate, quos per prolepsim locutos fuisse sæpissimè deprehendimus.

De Syllepsi.

Syllepsis Græcè, Latine sonat cōceptionem. Sic autem est appellata, quòd in ea numerus numerum, persona personam, casus casum, genus etiam concipiat genus. De hac tria in disputationē uocemus necesse est, quidnam sit, quot modis fiat, quot ad syllepsim requirantur.

Quidnam sit Syllepsis.

Antequàm syllepsis finitionem tradamus, duas regulas obseruetis necesse est, apprimè ad rē præsentem necessarias. Quarum prior est. Copulatum per coniunctionem, Et, Atque, Que, & per præpositionem, Cū, pro & captam, est pluralis numeri: quare uerbum, aut adiectiuum quod eis apponitur, plurale erit. Vno tantum exēplo uariato, præceptionē ueram esse cognoscetis. Ego & frater ualemus, ego atq; frater ualemus, ego fraterq; ualemus, ego cū fratre ualemus. Posterior regula est: Copulatū pluralis numeri, est illius personæ & generis, cuius est pars dignior. Dignior autem est persona prima quàm
secun

Tractatus de figuris.

secunda, & dignior secunda quàm tertia, dignius masculinum genus quàm fœmininum: & fœmininū quàm neutrum. Quocirca cū copulatum est prima persona & secunda, totum fit primæ personæ, ut ego & tu studemus. Cū secunda & tertia, totum fit secundæ, ut tu & frater studetis. Præterea cū copulatum fit ex masculino genere & fœminino, totum fit masculini generis, ut rex & regina iustissimi. Cū ex masculino & neutro, fit etiam masculinum, ut dominus & mancipia pugnaces. Cū ex fœminino & neutro, totum fit fœminini generis, ut leges & plebiscita coactæ. Præter hoc, non est aliud simile exemplum: usus nanque authorum obtinuit ut per neutrum loquamur, ut paulò inferiùs patebit.

His in hunc modum prælibatis, sine quibus sequentia intelligi facile non possent, definiamus syllepsin. Syllepsis est, discontinuata siue interrupta diuersarum dictionum sub plurali proprietate conceptio. Discontinua siue interrupta. Quia inter dictionem concipientem & conceptam debet esse media coniunctio siue expressa, ut, Et, Que, Atq;: siue subintellecta, ut Cum pro &. Diuersarum dictionum. Nam concipiens & conceptum res diuersas significare debent: nam si idem significant, nulla erit Syllepsis, ut corpus & anima Ioannis sunt Ioannes. Sub plurali proprietate, quia cū copulatum æquipolleet plurali, proprietate siue ea uerbum sit, siue nomē adiectiuum, siue participium, debet esse necessario pluralis. Alij aliter Syllepsin finiūt

Sylle -

Syllepsis est indignioris ad dignius adiunctio. Quæ finitio ex præcedentibus intellectu facillima est.

Quot modis fiat syllepsis.

Fit Syllepsis quatuor modis. Primū, in genere, quando genus masculinum concipit foemininum, ut rex & regina fortunati: aut foemininum neutrum ut in eo exemplo superius à me adducto, lex & plebs cita coacta. Hi: unum notabile, quando substantiva in conceptione generum res inanimes significant, tunc adiectivum quod eis adiungitur, elegantius & usitatus soleriponi in neutro genere: ut calceus & subucula sunt detrita, calamus & atramentum sunt scribenti necessaria: item in sacris, uirga tua & baculus tuus ipsa me consolata sunt. Porro conceptio generis duplex est, explicita & implicita. Explicita est, in qua genus concipiens et conceptum exprimuntur, ut exemplis superioribus patere potest. Implicita uerò, in qua nec concipiens, nec conceptum genus explicantur, sed de mare atq; foemina perinde loquimur, ac de solo mare: ut si dixerim, uterque est formosus, loquens de sponso et sponsa. Hæc autem quinque modis fieri solet. Per distributivum, ut uterq; sunt probi (semper debet de uiro et foemina fieri locutio) per particulare, ut alter horum loquitur: per demonstrativum, ut hi sunt christiani: per questivum siue interrogativum, ut quis horum sexum mentitur? per substantivum, ut Latona peperit geminos, Apollinem scilicet et Dianam. Secundò, in numero, quando pluralis numerus

Tractatus de figuris

merus concipit singularem, ut milites & imperator fortissime pugnauerunt. Simile est illud Vergilianum in Bucolicis Ecloga prima, sunt nobis mitia poma, castaneæ molles, & præsicopia lactis. Tertio, in persona, cum prima secundam & tertiam, & secunda tertiam concipit: ut ego & tu deambulamus, ego & ille deambulamus, tu & ille deambulatis. Quarto, in casu, cum nominatiuus comprehendit ablatiuum cum præpositione, Cum, ut, Virg. primo Aeneid. Remo cum fratre Quirinus iura dabunt: id est, Quirinus & frater Remus. Et hæc dicitur à Gramaticis conceptio indirecta, cum uidelicet rectus concipit obliquum: erit autem directa, quando rectus rectum concipit, quod contingit, quando fit copulatio per Et, Que, Atque.

Quot requirantur in Syllepsi.

Requiruntur quinque in syllepsi, dictio concipiens, quæ dignior est genere, numero, & reliquis accidentibus. Dictio concepta, quæ his omnibus indignior est. Copulatiua coniunctio, sub qua intellige, Cum, copulatiue sumptam. Proprietas, per quam intellige aut uerbum, ut ego & tu diligenter Ciceronem uersamus: aut nomen adiectiuum, aut participium plura alia, ut sponsus & sponsa uerecundi, frater & soror bonis moribus instructi. Postremo quod proprietas concordet cum dictione concipiente.

Tandem notabis syllepsi hoc inesse uitij, quod aut uerbum non conformatur cum recto, aut adiectiuam non respondet substantiuo in debitis accidentibus. Sed

excusatur, quia copulatum equipollet plurali, & est eius generis & personæ, cuius est pars dignior.

De Zeugmate.

Zeugma Græca uox est, quæ Latine representat colligationem, adiunctionem, siue copulatū: quod in Zeugmate duæ diuersæ clausulæ per unam proprietatem (siue ea uerbum sit siue nomen adiectiuū siue participium) colliguntur, coniunguntur, atque in unum ueluti conglutinentur. Hoc autē fit, ne crebra eiusdem uerbi repetitione legentium animis fastidium ingeneretur. De Zeugmate igitur quatuor adducenda sunt in quæstionem. Quidnā sit, quot modis fiat, quot ad eam figuram requirantur, & quot sint eius species.

Quid sit Zeugma.

Zeugma est unius proprietatis, uiciniori respondentis, ad diuersa reductio: ad unum quidē expresse, ad alterum per supplementum. Hæc finitionem diligenter exponamus: sunt enim multa, nec uulgaria illa quidem, in ea conclusa.

Vnius proprietatis reductio. Id est, repetitio unius uerbi, uel adiectiui, uel participij: id enim debet per proprietatem intelligere. De uerbo sit exemplum. Erraui ego, & multi: ubi idem uerbum ad diuersas clausulas repetitur. De adiectiuo, maritus & uxor formosa. De participio, cœli mouēdi sunt, & terra. In utroque fit siue adiectiui, siue participij ad diuersa repetitio. Viciniori respondentis. Nam in Zeugmate semper proprietates debet uiciniori respondere

Tractatus de figuris

ponderare: ut ego scribo, & tu, & Cicero: ego & tu scribis, & Cicero: ego & tu, & Cicero scribit. Tribus tamen modis potest remotiori supposito respondere, aut quando est in oratione particula similitudinis, ut ego, sicut fœnum, arui: aut comparationis, ut ego melius quàm tu scribo: aut exceptionis, ut nulla, nisi tu, talem filium pareret. Ad unum expresse, ad alterum per supplementum. Quia in Zeugmate proprietas propinquiori supposito expresse conuenit, remotiori uerò per sabintellectionem quãdam, ut in subiectis exemplis uidere licet.

Ex finitione colliges tres esse differentias inter Syllepsin & Zeugma. Prima est, Quia in syllepsi attenditur dignitas, cum in ea sit proprietatis cum digniori conformatio: in zeugmate propinquitatis, cum proprietas propinquiori respondeat. Secunda, proprietas in syllepsi omnibus suppositis ita coniunctim attribuitur, ut uniuersa ab una proprietate simul concipiantur: in Zeugmate uerò singulis distinctim atq; diuissim reddatur oportet. Tertia, In syllepsi proprietatis necessario pluralis esse debet: in zeugmate uerò aliquando singularis, aliquando etiam pluralis, ut uos peccauistis & ego. Hæc omnia attentius considerent publici professores, nam hic uideo quàm plurimos Grammaticos cœcutire, qui cum tanta inter syllepsin & zeugma intercedat similitudo, uix sciunt discernere, quidnam sit inter utranque discriminis.

Quot modis fiat zeugma.

Tribus modis fit zeugma. In persona, ut ego &

tu

tu uiuis. In genere, rex & regina est irata. In numero, Cicero in Catilinam, Nihil ne te hic mimitissimus senatus habēdi locus, nihil horū ora, uultusq; mouerūt? si queras an fieri possit zeugma per casus obliquos? Respondco fieri posse, non secus atq; per rectum, ut memor ero tui, & patris: patrocinator tibi & patri: non tantum te diligenter instruam, sed & fratrem & discipulos omnes, Idē de reliquis obliquis dictum uolumus.

Quot requirantur in zeugmate.

Requiruntur tria in zeugmate. Plura substantiua. Copula, quæ esse potest copulatiua, ut ego et frater in studio literario desudat: disunctiua, ut soluā tibi, uel frater meus: continuatiua, ut remisse ego laboraui, tu autem uehementer: exceptiua, nullus studet, nisi ego. Fit etiā per aduerbia, ut cubas ubi ego cœnas quando nos. Ultimò, Proprietas quæ cōueniat cū propinquiore substantiuo. Monui iam in finitione explicanda, per proprietatem, aut uerbum, aut adiectiuum. aut participium intelligi debere.

Quot sint species zeugmatis.

Tres sunt zeugmatis species. Protozeugma, quando proprietas ponitur in principio, ut ego dormio, & tu & frater. Mesozeugma, quando in medio, ut ego & tu dormis, & frater. Hypozeugma siue Hysterozeugma, quando in fine, ut ego & tu & frater dormit. Est et aliud genus zeugmatis, quādo eadem proprietas nō inmutata cum diuersis suppositis conuenit, ut nihil te horum ora, nihil uultus mouerunt: ubi uerbum. mouerunt, ad diuersa reducitur

Tractatus de figuris.

etur supposita sine ulla immutatione. Ioannes fuit piscator, ut Petrus: ubi uerbum, fuit, in nullo immutatum ad diuersa repetitur, uerum hoc genus zeugmatis elocutionis est, non constructionis.

Illud tandem addamus, uitium in zeugmate contra concordantiā nominatiui cū uerbo, adiectiui cū substantiuo esse. Verū excusatur, quia proprietas conuenit cum propinquiori expresse, cum remotiori uerò per supplementū: atque ita tamen Poëtis quàm Oratoribus permittitur.

De Antiptôsi.

Antiptôsis Latine sonat, casus pro casu positionem, dicta est enim ab anti particula, quæ pro significat aliquando, & ptôsis casus, quasi casus pro casu positio. De qua duo tantum breuiter expedienda sunt, quid sit, & quot in ea requirantur.

Quid sit Antiptôsis.

Antiptôsis est casus pro casu positio, sub aliqua proprietate. Duas partes cōplectitur definitio. Prior est, casus pro casu positio: ut urbem, quam statuo, uestra est, pro urbs. Sermonem quē audistis, non est meus, pro sermo. Quod si in his & similibus locutionibus relatiuum præcederet antecedēs, nulla fieret antiptôsis, sed sermo esset omnis elegantiæ et lepôris plenus: ut quam urbem statuo uestra est: quem sermonem audistis non est meus. Huius autem dissimilitudinis ratio est, quia in prioribus locutionibus antecedens & relatiuum à diuersis reguntur uerbis, in posterioribus uerò ab eodem, atque inde fit, ut alibi fiat antiptôsis, alibi non. Hic unum
notes

notes oportet, antiptôsin fieri posse per omnes casus. Per nominatiuum, id ætatis, pro eius ætatis: saluæ primus omnium parens patriæ appellate, pro priore. Per genitiuum, cum illius diei mihi uenit in mentem, pro ille dies. Per datiuum, Inferretq; Deos Latio, pro in Latium. Per accusatiuum Teren. in eunacho, Eunuchū, quē dedisti nobis, quas turbas dedit, pro Eunuchus. Per uocatiuum, Persius. Satyra 3. Censoremq; tuum uel quod Trabeate salutas? pro Trabeatus. Per ablatiuum, hæret pede pes, pro pedi. Posterior pars finitionis est, sub aliqua proprietate. Per proprietatem intellige uerbum, cuius gratia fit, ut casus pro casu ponatur.

Quot in Antiptôsi neces-

saria sint.

Requirantur tria in Antiptôsi. vnum subiectum, quod substantiuū esse solet, et in diuerso casu, quam ratio uerbi postulabat, collocari. Vna proprietas, quæ communiter uerbum est. Et quod casus ponatur pro casu.

Vitium in antiptôsi, est contra naturalem uerborum constructionem, quæ cum sua natura certum determinatumq; casum regant, casus ille per antiptôsin in alterum mutatur. Excusatur tamen, quia casus ponitur pro casu. Neque existimes licere tibi in omnibus uti pro arbitrato hac figura, sed in ijs tantum, in quibus possis tuam audaciā excellentium uirorum authoritate purgare.

De Synthesi.

V

Syn.

Tractatus de figuris.

Synthesis græce, latine interpretatur *compositio*, à *syn*, id est, cō, & *thesis* positio: quia est compositio quadam non uoce, sed significatione congrua. De hac tria discutienda nobis sunt, Quid sit, quot modis fiat, & quot sint ad *Synthesin* necessaria.

Quid sit *Synthesis*.

Synthesis est, attributio proprietatis uni uel pluribus copulatis, non gratia uocis, sed significati. Singulas partes finitionis expendamus. Attributio proprietatis uni Hoc est, quando proprietas uni tantum attribuitur, ut, O uere digna hostia, per quem fracta sunt tartara. Hic proprietas quem, attribuitur uni tantum Christo contento sub hostia. Vel pluribus copulatis. Nam aliquando proprietas non uni tantum attribuitur, sed pluribus, qui sub una uoce continentur, ut pars infrusta secant. hic proprietas secant, pluribus attribuitur, qui sub ea uoce, pars, conclusi sunt & copulati. Non gratia uocis, sed significati. Quia in hac figura nulla habetur uocis ratio, sed tantum significatus, atque inde procedit apparens illa incongruitas. Alij finiunt in hunc modum. *Synthesis* est oratio non uoce, sed significatione congrua. Quæ finitio multò magis perspicua est.

Quot modis fiat *Synthesis*.

Fit autem *Synthesis* tribus modis. Primò, in genere tantum: idq; aut sexus discernendi causa, ut anser foeta, elephanta grauida: aut supplementi causa, ut Præneste sub ipsa, scilicet urbe, Centauro in magna, supple nauis. Secundò, in numero tantum, ut

tur-

turba ruunt, utraq; formosæ: Tertiò, in genere & numero simul, ut gens armati, pars merfi, turba proterui.

Ex his colliges, Synthesin pugnare planè contra tria concordantiæ præcepta, nominatiui scilicet & uerbi, adiectiui & substantiui, relatiui & antecedentis. Fit primò Synthesis in nominatiuo & uerbo, per nomen collectivum, ut pars secant, ingēs hominum frequentia conueniēre. Tum per nomen distributivum, ut uterque insaniunt, pro salute quisque pecunias contulere. Deinde per particulare (quod rarius est) ut aperite aliquis ostium. In his omnibus, nominatiuus cum uerbo non concordat in numero. Fit etiam Synthesis in adiectiuo & substantiuo. Distinguendi sexus gratia, ut anser foeta Supplemēti causa, ut Eunuchus Terentiana, scilicet comœdia aut fabula. Ratione nominis collectiui, ut maxima pars uirgis cæsi, ac securi percussi sunt. Ratione distributiui, ut uterque missi sunt magnis rebus legati. Aut quando cōcretum sumitur pro abstracto, ut Teren. in Eunucho, Postquā ille scelus ludificatus est: scelus pro scelerato. In his omnibus, adiectiuum discordat à substantiuo in genere aut in numero. Fit postremò Synthesis in relatiuo & antecedenti modis etiam quinque. Primò, discretionē sexus, ut anser quæ incubat ouis. Secundò sub auditione, ut species est, quod prædicatur: scilicet uniuersale. Tertiò, collectione, ut pars qui uehebantur equis. Distributione, ut uterque occisi sunt, qui graues simultates gerebāt. Aut quādo fit relatio ad

• Tractatus de figuris

abstractum, non ad cōcretū. Teren. in andria, Vbi est ille scelus qui me perdidit, scel⁹, id est nimiū sceleratus. In his omnibus relatiuum discordat ab antecedenti in genere, aut in numero. De quib⁹, sat is copiose differuimus in tractatu de cōcordantia: libuit tamen hic eadē obiter repetere, ne quicquam huic figuræ necessarium silētio prætermisisse uideremur.

Quot spectanda sint in synthesi.

In Synthesi requiruntur tria. Vnum subiectum uel plura copulata: per quæ intelliges nomina substantiua. cum quibus proprietas cōcordat in significato, non in uoce. Proprietas, per quam intellige aut uerbum, ut pars secant: aut nomen adiectiuum, utraque formosæ: aut participium, pars uulnerati: aut relatiuum, pars qui uehebantur equis. Postremò necessarium est, ut proprietas cum subiecto aut copulato conueniat, non in uoce, sed in significatione.

Vitium est in Synthesi cōtra tria concordantiæ præcepta sed excusatur, tum ratione, quia in ea attenditur nō uox, sed significatio: tum etiā Poëtarum & Historiographorū authoritate, quos ita locutos fuisse passim legimus.

De synecdoche

Synecdoche interpretatur comprehensio, quia in ea id quod est partis, attribuitur toti, & quodammodo sub toto comprehenditur. Huius tria erunt tantum præcepta: quid sit, quot sint ad eam constituendam necessaria, quotuplex sit.

Quid sit synecdoche.

Synecdoche est, attributio partis ad totum sub-
propriete uerbi, uel participii, uel nominis ad-
iecti-

sectiui. Duo membra continet præsens finitio. Prius est, *Attributio partis ad totū*. Hoc est, cum id quod partis est, attribuitur toti: ut *AEthiops albus dentes*: hic album quod solis dentibus conuenit, toti attribuitur *AEthiopi*, posterius est, sub proprietate uerbi, uel participii, uel nominis adiectiui. Hoc adiectum est, ut intelligas hanc figuram tantum fieri per has tres orationis partes, uerbum, participium, nomen adiectiuum. Per uerbum, aut neutrum aut passiuum, ut *micat auribus*, expleri mentem nequit. Per participium, ut *nodoq; sinus collata fluentes*. Per adiectiuū, ut *niger oculos*. Resoluntur huiusmodi locutiones per uerbum habeo, aut per habens participium inde deductum,

**Quot sint in synecdoche
necessaria:**

Quatuor requisita sunt in *Synecdoche*. *Totum*, quod nomen substantiuum esse solet in recto appositum. *Proprietas*, quæ (ut in diffinitione explicatū est) uerbum, aut nomen, aut participium esse potest. *Pars*, quæ secundum poëtas semper in accusatiuo ponitur, ut *eger pedes*, *saucius frontem*: secundum uerò *Historicos*, quos nobis hac in re ad imitationē proponere debemus, in ablatiue, ut *eger pedibus*, *saucius fronte*. Postremò requiritur, ut proprietas cum toto conueniat, cum parte minimè, ut *horridus barbam*: hic, *horridus* cum toto conuenit, non cum *barba* quæ pars est.

Quotuplex sit Synecdoche.

Est autem duplex Synecdoche, constructionis, &

Tractatus de figuris.

locutionis. Rursus quæ constructionis est (de qua in presentia est sermo) duplex est, directa & indirecta. Directa est, quando pars quæ regitur à toto, est propria totius, ut ex superioribus exemplis liquidò constare potest. Indirecta uerò est, quādo pars quæ à toto regitur, totius propria non est, ut albus uestes, uestis enim non est, pars totius. Locutionis est, quæ in elocutione tantum spectatur. Hæc autem sex modis fit. Primò cum ex uno plures intelligimus ut Romanus prælio uictor pro Romani, Pœnus fugatus pro Pœni. Secundò, cum pars sumitur pro toto, ut mucro pro gladio, tectum pro domo. Tertiò cum totum pro parte Fontemq; ignemq; ferebant, pro parte aque & ignis. Quartò cum species pro genere: iracundior Adria, pro quouis mari. Quintò cum materia pro re ex ea cōfecta utis ferrū pro gladio, abies aut pinus pro navi. Sextò cum ex præcedentibus intelligimus sequētia: subdidit equo calcaria, id est cucurrit. Breuiter, cum quocunq; modo aliud ex alio intelligitur: uixerūt pro mortui sunt. Nos quoque floruimus & fuimus Troës: id est. floridæ fortunæ nostræ deciderunt, & uires nostræ calamitatibus fractæ, & infortunis attritæ sunt.

Vitium in Synecdoche illud esse apparet, quod cum id quod est partis, tribuatur toti, totum tamen non regit partem, aut in genitiuo aut in ablatiua, in quibus solet, sed in accusatiua. Excusatur Poëtarum authoritate, apud quos non infrequens est huiusmodi locutio: quare & nobis etiam in carmine simili dicendi figura utilicebit. Atque de figuris cō-

stru-

structionis hæc quidem satis.

In his omnibus placuit non nimis compendiosa aut effœminata, sed plena ac nervosa uti disputatio ne. Sunt enim quidam adeò molles, delicatuli, & sui ipsorum indulgentes, ut neglecta graui rerum tractatione, compendiolis quibusdam delectentur: quæ ego existimo ab hominibus otiosis, oscitabundis, ignavia ac socordie mancipatis in studiosorum perniciem & bonorum ingeniorum corruptelam (quantum cunctu patuit) excogitata fuisse. Video enim non tantum humaniora, sed Theologica etiam studia, non leue damnū fecisse, postquam à Germanis leui ac suspensa manu tractari cœperunt. Qui ut ad nocturnam diurnaque crapulam, & libidinem corporis explendam spatium aliquod temporis superesset, huiusmodi inuenerunt cōpendia: ex quibus (proh dolor) non literarum tantum omnis generis, sed religionis, ac Dei rerū omniū præpotentis & diuorum cultus grauissima consecuta sunt dispendia. Nullus igitur audeat nostros de Syntaxi & Prosodia commentarios, aut præsentem hunc tractatum prolixitatis aut superfluitatis posthac insimulare. Neque enim ea prolixa dicenda sunt, aut nimis longa, sine quibus materia esset ac mutila susceptæ materiæ disceptatio: neque superuacua, sine quibus puerorū & studiosorū adolescentium animi adeò ieiuni, sicci, & steriles redderentur, ut nullam quotidiani laboris mercedem, nullos studiorum fructus sibi in posterum referre possent.

FINIS.

